

პატრი
სტორია
კრიტიკა

ფეცუ დგებუაძე-ფუნდარია



პეტრული
საგომთა
კომპანი



ფუსუ
ღებებუაძე
ფულარია

თქაროს
ბეჭედი

„მარანი“ თბილისი

1989

საინტერესო და მრავალმხრივია ქართველი საბჭოთა მწერლის ფუცუ
ღვებუაძე-ფულარიას ლიტერატურული მემკვიდრეობა. მისმა მოთხრობებ-
მა, ნოელებმა, ნარკვევებმა, მოგონებებმა და რომანებმა იმთავითვე მიიქცია
ქართველი მკითხველის ყურადღება.


ისტორიულ რომანში „ოქროს ბეჭედი“, რომელიც მწერლის უმნიშე-
ნელოვანესი ნაწარმოებია, ასახულია სამეგრელოს წარსული.

**შემდგენლები: გურამ გვირდვინიძე
გურამ შანგიძე**

რედაქტორი გენო კალანდია

გამომცემლობის რედაქტორი ლალი თურბანდიაშვილი





აფხაზეთის მთავარი

აფხაზეთის მთავრის მიხეილ შერვაშიძის სასახლე სო-
ზუმის ცენტრალური მოედნიდან ამაყად გადაჰყურებდა მზის
სხივებით ალივლივებულ ზღვას. სასახლის ფანჯრები ღია
იყო. ზღვის ნიავეს სასახლეში სიცოცხლე და ხალისი შემო-
ჰქონდა.

მიხეილი თავის სამუშაო ოთახში იჯდა, სტუმარს ხან
ქართულად, ხან რუსულად დინჯად და საქმიანად ელაპარაკე-
ბოდა. სამუშაო ოთახის გვერდით, მისაღებში, იხდნენ დიდი
ნიკოს შვილის — გიორგი დადიანის ქალიშვილები. ერთი მათ-
განი ალექსანდრა, შინ ცუცუდ წოდებული, მიხეილ შერვაში-
ძის მეუღლე, ხოლო მეორე, მისი უმცროსი და, გაუთხოვარი
მაია, რომელიც დასთან სტუმრად ჩამოსულიყო. და და სიძე
დიდი სიყვარულითა და პატივით ეპყრობოდნენ მაიას, უნდო-
დათ სულ თან ჰყოლოდათ, ყოველ შემთხვევაში, ამ გაზა-
ფხულსა და ზაფხულზე მაინც. დები ამ წუთს ხელსაქმით
იყვნენ გართული, ყური კი მიხეილის სამუშაო ოთახისაკენ
ჰქონდათ მიპყრობილი. ცუცუმ იცოდა, თუ ვის ესაუბრებოდა
მისი მეუღლე მიხეილი.

მუდამ თავდაჭერილი მაია უცნობის ზავერდოვანმა ხმამ
მოხიბლა.

— ცუცუ, გენაცვალე, ვინ არის ეს კაცი, რა მშვენიერი
ხმა აქვს?

— შენ მას არ იცნობ. ის ჩვენი შორეული ნათესავია, სა-
მეგრელოს მთავრის ლევან დადიანის ქალიშვილის — პუპის
ვაჟი.

— ახ, ვიცი, ვიცი, ის ხომ შარშან ზაფხულზე კურზუში
იყო სანადიროდ, შემდეგ პეტრე ბიძიას სახლშიც გამოუვლია,
მამა შემთხვევით იყო იქ, ჩვენთანაც აპირებდა თურმე ჩამოს-
ვლას; მაგრამ არ მოუხერხდა, რადგან რუსეთში მიეჩქარებოდა.
მამა გულდაწყვეტილი დაბრუნდა, ძლიერ აქებდა ამ ვაჟს.

— მართლაც საქებია. მშვენიერი, თვალტანადი და თანაც ძლიერ განათლებული.

— სად იყო ეს კაცი ამდენ ხანს? — შეეკითხა მაია დას. — რა ნათესავია ჩემი სიძისა?

— ალექსი მამით შენი სიძის მკვიდრია, დედიტაც ჩვენი შორეული ნათესავია.

— მგონი არც ისე ახლობელი. საზოგადოდ ქართველებმა ერთობ დიდი ნათესაობა ვიცით.

მაია ხუმრობდა, მაგრამ ცუცუ ამ საკითხს ღრმად ჩაუფიქრდა, დას სერიოზულად უპასუხა.

— იცი?... ხუმრობა იქით იყოს და მას ცოლად რომ გაჰყვე, ურიგო არ იქნება. მე ძალიან მომწონს ალექსი. მარტო იმიტომ კი არა, რომ კარგი დედ-მამის შვილია და უაღრესად განსწავლული, ეს ზომ არის და არის. ამასთან ერთად, თავაზიანი და ფაქიზი ადამიანია — თავისი ქვეყნის პატრიოტი, შორსმჭვრეტელი, გონებამახვილი. თავისებური ბიოგრაფიაც აქვს. ბავშვობიდან რუსეთში იზრდებოდა. ალექსის ბავშვობისას აფხაზეთში თავი იჩინა არეულობამ. ამ არეულობის დროს მას ბაბუა მოუკლეს. ალექსის მამა იძულებული გახდა ბავშვი საიმედო ადგილას გაეხიზნა. ასეთ ადგილად მან პეტერბურგის ერთი შეძლებული, განათლებული ოჯახი მიიჩნია და იქ ჩაიყვანა თავისი შვილი აღსაზრდელად. იშვიათად ჩამოჰყავდა ალექსი აფხაზეთში. დედამისი, პუპი, ყოველნაირად ცდილობდა ბავშვს აფხაზეთი ენა არ დაეიწყებოდა. როცა კი თავისი პირმშოს ნახვის საშუალება მიეცემოდა, საათობით აკითხებდა სხვადასხვა წიგნს, ხან კი სთხოვდა რუსული მწერლობის ნაწარმოებები ქართულად მოეთხრო. ალექსიც გულმოდგინედ ვარჯიშობდა. პუპის მიწერ-მოწერაც ჰქონდა ალექსის აღმზრდელებთან. თუმცა აღმზრდელებს არ სჭირდებოდათ პუპის თხოვნა, ისინიც არა ნაკლებ ცდილობდნენ ბავშვს მშობლიური და ქართული ენა არ დაეიწყებოდა. ეს ოჯახი მოწინავე იდეებით იყო ცნობილი. ალექსის აღმზრდელებს კეთილმეგობრული დამოკიდებულება ჰქონდათ რუს დეკაბრისტებთან. ამ ოჯახმა და მისმა წრემ იცოდა რა მიზეზით იყო ალექსი რუსეთში გახიზნული. ბავშვს სათუთად ექცეოდნენ, იცოდნენ თუ როგორ დათარეშობდნენ პატარა ალექ-

სის სამშობლოში თვითმპყრობელობის დამქაშები, როგორ აქცევდნენ კავკასიას მეფის რუსეთის კოლონიად. ალექსი იმ ოჯახმა შეიღვივით შეიყვარა და, ბოლოს სწავლადამთავრებულს, თავისი ერთადერთი ქალიშვილი მიათხოვა.

— მაშ, ცოლიანია?! — გაკვირვებით იკითხა მაიამ და გაიცინა. — მე კი მისმა ხმამ მომხიბლა. არ გაპაცნოთ, თორემ მეშინია, რომ შემიყვარდეს ცოლიანი კაცი.

— შენ ადვილად ვინმე შეგიყვარდება? — დიას, იმას ვამბობდი, წუხდა პუპი და ვაჟს ხშირად უსაყვედურებდა:

— ერთადერთი ვაჟი მყავდი, შვილო, მინდოდა ქართველი ქალი შეგერთო. შენი შვილები ქართულ ენას ვერ ისწავლიან, დედისერთა ქალს აქეთ არ გამოგატანენ.

— ნუ სწუხარ, დედა ბატონო, შვილებს აფხაზურსა და ქართულს არ დავავიწყებ. ქართველ მასწავლებელს მივუჩენ... ადამიანი რაც უფრო მეტ ენას ფლობს, მით უფრო განათლებულია. ჩვენს ქვეყანას კი განათლებული ხალხი ბლომად სჭირდება, — ეტყოდა შვილი.

არ დასცალდა ალექსის თავისი ოჯახის ისე მოწყობა, როგორც სურდა. ქორწინების მეხუთე წელს ახალგაზრდა მეუღლე გარდაეცვალა, ხოლო პატარა ბიჭუნა დედუღეთში იზრდებოდა. თვითონ, საზოგადო საქმეებით გართულს, მეორე ცოლის შერთვა ფიქრადაც არ მოსდიოდა. დღენიადაც იმ იდეების განხორციელებაზე ფიქრობდა, რომლებიც რუსეთში მოწინავე ადამიანთაგან ჰქონდა შეთვისებული.

ალექსი ხშირად დადიოდა საქართველოში, ხვდებოდა მიხეილს, ნახულობდა აგრეთვე თავის ბაბუა ლევანს და მეგობრობდა ბიძებს, განსაკუთრებით გრაგოლს, რომელთანაც დაახლოებამ კიდევ უფრო გაადვივა მასში პატრიოტული გრძნობები. ახლო გაიცნო გიორგი, ბესარიონი და პეტრე დიანები. მოიარა სამეგრელო, იმერეთი, გურია, გაეცნო ამ კუთხეების ეკონომიურ და პოლიტიკურ მდგომარეობას.

— ეს უბრალო კაცი არ ყოფილა, ბატონო ჩემო! — დინჯად თქვა მაიამ.

ამ დროს დებს მიხეილის ოთახიდან ხმამაღალი ლაპარაკი მოესმათ.

ღები სმენად გადაიქცნენ და აი რა გაიგონეს:

— ჩვენ არ ვვარგევართ მმართველებად, ბატონო მიხეილ! მე გაეკადნიერდები და გულახდილად მოგახსენებთ: აფხაზეთის ძალ-ღონე უმთავრესად თავადების ერთმანეთისადმი მტრობასა და შურისძიებაზე იხარჯება. მთელი დასავლეთ საქარსველო მოვიარე და დავრწმუნდი — ჩვენი კუთხე ყველაზე უფრო ველურად გამოიყურება. ეს იმით აიხსნება, რომ აფხაზეთს საუკუნეების მანძილზე განუკითხავად აჩანაგებდა ოსმალეთი; ახლა ხდება საქართველოსა და მისი კუთხეების საკითხის ახლებურად გადაჭრა.

— ეს ახალი ვზა სწორედ, — განაგრძობდა ალექსი, — ჩვენთვის ყველაზე სასიფათოა. თვითმპყრობელი მეფე უკვე შეუდგა ჩვენი ხალხის ეროვნული გადაგვარების საქმიანობას; შავი ზღვის სანაპიროზე თანდათან ნადგურდებიან მკვიდრი მცხოვრებნი, მათ მამა-პაპულ ადგილ-მამულს რუსეთის მეფის მოხელეები ინაწილებენ. ალბათ, ის ხმებიც გამართლდება, რომ აქ კაზაკ-რუსების დასახლებას აპირებენო. ასე რომ, სულ მალე, ეს მხარე მეფის რუსეთის კოლონიად გადაიქცევა.

— მმართველად არ ვვარგევართო, მეუბნები, შე დალოცვილო, თუ არაფერს გვკითხავენ, როგორ ვივარგებთ. იცი, ალექსი, ზშირად ვფიქრობ იმაზე, რომ საქართველოში ერთ-ერთი მიმდინარეობა, რომელსაც სწავლული ადამიანებიც კი იზიარებენ, სწორია.

— ახლა იმდენი საზოგადოებრივ აზრთა მიმდინარეობა გაჩნდა, არ ვიცი, რომელზე მეუბნებით, მიხეილ.

— რადიკალებზე მოგახსენებთ, რომელნიც ფიქრობენ: საქართველო უკვე იმდენად ძლიერია, რომ შეძლებს რუსეთის ქვეშევრდომობიდან თავი გაითავისუფლოსო.

— მივხვდი, რომელ ჯგუფზე ლაპარაკობთ, მაგრამ ნუ დაგავიწყდებათ, რომ ამ ჯგუფს მოწინააღმდეგეც აღმოაჩნდა.

— რადიკალების აზრს გამოჩენილი ქართველი პოეტი და საზოგადო მოღვაწე გრიგოლ ორბელიანიც კი იზიარებს თურმე.

— მაგათაც კარგად ვიცნობ და მის ოპოზიციაში მდგომ მიმდინარეობასაც. მათ „ზომიერების“ დამცველებს ეძახიან. ისინი თავკაცად ივანე აფხაზს ასახელებენ. შარშან ჩემი

რძლის, თქვენი მეუღლის მამასთან და ბიძებთან მქონდა საუბარი ამ საკითხებზე.

— ისინი, რა თქმა უნდა, „ზომიერთა“ აზრს იზიარებენ, განსაკუთრებით პეტრე დადიანი, — ღიმილით თქვა მიხეილმა.

— მართალი მოგახსენოთ, როდესაც ეს საკითხები მწვავედ იყო დასმული, მე არაფერი გამეგებოდა, მგონი, მეხუთე კლასში ვიყავი. ახლა კი, როდესაც საქართველოსა და კერძოდ აფხაზეთის მდგომარეობას უფრო შეგნებით და სიყვარულით ვეკიდები, მჯერა, რომ რადიკალებს ეგ საკითხი არც კი უნდა წამოეჭრათ.

— ალექსი, მე კი მგონია, სწორედ მაშინ უნდა წამოეჭრათ ეგ საკითხი; თუ მეფის რუსეთი ომს წააგებდა, ის იძულებული გახდებოდა საქართველოსათვის თავი დაენებებინა. ჩვენ კი უფრო მოღონიერებული ვიყავით და ჩვენს თავს წარუძღვებოდით.

— საინტერესოა, ბატონო მიხეილ, რა ძალ-ღონით წარუძღვებოდით ჩვენს თავს? თუ გგონიათ, რომ გამარჯვებული ირანი და ოსმალეთი თავზე ხელს გადაგვისვამდა, ეს შემცდარი აზრია. ჯერ, ბატონო ჩემო, დიდმა მეფემ და სარდალმა ერეკლემ ვერ შეძლო მათი მოგერიება, როდესაც მტერს სამხედრო მომზადება და იარაღი არ ჰქონდა; მათ ახლა რეგულარული ჯარი ჰყავთ, ჩვენ კი არა.

— რადიკალები ასე არ ფიქრობენ, ალექსი. პირიქით. ახლა თუ როგორმე რუსეთთან კავშირს გაეწყვეტთ, მუსლიმანები ყოველ დათმობაზე წაელენ ქართველობის მიმართ; ისინი დარწმუნდნენ, რომ საქართველომ მათი მიზეზით გაუწოდა ხელი რუსეთს. ფრიად საშიში მეზობელი შევიქვით ოსმალებისათვის. თურქები ახლა სრულ დამოუკიდებლობას მოგვცემენ, ზოლო რუსეთი რას გვერჩის, ჩვენს კუთხეს საომარ ასპარეზად რისთვის გადააქცევს. ვიცხოვროთ მეზობლურად, გასაჭირში ერთმანეთს დავეხმაროთ, როგორც ეს რუსეთ-ირანის ომის დროს გავაკეთეთ. არავის არ ვთხოვდით დახმარებას, ოღონდ ჩვენს მიწა-წყალს შეგვარჩენდნენ, ცხოვრებას არ აგვირევდნენ.

— ბატონო მიხეილ, ახლა მთელი ჩვენი ძალა უნდა მოხმარდეს საქართველოს მოღონიერებას, ქართველი ხალხის

გამრავლებას და განათლებას. სწორედ ახლა უნდა ვესწრაფოდეთ კავშირს ერთმორწმუნე რუსეთთან, რომელიც პეტრე დიდის შემდეგ ჩქარი ნაბიჯით მიიწევს წინ. ვითარდება რუსეთის მეცნიერება, კულტურა. ახლა ყოველად შეუძლებელია ლტოლვა ოსმალეთისაკენ.

— რაც თქვენ თქვით, ყველაფერი კარგია, მაგრამ რუსეთის თვითმპყრობელობა თავის დანაპირებს რომ არ გვისრულლებს? გზად და ხილად ვჭირდებით, რათა აზიის სახელმწიფოები ადვილად დაიპყროს, — უპასუხა მიხეილმა.

— ბატონო მიხეილ, ამისათვის საჭიროა სამთავროებად დაქუცმაცებული საქართველო გაერთიანდეს და განმტკიცდეს.

— ეს მომავლის საქმეა, ალექსი. შენ მასწავლე წამალი, რით ავიცილოთ თავიდან თუნდაც აფხაზეთში კაზაკ რუსების დასახლება, თუ ერთხელ დასახლდნენ, ხომ ვეღარ ავეყრით!

როდესაც მიხეილი ამ სიტყვებს თითქოს დიდი გულისტკივილით ამბობდა, ალექსი მის სახეს აკვირდებოდა, თან ფიქრობდა: ნუთუ ყველა ის ბოროტება, რასაც ამ კაცს აწერენ, მართალიაო. ალექსის არ სჯეროდა მიხეილის ასეთი ცუდი კაცობა. თუმცა მიხეილის ოინები საქვეყნოდ იყო ცნობილი.

ჯერ კიდევ ამ სამი თვის წინათ მიხეილი თავის სამუშაო ოთახში მისი პირადი საქმეების მომგვარებელ ხასან მარღანას განმარტობით ესაუბრებოდა:

— როგორ ჯობია, ხასან, ვერ იქნა და ის თავადი ვეღარ მომაშორე თავიდან. რომ იცოდე, რა დიდ ფულიან მყიდველებს უჭირავთ თვალი იმ მამულზე, შენ ნახავ თუ მყიდველები მამულის პატრონს არ მიაგნებენ და იმ ძალღთაპირს ოქროებით არ აუვსებენ ჯიბეს.

ხასანს თავი ჩაელუნა, იატაკს ისე ჩასჩერებოდა თავისი ჭროლა და ბოროტი თვალებით, თითქოს ბნელი საქმეების გასაჩარხავ აზრებს უფსკრულში ეძებსო.

— რამ ჩაგაფიქრა, ხასან? როგორც წინათ გეუბნებოდი, ან სიკვდილი ან სასამართლოს ძალით კატორღა უნდა გადაუწყვიტოთ იმ თავადს, სხვა გზა არ არის.

— მისი მკვლელობა ძნელი საქმეა, მთავარო! მას ისე ვერ მოვკლავთ, რომ არ გახმაურდეს. ბევრი ნათესავი ჰყავს,

გავლენიანი კაცია, შესაძლოა, ხათაბალას გადავეყაროთ.

— მაშ რა ვიღონოთ?

— ისე უნდა მოვახერხოთ, რომ თავადი დავაჭვინოთ, შემდეგ კატორღა და მისი ჯანი.

მიხეილი ჩაფიქრდა, მაგრამ ხასანმა ფიქრი მალე შეაწყვეტინა.

— შეეწიროთ ერთი ვინმე ბობოლა რუსი მოხელე.

— ყოჩაღ, ხასან! — დიმილით თქვა მიხეილმა და ხასანს მხარზე ხელი დაჰკრა. — მაშ, აწი შენ იცი.

ამ საუბრის ათიოდე დღის შემდეგ ოქუმის გზაზე ასეთი ამბავი მოხდა: მეფის ერთ-ერთი მოხელე ოთხი ჯარისკაცით სოხუმიდან ოჩამჩირეში მიდიოდა. როდესაც ტყისპირს მიუახლოვდნენ, მოულოდნელად სროლა ატყდა. გაოგნებულმა მგზავრებმა განზე გაწევეც ვერ მოასწრეს, რომ მოხელე და ერთი ჯარისკაცი ცხენიდან გმინებით უგონოდ დაცვივდნენ მიწაზე. სროლა გრძელდებოდა. სამი ჯარისკაცი რაღას გაუმკლავდებოდა ტყეში თავშეფარებულ თავდამსხმელებს. ჯარისკაცები სოხუმისაკენ გაიქნენ. ყოველივე ეს მიხეილს სასწრაფოდ აცნობეს. მთავარმა უმალვე ზომები მიიღო. მოხელე პატივით მოასვენეს და დაასაფლავეს, ხოლო მკვლელებს ძებნა დაუწყეს.

მოხელის დასაფლავებას თვით მიხეილი დაესწრო, რათა თავისი ერთგულება რუსეთის მთავრობისათვის უფრო თვალსაჩინო გაეხადა.

გასვენებიდან დაბრუნებული მიხეილი ხასანთან ერთად თავის სამუშაო ოთახში ჩაიკეტა. მათ შორის ასეთი საუბარი გაიმართა:

— ძალიან მოხდენილად გაკეთდა ეს საქმე, ხასან! შენი დიდი მადლობელი ვარ. მოხელეც მოვსპეთ და მაგ საბაბით იმ თავადსაც მოვიცილებთ თავიდან. ახლა ხომ იცი რა არის საჭირო? იმ თავადზე უნდა შემოვიდეს საჩივრები პირადად ჩემთან და რუს მოხელეებთან. სასამართლოში ცოცხალი მოწმეები დაგვჭირდება... შენ ამ საქმეში ჩემი დარიგება არ გინდა.

— ახლა ესეც მიბრძანე, მთავარო, რამდენი წილი ექნება ამ მამულში საწყალ ხასანს?

— როდის დამინაგრიხარ, ჩემო ხასან, შენ ალბათ იცი მაგ თვადის მამული როგორ იზიდავს უცხოელებს და რუსებს. ფულიანი ხალხი დიდ თანხას გაიღებს; ახლა ხომ ფულს მეტი ფასი აქვს, ვიდრე მამულს, შენც გამდიდრდები.

ხასანს თვალები გაუბრწყინდა.

— ბატონო, თუ სასამართლო იმ თვადს გააციმბირებს ან ჩამოახრჩობს, ყველაფერი შენს ხელში არ იქნება?

— ეს მამულები, ჩემო ხასან, გასაყიდად მინდა. სამთავროს ფული არა აქვს, მიწები ცოტა შემოსავალს გვაძლევს, გზები და ხიდები ვერ გაგვიკეთებია, ლიხნის სასახლე ინგრევა, ვაჭრობა-მრეწველობა ვერ განვავითარეთ.

ხასანმა ღიმილი ძლივს შეიკავა. კარგად იცოდა, მიხეილი სამთავროზე ზრუნვით თავს არ იწუხებდა.

სულ მოკლე ხანში სასამართლომ მოხელის მკვლელობა უდანაშაულო თვადს დაუმტკიცა. მას კატორღა მიუსაჯეს, ხოლო მამული სამთავროს გადასცეს.

მიხეილმა ეს მამული რამდენიმე ნაწილად გაჰყო. ზოგი რუსეთისა და ზოგი უცხოელ მდიდარ პლანტატორებს მიყიდა, აღებული თანხიდან სამთავროს კეთილდღეობას არაფერი მოხმარებია...

სანამ დაღვრემილი ალექსი მთავრის მოღვაწეობის ამ ეპიზოდზე ფიქრობდა, მიხეილი თავჩალუნული იჯდა, თანამოსაუბრის კეთილ, თაფლისფერ თვალებს თავის ქორისებურ მზერას იშვიათად თუ გაუსწორებდა. მიხეილს ეჭვი ჰქონდა, რომ ალექსიმ ყველაფერი იცოდა, რასაც იგი აფხაზეთში აკეთებდა. „რას მიზამს, — ფიქრობდა მიხეილი, — მაგაზე კარგი და გულადი ვაჟაკები მომიშორებია თავიდან. ახლა, როდესაც აფხაზეთის სამთავროს არსებობის საკითხი დათვლილია და, ალბათ, მეც მალე მომიწევს აქედან გაქცევა, უნდა ვზრუნავდე ქონების შექმნაზე. უნდა მქონდეს ბევრი ფული ოჯახით უცხოეთში გადასახვეწად. არა, მამა უცხოონდება რუსთა ხელმწიფეს, მე მას ფეხქვეშ გავეგები და აქ გაუქმებულ სამთავროში ლევან დადიანივით ვიბორიალებ“.

მიხეილმა ალექსის ისევ აფხაზეთში კაზაკ რუსების ჩამოსახლებაზე დაუწყო საუბარი.

— ბატონო მიხეილ, მე კარგად მესმის თქვენი გულისტკი-

ვილი, მაგრამ ამაშიც ჩვენ გვიდევს ბრალი. ვინ არ დაეპატრონება მოსახლეობიდან დაცარიელებულ მიწებს. არ ვიცი, როგორ მოხდა, რომ აფხაზეთის მკვიდრი მცხოვრებნი ზღვის სანაპიროებზე აღარ არიან. ეს ხდება მხოლოდ დიდი ფეოდალების გავლენით, რომელნიც ადგილობრივ მოსახლეობას მთებისაკენ ერეკებიან საცხოვრებლად, ხოლო მათ მიწა-წყალს რუსეთის ან უცხოეთის თავადებსა და მდიდრებს აძლევენ დიდ ფასებში. აბა, რომელი მდიდარი კაცი დაიშურებს ფულს აფხაზეთის მიწებზე აგარაკებისა და პლანტაციებისათვის.

აფხაზეთის მცხოვრებთა რიცხვის შემცირებას ძლიერ უწყობს ხელს მაჰაჯირობა, ტყვეთა გაყიდვა. თქვენ, ალბათ, მოგეხსენებათ რამდენი ახალგაზრდა ტყვე ქალ-ვაჟი მიჰყავთ აფხაზეთიდან სტამბოლის ბაზარზე.

ხშირად ხომ თავადებიც აღარ ინდობენ ერთმანეთს. მეტი მამულის შეძენის მიზნით გავლენიანი თავადები ერთმანეთს ხოცავენ, რათა მოკლულის მამულებს თვითონ დაეპატრონონ და შემდეგ ეს მიწები ვინმე მსხვილ მემამულეს მიყიდონ.

— კაცო, შენ ამდენი ჭორები სად მოკრიფე, ალბათ დადიანებში, — ღიმილით უთხრა მიხეილმა ალექსისს, გულში კი გაიფიქრა: „არ დაგიჯდება, ყმაწვილო, იაფად ამდენი ამბების ცოდნა“. მას კი ისევ საქმიანი კილოთი მიმართა: — მე გთხოვთ მთავარ საგონებელ საქმეზე მიპასუხიოთ. რა უნდა ვიღონოთ, რომ აფხაზეთში კაზაკ რუსების ჩამოსახლება თავიდან ავიცილოთ?

— მე მეონია, ეს საქმე მოგვარდება, ბატონო მიხეილ! გავლენიან ხალხს შეუძლია დროებით მაინც შეაჩეროს ეს საქმე. როდესაც ჩვენ კულტურულად და ეკონომიურად მაღალ საფეხურზე დავდგებით, თვით შევძლებთ დავიცვათ ჩვენი თავი, მხოლოდ საჭიროა მთელი საქართველო და მისი კუთხეები განიმსჭვალონ მამულის სიყვარულით, ერთმანეთის პატივისცემით. ჩვენ უნდა შევიგნოთ, რომ მთელს საქართველო და მისი განაპირა ნაწილები თავისი მიმზიდველობით ყველას მადას უღვიძებს საკუთრებად გაიხადოს, თავისი ხალხით აავსოს. აფხაზები ცოტანი ვართ, ჩვენ გონებრივადაც უნდა

გავიზარდოთ და ქონებრივადაც. სხვანაირად მოვისპობით. ოსმალებმა ბევრი ცუდი ჩვევა და ცრუმორწმუნეობა დატოვეს ხალხში. ეს უნდა აღმოიფხვრას. თუ ერი მტრის ფეხით ყოველთვის გაითელა, როგორ მოუვლის საკუთარ თავს, როგორ განათლდება, როგორ შექმნის რაიმე საგანძურს, ეროვნულ კულტურას?

— ვიცი, ალექსი, მაგრამ ხელფეხშეკრული ვარ, არ არის საშუალება, რომ აფხაზეთი განათლების გზაზე დაუყენოთ. განა მე არ მინდა განუაახლო ლიხნის სასახლე, განუაახლო თვით სოხუმი, ასე ხანგრძლივად ნაჯიჯგნი და გაპარტახებული მტრის მიერ? განა არ მინდა მქონდეს კარგი ნავსადგური, კარგი გზები და ხიდები?

— მართალი ხართ, ბატონო მიხეილ, ეს ყველაფერი საჭიროა, მაგრამ ჩვენ ამის გასაკეთებლად მხოლოდ სხვის იმედზე დაყრდნობა და უნაყოფო დაპირებები ვერაფერს გვიშველის. ამისათვის სხვა წყაროების გამოიხედავთ საჭირო. ჩვენს მადლიან ქვეყანაში თესლი მოუხნავ მიწაზე უკულმა რომ გადაისროლო, ისიც კი გაიხარებს და აყვავდება. მე ვფიქრობ, ბუნებით უხვად დაჯილდოებულ ჩვენს მხარეში ისეთი ძვირფასი მცენარეები უნდა გავავრცელოთ, რომელთაც რუსეთსა და ევროპაში ფართო გასავალი ექნება. საქმის ასე წაყვანა საშუალებას მოგვცემს, ბატონო, ქვეყნის სიმდიდრე ხალხის საკეთილდღეოდ გამოვიყენოთ. აბა, რით გაამდიდრებს ქვეყანას სილარიბეში გათანგული ყმა გლეხი? თავისი ძველებური ბართა და თოხით რა ღირებულებას შექმნის? თუ ბატონების შესანახი შექმნეს და თვითონაც ძაღლურად იცხოვრებს, მეტი რა ძალა შესწევთ? აქ კი არა, რუსეთშიც არა აქვს გლეხს მიწის გაუმჯობესებელი სამუშაო იარაღები. რამე სხვა წყარო უნდა გამოძებნოთ კუთხის პატრონმა და მმართველმა. კარგი იქნება გამოიწეროთ მიწის დასამუშავებელი იარაღები.

მოვაშორეთ გლეხი კავსა და სახნისს, ცარიელ მიწებზე გავაშენოთ ცენტრუსები, ვაზი, კაკლის ხე, თხილი... ამას ვინ დაგვიშლის? თვითეულ თავადს ხომ უფლება აქვს თავისა მამული როგორც უნდა ისე მოიხმაროს. თუ ყოველ ოჯახში ოცი და ოცდაათი ყმა გლეხი თვეში სამი დღე იმუშავენს ამ

მიზნისათვის, გარწმუნებთ, საქმე უთუოდ გაიჩარხება. მხოლოდ გლახს მუშაობის პირობები უნდა შეეუქმნათ.

მიხეილმა უდარდელად გაიცინა.

— მგონი, შენ მირჩევ გლეხები გავათავისუფლო.

— თუშცა დარწმუნებული ვარ იმაში, რომ გათავისუფლებულა გლეხი ქვეყანას უკეთ ააშენებს და თვითონაც ადამიანურ ცხოვრებას მიაღწევს, ამას მაინც არ გირჩევთ, რადგან თქვენ ეს არ შეეძლება. მე მხოლოდ იქითკენ მოგიწოდებთ, არსებულ პირობებში გააკეთოთ ის, რისი გაკეთებაც შეიძლება.

— საღაპარაკოდ ადვილია, ჩემო ალექსი! განა არ ვიცი, როგორ ჯობია, მაგრამ არა მაქვს გასაქანი. დიდ იმედებს ვამყარებდი სამურზაყანოზე; ის მდიდარი კუთხეა, ბუნებრივი სიკეთით სავსე. სამწუხაროდ, შენც ხედავ, არ გამართლდა ჩემი იმედები. სამურზაყანო ჯერ დადიანებს მიაკუთვნეს, რითაც გული ძალიან მატკინეს. მით უფრო საწყენი იყო, როცა იგი დადიანებსაც ჩამოართვეს და ხაზინამ საუასური მხოლოდ მათ აუნაზღაურა. განა ეს სამართლიანია?! აფხაზებია აქ საუკუნეობით ცხოვრობენ და სამართლიანობა მოითხოვდა ჩვენი ხვედრი გერგებოდა. ასეთ პირობებში მთავრად ყოფნას რა ფასი აქვს. გადაწყვეტილი მაქვს, თუკი ჩვენი მოთხოვნები არ დააკმაყოფილეს, მეფისნაცვალს განცხადებით მივმართო გადადგომაზე, მაგრამ წინასწარ ვიცი, ვორონცოვი თავისი დათაფლული ენით დამამოშმინებს და პირში ჩალაგამოვლებულს გამომიშვებს. ვფიქრობ, აჯობებს ჯერ პეტერბურგში გავიგოთ, თუ რაზე გამოიტანა უმაღლესმა მთავრობამ ასეთი გადაწყვეტილება.

— ბატონო მიხეილ, არც ასე ვარგა გულის გატეხა. რა ვუყოთ, რომ სამურზაყანო ჩამოგვართვეს და რუსეთის მმართველობას გადასცეს. ეს ხომ ახალი ამბავი არაა. რუსეთის მეფე ყოველთვის ასე ფეხქვეშ თელავდა ხალხის უფლებებსა და დამოუკიდებლობას. მას არამცთუ უცხო ტომის ხალხი, თავისიც არ დაუნდვია. თუკი რუსეთში ვინმე განათლებული და პროგრესულად მოაზროვნე გამოჩნდა, ყველა ან ციმბირშია გადაასახლა ან ჩამოახრჩო. გაიხსენეთ თუნდაც დეკაბრისტები. ყველა მათგანი რუსეთის თვითმპყრობელობის მსხვერპლი გახდა. ჩვენ სულით არ უნდა დავეცეთ. პირიქით, გვმართება

მჭიდროდ დაუკავშიროთ ჩვენი ბედ-იღბალი, ჩვენი აზრი და მოქმედება რუსეთის პროგრესულად მოაზროვნე ადამიანებს. მათთან ერთად გაერთიანებული ძალ-ღონით მთლიანად უნდა გარდაიქმნას რუსეთის სახელმწიფოს სოციალური და ეკონომიური სახე. უკიდურეს შემთხვევაში ხუხულასავით დაინგრევა ეს ვეებერთელა ქვეყანა.

— ალექსი, ძვირფასო, შენ, მგონი, საფრანგეთის რევოლუციის განმეორებას მოელი რუსეთში.

— რატომ არა, ბატონო, რუსი ხალხი მომთმენია, მისი ძალა მწამს, მაგრამ ამ მოთმინებასაც გაუვა ყავლი. ტყუილად არ მიცხოვრია რუსეთში, მე მათ ვიცნობ. ერთ მშვენიერ დღეს ეს წყნარი ხალხი დაიქუსებს და მისი მოწინავე ინტელიგენციის მეთაურობით შენს მეფეს ტახტიდან ჩამოაგდებს.

მიხეილი აიშრიზა. რევოლუციის პერსპექტივაზე ასე გაბედული ლაპარაკი არ ესიამოვნა, მაგრამ, თან ალექსის დასაბუთებულმა საუბარმა თავისი ხალხის უნუგეშო მდგომარეობაშიც ერთგვარად ჩაახედა და უპასუხა:

— ყველაფერს ჯობია დეკაბრისტებზე ლაპარაკს თავი დავანებოთ და საქმეზე ვიფიქროთ. აფხაზეთში უცხოელთა დასახლება და სამურზაყანოს საკითხი მოსვენებას არ მძღვეს. თუკი სამურზაყანოს ღირებულების ნახევარი ჩვენც გაგვინაწილდა, მაშინ ოღნავ შეღწავათი მიეცემა ჩვენს ქვეყანას. ამიტომ საჭიროა გავლენიანი პირის გამონახვა, რომელიც მინისტრს დაიყოლიებს ამაზე. შენ, ჩემო ალექსი, რუსეთში აღზრდილი კაცი ხარ, დიდი ნაცნობ-მეგობრობა გაქვს მაღალი წრის საზოგადოებასთან, მგონი, რომელიღაც მინისტრი შენი აწვარდაცვლილი მეუღლის ნათესავია და მოდი, ითავე ეს საქმე!

— ნათესავი არაა, ჩვენი ოჯახის ახლო მეგობარია. მისი ვაჟი კი გიმნაზიიდან ჩემი ამხანაგია. ვცადოთ, თუ რამე გამოვიდა. ამას გარდა, ბატონო მიხეილ, შენ იცი, ჩემს ვაჟს აუარებელი მამული აქვს თვით რუსეთში. მგონი იმდენივე, რამდენიც მთლიანად აფხაზეთშია. ვთხოვ ჩემს მოხუც სიდედრს გაგვიწიოს დახმარება. დიდი სურვილი აქვს მოხუცებულობა ჩვენს მშვენიერ სამშობლოში გაატაროს. საქართველოს ხილვა ამ ოჯახის წევრების ოცნებაა. მე ისინი ამ ზაფხულს აქეთ

მომყავს ბავშვიანად. მდიდრები არიან, არც კი იციან იმდენი ქონება რაში მოიხმარონ, ალბათ თვით სოხუმში აიშენებენ სახლებს.

— ოო, ეს კარგი იქნება. მაგრამ, შენი წასვლის მთავარი მიზანი მაინც აფხაზეთის ზღვის სანაპიროზე კაზაკ რუსების დასასლების შეწყვეტაა. თუმცა არის კიდევ სხვა საჩქაროდ მოსაგვარებელი საქმეებიც. როგორც გეუბნებოდი, ძალიან ცუდად გადაწყდა. აფხაზეთისთვის სამურზაყანოს საკითხი. მოგეხსენებათ, სამურზაყანო რუსთა ხელმწიფემ ჩვენც ჩამოგვართვა და სამეგრელოსაც. ხოლო ფულს ხაზინა დადიანებს აძლევსო, ამბობენ. დიდი ნიკო დადიანი მაგ საქმისათვის პეტერბურგში იმყოფება კარგა ხანია და ჯერაც არ ჩამოსულა. ის ჭკვიანი და მოხერხებული კაცია, თავისთვის იბრძოლებს, რაში დაიცავს ჩვენს ინტერესებს. ჩვენ კი რა დავაშავეთ, სამურზაყანოზე ჩვენი უფლებები რისთვის უნდა დაგვეკარგოს! ეს კუთხე ჩვენც ისევე გვეკუთვნოდა, როგორც სამეგრელოს. თუ დადიანებს აძლევენ ფულს, ჩვენც უნდა მივიღოთ. ამის შესახებაც მოგიმზადებ ბარათს.

— დიდი სიამოვნებით გეახლებით, არაფერს დავიშურებ, თუკი რამეში გამოვადგები ჩემს კუთხეს.

— მჯერა შენი სიტყვების სიმართლე, მაპატიეთ მაგრამ რამდენიმე კაცი მყავს მისაღები. მანამდე შენს რძალთან მიბრძანდი, მისაღებ ოთახში, ცოტა ხანი არ მოიწყინოთ, სადილად ჩვენსას დარჩით, კიდევ განვაგრძოთ საუბარი ამ საკითხებზე.

ალექსი მიხეილის ოთახიდან გავიდა. თანდათან რწმუნდებოდა იმაში, რომ კეთილი გზით მიხეილზე არავითარი ზეგავლენის მოხდენა არ შეიძლებოდა. „როდესაც გიცქერს, ფიქრობდა ალექსი, თითქოს გულში ისარს გიყრის. ის თავის სიბოროტით და ანგარებით ამ მშვენიერ ქვეყანას ადრე თუ გვიან დალუპვის კარამდე მიიყვანს“.

არც მიხეილის ფიქრები იყო ალექსის მიმართ სიამითა და პატივით გამსჭვალული.

„ეს რუსეთში გაზრდილი ღლაპი ხედავ რეებს ამბობს! ფეოდალებზე ლაპარაკობდა, მაგრამ მე ვყავდი მხედველობაში. ვაი საცოდავო, ვის უპირებ ბრძოლას? ვინ გგონივარ? გაის-

რისები!“ მთავარი ხედავდა, რომ ალექსი მისთვის საშიში კაცი იყო. „ალექსი განათლებულია, მართალი და პირდაპირი ადამიანია, მაგრამ ჩემს საქმეებში ჩარევის უფლებას არ მივცემ, არა! ასეთი კაცი მე არ გამომაღება. უნდა მოვიშორო თავიდან ეს რაღაც დეკაბრისტული იდეებით თავგამოტენილი კაცი“. — ფიქრიდან გამოერკვა, ხმამაღლა დაიძახა. შემოსულ მსახურს უბრძანა:

— საქმეზე მოსული მთხოვნელები შემოუშვი!

ალექსი ამ დროს მისაღებ ოთახში იყო.

— რძალო ბატონო, — დაიწყო მან და, იქვე შველივით ამართული მათა რომ დაინახა, ოდნავ შეკრთა. ორივე ქალს თავაზიანად მიესალმა, ცუცუს ხელზე ეამბორა. ცუცუმ შინაურულად ხელი მოხვია და შუბლზე აკოცა.

— რამდენი ხანია გელოდებით, გაიცანით — ეს ჩემი და, მათა გახლავთ.

— დიდად სასიამოვნოა, ბატონიშვილო, თქვენი გაცნობა. მე ამ ბედნიერებას ავცდი შარშან, როდესაც მამათქვენის ოჯახი ვერ გავიცანი, რუსეთში მივიჩქაროდი. ახლა თქვენი შესვენდრა მოულოდნელი სიხარულია. — თქვა მან და მათას ყურადღებით და მალულად შეაელო თვალი.

— დაბრძანდით, ჩემო მასლო, — უთხრა ცუცუმ და თვითონაც დაჯდა. ალექსი კი ცუცუს ახლო მოეწყო სავარძელში.

— როგორ გრძნობთ თავს, რძალო ბატონო?

— კარგად, რაც ჩემი მათა ჩამომივიდა, უფრო ვერთობი: ხან ვკითხულობთ, ხან ვქარგავთ, თქვენ რამდენ ხანს დარჩებით აფხაზეთში?

— მთლად ჩემზე არ არის დამოკიდებული წასვლა ან დარჩენა. ეს უფრო მიხეილის ნებაა. დავალებებით მისტუმრებს რუსეთში. დარჩენა რომ შემეძლოს, სულ არ წავიდოდი აქედან. — ამ სიტყვებზე ალექსიმ მოკრძალებით გადახედა მათას, ხმაც თითქოს უფრო ხვეწვით გაუხდა. მათამ თავი აიღო, ალექსის შეხედა. მათი თვალები ერთმანეთს შეხედნენ, მაგრამ მალე ისევ ძირს დაეშვნენ.

— ბატონიშვილო მათა, თქვენ როგორ მოგწონთ აფხაზეთი, ჩვენი დანგრეული ქალაქი სოხუმი? სხვა თუ არაფერი გვაქვს

მოსაწონი, ზღვა მაინც მოგზიბლავთ, — თქვა ალექსიმ და თავისი ზღვისფერი თვალები ქალს შეანათა.

— მე აქ ყველაფერი მომწონს, თავად! გზადაგზა ბევრი საინტერესო ადგილებიც ვნახე.

— ბარემ ისიც მოუყევი, გზაში რა გმირობა გამოიჩინე, როდესაც პირველად მინახულე, — სიცილით უთხრა ცუცუმ დას.

— კარგი ახლა, ცუცუ, რად გინდა, მოსაწყენაა.

— პირიქით, ბატონიშვილო, მე სიამოვნებით მოვისმინე, თუ როგორ გადაარჩინეთ თქვენ გასაყიდად განკუთვნილი გოგონები. ეს ამბავი დედამ მიაგმო.

— მე რას გადავარჩენდი, ჩემმა ძმებმა და მხლებლებმა გამოიჩინეს სიმარჯვე.

— ძვირფასო რძალო, თქვენს სტუმარს რომ არ მოსწყენდეს, ურიგო არ იქნება კვირას ცხენებით გავისეირნოთ. ალბათ, ბატონიშვილი მაია ყოველ სიკეთესთან ერთად კარგი ცხენოსანიც იქნება.

მაიას თვალები გაუბრწყინდა, გულში კი გაიფიქრა: ამ კაცმა საიდან იცის ცხენოსნობისადმი ჩემი სიყვარულიო.

— ვფიქრობ, თქვენი სურვილების შესრულება ადვილია, თუ ჩემი დაც ინებებს, ვეცდებით მიხეილიც წამოვიყვანოთ, სულ მუშაობს, ერთ დღეს მაინც გაერთოს.

— მე დიდი სიამოვნებით წამოვალ სასეირნოდ და ვეცდება სიძე ბატონიც დავითანხმო, — თქვა გაღიმებით მაიამ.

მიხეილს საქმეები მოესტუმრებინა, ოთახში მხიარულად შემოვიდა. ცუცუმ ქმარს მოსიყვარულე თვალებით შეხედა.

— იცი, ბატონო, ჩემს მაზლს კვირას ცხენებით გასეირნება სურს და მაია თქვენ გაატიჟობთ, მუშაობით გადატვირთულს, არ გაწყენთ ქალაქგარეთ გავლა და დასვენება.

მიხეილმა ალექსის სიცილით მიმართა:

— ალექსი, ეცადე აქ ცხენებსა და გართობაზე ილაპარაკო, თორემ საფრანგეთის რევოლუციისაზე ან თუ გნებავთ დეკაბრისტებზე მსჯელობით სასახლის კარზე მაინცდამაინც პოპულარული ვერ გახდებით.

— თუ საჭიროება მოიტანს, დიხსაც, ვილაპარაკებ. თქვენ კი, უფროსო ძმაო და მეგობარო, დიდად გერიდებით და პა-

ტივსა გცემთ, როგორც აფხაზეთის მთავარსა და მოსარიდებელ კაცს, თორემ რუსეთის მოწინავე ადამიანები აუგად რომ ახსენეთ, ამას უპასუხოდ არ დავტოვებდი.

— ხომ გეუბნები, შენ სტანკევიჩისა და გერცენის წრეების მიმართულებას გაცნობილი კაცი ხარ, თან ახალგაზრდა, გიტაცებს ყოველივე ეს... თეორია ერთია, პრაქტიკულად საქმეების განხორციელება კი უფრო რთული საქმეა.

დებმა ერთმანეთს გადახედეს. გერცენის სახელი მაიას მამის ოჯახშიც გაეგონა, მაგრამ მზად იყო მოესმინა ალექსისაგან უფრო დაწვრილებითი ცნობები ამ დიდ რუს მოღვაწეზე. მაიას ეუხერხულა, პირველი გაცნობისთანავე ეკითხა ამ მშვენიერი კაცისათვის რამე და ისიც სიძის აქ ყოფნის დროს, მიხეილმა საათი ამოიღო და დახედა.

— სადილობამდე დავბრუნდები, — ჩაილაპარაკა მან.

— მეც წამოვალ, ბატონო, — უთხრა ალექსიმ.

— შენ დამიცადე, აკი დამპირდი, რომ ჩემთან ისადილებ.

— დარჩით, ბატონო! სთხოვა ცუცუმ.

ალექსი ისევ ფეხზე იდგა. მიხეილის გასვლას ელოდებოდა, შემდეგ მასპინძელი კარებამდე მიაცილა, შემობრუნდა და თავის ადგილას დაჯდა, თითქოს ერთგვარი შვება იგრძნო და მიხეილის წასვლის შემდეგ ქალებს მიმართა:

— როგორ მოგწონთ აზრი რუსეთის მოწინავე ადამიანებზე, ბატონიშვილ გიორგის ასულნო?

— რა ვიცი, ბატონო, — უპასუხა მაიამ, — მართალი მოგახსენოთ, დიდად გარკვეული არ ვარ მაგ საკითხებში. მაინტერესებს, ვინ არის გერცენი, მისი სახელი ბევრჯერ მსმენია ჩვენს ოჯახში.

— თუ თავს არ მოგაწყენთ, მოგახსენებთ, ბატონიშვილო! გერცენი ჯერ ახალგაზრდა კაცია. „ჰერც“ — გერმანულად ნიშნავს გულს. ის მართლაც მგზნებარე გულის პატრონია. ერთი ფრანგი მასწავლებელი მას ბავშობიდანვე უნერგავდა გულში რევოლუციურ იდეებს, ხოლო მეორე მასწავლებელი — რუსა სემინარიელი უკითხავდა პუშკინის ლექსებს, აღსავსეს მეფის კანონებისადმი პროტესტით. ახალგაზრდობიდანვე ვითარდებოდა მის გულში პროგრესული იდეები. მოწინავე პიროვნებათა თაყვანისმცემელი გერცენი ჯერ კიდევ ცამეტი წლის იყო

როცა დეკაბრისტების სიკვდილით დასჯის ტრაგედია მწარედ განიცადა.

— მაშ, თქვენც გახსოვთ დეკაბრისტების ამბავი? — შეეკითხა მაია.

— რატომ არ მახსოვს! მაშინ თხუთმეტი წლისა ვიყავი. რა საშინელი განწყობილება შეიქნა ჩემი აღმზრდელების ოჯახში, როდესაც პესტელი და მისი სუთი ამხანაგი სიკვდილით დასაჯეს. რამდენჯერმე ჩემი აღმზრდელიც კი დაიბარეს ჟანდარმებმა და დაკითხეს.

— შემდეგ რა ბედი ეწია, თავადო, გერცენს? — კვლავ შეეკითხა მაია.

— სულ ახალგაზრდა დააპატიმრეს და გადაასახლეს. მონხადა სასჯელი, დაბრუნდა მოსკოვში, დაამთავრა უნივერსიტეტი და ახლაც მუშაობს მოწინავე რუს მოღვაწეებთან ერთად. ის ახლაც ბატონყმური რუსეთის წინააღმდეგაა განწყობილი.

— მაზლო ბატონო, თქვენ მას იცნობთ?

— გერცენს და ოგარიოვს ვინ არ იცნობს ჩვენი თაობიდან. მოსკოვისა და პეტერბურგის უნივერსიტეტში ისინი დიდი ავტორიტეტით სარგებლობენ. დეკაბრისტები საქართველოშიც ბევრნი იყვნენ, უთუოდ თქვენც გაგეგონებათ მათი სახელები.

დები ინტერესით უსმენდნენ ალექსის საუბარს.

ალექსიმ ისევ ქალაქგარეთ გასეირნებაზე ჩამოავლო საუბარი:

— შორს რომ არ იყოს, — თქვა მან, — ბატონიშვილ მაიას ლიხნის სასახლეს ვაჩვენებდით; კარგი იქნება, ეს ექსკურსია კვირას დაენიშნოთ.

— არა, შენი ჭირიმე, შორსაა, ცხენებით დავიქანცებით, — თქვა ცუცამ.

— რატომ გგონიათ, სულ ორმოცდაათი ვერსი იქნება, იმ ღამეს იქ დავისვენებთ, კარგ დროსაც გავატარებთ. — არ თმობდა ალექსი.

— ნამეტანი მფრთხალი ხარ, ცუცუ, რა არის ორმოცდაათი ვერსი, სულ ექვსი-შვიდი საათიც არ დავგჭირდება ცხენებით იქ მისვლამდე.

— კარგი, მე არ შეგიშლით ხელს, მაია, მაგრამ რამდენად ლამაზია, რომ მამიდა პუპის ვერ ვეახელით და ლიხნში ამოვყოთ თავი?

— ეს კი არ გვეპატიება, თუმცა ამდენ ხანს დაღლილობა და წვიმა იყო მიზეზი. ამ დღეებში უსათუოდ უნდა ვეახლით მამიდას. მხოლოდ ლიხნში მგზავრობას ეს ხელს არ უშლის.

ალექსიმ და მაიამ ცუცუც დაიყოლიეს.

სადილობის დროს მაიამ არა ერთხელ დაიჭირა ალექსის თვალები, რომლებიც სიამოვნებით შესცქეროდნენ.

ლიხნის საუცხოო სასახლე, მომხიბვლელი ბუნება მაიასა და ალექსის სასიამოვნო გრძნობებს უღვიძებდათ. სილამაზის, მშვენიერებისა და სიყვარულის შეგრძნობა მათ უმახვილებდათ პატრიოტულ გრძნობებს, ერთმანეთისადმი ნდობას. ამ შეხვედრამ ისინი დაახლოვა და დაამეგობრა...

მაია მხიარული ბრუნდებოდა სოხუმში. ალექსი და სხვა ახალგაზრდები მოკრძალებულად მიჰყვებოდნენ ქალებს. მაია გაბედულად მიაგეღებდა ლაფშას, ხშირად სხვა მხედრებს უსწრებდა. მაია, გრძელი ამაზონკით შემოსილი, ზღაპრულ ამორძალს ჰგავდა. ალექსი მას ხანდახან დაეწეოდა და გვერდით გაჰყვებოდა. გზა-გზა დაქვეითდებოდნენ, შეისვენებდნენ დიდი ხის ჩრდილში. ერთ-ერთი დასვენების შემდეგ მაიამ სწრაფად შედგა მარცხენა ფეხი უზანგში და ის იყო, მარჯვენა ხელით ამაზონკა უნდა აეკრიფა, ფიქლო გულ-მკერდი დახარა, ნაწნავები მკერგზე გადმოუსრიალდა, საშიში იყო აღვირში ჩახლართულიყო. მაიას ხელებს არ ეცალა. ალექსიმ ეს შენიშნა, თმებს ფროთხილად ხელი შეახო და ისევ ბეჭებისკენ გადასწია, მაიამ წარბი შეიკრა და წყრომით შეხედა ალექსის.

ალექსი დაიბნა, მაგრამ არ შეიმჩნია, ისევ გვერდით გაჰყვა მაიას. ახლა ჩვეულებრივ არ ლაყვარდობდნენ მაიას თვალები, ის არ ენამჭევრობდა. უხერხულობა ჩამოვარდა მათ შორის. ალექსიმ დუმილი ველარ აიტანა და ქალს უთხრა:

— ბატონიშვილო, ნება მიბოძეთ, ერთი ლეგენდა გიამბოთ! მაიამ თანხმობის ნიშნად ოდნავ გაიღიმა, ბრძანეო, უპასუხა.

— ამორძალების დედოფალი პენტეზელია განთქმული ყოფილა თავისი გმირობით. ტროადელთა ომის მიწურულში

ის დახმარებია პარისს. გამპკინვარებულ აქილევსს მოუკლავს უცნობი გულადი მეომარი. მასვე აუხდია საომარი საჭურველი მოკლულისათვის. აქილევსს უცვნია პენტეზელია და ისე მოჯადოებულა ქალის უჩვეულო სილამაზით, რომ ქალივით ატირებულა.

დღეს თქვენ, ცხენზე მჯდომმა, პენტეზელია მომაგონეთ. თავი ვერ შევიკავე, თუ ლომგული აქილევსი ატირდა, მე გონების დაკარგვის უფლება მაინც მაქვს, როდესაც თქვენს მშვენიებას ვუცქერ.

ალექსი ქალს მიუახლოვდა, თვალებში ჩააცქერდა, თითქოს უნდოდა პატიების დასტური მაიას თვალებში ამოეკითხა. მაიას ღიმილმა უსიტყვოდ შეარიგა ახალგაზრდები, სიყვარულის გრძნობა ღვივდებოდა მაიას გულშიც.

მ მ მ ბ ი

კარგი სანახავი იყვნენ ძმები, დიდი ნიკოს ვაჟები.

მაიას მამის გიორგის ახოვან, ლამაზ ტანადობას ამშვენებდა ჭკვიანი და კეთილშობილური სახე. გიორგი ბუნებით ზრდილობიანი და დარბაისელი იყო, უყვარდა ბევრი კითხვა და წაკითხულზე მსჯელობა, მჭკვერმეტყველებაც ხელს უწყობდა. გიორგი არ კმაყოფილდებოდა მარტო ქართული ლიტერატურით, ძლიერ დაინტერესებული იყო რუსული და უცხოეთის მწერლობითაც. ზედმიწევნით იცოდა ქართული ენა; ოცნებობდა იმაზე თუ როდის გარდაიქმნებოდა რუსეთის თვითმპყრობელობა და საქართველოში როგორი მართვია-გამგეობა დამყარდებოდა.

გიორგის, ცოტა არ იყოს, აინტერესებდა ხალხის ცხოვრების ამბები. ის გამოიხმობდა ჭკვიან, კარგ მოლაპარაკე გლეხებს და საუბრობდა მათთან. ერთი ასეთი გლეხთაგანი იყო მჭედელი კაზაკია ფიფია, სოფელ კორცხელის მცხოვრები. გიორგის სასახლეს ხშირად სჭირდებოდა მჭედელი. ხან ცხენები იყო დასაჭედი, ხან მიწის დასამუშავებელი იარაღი შესაკეთებელ-ასალესი. ამჟამად მან კაზაკია ახმობინა საქმისთვის და სალაპარაკოდაც.

კაზაკია მუშაობდა, ხოლო გიორგი იქვე ჩამომჯდარიყო

და უყურებდა. გიორგიმ მოულოდნელად ასეთი შეკითხვა მისცა:

— კაზაკია, მითხარი, რას ლაპარაკობენ ჩემზე სოფელში?

კაზაკია არ ელოდა ასეთ შეკითხვას, გაკვირვება არ შეიმჩნია, მაშინვე თავი ასწია და ასე უპასუხა:

— სოფელს რა აქვს სათქმელი, გარდა თქვენი სიდიადისა და კარგი კაცობისა.

— მომდურავი ბევრი მყავს?

— მომდურავი თქვენ კი არა, მეც მყავს. ბევრი მომდურავი მყავს თავადებში, საერთოდ კი მაინც ყველგან კარგ ყაძახს ბეძახიან.

სადილობის დრომ მოაწია. გიორგი ადგა, მჭედელს თავის სუფრასთან დაჯდომა შესთავაზა.

— კაზაკია, რამე კარგი მითხარი.

— ბატონიშვილო, დღეს რაც ჩემს თავზე ხდება, ამაზე კარგი რა უნდა ვთქვა; თქვენთან სუფრას ვუზივარ და ცხვრის ხორცის საუკეთესო ულუფას მივირთმევ.

— აბა, ჭიქა აიღე და დაგვლოცე. ყველაზე უფროსი აქ შენა ხარ.

კაზაკია ადგა, ადღეგრძელა გიორგი ცოლ-შვილით და დასძინა:

— ბატონიშვილო, მუდამ სხვისი იმედით შრომა და ცხოვრება არ შეიძლება. დრო და ჟამი ცვალებადია. სწავლა-განათლება შემოდის, მაგრამ იგი ჩემისთანებისთვის კარჩაკეტილია, თქვენი მშვენიერი შვილები ისე მოამზადეთ, რომ ცხოვრებას საკუთარი ძალ-ღონით გაუმკლავდნენ. თქვენ დიდი სახელი და კეთილი გული მათ გააყოლეთ ცხოვრების გზაზე.

გიორგი ჩააფიქრა კაზაკიას სიტყვებმა, მაგრამ ხმის ამოდებას დუმილი არჩია.

ნასადილევს ფიფიას საჩუქრად ცხენი გამოუყვანეს. გიორგი უკანა აივნებიდან უყურებდა როგორ ეჭირა კაზაკიას ლაგამი, ცხენზე კი არ ჯდებოდა.

— ბიძია, — მიმართა კაზაკიამ მეჯინიბეს, — შენს გაზრდას, რამე კიბე იქნება მანდ და მომიტანე, რომ ცხენზე ავიდე.

ყველა მიხვდა, თუ რა კიბე უნდოდა კაზაკიას.

ბიჭები ჩუმად იცინოდნენ. გიორგიმ კი ხმამაღლა გაიცინა და აიენიდან ბიჭებს გადასძახა:

— მიეცით ცხენის შესაფერი კიბე.

მეჯინიბემ იმ წუთსავე მოარბენინა ნანძარი, მაგრამ კარგი უნაგირი.

გიორგი ამას სახელისათვის აკეთებდა და არა კაზაკიას სიყვარულისათვის.

იმ საღამოს გიორგი კარგ გუნებაზე იყო. ძმების — პეტრესა და ბესარიონის მოულოდნელმა სტუმრობამ კიდევ უფრო გაახარა. დაწვრილებით მოუყვა ძმებს, თუ რა საუბარი ჰქონდა კაზაკიასთან. გიორგიმ პეტრეს საქართველოში რუსეთის თეიტმპყრობელობის უმსგავსოებაზე ჩამოუგდო საუბარი.

ბესარიონი გიორგისა და პეტრესავით განათლებული არ იყო, მაგრამ ბუნებით მკვირცხლი და გამჭრიახი ეახლდათ, ცხენოსნობასა და ნიშანზე სროლაში ბაღალი არა ჰყავდა. სამივე ძმა განთქმული იყო ვაჟკაცობით და კაცთმოყვარეობით. ძმების გარეგნობამ და ხასიათის სიმტკიცემ მათდამი უნდობლობით განწყობილი მთავარი დაეით დადიანიც კი შოშიბდა. ის მათ სამ მუშკეტერს უწოდებდა. ეს სახელი მალე პოპულარული გახდა სამეგრელოს მაღალ წრეებში...

ბესარიონი ორივე ძმაზე უფრო მაღალი და ტანადი იყო, ენამახვილი და მხიარული ხასიათის. ხალხში მას დეკაკს ეძახდნენ.

თურმე ერთხელ ბესარიონი გურიაში ესტუმრა თავის დას ეკატერინეს — გურიის მთავრის მემკვიდრის, დავით გურიელის ცოლს.

ბესარიონმა თავისი გოლიათური გარეგნობით ყველას ყურადღება მიიპყრო. გურიელის ერთ-ერთმა შინაყმა აზნაურმა გიგინეიშვილმა დადიანს ასე მიმართა:

— რას ხედავს ჩემი თვალები! რა დედამ გშობა ასეთი დეკაკი, ბატონიშვილო!

ბესარიონმა ჯერ არაფერი უპასუხა, მაგრამ, როდესაც გიგინეიშვილი არ მოეშვა და შეკითხვა რამდენჯერმე გაუმეორა, ბესარიონმა სიცილით უპასუხა:

— შე კაი კაცი, რას ჩამაცვივდი, დედამ ამხელა ხომ არა მშობა.

— ბატონო, ყოველ შემთხვევაში, ჩემხელა მაინც დაიბადე-
ბოდით, — მოუჭრა სიტყვა გიგინეიშვილმა.

ლალი და მახვილი ენით დაჯილდოებული ძმები ხანდახან „ვეფხისტყაოსნის“ ტაეპების ზეპირ თქმაში ეჯიბრებოდნენ ერთმანეთს, დადიოდნენ ტყეში; ახლად ამწვანებული ნორჩი ფოთლების შრიალითა და სურნელებით ტკბებოდნენ. ხავერდოვან მოლზე ხშირად გასრიალდებოდა ნაირფერებით ნაქსოვი ხალიჩა და იმართებოდა სჯა-ბაასი, უფრო მეტად საქართველოს სამთავროების აწმყოსა და მომავალზე.

— ბატონიშვილებო, ერთი დიდად საინტერესო ამბავი მომიყვა ამას წინათ ალექსი ფიჩხაია.

— რა ამბავია, მოგვიყევი, — ერთხმად სთხოვეს ძმებმა.

ბესარიონმა ჩაახველა, ხმა ჩაიწმინდა და დაიწყო.

— საქმე ასე ყოფილა, ბატონებო: სოფელ ზიმში ქაიხოსრო ჩიქოვანის ყმა გლეხს, კოჩაია ლემონჯავას რძლად მოუყვანია აბაშელი ქალი.

ლევანს თავისი მოენებების საშუალებით გაუგია, რომ ეს ქალი ძალიან ლამაზი ყოფილა. როდესაც გლეხი კოჩაია ლემონჯავა ქორწილს იხდიდა, დაუპატიჟებელი სტუმარი, მთავარი ლევანი თავისი ამალით მოულოდნელად მისულა. გაიკვირვა თურმე გლეხმა მთავრის სტუმრობა. მაშინვე მიმხედარა ჭკვიანი კოჩაია, რა მიზნით იყო ლევანი მის სახლში მოსული, იმ წუთშივე ქაიხოსრო ჩიქოვანთან გაქცეულა და მოუხსენებია: თქვენ ჩემი პატრონი ხართ, ერთგულად გემსახურებით და გთხოვთ გასაჭირში გვიპატრონოთ, თუ არ დამეხმარებით, მაშინ მე ჩემსას ვიზამ. ოჯახში ბოროტი განზრახვით მოსულ ლევანს თავს შეეაკლაე და მთავარსა და მის თავადის შვილებს საჯაროდ შევარცხვენ.

კოჩაია მშრომელი, მტკიცე ხასიათისა და გულადი იყო. ნათქვამს არ გადაუხვევდა. ჩიქოვანს თვითონაც შეურაცხყოფილად უგრძენია თავი და უთქვამს:

— დამშვიდდი, კოჩა, ჩემს გლეხს რომ ვინმე დაჩაგრავს, ის მე არ მიწევს ანგარიშს. საჩქაროდ წადი შინ, ახლავე დაგეწყვიო.

ქაიხოსრო თურმე მაშინვე შეჯდა ცხენზე და კოჩაიას სახ-

ღისაკენ გასწია. ხალხის საჩვენებლად ქაიხოსრომ მთავარს თაყვანი სცა და ყურში კი თურმე ჩასწურა: —

— აქ რატომ მობრძანებულხარი თუ ზიმიში მოდი, ჩემთან უნდა მოსულიყავით, რა გინდოდათ კოჩია ლემონჯავას სახლში? გადაჭრით გეუბნებით: თუ გნებავთ შინ მესტუმრეთ, არადა სასახლეში წაბრძანდით, ჩვენ გაგაცილებთ.

— ვითომ მართალია? ძალიან კი გაუბედავს მთავრისათვის. — თქვა პეტრემ.

— სრული ჭეშმარიტებაა, თქვენ თავს ვფიცავ. რამდენიმე წუთის შემდეგ ამდგარა ლევანი თავისი ამალით და ლემონჯავას ეზოდან გასულა. ქაიხოსროც აცილებდა თურმე, თან არწმუნებდა: ცხენიან-კაციანად გაგწყვეტდნენ ლემონჯავეები, ქვეყნის სალაპარაკოდ გაიხდიდით თავსო.

გულმოსულ ლევანს გამცილებელი ქაიხოსრო ჩიქოვანი მალე დაუბრუნებია, თვითონ კი ზუგდიდში ჩასვლამდე თურმე სულ იგინებოდა და იქაღნებოდა: სოფელი ზიმი ერთიანად უნდა გავანადგურო, რაღა მთავარი ვარ, თუ ასეთ პატარა სურვილსაც ვერ შევისრულებ, პირველი ღამის უფლებით მე კი არა, უბრალო თავადებიც კი სარგებლობენო, მე კი რა გამიბედეს ესო. ან ის ქაიხოსრო რას ერეოდა ამ საქმეში, მასაც გადაუხადი პატივისცემასო.

— ეს ახალი ამბავია? — იკითხა წარბებშეკრულმა გიორგიმ.

— რამდენიმე თვის, ბატონო, — უპასუხა ბესარიონმა. — გიორგიმ ამოიოხრა, ყრუდ, თითქოს თავის თავს ელაპარაკებო, უიმედოდ თქვა:

— წარმოიდგინეთ რა უბედურებაში ვართ. ასეთი კაცი უნდა მართავდეს ქვეყანას? ეს კიდე რა სამარცხვინო საქმე მოგვსვლია! განა ის არ გვეყოფოდა, რომ სამთავრო საქმეებს ვერ უძღვებოდა ლევანი? ასეთი უზნეობა, ისიც საქვეყნოდ და მის ასაკში! — ბრაზობდა გიორგი.

ლევანის ცხოვრება და მმართველობა არათუ ასეთ ახლობლებს, როგორც ნიკოს შვილები იყვნენ მისთვის, გარეშეებსაც აწუხებდათ. მართალია, ლევანი ერთი შეხედვით კეთილი კაცი იყო, ახლობლებისათვის უხეად ხელგაშლილი, მაგრამ მარტო ეს არ იყო საკმარისი სამთავროს გასაძღოლად. მას გარს

ეზვია მრავალი მლიქვნელი, სახალხო ქონების გამნიავებელი. ლევანმა არც კი იცოდა რა ხდებოდა მის სამთავროში.

ლევანის პირველი მრჩეველი, ანუ როგორც მას ხალხში ეძახდნენ პირველი ვეზირი, ეგრეთწოდებული დიდი ნიკო იყო. ნიკო ჯერ კიდევ ლევანის მამის — გრიგოლის სიკვდილისთანავე მცირეწლოვანი ლევანის მეურვედ იქნა დანიშნული. ის იმავე დროს სამეგრელოს საბჭოს თავმჯდომარე იყო. დიდი ნიკო თავდადებული ერთგულებითა და სიყვარულით ეკიდებოდა სამთავრო საქმეებს. მან შეადგინა კანონის წიგნი „დასტურლამა“. დიდი ნიკო კარგ თვისებებს უნერგავდა მცირეწლოვან ლევანს, ამზადებდა ღირსეული მთავარი გამხდარიყო, მაგრამ მას ბუნებით დაჰყვა სუსტი ნებისყოფა, საკუთარი სურვილების აყოლა, რაც ძლიერ უშლიდა ხელს საზოგადოებრივ მოღვაწეობაში.

ლევანი იმდენად მიმზიდველი და გულუხვი იყო, რომ მრისხანე რუსთა ხელმწიფე ნიკოლოზ პირველიც კი მოსიბღლა.

ნიკოლოზ პირველი ლევანს ესტუმრა ზუგდიდში და იქ სამი დღე დარჩა. ეს ახირებულად ჩაცმული მთავარი ნიკოლოზს იზიდავდა თავისი სილამაზით, უხვი პურ-მარილით. მთავრის ასეთი ხელგაშლილობა მთელი სიმძიმით აწვებოდა გლეხებს კისერზე. მთავარი ფლანგავდა და არც კითხულობდა, თუ საიდან მოდიოდა ქონება. მან კარგად იცოდა, რომ ეს გლეხის ღუქმაპური იყო, რომელსაც პირიდან აცლიდნენ მას, მაგრამ ლევანი თვალს ხუჭავდა, არ უნდოდა ამის დანახვა.

ლევანს ძალიან უყვარდა ნადირობა. დღენიადაც სანადიროდ ტყეში გაჭრილს სამთავრო საქმეებისათვის არც კი ეცალა. მისი სამუშაო კაბინეტი, სადაც მთხოვნელებს ღებულობდა, თითქმის სულ გამოკეტილი იყო. კვირაში ერთხელ თუ შეიხედავდა კაბინეტში, მაშინაც ჩქარობდა, თითქოს ნემსებზე იჯდა და ათიდან ერთ-ორ მთხოვნელს მიიღებდა. არც საბჭოს თავმჯდომარე დიდი ნიკო იჯდა ადგილზე. მას ხაგარეო საქმეების გამო ხან იმერეთში უხდებოდა მგზავრობა, ხან ქართლში, გურიაში და ზოგჯერ რუსეთშიც. ლევანს სწორედ მაშინ გაეხსნებოდა ხელ-ფეხი და უსაზღვრო გან-

ცხრომას ეძლეოდა. ნიკოს შემცვლელი მრჩეველი, რა თქმა უნდა, მთავარს ვერ გაუბედავდა შენიშვნის მიცემას.

— ბატონო მთავარო, — მოახსენეს ერთხელ ლევანს, — ძლიერ ცუდი ამბავი მოხდა, აბაშიდან და ძველ სენაკიდან დადიანისა და მხეიძეების ყმები ას კაცამდე აყრილან და იმერეთში გაპარულან, მეფე სოლომონს მიჰკედლებიან.

— რატომ? — იკითხა გაოცებულმა ლევანმა.

— ძლიერ მკაცრი პირობები შეუქმნიათ მათთვის მებატონეებს. მაგრად უჭერენ თურმე ქანჩებსა და ხაჯალურებს.

— რამდენჯერ ვთქვი, მაჩვენეთ ერთი რა არის ეს ქანჩი და ხაჯალური, — გაბრაზდა მთავარი. — მშმიყვანეთ ის თავადები, რომლებიც ხმარობენ ამ იარაღებს.

ლევანს თავისი ბრძანება იქვე ავიწყებოდა. მის მოხელეებს კი არც თავადები მოჰყავდათ, არც ქანჩები და ხაჯალურები მოჰქონდათ და გლეხების ტანჯვა-წამება ძველებურად გრძელდებოდა. გაივლიდა რამდენიმე დღე და მთავართან კვლავ ახალი შემადრწუნებელი ამბავი მოჰქონდათ.

— ხორგიდან ოცდაათი ახალგაზრდა ქალ-ვაჭი გაუტაცნიათ ოსმალისთვის მისაყიდად.

— ოხ, ოხ, — შეწუხდებოდა მთავარი, — ვერ მოვლოკე ეს წუწკი თავადები. მაგრამ, აი ჩამოვა ნიკო და მე მათ ვაჩვენებ სეირს! — დაემუქრებოდა მთავარი ყმების გამყიდველ თავადებს.

ნიკო ჩამოდიოდა, მაგრამ მთავრის მუქარა მუქარადვე რჩებოდა. თავადები შაინც თავისას აკეთებდნენ, ყმების გამკითხავი კი არავინ იყო.

— მთელი კვირაა გლეხები იცდიან, დიღო ბატონო, — მოახსენებდნენ მთავარს.

— ვინ არიან?

— თოდუები და ხეიჩიები გახლავთ.

— ვისი ყმები არიან?

— დგებუაძეების, ჩაჩიბაიების, ფალავებისა და ანჯაყარიძეების.

— რას თხოულობენ, მთელი ჯარი რომ ამდგარა და მოსულა.

— მხოლოდ ოთხი კაცი გახლავთ, დიღო ბატონო, თქვენს ნახვას თხოულობენ.

— შემოუშვით, ოღონდ დიდხანს ნუ გააჩერებთ აქ. თქვან თავისი და წავიდნენ. დღეს ბევრი საქმე მაქვს, ბონდის ხილი ჩანგრეულა, ხობის წყლის გაღმა სანადიროდ ვერ გავედი, იქ ჩინუები მელოდებოდნენ.

გლეხები შემოიყვანეს, მთავარს მდაბლად თაყვანი სცეს.

— რაზე გარჯილხართ? — შეეკითხა მათ ლევანი.

ერთი ხნიერი გლეხი წინ წარსდგა და ასე დაიწყო:

— დიღო ბატონო, ისე არ დააკლდა სიკვდილი თქვენს მტერს, რა ვარც გარჯა და ტანჯვა ჩვენ არ გვაკლია. გვიხსენი უსამართლობისაგან. სულსა გვხდიან, ტყავს გვაძრობენ ბატონები.

— რას უშავებთ ისეთს? — მთქნარებით შეეკითხა მთავარი.

— ჩვენ ყველაფერი დანაშაულად გვეთვლება. ავად გავხდებით — დანაშაულია, ღალის მიტანა დაგვაგვიანდება — დანაშაულია. მოსავალი ნაკლები მოგვივა, ესეც დანაშაულია.

— მოსავალი უნდა მოიყვანოთ.

— რაფერ მოიყვან, ბატონო, მოსავალს, როცა ამინდი ჩვენს ჭკუაზე არ მოდის. ჩვენ ხომ მხოლოდ შრომისათვის ვართ გაჩენილი და ყანას გულს არ დავაკლებთ.

— ჩინებულა, წადით, კარგად იმუშავეთ, ღმერთი მოწყალეა. ამინდი ხელს შეგიწყობთ და ბატონიც მადლიერი გეყოლებათ. — წამოდგა მთავარი, რითაც გლეხებს ანიშნა — მეტა სალაპარაკო არაფერი მაქვსო.

სახტად დარჩენილ გლეხებს სათქმელი პირზე შერჩათ.

მთავარი გავიდა.

ბევრი ასეთი ამბავი იცოდნენ ნიკოს შვილებმა. გიორგი ბოლთას სცემდა და თან ძმებს ელაპარაკებოდა:

— რამდენჯერ არ მოვახსენე მამას, რომ დაეთანხმებინა ლევანი გადადგომაზე, დაეჩქარებინა თავისი ძის დავითისათვის მთავრის მოვალეობის გადაცემა. დედოფალიც ხომ არა ერთხელ შემინუხებია ამ საქმეზე საუბრით. ლევანთან არავის არაფერი არ გაუვა. ეს ყოვლად საპატიო ქალიც ვერ ახდენს გავლენას თავის მეუღლეზე.

— თორემ დავითი კი მისცემს შეღავათს გლეხებს, — თქვა ბესარიონმა გულგრილად.

— ყოველ შემთხვევაში, მამამისზე მეტს კი გააკეთებს

ხალხისთვის, განათლებული კაცია, ზნეობადაცული ახალგაზრდა, რუსეთის ცხოვრებასაც გაცნობილი. თქმა არ უნდა, მათთან უფრო მეტ საერთო ენას გამოიხატავს.

— ბატონო ჩემო, თუ მოისურვა დავითმა, იცოცხლე, მას გასაკეთებელი ბევრი აქვს სამთავროში.

— რატომ არ მოისურვებს, რომელ ქვეყნის მმართველს არ უნდა თავისი ქვეყნის დაწინაურება, ხიდებსა და გზებს მაინც შეაკეთებს. ვაჭრობა-მრეწველობას განავითარებს, სკოლების გახსნაზე იზრუნებს. ჩვენი ქვეყანა განა ისე ღარიბია გონებით, რომ ჩვენი ბუნებრივი სიმდიდრის ათვისების უნარი არ გაგვაჩნდეს.

— ჩემო გიორგი, ახლა არც მთლად ლევანის ნებაა ჩვენი კუთხის მოწყობა. ხომ ხედავ, ჩვენს ქვეყანას რუსთა ხედვების ჩინოვნიკები განაგებენ, — უთხრა პეტრემ ძმას, პაპიროსს მოუკიდა. თითქოს უნდოდა გულში დაგროვილი ბოლმა თამბაქოს კვამლისათვის გაეყოლებინა.

— პეტრე, შენ გონიერ კაცს გეძახიან, ჩემზე მეტი ქვეყნები მოგივლია, — მიუგო გიორგიმ. — შეგიძლია ჩემზე კარგად ჩაიხედო სამთავროს საქმეში. თუ თვითმპყრობელობის წარმომადგენლები ჩვენი კუთხის კეთილმოწყობაზე არ ფიქრობენ, ესეც ლევანის ბრალია. რუსი მოხელეები არავითარ ანგარიშს არ უწევენ ლევანს. განა მხოლოდ ქეიფობითა და სუფრას გაწყობით მოიგებ რუს მოხელეთა გულს. ქვეყნის მმართველი ჭკუით და საქმით ფასდება და არა პურ-მარილით. აბა, რა ჭკუა და საქმე უნდა უჩვენოს მათ ლევანმა? დღედაღამ ნადირობისა და ქეიფის მეტს არაფერს აკეთებს.

— რატომ ვერ დაეარწმუნეთ ამაში, ბატონო, დიდი ნიკო! — სიტყვა ჩამოართვა ძმას ბესარიონმა.

— დიდი ნიკო დარწმუნებულია, მაგრამ თვალს ხუჭავს. ცუდის გაგონება არ სურს ლევანზე. ის ხომ ნიკოს აღზრდილია და შვილივით უყვარს.

— ეს რა სათქმელია, ბესარიონ, შენი ჭირიმე. — გაბრაზდა გიორგი. — საქმისადმი ასეთი მიდგომა არც ძამას ეკადრება და არც ჩვენ. საქვეყნო საქმეში ერთმანეთს არ უნდა მოვერიოდოთ და პირში ვუთხრათ სიმართლეს. მლიქვნელობამ და პირში ყურებამ ბევრი უბედურება მოუტანა საქართველოს, გვეყოფა.

დროა პირადი ინტერესები ქვეყნის საქმეს ვანაცვალოთ. თუ ასე არ მოვიქცით, ცუდი დღე დაგვადგება. არა, ჩვენ თვითონ უნდა ჩავერიოთ სამთავროს საქმეში, სანამ გვიან არ არის. ჩამოვიყვანოთ თბილისიდან დავითი და ვთხოვოთ უპატრონოს თავის გადატაკებულ სამთავროს.

— ჩემო გიორგი, მამა რომ რუსეთში მიბრძანდებოდა, ზომ დაგიბარა, რუსეთიდან თბილისში გამოვივლი და დავითს მოველაპარაკებო. აქ კიდევ ლევანს დავიყოლიებთ, დავითი მოკლევ ხანში დაიბაროს და სამთავროს მართვა-გამგეობა მას გადასცეს. მოთმინება ვიქონიოთ და დაველოლოთ მის დაბრუნებას, — დაამშვიდა პეტრემ გიორგი.

ბ ი ო რ ბ ი

აღდგომის წინა ღამე იყო. ზუგდიდის სამთავრო ტაძრის ზარების გუგუნი შორს გაისმოდა. გუგუნი ძლიერად იჭრებოდა დადუმებულ და ჩამუქებულ ტყეში, ფოთლების შრიალსა და შარიშურს ეხმაურებოდა, სტვენაში ჩათვლემილ ბულბულსაც აკრთობდა.

ახალი მთვარის სხივები ჯერ კიდევ უძლური იყვნენ, მტრედისფერ ღრუბლებს ვერ ებრძოდნენ. გადახრილ მთვარესთან მიყვებოდნენ სხივები, თანდათან შორდებოდნენ თემშარას, რომელსაც უღრანი ტყე შუაზე გაეჭრა, რათა ქალაქი ზუგდიდი ადვილად დაეახლოებინა სალიპარტიოსა და სამეგრელოს განაპირა ნაწილებთან.

თემშარაზე მიმავალი დიდი ნიკოს ვაჟები: გიორგი, ბესარიონი და პეტრე — თავიანთი ბედაურებითა და მრავალრიცხოვანი მხლებლებით ხმაურით არღვევდნენ ღამისა და ტყის მღუმარებას. ისინი ჩქარა მიდიოდნენ, აღდგომის ცისკარზე ზუგდიდში უნდა ყოფილიყვნენ. ნოლადან დღისით გამოვიდნენ, მთვარის სინათლის იმედი ჰქონდათ, მაგრამ ვერ მოზომეს; ახალმა მთვარემ მალე უღალატა მათ. თემშარას თანდათან სიბნელე იპყრობდა. ლაპარაკში გართულებს გზა ფოცხვერმა გადაუჭრა, ოდნავ შეკრთნენ ცხენები.

ბესარიონმა და გიორგიმ დამბაჩები იძრეს, ესროლეს, მაგრამ დააცილეს.

შეშინებულმა ფოცხვერმა გზის მეორე მხარეზე ამართულ ტყეს მისცა თავი.

ბესარიონმა ცხენი ტყისკენ გააქანა და ნადირს ტყვია კვლავ ესროლა; ახლა მხლებლებიც მიეშველნენ. გაეკიდნენ, ატყდა სროლა, გიორგიმ დამბაჩა შეინახა და ბესარიონსა და მის მხლებლებს მიაძახა:

— თავი დაანებეთ, ბატონო, ასე გვიან ამ ულრან ტყეში მხეცს ვინ მოძებნის?

— გამექცა, ეგ ურჯულო, — თქვა გულმოსულმა ბესარიონმა და ძმებს მიუახლოვდა.

— ძლიერ ვწუხვარ, ბატონიშვილო, რომ აღდგომა დილით ნადირობა გაგიცუდდათ.

— გაგვთვალა მაგ ოხერმა. — თქვა ბესარიონმა და გულიანად გაიცინა.

გიორგიმ კი ამოიხვნეშა, ძმებს გადახვდა და ნაძალადევი ღიმილით თქვა:

— რაღა ეს გვინდოდა, ისედაც საუაღალოა ჩვენი საქმე. გული კარგს არ მეუბნება, სევდა შემომწოლია, ვერ ვიშორებ. სულ არ მიწევდა გული ამ საღამოს აქეთ წამოსასვლელად, ოღონდ ხათრი ვერ გაგიტყხეთ.

პეტრემ ცხენს სადავე მოსწია, გიორგის მიუახლოვდა და ნელი ხმით უთხრა:

— რატომ ხარ, გიორგი, ასეთი მგრძნობიარე, ლევანსე რომ გულდაწყვეტილი ვართ, ეს იმას როდი ნიშნავს, საზოგადოებაში არ გავვერიოთ.

— შენ ყველაზე ადრე შეატყვევე ლევანს, როგორი მთავარიც იქნებოდა იგი. გახსოვს, ჯერ კიდევ ჭაბუკებს მამა გვეუბნებოდა: სასახლეში იარეთ, ლევანს დაუახლოვდითო. გვთხოვდა დავსწრებოდით თათბირებს და მსჯელობებს სამთავროს მართვა-გამგეობაზე. როცა მამა-ბატონი მოხუცდა, თავისი ადგილი შენ შემოგთავაზა. მაგრამ შენ უარი უთხარი. ეს ლევანს და ნაწილობრივ მის ვაჟებსაც არ ესია მოვნათ.

— ჩემო პეტრე, ესია მოვნათ კი არა, მას შემდეგ მე მტრად ვეგულები ლევანს. მაგრამ მაღლა ღმერთია მოწამე, რომ მე

მასთან სამტრო არაფერი მაქვს. რა უნდა მექნა. ხომ იცით ჩემი ხასიათი. მე ვერ ავიტანდი იმ ქარაფშუტობას, რაც ახლა სასახლეში ხდება. სამთავრო უპატრონოდაა მიტოვებული. ხალხის გამკითხავი არავინაა. თავადების აღვირახსნილობას საწლვარი არა აქვს.

— გიორგი, შენ თუ გული შეგტკივა ხალხზე, სამთავროზე, მაშინ სასახლეს კი არ უნდა განერიდო, პირიქით, ჩაერიო სასახლის საქმეებში.

— ხო, მაგრამ ჩემი ფიცხი ხასიათით, ალბათ, ერთი დღეც ვერ შევეწყობი ლევანს.

— ერიდები შენს თავს...

— არა მარტო ჩემს თავს, ბევრ სხვა რამესაც. ლევანი მე არ დამიჯერებს, მე მას არ დავუჯერებ, არ მოვუთმენ იმას, რასაც მამა უთმენს და ხომ იცი, ამას რა მოჰყვება.

— მაგრამ ლევანი და რუსი მოხელეები ახლაც არ გიცქერნიან კარგი თვალით, შენს გამო კი ჩვენც არ ვახატივართ გულზე. მამასაც უკვე ეჭვის თვალით უყურებენ, მამას, რომელმაც მთელი თავისი ძალ-ღონე სამთავროს სამსახურს შეაღია. მამას მარტო ის ეყოფა დამსახურებად, რომ ჩვენს კუთხეში ის იყო ერთ-ერთი პირველი მოთავე საქართველოს რუსეთთან შეერთებისა. ახლა შენს გამო ლევანის კაცები ისე ხატავენ სურათებს, თითქოს არა მარტო შენ, მთელი ჩვენი ოჯახი ხმალს ლესავს რუსეთის წინააღმდეგ.

— გონიერმა რუსმა მოხელეებმა კარგად იციან, რომ მე ხმალს ვლესავ იმ აღვირახსნილი მოხელეების წინააღმდეგ, რომლებიც არაფერს ერიდებიან ხელის მოსათბობად, არც ხალხის დამცირებას, არც სისხლს, არც ტყუილს. მე ყოველთვის მზად ვარ ვებრძოლო ასეთ მძარცველებს, ვისაც არ უნდა მოხვდეს ეს გულზე — გინდ მთავარს, გინდ მთავარმართველს. ჩემი ქვეყნის საქმეს ყველაფერს ვანაცვალებ. ლევანს ჰგონია, რომ ტახტს ვეპოტინები. ღმერთმა დამიფაროს ასეთი ფიქრისაგან. იგი თავის უგუნური მოქმედებით სამთავრო ტახტს თვითონ დაუკარგავს სამეგრელოს სამუდამოდ, თუ დავითი დროზე არ ჩამოვიყვანეთ.

— გიორგი, უნდა ერიდო ლევანს, — მიმართა ძმას ბესა-

რიონმა. ხალხში სულ უფრო და უფრო ხშირად გაისმის სმები, რომ თითქოს შენ ტახტს ეცილები ლევანს.

ასეთი საუბრით შევიდნენ ძმები ზუგდიდში, ეკლესიის გალავნის გარეთ დატოვეს ცხენები, თვითონ განათებულ ტაძარს მიაშურეს: საკურთხეველთან მარცხნივ ლევანი და მისი მეუღლე — წერეთლის ქალი, მართა, იდგნენ. ჭყონდიდელი წირავდა.

ტაძარში მღვდელთმსახურება მთავრდებოდა, სანთლების ალი თანდათან ძალას კარგავდა მოახლოებული განთიადის შუქზე.

ის-ის იყო ძმები მთავრის უკან დადგნენ და ხელი ასწიეს პირჯვრის გადასაწერად, რომ უცებ ხალხმა გზა უტია ვიდაცას. მეფის გენერალი სწრაფად მიეშურებოდა საკურთხეველისაკენ. აი იგი მობრუნდა, შედგა, შეხედა გიორგის.

— თქვენ დაპატიმრებული ხართ ღვთისაგან მირონცხებულ თვითმპყრობელ რუსთა ხელმწიფის ტახტის ორგულობისათვის. ტაძარი გარშემორტყმულია ჯარით, გირჩევთ, თქვენივე ხელით აიყაროთ იარაღი და ჩაგვაბაროთ!

გიორგიმ მთავარს შეხედა, რითაც ანიშნა — ეს შენი ნამოქმედარია თუ ამ ზიზილპიპილებით შესუნძლული ვირთხისაო!

ატყდა საშინელი ხმაური და კივილი.

— მთავარო, დიდი ნიკოს ოჯახისათვის ეს არ უნდა გეკადრებიანთ, ჩემი გვარი სამთავროს ორგული არასოდეს არ ყოფილა, — უთხრა ლევანს გიორგიმ და აღარ დააყოვნა, სმალ-შემართულ გენერალს ომახიანად შესძახა: ეი, ვირთხავ, ვწუხვარ, რომ იბულებული ეხდები ტაძარში ვიშიშვლო მახვილი, აი რა მოგაქვთ თქვენ ჩვენთვის, რას უჩვენებთ, რას აჩვენებთ ხალხს. დამხვდი შენი ჯარით! — უმადლოდუ უფალს, რომ ტაძარში ხმალს ვერ მოვიხმარ, — კვლავ ხმამაღლა შესძახა სიკვდილის შესახვედრად უშიშრად მდგარ, ხმალამოწვდილ გენერალს, თუ ვაჟკაცი ხარ, გამომყევი, გარეთ გავსწორდეთ! — გიორგიმ გასასვლელისკენ გასწია.

ბესარიონი მხარდამხარ მიჰყვებოდა ძმას. მათ ისარგებლეს აურზაურით, გალავნიდან გადმოვიდნენ და სასწრაფოდ ცხენებს მოახტნენ.

ვიდრე გენერალი და მისი ჯარი გონს მოვიდოდა, გიორგი და ბესარიონი ზუგდიდის თემშარაზე მიაგეღვებდნენ დაოთხებულ ცხენებს. გიორგის აწუხებდა, რომ პეტრე მათთან არ იყო. ბესარიონი კი ამშვიდებდა: კარგია რომ პეტრე იქ დარჩა. ის შეანელებს მომხდარ არეულობას.

მართლაც პეტრე იმ ღამეს დაესწრო თათბირს, რომელზეც ბჭობდნენ თუ რა ზომები მიეღოთ გიორგის დასასჯელად.

საქმის გამწვავებას ახლა ყველა უფრთხილდებოდა, პეტრეს დაავალეს ძმას დადევნებოდა და გიორგი გენერალსა და სამთავროსთან შეერიგებინა.

პეტრე სიამოვნებით დათანხმდა. მეორე დღესვე დაედევნა ძმებს, რომელთა კვალი კურზუსკენ მიდიოდა. არავინ იცოდა, პეტრემ მიუსწრო თუ არა კურზუში გიორგის. ეს კია, რომ მარტო დაბრუნდა, ხოლო გიორგიმ თავისი ვაჟების — დავითის და კოწიას თანხლებით თავის სიმამრს სვანეთის მთავარს ისმაილ დადემშქელიანს შეაფარა თავი.

მეფის მოხელეებმა რამდენჯერმე მიმართეს დადემშქელიანს გიორგი ჩამოეყვანა, მაგრამ ის მათ ყოველთვის ერთ და იმავე პასუხს აძლევდა: გიორგი ჩემი სტუმარი და მეგობარია, მეგობრისა და სტუმრის ღალატი სჯულის ღალატზე უარესიაო.

მალე გიორგიმ თვით გადაწყვიტა თავისი საქმე. სიმამრის დახმარებით კარგ მებრძოლ ვაჟაკებს მოუყარა თავი და თქვა:

— არაფრით არ დავზოგავ ლევანს. მან მე ქვეყნის ამრევად გამომიყვანა, სამშობლოდან გამომაგდო. ლევანი ცუდი მმართველია, მოკავშირეების თვალში ვერავითარ პატივს ვერ იმსახურებს, ლევანს ისიც კი გაუბედა გენერალმა, რომ, მისი სისხლი და ხორცი, ტაძარში შევეპყარი, დარწმუნებული ვარ, გენერალთან ლევანმა თვითონ დამაბეზლა. ჩემი დაპატიმრების განზრახვაც ლევანისაგან მოდის. ვერ გაითვალისწინა, ასეთ პირობებში დაპატიმრება რა ჩირქს მოცხებდა თვით მას და რუსეთის წარმომადგენელს. სად გაგონილა წმინდა საკურთხეველთან ადამიანის დაპატიმრება და ისიც აღდგომა დღეს!

სვანეთიდან წამოსული გიორგი ყაბარდოში გადავიდა.

ნათესავ-მოყვრების საშუალებით იქაც შეკრიბა მოხალისე-ები, შემდეგ თავის სიძეს — მიხეილ შერვაშიძეს, აფხაზეთის მთავარს, ესტუმრა და საქმის ვითარება საიდუმლოდ გა-აცნო.

მიხეილი მას გულთბილად და თანაგრძნობით შეხვდა. წააქეზა გადაყენებინათ ლევანი და სამეგრელოს კუთხის მართვა-გამგეობას თვით გიორგი ჩადგომოდა სათავეში.

— ბატონო ჩემო, ჩემს მიზანს ოდნავადაც არ შეადგენს მთავარი გავხდე. მე ამისათვის ჩემი ხალხის ერთ წვეთ სისხლს არ დავღვრი, — უთხრა მიხეილს გიორგიმ მისი წინადადებით განაწყენებულმა. — საქართველოს რუსეთთან შეერთება ჩვენს ქვეყანას ახალ გზაზე აყენებს, ააღორძინებს. ფრიად უგონო უნდა იყო კაცი, რომ ახლა გამთავრება იფიქრო. სამთავროება მალე გაუქმდება, ვინაიდან ჩვენ რიგიანად ვერ ეუძლებით მას. რუსეთის მეფესაც ეს უნდოდა. ჩვენ მის წისქვილზე ვასხამდით წყალს. იმის მაგივრად, რომ ერთმანეთს მხარში ამოვდგომო-დით და ჩვენი ქვეყნის წინსვლაზე გვეფიქრა, მთელი ჩვენი ძალ-ღონე შულლსა და მტრობას შევადიეთ, ხალხი გავაჩა-ნაგეთ. ჩემი ერთადერთი სურვილია ლევანის ბატონობას ბო-ლო მოვუღო. ჩვენი მთავარი ფუქსავატი და ენატანია ადამიან-ებით არის გარშემორტყმული. ისეთი მმართველი, რომელიც ერთგულს ორგულისაგან ვერ არჩევს, უნდა აილაგმოს და ჰე მას აელაგმავ კიდევც.

— სანამ სამთავროები გაუქმდებოდეს, ჩემო გიორგი, მანამ სამეგრელოს ხალხს თავისი დაეძარტება. ამიტომ გთავაზობ მე გამთავრებას. სხვა არავინ მეგულება ისეთი, რომელსაც შენსავით შესტკიოდეს გული ხალხზე, სამთავ-როზე. შენზე უკეთ არავინ იცნობს სამეგრელოს სამთავროს ჭირ-ვარამს. აი, ამიტომ იქნება კარგი, რომ სათავეში ჩაუდგე შენს ქვეყანას და არა იმიტომ, რომ მთავრის ადგილი გიტა-ცებს, ღმერთმა დამიფაროს ასეთი ფიქრისაგან.

მიხეილი ერთს ამბობდა და გულში სხვას ფიქრობდა. მას ხალხის ბედი, მისი გასაჭირი კი არ ალაპარაკებდა, თავის გამორჩენაზე ფიქრობდა, სიმამრის მეშვეობით იქნებ სა-მურზაყანოს საკითხი თავის სასარგებლოდ მოეგვარებინა.

რუსეთს სამურზაყანოს საფასური სამეგრელოსა და აფხაზეთისათვის გაენაწილებინა.

— სამეგრელოს ჰყავს სამთაერო კაცი, — მიუგო მიხეილს გიორგიმ. — ის სიძის სახეზე გარკვევით კითხულობდა, თუ რა ელო გულში, რა ამოძრავებდა და რატომ აქეზებდა სიმამრს ტახტი წაერთმია ლევანისათვის და ძლივს ფარავდა თავის ზიზღს. გადაწყვიტა არ ეთხოვა ჯარი სიძისათვის, დაუყოვნებლივ დაეტოვებინა იქაურობა და სამეგრელოში დაბრუნებულიყო. — მთავრის წულს, დავითს, ვფიქრობ, არა ნაკლებ შესტკივა თავის სამთაეროზე გული ვინემ მე და შენ, მიხეილ. ამ საკითხში, როგორც ჩანს, ჩვენი აზრები სხვადასხვაა. მე ჩემი მცირე ჯარით ხეალვე უნდა გავეშურო სამეგრელოში, მოეთხოვო ლევანს დაუყოვნებლივ გადადგეს და ტახტი დავით დადიანს ჩააბაროს.

გიორგი და მიხეილი განმარტოებით საუბრობდნენ. მიხეილის მეუღლე ცუცუ და ცოლის და მათი კი უღარდელად ისხდნენ მაიას ოთახში. მათ არაფერი იცოდნენ სამეგრელოში მომხდარ ამბებზე. ძლიერ გაიხარეს მამის ჩამოსვლით. ახლა ისინი მოუთმენლად ელოდნენ როდის დაამთავრებდა მამა მთავართან საუბარს, რომ დამტკბარიყვნენ მისი ცქერითა და ალერსით. მეორე დღეს მამამ მოულოდნელად რომ გამოუცხადა, დღეს უკან უნდა დავბრუნდეთ, დები შიშმა აიტანა, გუმანით მიხვდნენ, მამის თავზე რაღაც კარგი ამბავი არ ტრიალებდა, მაგრამ დაწვრილებით გამოკითხვა ვერ გაუბედეს. გიორგიმ დილით ადრე დატოვა მთავრის სასახლე.

* * *

გიორგი თავის ჯარით ენგურგალმა დაბანაკდა და სამეგრელოს მთავარს შეუთვალა:

— მშვიდობიანი გზით მინდოდა ტახტიდან შენი გადადგომა. ვუცდიდი მამის დაბრუნებას, რომ დავითი ჩამოეყვანა თბილისიდან და მისთვის განკუთვნილი ადგილი დაეკავებინა. მაგრამ დრო არ ითმენს. მთავრად შენი ყოფნა, მეტი არა ვთქვა, სამარცხვინოა, შენ შავი აღდგომა გამითენე არა მარტო

მე და დიდი ნიკოს ოჯახს, მის შვილებს, მთელ ხალხს. წინადადებას გაძლევ დღესვე აფრინო კაცი თბილისში და დაიბარო დავითი. შენ კი მის ჩამოსვლისთანავე დაუთმო მას ტახტი. თუ დღესვე არ მომცემ ამის დასტურს, ხვალ ლაშქარს დავძრავ სასახლისაკენ და პირდაპირ ხმალში გიწვევ!

ლევანი სრულიად მოუშზადებელი იყო ასეთი მოულოდნელი უბედურებისათვის. მას არც თავისი ჯარი ჰყავდა და არც რუსთა ხელმწიფის ჯარი ეგულებოდა ახლოს. სასწრაფოდ მოიწვია სამთავროს საბჭო; ბევრნი იმ აზრისა იყვნენ, რომ გიორგისთან ბრძოლა გაემართათ, ხოლო უმრავლესობას სურდა მოლაპარაკება ზავით დამთავრებულიყო. ლევანის მეუღლე ზურაბ წერეთლის ქალი, მართა, ყველას გულდასმით უსმენდა. მასში გაიღვიძა ძველი ქართველი ქალის ბუნებამ, მას თითქოს გადაეცა გრძნობა საუკუნეობით განთქმული კრავაი ჯაყელის, ცოქალასი და სხვა გმირი ქალებისა, რომელთა ჩარევით სახელმწიფო საქმეები გვარდებოდა, და მართაჲ ქმარს ასე განუცხადა:

— ნება მიბოძეთ, ბატონო ჩემო, მოსალაპარაკებლად მე წავიდე ჩემს მაზლისწულთან, გიორგისთან.

— ეს შეუძლებელია! — გაისმა ხმები, — შენ როგორ გეკადრება.

ბევრი იდავეს, მაგრამ მართამ მაინც თავისი გაიტანა. რამდენიმე მხლებლით მალე მშფოთვარე ენგურს მიადგა, ბანაკიც გამოჩნდა.

მხლებლები შეკრთნენ და მართას მოახსენეს:

— გარდა იმისა, რომ მდინარე ძლიერ აღიდებუღია, შეიძლება გიორგი ბატონიშვილმა ტყვედ ჩაგვიგდოს თქვენცა და ჩვენც. ამით მას უპირატესობა მიეცემა ბრძოლაში და იძულებული გაეხდება დათმობაზე წავიდეთ.

— როგორ გეკადრებათ გიორგის ასე დამცირება, ის დიდი ნიკოს შვილია. თქვენ მდინარეს გაღმა გამიყვანეთ, გიორგი მაჩვენეთ, დანარჩენი მე ვიცი.

როგორც კი მხლებლები ფონს მიუახლოვდნენ, მართამ არავის დაუცადა, ცხენს მათრახი გადაჰკრა და ენგურის ზვირთებში შეაგლო ბედაური.

გაღმა გასულებს გიორგის ლაშქრის მხვერავები შემოი-

ვდათ. არ იცოდნენ როგორ მიეღოთ ეს დიდებული ქალი. ბანაკში ხმა გავარდა, მთავრის მეუღლე გვეახლო. გიორგი ამ ამბავმა ძლიერ გააკვირვა, მართას მაშინვე მიეგება და გულზე ამბორი მოუნდომა. მართამ სალამი აღარ დააცალა, თვითონ ეამბორა გიორგის, როგორც დედა თავის შვილს.

— არ მინდა დავიჯერო, შვილო ჩემო, რომ ლაშქრით მოდიხარ შენს სამთავროში. რაც უნდა დიდი იყოს ის შეურაცხყოფა, რომელიც ლევანმა მოგაყენა, ეს მაინც არ გაძლევს საფუძველს შენი ხალხის სისხლი დაღვარო.

— ხალხის სისხლის დაღვრა არც მიფიქრია, მართა ბატონო. მთავრის მოქმედებაზე პასუხს ხალხი არ აგებს. — ცივად მოუჭრა სიტყვა დედოფალს გიორგიმ.

— ვიცი, შვილო, რომ ლევანი ბევრ რამეში ტყუის ხალხთანაც და შენთანაც. იმასაც ვხედავ, რომ მას არ ძალუძს სამთავროს გაუძღვეს. დიდი ნიკო რუსეთიდან დაბრუნდება თუ არა, ვაახლებთ დავითს თბილისში...

— მეტს არაფერს მოვითხოვ მთავრისაგან, — შეაწყვეტინა სიტყვა დედოფალს გიორგიმ. — დავენდობი შენს მართალ სიტყვას, დედოფალო, და დღესვე უკან დავძრავ ჩემს ლაშქარს. მაღალი ღმერთი მოწამეა, რომ მხოლოდ ხალხის და სამთავროს სიყვარულმა მაიძულა ასეთ რისკზე წავსულიყავი, სმალამოღებული მოვდგომოდი სასახლის კარიბჭეს. ამავე სიყვარულმა და არა მეუღლის დამარცხების შიშმა გაიძულათ თქვენ ამ უდროო დროს ცხენით გადმოველახათ ადიდებული მდინარე. ბედნიერი ვარ, დიღო ქალბატონო, რომ ჩემი და თქვენი ფიქრები, ჩვენი შეხედულებები ერთმანეთს ემთხვევა, ერთი მიზნისაკენ არის მიმართული. — გიორგიმ მუხლი მოიყარა დედოფლის წინ და კაბაზე ემთხვია.

აღელვებულმა მართამ სწრაფად წამოაყენა გიორგი და დედობრივი ალერსით მკერდში ჩაიკრა. მერე თავისი ცხენი მოითხოვა. გიორგიმ თვითონ შესვა დედოფალი ცხენზე და გაღმა გაიყვანა. უკან გამობრუნებისას ფონიც არ მოუძებნია, პირდაპირ გადაეშვა ენგურის მღვრიე ტალღებში, ნაპირზე გავიდა და თავის ბანაკს მიაშურა.

ახლოვდებოდა რუსეთში ალექსის გამგზავრების დრო. მძიმე იყო შეყვარებულთათვის განშორება. ისინი თავიანთ ფიქრებს ჯერ არაყის უმხელდნენ. ალექსის მოუცლელობის გამო არ შეეძლო ახლა მათა დაენიშნა. ამას ბევრი ცერემონი-ალი სჭირდებოდა. მიხეილი კი ძლიერ აჩქარებდა ალექსის რუსეთში წასვლას.

ალექსი გაემგზავრა. დადიანის ქალები ყოველდღე დაპირე-ბულ ბარათს მოელოდნენ მისგან.

რამდენიმე დღას შემდეგ მიხეილ შერვაშიძის სასახლის ეზოში ვილაცამ ცხენი შემოაჭენა. მხედარს მხოლოდ ახლა გაახსენდა, რომ წესისამებრ ჭიშკართან უნდა ჩამომხტარი-ყო. ის შუა ეზოში გადმოხტა ცხენიდან. მას სტუმრის შესა-ხედრად მიჩენილი ახალგაზრდა მიეგება და ცხენი ჩამოართოა.

— მთავარი შინ ბრძანდება?

— კი, ბატონო.

რამდენიმე წუთის შემდეგ ახალმოსული მიხეილის სამუ-შაო ოთახში იდგა თავდახრილი და მთავარს ხმადაბლა ესაუბ-რებოდა. გაფითრებული მთავარი კი ყურს უგდებდა.

— ეს რა უბედურება მომხდარა? თქვა აღელვებულმა მიხე-ილმა, ადგა, ოთახში გაიარ-გამოიარა, შემდეგ მოსულს უთხ-რა: შენ აქ დამელოდეო და ცუცუს ოთახში გავიდა.

მიხეილმა იცოდა, რომ ცუცუს ალექსი სასიძოდ მიაჩნდა და ძმასავით უყვარდა. ამიტომ თავის ფრთხილ და შენიღ-ბულ მოქმედებას დების განწყობილებას უფარდებდა.

დები ცუცუს საწოლ ოთახში ისხდნენ, ჩუმიად საუბრობ-დნენ. საუბრის საგანს ალექსის ბარათის დაგვიანება შეადგენ-და. კარი გაიღო და მიხეილი შემოვიდა. მას ისეთი მკაცრი და გაფითრებული სახე ჰქონდა, რომ ცუცუმ მაშინვე შეამჩნია მეუღლეს აღელვება.

— რა დაგემართა, ძვირფასო, ავად ხომ არა ხარ? — მზრუნ-ველობით შეეკითხა ცუცუ.

— ავადმყოფობა კი არა, სიკვდილი მერჩია, ისეთი ამბავა მომივიდა.

— რა ამბავია?! — ერთხმად შესძახეს ქალებმა. — მაიას კი

გული უჩვეულოდ აუბგერდა. რატომღაც ეს ცუდი ამბავი ალექსის დაუკავშირა. ამაზე ფიქრიც ვერ დაამთავრა, რომ მიხეილმა მწარედ თქვა:

— ალექსი დაღუპულა!..

ცუცუმ შეკივლა, ხოლო თავზარდაცემული მათა ოთახიდან გავარდა.

ცუცუ ცრემლებს ღვრიდა, მოთქემდა, თან ქმარს კითხვებს აყრიდა:

— სად დაღუპულა, რა მოსვლია?

— კისლოვოდსკში. იქ სადღაც უსაუზმია, შინ დაბრუნებულა და სულ ორ საათში გარდაცვლილა.

— უი, ჩემი სიკვდილი, ვაი დედამისის ბრალი! ეს რა მოსწრებია მოხუცებულობის დროს!

— დაწყნარდი, ცუცუ, შენი ჭირიმე! ახლა ჩვენ უნდა ვიზრუნოთ უბედური პუპის მოვლასა და ალექსის პატივისცემით დაკრძალვაზე. ჩვენზე ახლობელი მათ ხომ არავინა ჰყავთ!

— წამიყვანე უბედურ პუპისთან! მიცვალებულს როდის მოასვენებენ?

— სამ-ოთხ საათში.

— ოხ, ღმერთო ჩემო!..

— მაშ, გაეცი თადარიგი. მე კი ახლავე ცხენით წავალ, ალბათ მათაც წამოვა.

— კარგი, წადი, ოღონდ ჩემს მოსვლამდე პუპის არ უთხრათ.

მიხეილმა მოსული კაცი გაისტუმრა, მერე პუპის სახლში წავიდა, ხოლო თვალცრემლიანი ცუცუ წასვლის სამზადისს შეუდგა და მათას ოთახში შევიდა.

მათა პირადმა იწვა ლოგინზე. თვალები ჭერზე მიეშტერებინა, სანთლიდან ჩამოქნილს ჰგავდა: არც ცრემლი, არც ოხერა. შემოსულ დას უგონო თვალები მიაპყრო. ცუცუ წინ ჩამოუჯდა.

— მათა, ჩემი თავი გენაცვალოს, დიდი უბედურებით დაიჩრდილა შენი პირველი სიყვარული. სწორედ ახლა გმართებს მხნეობის გამოჩენა. ადექი, პუპისთან წავიდე!

— არა, არ შემიძლია, მაპატიე, მადროვე. ხვალ გეახლები!

ცუცუ დარწმუნდა, რომ მაიას ვერ დაითანხმებდა და ესლა უთხრა:

— მე მივდივარ, გონს მოდი, აეად არ გახდე! ნუ დაგავიწყდება, რომ ქალიშვილი ხარ და შენზე ცუდის თქმის საბაბს ნურავის მისცემ. ღმერთმა ხომ იცის, ალექსი მესამე ძმად მიმაჩნდა, შენზე ნაკლებად არ მიყვარდა, თავი უნდა შეიკავო.

მაია დას არ შეკამათებია, მხოლოდ ჰკითხა: როლის დაბრუნდება.

— მოასვენებენ საცოდავს და მოვალ დაღამებამდე. ოხ, ღმერთო, ეს რა დაგვემართა!

ბ ა შ ი ნ ა რ ე ბ ა

მოულოდნელად დაღუპულ ალექსი შერვაშიძის ცხედარს მთელი ქალაქი შეეგება.

პუპი დადიანის ქალს ცუცუ და სხვა ნათესავი ქალები გვერდით ამოდგომოდნენ. მათი კივილი და გულმდუღარე მოთქმა, რომ იტყვიან, ქვას აატირებდა.

ხალხში იმ დღესვე ხმა გავრცელდა: ალექსი მამამისივით წინასწარგანზრახვით არის მოწამლული.

თუ ვისი თაოსნობით მოხდა ალექსის მოწამელა, არავინ ამბობდა, მაგრამ ეჭვი მაინც მიხეილისა და მისი ერთგული მსახურის, ბოროტ საქმეებში გაქნილი ხასანისაკენ იკაფავდა გზას.

სალამოს, როდესაც ცუცუ შინ დაბრუნდა, პირდაპირ მაიას ოთახში შევიდა. ტახტზე მჯდომი თავჩაქინდრული მაია გაშეშებული თვალებით იატაკს დასცქეროდა. მაიას ფარეშები — თუთანა და ლერწამისა ოთახში ტრიალებდნენ, მაიას თეთრულსა და კაბებს მეშის ყუთებში აწყობდნენ.

ოთახში ფრთხილი ნაბიჯით შესული ცუცუ ისე წაადგა დას თავზე, რომ მაიას არ შეუმჩნევია.

— მაია, ძვირფასო, როგორ ხარ? — შეეკითხა ცუცუ. მაია წამოდგა.

— როგორც დამტოვე, წასასვლელად ვემზადები. ცუცუმ დას მრისხანედ შეხედა.

— რას ამბობ, მაია? როგორ გეკადრება ასეთი საქციელი. რა დროს შენი წასვლაა, როცა ყველანი შეწუხებული ვართ ჩვენი ძვირფასი ალექსის უბედურებით. დამწვარ-დადაგული პუბი მამიდა მაინც შეიბრაღე. შენი სიძე საშინლად შეწუხებულია. იმის მაგივრად, რომ მოხუც მამიდას ნუგეში ვცეთ და გაჭირვების ჟამს მხარში ამოვუდგეთ, შენ გაქცევას აპირებ, ხალხის ყბად ასაღებად იხდი საქმეს?

— არავის არაფერი არ დაგიშავდებათ, იმან იკითხოს, ვინც ასე უსამართლოდ მოჰკლეს. ვერაფრით ვერ დავრჩება. უბრძანეთ დილისთვის ცხენები მომიმზადონ.

— მაია, გონს მოდი, რას ამბობ, ნუ გადარევე შენს სიძეს, მაგ სამარცხვინო აზრი თავიდან მოიშორე. მითხარი, რა მოხდა? ჩვენი გაჭირვება გვეყოფა. ახალ მწუხარებას ნუ დაგვატეხ თავზე, ალექსის გასვენებაზე ხომ მამა და ბიძებიც ჩამოვლენ. თვით მთავარი ლევანი ჩამობრძანდება ალბათ. ნუ ჩამაყენებ უხერხულ მდგომარეობაში ნურც მე და ნურც შენს სიძეს. ხომ იცი, მიხეილი რა სასტიკი კაცია, ის შენ არასგზით არ გაგიშვებს.

ცუცუ დას მოეხვია, სახე დაუკოცნა, მიეაღერსა... ორივეს ცრემლები წასკდათ.

ცუცუ მაიას არ მოშორებია, სანამ მიხეილის მოსვლა არ მოახსენეს. მაიას გულში ორი აზრი იბრძოდა: დაუთმოს დას თუ გაემგზავროს სამეგრელოში.

სადამოს მაიას ოთახში ცუცუ და მიხეილი შევიდნენ. მთავარი შეწუხებული იყო, მაგრამ რატომღაც მაიას მისი შეწუხება არაგულწრფელად ეჩვენებოდა. თვალი მოარიდა სიძეს, ტანში გაბურძღლა. თავჩაღუნული იჯდა და მიხეილს არც ერთ სიტყვაზე პასუხს არ აძლევდა. როცა მარტო დარჩა, გადაწყვიტა სოხუმიდან გაპარულიყო. მოუსვენრობდა, სასახლის მოშხამულ ატმოსფეროში სული ეხუთებოდა, სუნთქვა უმძიმდა. რაღაც იდუმალი ძალა ყურში ჩასძახოდა. „ალექსი მიხეილის მოკლულია, ალექსი მიხეილის მოკლულიაო“. — ძალაუნებურად მეორდებოდა მის გონებაში ერთი და იგივე სიტყვები. თავზარდაცემულს ჭიასავით უღრღნიდა გულს ეჭვი. მაია თანდათან რწმუნდებოდა სიძის ვერაგობაში. ისე ეჩვენებოდა, თითქოს მთელი ქვეყანა შემოსცქეროდა ამ ბნელ ოთახში

მყოფს და აქეზებდა ემხილებინა სიძე, ეთქვა ყველასათვის, რომ მიხეილმა მოაკვლევინა ალექსი. მაია გააკეთებდა კიდევაც ამას, მაგრამ რა საბუთი ჰქონდა ხელში? რით დაამტკიცებდა თავის ეჭვებს? ვერაფრით. „ვერა, მე აქ ველარ გავნერდები. ამ ღამესაც ველარ გავათენებ აქ“. — მტკიცედ გადაწყვიტა მაიამ.

* * *

მაიას გაპარვის ამბავი დილით ელვასავით მოედო მთელ სასახლეს. შეშფოთებულ ქალბატონს მოახლე გოგონამ ლერწამისამ სადილობის წინ მაიას წერილი მოუტანა. ცუცუმ კარი ჩაიკეტა, ლოგინზე დაჯდა და კითხვას შეუდგა.

„ძვირფასო ცუცუ! — სწერდა მაია დას. — მაპატიე, ვიცი, რა დიდ ტკივილს მოგაყენებს ჩემი საქციელი, მაგრამ სსევანირად არ შემექლო მოვქცეულიყავი. მიმიხვდები ალბათ, რომ ალექსისთან ერთად მოკვდა ჩემი სიყვარული და სიხარული, ის დიდი იმედებიც დაიფერფლა, რომელიც ასულდგმულებდა ჩვენს ოჯახს. შენმა ქმარმა მიხეილმა დაასამარა მამაჩემის აზრი — ყველა სამთავრო მტკიცე კავშირით გაეერთიანებინა. აფხაზეთ-სამეგრელო უფლებააყრილად რჩება. რა თქმა უნდა, ასეთ სახელმწიფოს ანგარიშს არავინ გაუწევს, როდის მომხდარა, რომ ძლიერი უძღურს პატივითა და სიბრალულით მოქცეოდეს. შენი სასახლის კარზე მრავალი ბნელი და არამზადა იკრიბება. რამდენი არ ეცადა მამა, მაგრამ შენს მეუღლეს ვერ ჩამოაშორა ეს ნაძირალები. მამა უფრო ხშირად თქვენთან იყო, რომ სიძეზე გავლენა მოეხდინა, ამის გამო შეიძულა იგი ლევანმა. მამის სულისკვეთებასა და მიზნებს დიდად თანაუგრძნობდა ალექსი. მისი მოკვლის ერთ-ერთი მიზეზი, ალბათ ესეც არის“.

ცუცუმ წერილი ქმარს არ უჩვენა. წერილის შინაარსი მიხეილს რომ გაეგო, მაიას მიწაში დამარხულს მოძებნიდა და შურს იძიებდა. ეს იცოდა ცუცუმ და როცა სადილად დასხდნენ, მხოლოდ ეს უსაყვედურა მეუღლეს, რომ მან მაიას მღევრები დაადევნა. რა საჭირო იყო ყოველი კუთხით მღევრების დაგზავნა და მაიას საქციელის ასე საქვეყნოდ გამოაშკა-

რავება. მე თუ დავკარგე გონება, შენ მაინც რატომ დაიბენიო.

ცუცუმ წერილის მომტანი, ტყვეობიდან დახსნილი გოგო, ლერწამისა დაიბარა და დაკითხვა დაუწყო:

— როდის მოგცა ბატონიშვილმა ეს წერილი, ლერწამისა?

— გათენებული არ იყო, ქალბატონო! — უპასუხა გოგონამ, თან დაიწოქა და ტირილი დაიწყო.

— სად ბრძანდებოდა ჩემი და, როცა წერილი გადმოგცა?

— თავის ოთახში, ბატონო, — უპასუხა თვალცრემლიანმა გოგომ.

— მართო იყო?

— არა, ბატონო, თუთანაც თან ახლდა.

— რას აკეთებდნენ?

— სამგზავროდ იყვნენ ჩაცმული. ბატონიშვილს დიდი შალი ეხურა, ფოჩები მიწას ეხებოდა, ჩქარობდა. ბატონიშვილმა მიბრძანა: ეს წერილი ღიდ ქალბატონს სადილობის წინ გადაეციო, არ გაბედო მანამდე ამ წერილის გამოჩენა და არც არავისთან წამოგცდეს რამე, თორემ შავი ღლე არ აგცდებო. თუთანამაც დამარიგა, კრინტი არ დამეძრა. არავისთვის გამემხილა. თუ ასე არ მოიქცევიო, როგორც დაგიხსნა თაორების ტყვეობიდან ბატონიშვილმა მაიამ, ისევ გაგყიდისო.

— ძალიან გეშინია სათათრეთში გაყიდვის, ხომ? ახლაც იცი, ყველაფერი თქვი, თორემ ისეთ საქმეს დავაწევ, რაც არასოდეს არ მიქნია, — დაემუქრა ცუცუ მოახლეს.

გოგო აკანკალდა.

— ღმერთი გამიწყრეს, თუ რამე დაგიმალო. როცა სასახლეში ყველანი დაწვნენ, ბატონიშვილი და თუთანა სასახლიდან გავიდნენ. ვერ იცნობდა კაცი, ისე იყო ბატონიშვილი შავ თავშალში გახვეული.

— შენი ფიქრით სად უნდა წასულიყვნენ?

— მგონი ალექსის სატირლად. ბატონიშვილს თვალეში ცრემლის ნაკვალევი ეტყობოდა. აქაც ცრემლს ვერ იკავებდა.

— ვაიბე, ჩემო ღლეო, რა მესმის! ახალგაზრდა ქალი ასე უმხლებლებოდ, უპატრონოდ, შუალამისას ახალგაზრდა კაცის სატირალში? რა იფიქრა უბედურმა ჩემმა დამ? მომჭრა თავი მეც, ჩემ ქმარსაც, მამას, ძმებს! — ფიქრობდა გულში ცუცუ და, დაზე გულმოსულს, თვალეში ცრემლიც გაუშრა.

საქალებოში ჩურჩული ატყდა. ცუცუს მოახლეები, მკერაეები და მათი მეგობარი ქალები იმეორებდნენ ჭორსა და მართალს. ჭორებმა და მითქმა-მოთქმამ მოიცვა მთელი სასახლე, რამაც ყველაზე მეტი სარბიელი და გამოძახილი საქალებოში ჰპოვა.

— ეს რა უნებებია ქალბატონის დას, ალექსის სატირლად შუალამისას მართლმდართო მისულა. წინდაწინ თუთანა შეუგზავნია — მხოლოდ პუპი დამხვდესო, მართლაც, მარტო პუპი დახვდა თურმე.

— ტყის დედოფალს ჰგვანებია მათა ბატონიშვილი, მთლად თეთრად ყოფილა გამოწყობილი.

— მერე, მერე, თქვი. — შესძახეს ქალებმა.

— თურმე თავისი ნაწნავები გულზე დააყარა მიცვალე-ბულს, მერე სიყვარული შეუფიცავს.

— უი, უი რა გაუბედავს?! — გაისმა აქეთ-იქით გაკვირებული შეძახილები.

— მაცალეთ, ქალებო, ოქროს ბეჭედი, რომელიც ალექსის პატარა თითზე ჰქონია და უბედურ მაიას დასანიშნავად ნდობებია, ბატონიშვილს წაუძვრია მიცვალებულის თითიდან და თავის მარჯვენა უსახელო თითზე წამოუგია.

— არა, ქალო, პუპის უთხოვია ბეჭედი. — გამოეღვა ერთ-ერთი ქალი.

— კარგი, აცალეთ ლაპარაკი. — მოისმა ხმები.

— მერე თურმე პუპის გადაეხვია და ცრემლებით გულმკერდი დაუსველა. პუპი არ მოთქვამდა, ჩუმად ტიროდა, ბატონიშვილს თმებს უსწორებდა, თან ეუბნებოდა: დაწყნარდი, შვილო, რატომ მოდი უდროო დროს. დაბრძანდი, გენაცვალე, ნუთუ ჩემი ალექსის ჯავრმა დაგავიწყა ვინ ხარ და რა ხარ, შენ შემოგველოს შენი პუპი.

— დიდებული ქალია მათა, თან კეთილი და გამბედავი. თუთანა და ლერწამისა მან დაიხსნა ტყვეობიდან.

— ეს ამბავი გამიგონია, მაგრამ მთლად კარგად არ ვიცი, — ჩაერია ლაპარაკში ცუცუს მკერავი, შუახნის ქალი.

— თურმე მათა ბატონიშვილი თავის ძმითა და მახლობლებით ცხენით მობრძანდებოდა აქეთ, ჩვენი მთავრის ოჯახში. ოჩამჩირეში, ზღვის პირას, პატარა ლერწამისა და მეორე,

მასზე უფროსი თუ თანა ხელფეხშეკრულნი ისხდნენ და მწარედ ტიროდნენ. მათი მოთქმა თურმე მაიამ გაიგონა, დაუკვირდა, საიდან მოდიოდა ეს ხმა. ორი თურქი იქვე მიბმულ ნავს ხსნიდა ნაპირიდან, თან გოგონებს მათრახით სცემდნენ, ხმა გაეკმიდათ და მგზავრების ყურადღება არ მიექციათ.

— არიქა, გააჭენეთ ცხენები, თორემ თუ ზღვაში ჩაგვასწრეს, დაიკარგებიან გოგონებიო! — უყვირია მაიას და, სანამ მამაკაცები გონს მოვიდოდნენ, მას ცხენი აურჩქარებია, ძმისა და მხლებლების გასწრება მოუნდომებია. მაიას ძმას, დავითს და მხლებლებს ცხენით გაჭრილი ქალი შეუჩერებიათ და ყიჟინი აუტეხიათ. თურქები შეშინებულან, მოხსნილ ნავში ჩამსხდარან, მოუსვამთ ნიჩბები და გაქცეულან. ტყვეობიდან დახსნილი ქალები მაიას ოქუმში წამოუყვანია.

— ვენაცვალე მის ქალობას! დედოფლობის ღირსია, საკვირველია, რატომ იკადრა ბედნაცვალი ალექსის ასეთი სიყვარული, ან რა სახარბიელო იყო მაიასთვის ალექსის ცოლობა, განა არ იცოდა, რომ მიხვილს იგი ქვისლად არ ენდომებოდა?

— ალექსი ხომ მთავრის ოჯახის შვილი არ იყო.

მოლაპარაკეთა გვერდზე მჯდომმა ქალმა ფეხზე ფეხი დააჭირა და გადაულაპარაკა:

— შენ ენა ხომ არ გექაეება, ბევრს რომ ლაპარაკობ?

— შერე, იმ ღამეს, ოქუმში მოუყვანიათ ეს ქალები, იქ მოუსვენებიათ აჩბებთან. მაიას მხლებელი ქალებისათვის ებრძანებინა მათთვის ტანისამოსი მიეცათ, სამგზავროდ ცხენები მიერთმიათ. ეს საწყალი გოგოები ამნაირად გადარჩენილან თურქების ტყვეობისაგან.

სანამ ქალები საუბრობდნენ, ცუცუს გამზრდელი, მოხუცი გადია საროსტანისა, ჩუმად იჯდა. გადია განსაკუთრებული სიმძიმით განიცდიდა სირცხვილს, რომელიც მის გაზრდილებსა და ნაამაგარ ბატონიშვილის ქალებს თავს დაატყდათ.

— ეხ, შვილებო, ჩემი გაზრდილები კიდევ უკეთესები უნდა იყვნენ, ისეთი დედ-მამის შვილები არიან. ყმის გაყიდვას დიდი ნიკოს ოჯახში ვერ ურიგდებოდნენ.

მათ ლაპარაკი არ დაემთავრებინათ, როცა საქალებოში

შუახნის ქალი შემოვიდა. მას ყველა მიესალმა. ქალმა თეთრი თავსაფარი მოიხსნა, დალაღები წინ ჩამოიყარა და დაჯდა. სახეზე ეტყობოდა, რომ რაღაც ახალი ამბავი გაეგო და ამ ამბის მალე თქმა ეჩქარებოდა.

ქალებიც მიუხვდნენ გულისნადებს და თვალები მიაპყრეს.

— რა იცი, ეშა, ახალი, რას ამბობენ ქვეყანაზე?

— ქვეყანაზე რომ ამბობენ, ისეთი შენს მტერს.

— რაო, რაო? — შესძახეს ყოველი კუთხიდან ქალებმა. — ზოგმა საკერავზე ნემსი შეაჩერა, ზოგმა აბრეშუმის ძაფის რთვა შეწყვიტა, ზოგმა — ქარგვა.

— რაო, შენი ჭირიმე და, ალექსი მაია ბატონიშვილის საქმრო იყოვო. მთავარს ის ქვისლად არ უნდოდაო. კაცმა არ იცის რამ მოკლაო. იმის სიკვდილზე რას არ ამბობენ. მაია სიძეზე იყო გაჯავრებული და იმიტომ დატოვა აქაურობაო.

— ამ დილით, გათენებისას, კაცები თევზაობიდან ბრუნდებოდნენ თურმე, — გვიამბეს ბაღმარანში, — კელასურის პირას ვნახეთ შესანიშნავი ქალი, რომელიც თეთრად იყო გამოწყობილი. ქალი ფეხშიშველი იყო. კაბა მუსლამდე აწეული ჰქონდაო. წყლის დედოფალი გვეგონა, მაგრამ როდესაც წყალში ჩავიდა და უკან ვიღაც ქალი დავინახეთ, მივხვდით, ვინც იყოვო.

— უი, ნამდვილად მაია ბატონიშვილი ყოფილა! — ერთხმად შესძახეს ქალებმა.

— დიახ, მაია ყოფილა. ჩვენს კაცებს ის წინათაც უნახავთ სასახლეში, მაშინვე უცვნიათ, მაგრამ ბუჩქებში შემალულან, რომ ბატონიშვილისათვის თავი არ ეჩვენებინათ, მორიდებოდათ საწყლებს.

— ვაი, ვაი, სირცხვილო! — ამოიკვნესა ცუცუს გამზრდელმა საროსტანისამ.

წუთით სამარისებური სიჩუმე ჩამოვარდა საქალებოში. ყველა საკუთარ ფიქრს მისცემოდა. ამ წუთში ქალები სიყვარულზე ფიქრობდნენ; ზოგს წყუროდა სიყვარულის განცდა, ზოგიც განცდილს იგონებდა.

ნიკო დადიანი, დიდ ნიკოდ წოდებული, სამეგრელოს მთავრის ლევანის უახლოესი მრჩეველი, აშკამად პეტერბურგიდან თბილისში ჩამოვიდა. მას იქიდან მოჰქონდა რუსეთის მთავრობის დადგენილება, რომლის ძალითაც სამურზაყანო სამუდამოდ მიაკუთვნეს სამეგრელოს სამთავროს. გამარჯვებული და კარგ გუნებაზე მყოფი ნიკო პირდაპირ ლევანის ვაჟთან, დავითთან, ჩამოხტა ბინად. მისალმების შემდეგ ნიკო დავითს მოუყვა თუ რა სიძნელის გადალახვა მოუხდა იმისათვის, რომ პეტერბურგიდან წამოეღო ორი წლის წინათ მოკებული სამურზაყანოს საქმის ქაღალდი.

— ახლა მეფისნაცვალს ვინახულე, უკანასკნელ „ნებართვას“ გამოვართმევ. გადაეყვით სამურზაყანოს. რამდენი სარჯები მოუნდა, პირდაპირ ვერ აგიწერ, — თქვა ნიკომ.

— დიდად სასიამოვნოა რაკი გამარჯვებული ჩამობრძანდით და შრომა არ დაგეკარგათ, — უპასუხა დავითმა.

— სამურზაყანოს გარდა, მრავალი სხვა საჭირბოროტო საქმე გვაქვს გადასაწყვეტი, დავით... თუ მომისმენ, მოგახსენებ რა მდგომარეობაშია ჩვენი სამთავრო.

— სიამოვნებით, ბიძავ ბატონო!

— მამაპაპათა ჩვენთა უბრძოლიათ და სისხლი უღვრიათ, რომ საქართველოს საზღვრები დაეცვათ. ახლა გამოდის, რომ ვისაც მივენდეთ, ვინც ჩვენ პატრონად დიდმა ერეკლემ აირჩია, ის პირობას არ გვისრულებს. ხალხი თვითმპყრობელობის უგონო და უხეში მოხელეებისაგან იტანჯება. მამაშენს ლევანს არავითარ ანგარიშს არ უწევენ... ალბათ დაიღალა მთავარი. დროა მან დაისვენოს. ამ მოხელეებთან უფრო ახალი მოქნილი დამოკიდებულებაა საჭირო, მამაშენი მათ აღდოს ვერ აუღებს, საქმეებს ისე ვერ წარმართავს როგორც მდგომარეობა უკარნახებს. ამიტომ შენ უნდა მოემზადო მამაშენის სანაცვლოდ, მთავრის საპატიო მოვალეობის მისაღებად.

— დიდად გმადლობთ, ბიძა ბატონო, ჩემზე რომ ასეთი აზრის ბრძანებულხართ, საპატიო ადგილს მთავაზობთ, მაგრამ ეს ჩემგან დიდ პასუხისმგებლობას მოითხოვს. მე თვითონ

უნდა შევამოწმო ჩემი თავი, შევძლებ თუ არა პირნათლად შევასრულო სამშობლოს წინაშე მთავრის მოვალეობა.

— გეთანხმები, შვილო ჩემო. ქვეყნის მართვა აღვილი არ არის. კარგი მმართველი რომ გახდე, საჭიროა კარგად იცნობდე სახელმწიფოების მმართველობის სისტემას, განსაკუთრებით კი შენი სამშობლოს წარსულს. უნდა გესმოდეს შენი ხალხის ავ-კარგი. ლევანი ჩემი სისხლი და ხორცია, მაგრამ ვებრძობით, არც შენოდენი განათლება გვაქვს, შენ ახალგაზრდა ხარ და ცოდნით აღჭურვილი. ლევანთან უკვე მქონდა ამაზე თათბირი. ნაწილობრივ დავითანხმე, რომ თავის სიცოცხლეშივე გადმოგცეს სამთავროს მართვა-გამგეობა. სანამ სული მიდგას, მეც მხარში ამოვიდგები.

დავითი ყურადღებით უსმენდა ბიძას. გული თავისი კუთხისაკენ მიუწევდა, მაგრამ თბილისში მას ბევრი რამ აჩერებდა. ჯერ იყო და, თავისი თავი კიდევ არ მიაჩნდა მთავრის თანამდებობის შესაფერისად მომზადებული, შემდეგ, აშირებდა ეკონომიურად დაუძლურებული და პოლიტიკურად დაქუცმაცებული სამთავრო, რომელიც არ იყო შეკრული და ერთპირიანი. მსხვილი ფეოდალები მტრობასაც კი უწევდნენ მთავარს. ურთიერთშორის შულლისა და მტრობის გარდა ფეოდალებს არაფერი ჰქონდათ საერთო, სახელმწიფო-საზოგადოებრივი ინტერესები დიდი ხანია არც ერთ მათგანს არ აღეკვებდა. ახლა, როდესაც სამთავრო ასე საუაღალო მდგომარეობაში იმყოფებოდა, ახალგაზრდა დავითს საქართველოს დედაქალაქში კიდევ ერთი მიზეზი აყოვნებდა: ის ხშირი და სასიამოვნო სტუმარი გახლდათ პოეტ ალექსანდრე ჭავჭავაძის ოჯახისა, რომელიც მაშინდელი საქართველოს კულტურის კერას წარმოადგენდა. ამ ოჯახში ხშირად იმართებოდა ლიტერატურული საღამოები. შეკრებილ დიდებულ საზოგადოებას ამშვენებდნენ ალექსანდრეს ქალიშვილები და ტრფობის ცეცხლს უკიდებდნენ რჩეულ ახალგაზრდებს. დავითს უმძიმდა ამ წრის დატოვება, მით უმეტეს, მშვენიერი ეკატერინეს დედოფლური თავდაჭერილობა, მიმზიდველი სიმღერები მოსვენებას არ აძლევდნენ ჭაბუკს. მამის მუსიკალური ლექსის სიტყვებით ამღერებული ეკატერინე განა შეიძლებოდა არ შეგყვარებოდათ? ყელყარყარა ქალიშვილის მო-

ხიბვლას ტატო ბარათაშვილიც ცდილობდა. ქონებრივად ღარიბი მოხელის და ნიჭით მდიდარი პოეტისათვის უნდა დაეწყო სამეგრელოს მთავრის შვილს, თორემ... რაც უფრო მეტს ფიქრობდა დაეთი ამაზე, მით უფრო ნათლად ესახებოდა აწ აიხრებელი და ახლო მომავალში მისი ხელმძღვანელობით ზუგდიდში ასაგები სასახლე. ეკატერინეს გარდა ამ სასახლეში სხვა დედოფალი ვერ წარმოედგინა. რუსეთის დედოფლის, ეკატერინე მეორის მონათლულს — ალექსანდრე ჭავჭავაძეს უთუოდ სადედოფლოდ გაუზრდია ქალიშვილი. დავით დღე დღეზე უპირებდა ეკატერინეს სიყვარულის გამომჟღავნებას, მაგრამ ლევანის ზვიად შვილს აფიქრებდა პასუხის მოლოდინი — ვაი, თუ!.. და გასაგებია, რა მოუმზადებელი შეხედებოდა ის ნიკოს რჩევას. ბუნებით დინჯმა დავითმა ბიძას დანამდვილებით ვერაფერი უთხრა.

— მე მუდამ გულისყურით მივიღებ შენს რჩევა-დარიგებას, ბიძა ბატონო! ვეცდები, ყველაფერი ისე გააკეთო, როგორც შენ მიჩნევ, მაგრამ ცოტა უნდა მადროო. ასეთი დიდი საქმის გადაწყვეტა არც ისე ადვილია, არ მინდა მამამ იფიქროს, რომ მე მის თანამდებობას ვეშურები.

— ეს რა თქვი, შვილო, შენზე ასეთ ეჭვს მამა არასოდეს არ მიიტანს. ვატყობ, შენ მამის გერიდება. უფროსის წინაშე მორიდება ცუდი არ არის, მაგრამ აბა წარმოიდგინე სამთავროს მდგომარეობა. იგი დაცემის კარამდეა მისული. გული დაგეწევა დღევანდელი სამეგრელოს შემეყრეს. მამაშენს ბევრი თავადი გადაუდგა, იმის გამო, რომ ღირსეულად ვერ უძღვება სამთავროს. მთავრის მოწინააღმდეგეთა ბანაკში მოექცა ჩემი შვილი გიორგიც. მე უფრო მისი რჩევით ჩამოვედი შენთან. დრო არ ითმენს, დაეთ, მიხედე შენს სამთავროს.

— ვეცდები, ბატონო ნიკო, არ დავაყოვნო. ოღონდ აქედანვე ვგრძნობ, ჩემი ჩამოსვლა და გამთავრება ბევრ თავადს გულს მოუშხამავს. წინასწარ ვაცხადებ, მე მათთან ღმობიერი ვერ ვიქნები.

— ზალხის საქმისათვის ნურც სიმკაცრის მოგერიდება, შვილო ჩემო, ნურც ღმობიერების, — მიუგო ნიკომ. — სამთავროს მტრებს მტრულად უნდა მოექცე, მოყვარეს — მოყვრულად.

დავითმა იცოდა, თუ რა უსიამოვნება დატრიალდა ზუგდიდში მამასა და გიორგის შორის, მაგრამ ნიკოს არაფერი უთხრა, მოერიდა, იფიქრა: თვითონ გაიგებს და თვითონვე განსჯისო.

ნიკო წამოდგა, საათს დახედა.

— ალექსანდრე ჭავჭავაძისას სადილად მელოდებიან, უნდა დაგტოვო, დავით.

— სალამოს მეც იქ გეახლებით, — უთხრა დავითმა სტუმარს და ისიც წამოდგა, — ალექსანდრე ჭავჭავაძის სალონი ამ სალამოს განსაკუთრებით მიმზიდველი იქნება. ამაღამ ტატო ბარათაშვილი ახალ ლექსებს კითხულობს.

— ძლიერ გამახარე, ჩემო დავით, ბევრი კარგი გამიგონია ბარათაშვილზე, როგორც ნიჭიერ მგოსანზე. მისი ნათლობის სახელი მგონი ნიკოლოზია. მე, ერთი პატარა კაცი, მუდამჯამს პოლიტიკური ამბებითა და ყოფაცხოვრების საქმეებით თავმობეზრებული, ერთხელ პოეზიითაც დავტკბები, ჩემი ყურით მოვისმენ საამაყო ახალგაზრდა მგოსნის ლექსებს.

— ვფიქრობ, ისიამოვნებთ! მართლაც დიდი ნაშრომი ბრძანდებით, უთუოდ მოგიხდებათ გართობა.

გულში კი სხვანაირად გაჰკრა დავითს. დიდი ნიკო დღეს მის სანუკვარ ეკატერინეს გაიცნობდა.

* * *

მდიდრული ელფერით გამოირჩეოდა ალექსანდრე ჭავჭავაძის სასახლე თბილისის შუაგულში. იგი საუკეთესო არქიტექტურული ხელოვნებით იყო ნაგები. მისი ევროპული გემოვნებით მორთული დარბაზები უამრავ მეგობარსა და სტუმარს იტევდა. ალექსანდრე ჭავჭავაძის მდიდარი ოჯახი არა მარტო სტუმართმოყვარეობით იზიდავდა თბილისის მოწინავე საზოგადოებას — თავისი ლიტერატურული სალონით, სულიერი და გონებრივი საგანძურით კიდევ უფრო საყვარელი იყო ყველა მათგანისათვის. საქართველოსა და რუსეთის თითქმის ყველა კუთხიდან ჩამოსულებს ნახავდით ალექსანდრე ჭავჭავაძის სამუშაო ოთახში, მის განთქმულ სალონსა და დიდ სასადილოში.

მეცხრამეტე საუკუნის პირველი ნახევარი მრავალი სახის

პოლიტიკური ცვლილებებითა და კულტურული ძვრებით აღინიშნა. ეს ამბები ალექსანდრე ჭავჭავაძის ოჯახში დიდ გამოძახილს პოულობდა. ხშირად მსჯელობდნენ აქ იმაზე, თუ რა ბედი მოელოდა რუსეთს და კერძოდ საქართველოს, იყო თუ არა მოსალოდნელი რუსეთში მმართველობის სისტემის შეცვლა, შეუმსუბუქდებოდა თუ არა ყმა-გლეხებს ცხოვრების პირობები, დარჩებოდა თუ არა თავადაზნაურული პრივილეგიები. ყველას ასულდგმულებდა ის იმედი, რომ პროგრესული რუსეთის ბედთან ქართლის ბედის დაკავშირება სიკეთესა და ბედნიერებას მოუტანდა საქართველოს. მით უფრო, რომ რუსეთიდან ჩამოსული მოღვაწეები, რომელნიც ოდნავ მაინც ლიბერალურად აზროვნებდნენ, თანაგრძნობით უახლოვდებოდნენ საქართველოს მოწინავე საზოგადოებას, იზიარებდნენ მის ჭირსა და ღსინს. თუმცა ჩამოსულთა შორის ცოტანი ჭოდი იყვნენ თვითმპყრობელური სულისკვეთებით გაუღენთილი მოხელეებიც, რომელთაც საქართველოს ბედნიერება ჩირად არ უღირდათ. ისინი საქართველოს ისე უყურებდნენ, როგორც კოლონიას, მოსახლეობაში არავითარი მკაცრი ზომების მიღებას არ ერიდებოდნენ, რის გამოც ხალხის სიბუღვილი დაიმსახურეს. მათი მოქმედება სოფლებსა და ქალაქებში იწვევდა პროტესტს, ხშირად აჯანყებასაც. სავალალო გაზდა უცოდინარობა რუსული ენისა, რომელიც უკვე ყოველ დაწესებულებაში შემოღებული იყო და, რომელსაც თვით თავადაზნაურებიც იშვიათად იყვნენ დაუფლებულნი.

სხვა მებატონეებთან შედარებით, ალექსანდრე ჭავჭავაძე გლეხებს ადამიანურად ექცეოდა. შრომის ანაზღაურებაშიც ბევრი მომდურავი არ ჰყავდა, ამიტომ საქართველოს ყოველი კუთხიდან მოდიოდნენ მასთან გლეხები სამუშაოდ. ნიჭიერ პოეტს ხალხი სიყვარულით ამკობდა:

ბატონია, თავადია კახისა,
გამკითხავი ღარიბის და გლახისა,
ალექსანდრე ჭავჭავაძე ქებული
ხელმწიფისგან სახელგანდიდებული.

ალექსანდრე ჭავჭავაძის სიყვარული თითქოს შვილებზე გადავიდაო, ჭკუა-გონებითა და უჩვეულო სილამაზით დაჯილ-

დოებული მისი ქალიშვილები მთელი საქართველოს სათაყვანებელი იყვნენ. ალექსანდრეს სახელგანთქმულ სალონს ამშვენებდნენ მეუღლე სალომე, ქალიშვილები — ნინო, ეკატერინე და სოფიო.

* * *

სადილის შემდეგ ალექსანდრე ჭავჭავაძე სტუმრებს საშუალო ოთახში შეუძღვა. ახალგაზრდები კი სადარბაზო ოთახისკენ გაიკრიფნენ. მარტო სადარბაზო ოთახის მოწყობილობა იყო საკმარისი მხიარული განწყობილების შესაქმნელად. მნახველს აჯადოებდა მითოლოგიური სურათებით. მოხატული ოთახის კედლები. იმასაც ამბობდნენ, რომ კედელზე გაკრული ეს უჩვეულო შპალერი თითქოს ეკატერინე შგორეს ერუქები-ნოს ჭავჭავაძეებისათვის.

ახალგაზრდების შესვლისთანავე დარბაზი სიხარულით აივსო.

ალექსანდრეს უფროსი ქალიშვილი, კდემამოსილი ნინო, გრიბოედოვის ქვრივი, ფორტეპიანოსთან დაჯდა. ის შვიდი წლის წინათ დაქვრივდა. თავის სასახელო კმართან მხოლოდ რამდენიმე თვე არგუნა ბედმა ყოფნა. ცას მოწყვეტილი ვარსკვლავით მოულოდნელად ხელიდან გამოეცალა ღირსეული მეუღლე და რჩეული მამულიშვილი. ქმრის დაკარგვით გამოწვეული მწუხარება ნინოს მთელი სიცოცხლის მანძილზე თან სდევდა, საზოგადოებაში ყოველთვის თავი მორიდებულად ეჭირა, თავისი მწუხარებით და წუწუნით არ უნდოდა სხვები შეეწუხებინა. ფორტეპიანოსთან მჯდარი კლავიშებზე ბროლის თითებს ნელა ათამაშებდა და უმცროსი დის — ეკატერინეს გამოსვლას ელოდებოდა.

აჰა, გამოჩნდა მაღალი, ნარნარი ეკატერინე, ყველას მიესალმა, შემდეგ ნინოს გვერდით შედგა. როიალის ახლოს თანდათან ახალგაზრდათა ჯგუფი შეიკრიბა. მხოლოდ ერთი იჯდა მათ შორის თავდახრილი, განმარტოებით ჩუმად კუთხეში, ეკატერინეს ხმის ყოველი ბგერა მას ჟრუანტელს ჰგვრიდა.

როგორ დაბლის ხმით დაგეფუდე,
რომ შენს მეტს არეის ვასმენდე,
ხარკიც მხოლოდ შენ გაპლიო,
სულიც შენს ბუჩქზე დაელიო.

ნიკოლოზ ბარათაშვილს სულსა და გულში სწვდებოდა მგრძნობიარე სიტყვები. ეკატერინემ მისკენ მიიხედა. ბარათაშვილი შეირხა და ადგომა დააპირა. ამ დროს დარბაზში ალექსანდრეს მეუღლე სალომე შემოვიდა. მეგობარ ქალებთან ერთად ყველანი ადგნენ და თავი მდაბლად დაუკრეს. სალომეს ჯერ კიდევ დასთამაშებდა სახეზე მშვენიერების შუქი.

— შვილებო, ეს რა მოგსვლიათ, რომ თქვენ ორი ჰლერი-ხართ და სხვები კი მოწყენილები არიან? ნინო, კატენკა, განა სტუმრებს ასე ართობენ? ნინო, გეთაყვა რამე საცეკვაო დაუკარი და ვაუებიც გაერთობიან.

— მისი უგანათლებულესობა დავით დადიანი მობრძანდა! — საკმაოდ ხმამაღლა თქვა შემოსულმა მსახურმა.

— თხოვეთ, მობრძანდეს! — თქვა სალომემ. რამდენიმე წუთში დარბაზში დავითი შემოვიდა. ყველას საერთო სალაპი მისცა, სალომე ჭავჭავაძესა და მის გვერდში მყოფ მანდილოსნებს კი ხელზე ეამბორა. შემდეგ ახალგაზრდებს მიესალმა და დაუფარავი აღტაცებით შედგა ეკატერინეს წინ, მაგრამ მისი აღტაცება უმაღლე ჩაქრა: ქალიშვილის სევდით სავსე თვალები იმ კუთხისკენ იყურებოდა, სადაც ტატო ბარათაშვილი იჯდა. პოეტისკენ თვალმიპყრობილ ეკატერინეს დავითის შემოსვლა არც კი შეუნიშნავს.

— კატენკა! — მიმართა დავითმა ყრუ ხმით.

— კარგი ჰქენი, რომ მობრძანდი, დავით, — მობრუნდა დადიანისაკენ ეკატერინე, — მე ძალიან მაინტერესებს შენი აზრი ტატოს ლექსებზე.

— დარწმუნებული ვარ, ეკატერინე, რომ ტატო ამაღამ კარგ ლექსებს წაგვიკითხავს.

— შენ ხომ გიყვარს ლექსები, დავით?

დავითმა თავის დახრით მისცა დასტური.

— ტატოს ლექსები რაღაც ზღაპრულია. ჩანს, ჩვენი მგოსანი ღელავს, ერთი მივალ მასთან. მაპატიე, მაგრამ უნდა დაგტოვო.

ეკატერინე მსუბუქი ნაბიჯით და ჰაეროვანი ტანის რხევით ტატოსაკენ გაეშურა.

დავითს ეგონა მთელი დარბაზი დაცინვით შეჰყურებდა, ეკატერინემ ასე რომ მიატოვა, მაგრამ ნინოს მეტს არავის შეუმჩნევია. ნინომ კი დადიანის სახეზე უმაღლვე ამოიკითხა ეჭვისა და შეურაცხყოფის ნალექი.

— ბატონო დავით, — მიმართა ნინომ ნაზი ხმით დადიანს და თავის გვერდით სავარძელზე მიუთითა, — როგორ მოგვანატრეთ თავი. რამდენი ხანია ჩვენსა არა ყოფილხართ.

დავითს არაფერი უთქვამს. იგი მძიმედ ჩაეშვა სავარძელში. ცდილობდა გამხიარულებულიყო, ნინოს არაფერი შეენიშნა, მაგრამ ვერ ახერხებდა...

— მე დედას ვთხოვე ცეკვების დაწყებამდე წაიკითხო ლექსები. რას იტყვი, ტატო?

— როგორც გინდა, კატერინა.

— ღელავ?

— ძალიან!

— მეც გული ამოვარდნაზე მაქვს.

— გმადლობთ თანაგრძნობისათვის, კატერინა, — გაიღიმა ტატომ.

— დავით დადიანი დარწმუნებულია, რომ შენ კარგ ლექსებს წაიკითხავ.

დავითის ხსენებაზე ტატოს უმაღლვე გაუქრა ღიმილი.

დავითი კი ერთი წამითაც არ ამორებდა თვალს ეკატერინეს და ტატოს. ცდილობდა მისი ქურდული მზერა არავის დაეჭირა, მაგრამ ნინო კარგად ხედავდა, თუ რა ხდებოდა დადიანის გულში და ცდილობდა გაერთო თავადი.

— თურმე ზუგდიდში აპირებთ გამგზავრებას, დავით. დღეს ჩვენს სტუმრებს შორის ბრძანდება სამეგრელოს მთავრის მრჩეველი, დიდი ნიკო. თუ არ ვცდები, ასე ეძახიან მას სამეგრელოში.

— დიახ, დიდ ნიკოს ეძახიან.

— ამბობენ, სპეციალურად თქვენს წასაყვანად ჩამობრძანდაო.

ვიდრე ნინო გრიბოედოვისა და დავით დადიანი საუბრობდნენ, დარბაზის მეორე მხარეს ეკატერინე და ტატო განმარ-

ტოებით ისხდნენ. ტატო ალბომში ლექსს უწერდა ეკატერინეს, თან დროდადრო გაბრწყინებულ თვალებს აპყრობდა მისთვის ყველაზე ძვირფას ადამიანს. „თავად ჭავჭავაძის ასულს ეკატერინეს“, — ასე წააწერა ლექსს. წერა დაამთავრა, წამოღება, ალბომი ეკატერინეს გადასცა. ქალიშვილი გააოცა ასე ექსპრომტად დაწერილი ლექსის სიდიდემ და შინაარსმა.

— ტატო, გეთაყვა, ასე სწრაფად რამხელა ლექსი დაგიწერია? — აღტაცებით უთხრა ეკატერინემ და ლექსს დაეწაფა. კითხვამ ისე გაიტაცა, რომ თავი მარტო ეგონა და უკანასკნელი სტრიქონები ხმამაღლა აღმოხდა:

მახსოვს სიამით,
ოდეს ტბილი ხმით,
ვარდსა და ბუღბუღს მოელხინარე,
პირმცინარითა,
სინარნარითა,
მგოსნის ყარიბ გულს ესხიმფინარე.

ეკატერინე აღტაცებაში მოიყვანა ლექსმა. სიხარულისაგან დაბნეულს ენა დაება. ვერ ახერხებდა ვერაფრის თქმას. მადლობითა და რაღაც გამოუცნობი სინანულით შეჰყურებდა ტატოს.

დარბაზის კარები გაიღო. გამოჩნდა ნიკო დადიანი. მას შემოყვანენ ალექსანდრე ჭავჭავაძე, ერისთავები — გიორგი და და რაფაელ, ორბელიანები — გრიგოლ და ვახტანგი, ჩოლოყაშვილი, ტორნაუ და სხვა მეგობრები. ალექსანდრე რიხიანად შემოვიდა ოთახში და სიხალისესთან ერთად საყვედურიც შემოიტანა.

— რა მოგივიდათ, ახალგაზრდებო! გამოდის, მე თუ არა ვარ, თქვენ სტუმრებს ვერ გაართობთ, — თქვა სიცილით, — არც ცეკვა, არც სიმღერა. კატენკა, სადა ხარ, ქალო!

ეკატერინე მამას შეეგება და სერიოზული კილოთი დაუწყო საუბარი. მორიდებულად მიუახლოვდა მათ ნიკოლოზ ბარათაშვილი. დარბაზი თანდათან სტუმრებით ივსებოდა. აგერ გამოჩნდნენ ქართველ ქალთა დამამშვენებლები მანანა და მაიკო ორბელიანები. ყველანი დასხდნენ. გიორგი ერისთავი ნინო გრიბოედოვას აღტაცებულ თვალებს ვერ აშორებდა, მაგრამ

ნინო ისეთი მოწყენილი იყო, დაეით დადიანს ძლივს ართობდა, მისთვის კატენკასგან დაკლებული ყურადღება რომ შეეცხო.

„რალა ახლა გაუნნდა ტატოსთან სასაუბრო, ხვალ ვერ ნახავს? უგანათლებულესი თავადი ხელში შემატოვა, თითქოს სულ არ აინტერესებს მასთან ყოფნა. რა თაქარიანია!“ — ფიქრობდა ნინო.

* * *

სალონში ყველას ჰქონდა მიჩენილი თავისი ადგილი. ნიკო დადიანი სალომემ თავის გვერდით მოისვა და ზუგდიდის ამბების გამოკითხვა დაუწყო. მალე მათ საუბარს ალექსანდრე ჭავჭავაძემ შეუშალა ხელი:

— ბატონებო, მოგეხსენებათ, მე ძლიერ მოყვარული ვარ ცეკვისა და სიმღერის, საერთოდ ღზინის, მაგრამ მთლად ნუნუას მოყვარულად ნუ ჩამთვლით. მე სხვა ღზინი კიდე უფრო მიყვარს, ღზინი პოეზიისა. ღზინი გონებისა ყველაფერზე უფრო ძვირფასია და ჩვენც ამაღამ ნიკოლოზ ბარათაშვილის პოეზიას დავეწაფოთ. მე მჯერა, ჩვენი ახალგაზრდა ნიჭიერი პოეტის პოეზია კატენკას სიმღერაზე უფრო დავატკობთ!

ალექსანდრეს სიტყვამ ყველანი აღტაცებაში მოიყვანა, ხოლო თვით პოეტი, ყოველთვის მოძრავი და სიცოცხლით სავსე, მოკრძალებულად იდგა და სევდიანი თვალებით გამოიყურებოდა.

ეკატერინემ ტატოს თავისი ხელით წინ დაუდგა პატარა მაგიდა. ფორტეპიანოზე მღვარი ვერცხლის შანდალი მაგიდაზე გადადგა.

დარბაზში სიჩუმე ჩამოვარდა. ნიკოლოზ ბარათაშვილმა წაიკითხა ახალი ლექსები: „ვპოვე ტაძარი“, „ბუღბუღი ვარდზე“...

ნიკო დადიანი სმენად იყო გადაქცეული, მაგრამ ამავე დროს თვალს არ აშორებდა დავითს, რომელიც ეკატერინეს გვერდით იდგა, როგორც მისი მონა-მორჩილი და ეკატერინეს მეტს ვერავის ხედავდა გარშემო. „იგი ალბათ არც პოეტს უსმენს ახლა“ — გაიფიქრა ნიკომ და სიამის ტალკვესმა გაპკრა გულში. ამ ახალგაზრდებზე ზუგდიდსა და თავის სოფელ

ჭკადუაშში გაეგო, რომ მათ შეუღლების სურვილი ჰქონდათ. მაშინ ყურადღება არ მიუქცევია, ახლა კი ფიქრობდა: „გარდა იმისა, რომ ეს ქალი მშვენიერებაა, ხომ სასიკეთო საქმე იქნება ჩვენი კუთხისათვის გარსევან ჭავჭავაძის ოჯახთან დამოყვრება. თვით ალექსანდრე ნამდვილი ქართველი მამულიშვილი, გავლენიანი და ყოვლად კეთილშობილი კაცია. ის ერთიორად წინ წაწევს ჩვენს კუთხეს. დავითი, რა თქმა უნდა, ყოველ სიკეთეს დაეწაფება. თბილისი ხომ სათავეა ქართული კულტურისა და განათლების. ამ საქმით კი საქართველოს შორეული კუთხეები უფრო დაუახლოვდებიან ერთმანეთს“.

ნიკო დადიანს ასეთი ფიქრები უტრიალებდა თავში. მაგრამ თან ტატოს ლექსების ერთი სტრიქონი არ გამოორჩენია. „იგი ნამდვილი, ჭეშმარიტი პოეტია“, — ფიქრობდა ნიკო.

ლექსებით აღფრთოვანებული სტუმრები გამარჯვებას ულოცავდნენ ნიკოლოზ ბარათაშვილს. არავის სურდა ცეკვა, თამაში, ყველა ლექსების შთაბეჭდილებებით იყო მოცული. უნდოდათ განმარტოებულიყვნენ და დიდხანს ლექსების ტკეობაში ყოფილიყვნენ. ლექსებით აღძრული სევდა და სიტყვის მუსიკალობა ღრმად ჩაებეჭდათ გულში...

მაღე დადიანები გამოეთხოვნენ მასპინძელს, გამოთხოვებისას ალექსანდრემ ნიკოს სთხოვა:

— თავადო, ნება მიბოძეთ ზვალ დილით თქვენს ბინაში გეახლოთ.

— დიდად მასიამოვნებთ, ბატონო ალექსანდრე, — თავაზიანად უპასუხა დადიანმა ჭავჭავაძეს.

წინა დღეს დაწყებული საუბარი დილას კვლავ განაგრძო ნიკომ დავითთან:

— მართალი ვითხრა დიდებული ოჯახი აქვს ალექსანდრეს, ან რა ქალიშვილები ჰყავს. ეკატერინე ნამდვილი სადედოფლოა. სამეგრელოს კი ახლა, როგორც არასდროს, მთავარიც ჭკვიანი სჭირდება და დედოფალიც. ამ დილით წერილი მივიღე ზუგდიდიდან. გიორგი, ჩემი შვილი, ულტიმატუმს უყენებს ლევანს. სთხოვს გადადგეს და ტახტი შენ დაგიტომოს. გიორგი მარტო არ არის, შვილო ჩემო. ამ აზრისაა თავადებისა და ხალხის დიდი ნაწილი. უნდა წამოხვიდე ჩემთან ერთად, დავით. თუ შენ ახლავე არ მიგაჩნია მიზანშეწონილად გამთავ-

რება, ხალხს მაინც ეჩვენე. გადახედე სამთავროს საქმეს, და-
ფიქრდი. მერე როგორც გონება გაგიჭრის და მოვალეობის
გრძნობა გიკარნახებს, ისე მოიქეცი.

დავითი დინჯი და ცოტა გულცივი კაციც იყო, მაგრამ ნიკოს
სიტყვებმა მას მტკიცედ გადააწყვეტინა მესამე დღეს სამეგ-
რელოში გამგზავრებულოყო.

ალექსანდრე ჭავჭავაძე დილის თორმეტ საათზე უკვე
დავით დადიანის მისაღებ ოთახში იყო.

ნიკო მოწონებით შეხვდა საპატიო სტუმარს. რაკი იცოდა
ზუგდიდის ამბები, დავითი გუმანით მიხვდა, თუ რისთვის
მოდოდა ალექსანდრე ნიკოს სანახავად. უხერხულად ჩათვალა
მათ საუბარში მონაწილეობის მიღება და სახლიდან ადრე
გავიდა; ნიკოს სთხოვა ბოდიში მოეხადა ალექსანდრესთან და
აეხსნა, რომ დავითი გამგზავრების სამზადისთან დაკავში-
რებით იძულებული გახდა სახლიდან ადრე გასულიყო-თქო.
ჭავჭავაძის მოსვლას ნიკო მხოლოდ თავისი პირადი პატივის-
ცემით ხსნიდა, მაგრამ სტუმარს ამჟამად სხვა უფრო დიდი საქ-
მე ჰქონდა.

ალექსანდრემ დაწვრილებით უამბო ნიკოს აღდგომა ღამეს
ზუგდიდში მომხდარი ამბები, რამაც ნიკოზე მძიმე შთაბეჭ-
დილება მოახდინა. ალექსანდრე გიორგის ამართლებდა და
თან ნიკოს ამშვიდებდა:

— ნუ სწუხართ, ბატონო, ისეთი რა მოხდა? ეს ჯერ მეფის-
ნაცვალმა არც კი იცის.

— განა გუბერნატორი არ აცნობებდა მეფისნაცვალს ჩემი
შვილის ასეთ უხეშ საქციელს? მთელ ჩემს სიცოცხლეს სამ-
შობლოს ინტერესებს ვწირავ, დედაქალაქს დაშორებულნი
მრავალჯერ მტრის ლუკმა ვყოფილვართ, რამდენი მიბრძოლია
იმისათვის, რომ ჩვენი დაკნინებული კუთბე წელში გამართუ-
ლიყო, ხალხს ერთი პირი ჰქონოდა. ვზრუნავდი ერთმანეთზე
მტრად გადაკიდებული თავადების შერიგებაზე; ჩემი შვილი
კი თურმე ჯარით მოადგა სამთავროს და ომით დაემუქრა ლევანს.
ნეტა არ გამეგონა, ბატონო ალექსანდრე, ეს სამარცხეინო ამ-
ბავი და მოემკედარიყავი.

— ის მიზანი, რისთვისაც იბრძვის თქვენი შვილი გიორგი,
მართალია და აუცილებელი. რა ვუყოთ, რომ მიზნის მისაღწე-

ვად ის ძალას მიმართავს. ეს შესაძლოა ახალგაზრდული სიფიცხის ბრალი იყოს. მთავარია კარგი საქმისათვის, ხალხის საქმისათვის იბრძოდე. თქვენი და დავითის გადაწყვეტილება მოსაწონია. დავითი დაუყოვნებლივ უნდა გაემგზავროს და მიხედოს თავის სამთავროს, დავითი განათლებული, ნიჭიერი ახალგაზრდაა. მე იმედი მაქვს იგი ურიგოდ არ წარმართავს სამთავროს საქმეს.

— ჩვენც ასე ვფიქრობთ, ბატონო ალექსანდრე... მაგრამ ჩემი შვილი არ უნდა აჩქარებულიყო, მოხუცი მთავრის ასე აბუჩად აგდება რა საკადრისია. გარდა ამისა, რომ ლევანი მთავარია, ბიძადაც მოხვდება გიორგის.

— ბიძებმა და მამებმა ბევრი რამ უნდა დაუთმონ შვილებს, ჩემო ნიკო, თუ ისინი საღ გზას ადგანან ხალხის სამსახურში.

— მაგის იმედი კი მაქვს, ბატონო ალექსანდრე, რომ გიორგი მხოლოდ თავისი კუთხისა და სამთავროს ინტერესებმა აიძულა მიემართა ამ გზისათვის.

— დარწმუნებული ვარ, რომ ეს ასეა. გისურვებთ კეთილ მგზავრობას. ჩვენ აქ და თქვენ იქ, ხელიხელჩაკიდებულებმა ერთი საქმე უნდა ვაკეთოთ ქვეყნისა და ხალხის საკეთილდღეოდ. თუ რაიმეში გამოგადგეთ, მიმსახურეთ.

* * *

მეორე დღეს ნიკო და დავით დადიანი დილაადრიან გაუდგნენ გზას სამეგრელოსაკენ.

როცა ნიკო და დავითი ზუგდიდის სასახლეში შევიდნენ, ლევანი სასტუმრო ოთახში იჯდა რამდენიმე ახლობელი თავადით. როგორც ყოველთვის, ამჯერადაც დიდი პატივისცემით შეხვდნენ ნიკოს. დავითის მოულოდნელმა ჩამოსვლამ კი მშობლები სიხარულით აავსო. მართალია, მართამ პირობა მისცა გიორგის, ლევანი დაუყოვნებლივ გამოიწვევდა თბილისიდან დავითს, მაგრამ სასახლეში ჯერ ეს საკითხი გადაწყვეტილი არ იყო. მთავრის კაცთა ერთი ნაწილი ლევანის გადადგომის კატეგორიული წინააღმდეგე იყო. არც ლევანს სურდა გიორგის მუქარით გადადგომა და ახლა შვილი რომ მოულოდნელად

ესტუმრა, უსაზღვრო სიხარულმა მოიცვა მოხუცი მამა. ღაღადღად დასახვედრად ერთბაშად ამოერეცხა გულიდან პატივ-მოყვარეობის გრძნობა. ახლა სულ ერთი იყო მისთვის, თუ ვინ რას იფიქრებდა. ევროპულად ჩაცმულ და აღზრდილ შვილთან მან, ცოტა არ იყოს, უმწეობა და სისუსტე იგრძნო, „აი, ვისი ჭკუა და გონება უნდა განაგებდეს სამთავროს“, — ფიქრობდა ლევანი სიამაყითა და აღტაცებით. გადაწყვიტა მთელი სამეგრელო რომ წასულიყო წინააღმდეგი, სამთავრო მაინც ღაღადღად გადაეცა. „მეფის მოხელეებს ღაღადღად თუ გაართმევს თავს, თორემ მე რაღას გავხდები. ისე გამომაცლიან ხელიდან სამთავროს, რომ ვერც გავიგებ“ — ფიქრობდა გულში მოხუცი მთავარი.

ცუდის მაუწყებელი

განთიადი მოახლოებულყო, როცა ტოჩი მარშანიამ, თემყვა ათმავამ და მათმა მხლებლებმა გაოფლილი ცხენები შეაგელვეს ოდიშში. ზუგდიდიდან მიხეილ შერვაშიძის წარგზავნილები ჭკადუაში ეშურებოდნენ გიორგი დადიანის სასახლეში. როგორც კი სასახლის ჯებირ-თხრილს მიაღწენ, ცხენები შეაჩერეს. მთელი ღამე უძილობით და მგზავრობით დაღლილებს მხოლოდ ახლა გაახსენდათ გიორგის ეზოში შესვლის სიძნელე. სასახლეში წესად იყო მიღებული, რაც არ უნდა ზარი ერეკათ, გათენებამდე სტუმარს თხრილზე ხიდს არ გაუღებდნენ. მაინც სცადეს, ცხენებიდან ჩამოხტნენ.

ათმავამ პალოზე დამაგრებული ჯოხი მთელი ძალ-ღონით მოზიდა. ზარის ხმაზე ნაგაზი აყეფდა.

შილიფ შურღაია, რომელიც ლევან დადიანს გამოქცეოდა და თავი გიორგისათვის შეეფარებინა, გუშაგებისა და სასახლის მცველების უფროსად ითვლებოდა. ის მტკიცე ხასიათის კაცი იყო, უშიშარი და ერთგული: თუ მის ადამიანურ ღირსებებს დააფასებდნენ, მტლად დაედებოდა ყველას, სამაგიეროდ, აგდებასა და ღალატს თუ ვინმეს შეამჩნევდა, ვინც არ უნდა ყოფილიყო, არ დაზოგავდა.

თოფმომართული შილიფი თხრილის ჯებირისკენ გაემარ-

თა, აფხაზეთიდან მოსული სტუმრები კი დაწყებულ საუბარს განაგრძობდნენ:

— როგორ ფიქრობ, თემყვა, ვითომ ეს ამბავი ჩვენს მთავარსა და მის სიმამრს, გიორგი ბატონიშვილს ერთმანეთს გადაამტერებს?

— მე მგონია, კი, — უპასუხა თემყვამ.

— ეს ძალიან ცუდია, როგორც იყო სამეგრელოს სამთავროდან ეს ერთი დიდი კაცი დაგვიმოყვრდა და ამ კავშირის დაკარგვა არ იქნება კარგი ჩვენთვის, ჩემო თემყვა.

— რატომ ფიქრობ ასე, ტოჩი, თუ მთავარი მიხეილი და გიორგი ბატონიშვილი ერთმანეთს წაეკიდებიან, შეიძლება აფხაზეთისათვის უკეთესიც იქნეს.

მათი საუბარი შეწყვიტა შილიფ შურღაის შეძახილმა:

— მტერი ხარ თუ მოყვარე!

— მოყვარე! — უპასუხა თემყვამ და თავისი სახელი და გვარი უთხრა. შილიფმა თოფი დაუშვა და ახლა უფრო თავაზიანად გადასძახა:

— რამე ცუდი ამბავი ხომ არ მოგაქვთ, ბატონო?

— ცუდი არაფერი, გიორგი ბატონიშვილს ვეახელით, თუ შეიძლება მალე გაგვიდევით ხიდი, გვეჩქარება ბატონის ნახვა, — უთხრა ტოჩიმ.

შილიფმა ცას ახედა და უპასუხა:

— ახლავე, ბატონო, სანამ ბიჭებს მოვიყვან, გათენდება კიდევ. თქვენისთანა კარგი სტუმარი ყველა ჩემს კეთილს მოსვლოდეს...

შილიფი შურღულივით გაექანა სასახლისაკენ, ხოლო ტოჩიმ საუბარი განაგრძო:

— გარკვევით მითხარი, თემყვა, შენი ფიქრით, რატომ იქნება კარგი გიორგისა და ჩვენი მთავრის მიხეილის წაკიდება?

— როგორ არ იქნება კარგი, ბატონო! გიორგი და მიხეილი რომ ერთმანეთს გადაემტერებოდეს, მთავარი ერთხელ და სამუდამოდ მოშორდება სამეგრელოსა და ქართლის გაუღენას. მაშინ მეფის მოხელეებს აღეკვეთებათ ფეხი აფხაზეთიდან. რა უბედურებამ შეაყვარა დადიანებს საქართველო და რუსე-

თი! თვითონ მათ გზას მიჰყვებიან და ჩვენს მთავარსაც იქით ეწევიან. ის დალოცვილი გიორგი დადიანი და მისი ძმები ყველაფერს ზომავენ და წონიან: თუ სადმე დიდი სამთავროა, ან დიდი კაცი, ყველა მაგათი მოყვარეა. ან აქეთ მოჰყავთ დიდი კაცის ქალები, ან თავიანთ ქალებს ათხოვებენ სხვადასხვა სამთავროში. დათვალე, რამდენი დადიანის ქალი იყო აფხაზეთში გამოთხოვილი: კესარია, გიორგის და, ალიბეგ შერვაშიძის ცოლი, მეორე მისი და ეკატერინე, გურიის მთავარს ჰყავდა. პუპი, ლევან დადიანის ქალიშვილი და კიდევ რამდენი, ვინ მოთვლის. ეს ქალები მამაკაცებით საქვეყნო საქმეებში ერევიან. წახდა ქვეყანა, რა ქალის საქმეა ქვეყნის საქმეებში მონაწილეობის მიღება? რომ ვუკვირდები, ისევ ძველი დრო ჯობია, ბატონო ტონი. — ეუბნებოდა თემყვა და გამოცდილი თვალებით უყურებდა მარშანიას, უნდოდა მოეგონებინა მისთვის, თუ რამდენი სარფიანი საქმე უკეთებით ერთად. ტონის ახლა არ უნდოდა გულახდილი ყოფილიყო ძველ მეგობართან და უპასუხა:

— რა გითხრა, ჩემო თემყვა, იცი? ახლა სხვა დრო დადგა, რაკი მთავარმა შეგვირიგა მარშანიები და ჩვენც სიტყვა მივეციოთ მისი ერთგული ვიყოთ, ყველაფერი დავივიწყოთ. ცხადია, მარშანიებს შერვაშიძეები საიმედოდ არ უნდა მიგვაჩნდეს. ჯერ მიხეილმა რამდენი მიწა-წყალი წაგვართვა. მან რუსის წყალობით გაიმარჯვა, თორემ რას დაგვაკლებდა. თურქები ხომ ჩვენ გვიჭერდნენ მხარს. მახსოვს, თემყვა, რას არ გვპირდებოდნენ ის ურჯულოები, თუ შერვაშიძეს სამთავროს წაეართმევდით, კიდევ კარგი, რომ არ ვენდეთ, აშკარად გვატყუებდნენ.

— როგორც გინდა, ისე თქვი, ბატონო ტონი, არ მიდის კარგად აფხაზეთის საქმე. ვყოფილიყავით ჩვენს ნებაზე, რად გვინდოდა ამდენი დავიდარაბა, ამდენი ბატონი. მე ვერ გამიგია, ვისი თაოსნობით მოხდა აფხაზეთის რუსეთთან შეერთება.

— ეკ, ჩემო თემყვა, ეს საკითხი ყველაზე უფრო ჭკვიანმა მეფემ და სარდალმა ერეკლემ გადაწყვიტა. ვის არ უნდა თავი მეფედ და ცოლი დედოფლად, მაგრამ, ალბათ, სხვანაირად არ შეიძლებოდა, ამიტომაც რუსეთის ხელმწიფის ძალას შეაფარა თავი.

— მერე, ბატონო, კაცი რომ მოგენდოს და მფარველობა გთხოვოს, შენ მგლად უნდა გადაიქცე?

მხედრები საუბარმა ისე გაიტაცა, რომ განთიადის სინათლეს ვერ შეამჩნიეს. როდესაც სასახლეს გახედეს, დაინახეს, რომ იქიდან ოთხი ფეხებაკაპიწებული მეჯინიბე მოდიოდა, მათ შილიფ შურღაია მოუძღვებოდა. სასწრაფოდ გაიშალა ხილი; შილიფი გამოღმა გამოვიდა, სტუმრებს მდაბლად თავი დაუკრა, ხელი ჩამოართვა, მან დაგვიანებისათვის ბოდიში მოიხადა, თავაზიანი პატივით სტუმრები წინ გაუშვა, მათი მხლებლები კი გაოფლილ ცხენებს რომ დაატარებდნენ, გააფრთხილა: სწრაფად მოგვეყვით, თორემ ხიდს ახსნიანო.

სტუმრები გაკვირვებულები იყვნენ: რა დავიდარაბა ყოფილა საჭირო დადიანს რომ ეახლოო.

გიორგი დადიანს ზარის ხმამ და ძაღლის ყეფამ ძილი გაუტეხა. ისიც გათენებას მოუთმენლად ელოდებოდა უდროოდ მოსული სტუმრების ვინაობა რომ გაეგო. არ იცოდა რა ამბავი მოჰქონდათ სტუმრებს, თუმცა კარგი არსაიდან იყო მოსალოდნელი.

როგორც კი განთიადმა გიორგის საწოლ ოთახში შეანათა, იგი სწრაფად ადგა, ჩაიცვა და სასახლის მოურავის გოჩა ხეიტის სადგომისკენ წავიდა. ეზოში შილიფ შურღაია შემოხვდა. შილიფმა ბატონის დანახვისთანავე თავზე წაკრული ყაბალახი წაიძრო, შავი გრუზა თმა გაისწორა და მორჩილი თვალები გიორგის მიაპყრო.

— შილიფ, ვინ დაგვიფრთხო ძილი მე და შენ? — ჰკითხა გიორგიმ.

— ტორი მარშანია და თემყვა ათმავა გეახლათ, ბატონო, აფხაზეთიდან, — უპასუხა მან.

„ვითომ რაშია საქმე? ქალიშვილები არ მყავდეს ავად, ან პატარა გიორგის არ უჭირდეს რამე“, — გაიფიქრა გიორგიმ.

ტორი და თემყვა გიორგის მისაღებ ოთახში შევიდნენ.

ფიქრებში გართული გიორგი უცებ გამოერკვა, ადგა, ნაბიჯი წინ წადგა და მოსულებს მცდელი თვალებით შეხედა. მათი თვალები კი სასიამოვნოს არაფერს მეტყველებდნენ. მარშანია მაინც არ დაიბნა: ბატონიშვილს მკერდზე ეამბორა, თავდახრილი ათმავა კი კარებთან კედელს აეკრა.

— ჩემო თემყვა, ყოჩაღად ყოფილხარ, მოდი აქეთ! — მიმართა მას გიორგიმ.

თემყვას იატაკზე ფეხი არ დაუდგამს, ისე გაჩნდა გიორგის წინ, თაყვანი სცა და შემდეგ ისევ კარებთან დადგა მოკრძალებულად.

გიორგიმ სტუმრებს დაჯდომა შესთავაზა. ტოჩი დაჯდა, მაგრამ ისევ სწრაფად წამოდგა.

— ბატონიშვილო, ძლიერ ვწუხვარ, რომ კარგი ამბის მაუწყებლად არ მოვსულვართ, — დაიწყო მარშანიამ, — მაგრამ უნდა მოგახსენოთ ჩვენი გაჭირვება: ბატონიშვილი მათა გუშინ დილით სასახლიდან წავიდა და აღარ დაბრუნებულა. მთავარმა ყოველი კუთხით მღვერები დააგზავნა, არც მკედარია და არც ცოცხალი. შიში და სირცხვილი ჰკლავს: სად გავალო თვალი, რა პირით შევხედო მამა ბატონსო, — აქარგა ენა აფხაზმა. — დიდი ქალბატონი ჭკუაზე აღარ არის, სულ თქვენ გახსენებთ, იძახის: მამას აცნობეთ, თუ ჩემი და ცოცხალია, მამა ბატონს არაფერი დაემალებაო.

სანამ ტოჩი ლაპარაკობდა, გიორგი წარბშეკრული უსმენდა, შემდეგ ცივად ჩაილაპარაკა:

— ვითომ შეგვარცხვინა მეცა და სიძეც?

— ეს როგორ მოხდებოდა! ბატონიშვილი მათა ისეთი ჭკვიანია და აუჩქარებელი, რომ არასოდეს არ შეცდება, — უპასუხა მარშანიამ.

— მაშ რა დემართა?

— ვერაფერს მოგახსენებთ, ბატონო, სასახლის გარშემო მითქმა-მოთქმა როდი გამოლევულა, მაგრამ ახლა მათა ბატონიშვილის ასეთ უეცარ გაუჩინარებას ვერაფრით ხსნიან.

— ხომ არაფერი აწყენინეს, თუ იცი? მათა ცოტა პატივმოყვარეა.

— როგორ გეკადრებათ, ბატონიშვილო! მთავარსა და მის მეუღლეს მათა თვალში რომ ჩავარდნიოდათ, ხელს არ ამოიხვამდნენ.

— ეგ მართალია, ტოჩი, მაგრამ... — გიორგი ბოლთას სცემდა ოთახში, უცებ შეჩერდა, მარშანიას თვალებში შეხედა. — სასახლის კარზე მაინც რას ამბობენ, იქნებ რაიმე ეჭვებს გამოთქვამენ?

— სასახლის კარზე ტირილი და წუხილია. ქალბატონს კაცისშვილის დანახვა არ სურს. მიხეილს ეუბნება, „გარეთ თავი არ გამოგვეყოფა, თუ დღეს-ხვალ მაიას კვალს არ მივაგენითო“. სად არ გაგზავნეს მღევრები, ნოლაში, ბატონიშვილის საგასამზრდელოში, საჩაჩიბაიოში, სვანეთში. ეხ, ისიც უნდა ვთქვა: არეული და შეწუხებული იყო აფხაზეთი იმ უბედურებით, რომელიც ამ დღეებში მოხდა.

— რა მოხდა აფხაზეთში?! — გაკვირვებით შეეკითხა გიორგი.

— ბატონიშვილო, დიდი უბედურება დაგვატყდა თავზე. ჩვენი საიმედო შვილი ალექსი შერვაშიძე, რომელიც მთავარმა ხელმწიფესთან მოსალაპარაკებლად რუსეთში გამგზავნა, გზაში გარდაცვლილა, კისლოვოდსკის მახლობლად. ის უბედური რომ მოასვენეს, სწორედ იმ ღამეს გაუჩინარდა მაია ბატონიშვილი. მთავარი და დიდი ქალბატონი შესაცხადებლად ბრძანდებოდნენ პუპი დადიანის ქალთან. მაია ბატონიშვილი იმათთან ერთად არ წაბრძანებულა სატირალში, — ტორიმ თითქოს რაღაც მეტი თქვაო, საუბარი უცებ შეწყვიტა.

გიორგის დაკვირვებულ გონებას არ გამოეპარა მარშანიას საუბრის კილო.

— დიდი უბედურება მომხდარა! რა ვაჟკაცი და პატიოსანი ადამიანი დაღუპულა. საცოდავი პუპი ნეტავ ეს არ გამეგონა, — თქვა გიორგიმ და განიერი ბეჭები უსიამოვნოდ შეარხია. კვლავ ოთახში გაიარ-გამოიარა, შემდეგ სტუმრებს მიმართა:

— ალბათ მთელი ღამის უძინარი ხართ, ისაუზმეთ და მოისვენეთ. ამ სიტყვებზე გიორგი ოთახიდან გავიდა.

* * *

ჯერ კიდევ სასახლეში სადილად არ დამსხდარიყვნენ, როცა ეზოში ზარის ხმა გაისმა. ცოტა ხნის შემდეგ სასადილო ოთახში ნოლადან მოსული ვარლამ გაბედავა შემოვიდა, მაიას ბიძაშვილი. მან ყველას მორჩილებით თავი დაუკრა.

დაიწყო სადილობა. სასახლეს ჩვეულებრივი ელფერი ედო. გიორგი თავის ჯავრს სტუმრებს არ უჩვენებდა, ცდილობდა მზიარული ყოფილიყო და მისთვის ჩვეული სილალითა და დარბაისლობით უძღვებოდა სუფრას. ვარლამმა ერთი შეხედ-

ვით შეატყო, თუ რა ბოღმა ტრიალებდა. გიორგის გულში, მაგრამ არ შეიმჩნია. სუფრას მიუჯდა და უმაღლეს საერთო მხიარულებას აპყვა.

ნასადილევს გიორგი თავის ოთახში წავიდა, ვარლამი თან გაჰყვა.

— რას მეტყვი საიმედოს, ვარლამ, რა დაემართა შენს გაზრდილს, — უთხრა გიორგიმ მორღუს, როგორც კი განმარტოვდნენ.

— კარგს ვერაფერს მოგახსენებ, ბატონიშვილო! ჩემს სახლში პირდაპირ ქრისტეს ტირილია. დედაჩემი კვილით იკლებს იქაურობას, მეც შენს დიდებას ვეახელი, გავიგო, თუ რას მიბრძანებ, როგორ მოვიქცე.

— ვერაფერს ვიზამთ, რაკი მოახლე თან მიჰყვება, უთუოდ ცოცხალია, ადრე თუ გვიან სადმე გამოჩნდება. ახლა მთავარი ისაა, რომ დედამისმა და სასახლემ არ გაიგოს ეს უბედურება. შემარცხვინა თქვენმა გაზრდილმა, ყელი გამომჭრა, ქვეყნის სალაპარაკო გამხადა. შენ გაბრუნდი შინ და, თუ რაიმე გაიგო, მაცნობე, ძიძა კი დაამშვიდე: გიორგის სულ არ ეშინია-თქო.

გიორგიმ ტოჩის და თემყვასაც იგივე უთხრა წასვლისას, ხოლო დამატებით ცუცუსთან ეს დააბარა:

— მაიას თუ რამე ცუდი შეემთხვა, შენც ცოცხლად დაკარგული იქნები ჩემთვის, მოკვდები, ნუ დამიტირებ-თქო.

* * *

სასახლეში ყველა გრძნობდა, რომ ბატონიშვილი უგუნეზოდ იყო, გიორგი სულ განმარტოებით დასეირნობდა თავის დიდ აივანზე, ხან კითხულობდა, ხან წერდა, მაგრამ როცა შვილზე დარდი ძლიერ შემოაწვებოდა, თავის საყვარელ ტყეს მიაშურებდა და ნადირობას გულს აყოლებდა.

ჭკადუაშის ფართო მინდორი ხშირ ტყეს ეკვროდა. თვალშეუდგამი მუხნარი და წიფლნარი ნადირთათვის საუკეთესო თავშესაფარი იყო. გიორგი დადიანის ტყე მდიდარი იყო ნადირით. შველი, ქურციკი, მელა, ტურა, ჯოგებად ცხოვრობდნენ უღრანი ტყის სიღრმეში. აქ დათვიც კარგად გრძნობდა თავს, რადგან ზამთარ-ზაფხულ გამოუღეველი ჰქონდა თაფლი. არც

ფრინველების ჭიკჭიკი და ყვავილების სურნელება აკლდა ამ ტყეს, რის გამოც მისი პატრონი თავისუფალ დროს ხან მარტო, ხანაც მეგობრებთან ერთად ხშირად ესტუმრებოდა აქაურობას და ბუნების წიაღში მშვიდად ისვენებდა.

ტყე უფრო მომხიბვლელი იყო მთვარიან ღამეებში, როდესაც იქ სრული ღუმილი ისადგურებდა. მხოლოდ ბუღბუღების სტვენა და ნიავის ნელი ქროლვა არღვევდა სიჩუმეს. ფოთლებით დაბურულ ტყეში მთვარის შუქი მიწამდე ძლივს ატანდა. მწვანე მოლი ხავერდით ელამუნებოდა ადამიანის გულს. ამ ტყეს ხშირად აფხაზეთისა და გურიის სამთავროებიდან გამოქცეულნიც აფარებდნენ თავს.

გიორგის მთელი დასავლეთ საქართველო იცნობდა, როგორც იმ დროის კვალობაზე განათლებულ და ნაკითხ კაცს, თან ვაჟკაცობითაც განთქმულს. მას ბევრი რაინდული თვისება ჰქონდა. გლეხობაში გიორგის არაერთი ნათლული ჰყავდა. გიორგის შვილების ძიძა-ალმზრდელად გახდომა ყოველმხრივ გაჩანაგებულ გლეხებს დიდ ბედნიერებად მიაჩნდათ. გიორგის სახით გლეხი მფარველს პოულობდა, ხოლო თავადი კი, როგორც ფეოდალი, მდაბიოთა შრომითა და სამსახურით უხვად სარგებლობდა.

გიორგი დადიანის სასახლეში დევნილებიც პოულობდნენ თავშესაფარს. ესენი იყვნენ გამოქცეული ყმები ან ღარიბი აზნაურები. მებატონესთან მათი დაბრუნება ნიშნავდა სასტიკი სასჯელის მიღებას, ხაჯალურებითა და ქანჩებით წამებას ან ოსმალეთში გაყიდვას. გიორგის ოჯახში ვერავინ შებედავდა გაქცეული ყმის საძებრად შემოსვლას.

მინდორში, ტყის დასაწყისთან წრე იყო მოხაზული თხრილით, რომელიც მეორე თავით ისევ ტყეს უერთდებოდა. მხოლოდ რამდენიმე ადგილზე წყდებოდა თხრილი სქლად ჩამწკრივებული მუხებით, რომელთა შორის კაცი ძლივს გაეტეოდა. ვიწრო ადგილები ქვის ჯებირებით იყო ამოვსებული და ამოკირული.

ჯებირის მარჯვნივ, საცხოვრებელი სახლის უკან, ციხე იყო ამართული, რომელიც გაჭირვების დროს სამას-ოთხას კაცს დაიტევდა. ამაყად გადმოჰყურებდა ენგურის ჭალებს ხავსითა და სუროთი შემობურული ციხე. დღე-ღამე შეიარაღე-

ბული გუშაგები დარაჯობდნენ ურდულებით დაგმანულ რკინის დიდ ჭიშკარს.

თხრილი, რომელიც დიდ ეზოს ზღუდავდა, სიღრმით და სიგანით ორ საჟენს აღემატებოდა.

იქ ჩავარდნილი პირუტყვი ცოცხალი ვერ გადარჩებოდა. ბევრ კარგ ცხენოსანს უცდია ბედი ამ თხრილზე გადამხტარიყო, მაგრამ ამაოდ, იგი მარცხით მთავრდებოდა. გიორგიმ აკრძალა ასეთი „თავის შექცევა“. გიორგი დადიანის ეზო ას ქცევას აღემატებოდა. ეზოში ჩადგმული ხის დიდი ოდა და აქა-იქ გაბნეული პატარა სახლები მიუწევდომელი და შეუვალი იყო, რომ იტყვიან, ჩიტიც ვერ შეფრინდებოდა. დაღამების შემდეგ წინა ეზო თითქოს არც კი არსებობდა. ვინც გიორგის პატივს სცემდა, უდროო დროს სასახლეში არ მოვიდოდა, რათა უხერხულ მდგომარეობაში არ ჩაეგლო არც თავი და არც მასპინძელი. რარიგ საპატიოც არ უნდა ყოფილიყო სტუმარი, დღე და ღამის გაყრის შემდეგ ყმები ხილს არავის გაუღებდნენ.

მსგავსი ცხოვრება ძველი ფეოდალების ოჯახში არც ისე იშვიათი მოვლენა იყო, მაგრამ გიორგის ოჯახის ასეთ დაცვას სხვა მიზეზები ჰქონდა.

გიორგი დადიანი თავისი ძმებით — პეტრეთი და ბესარიონით სამეგრელოში გავლენით სარგებლობდა. ამას მათი მამის დიდი ნიკოს სახელიც უწყობდა ხელს.

დიდ ნიკოს არა მარტო სამეგრელოში, მთელ საქართველოში და თვით რუსეთშიც იცნობდნენ თავისი „დასტურლამათი“ და ისტორიული ნარკვევებით.

ნიკოს ოჯახი მჭიდრო ნათესაური კავშირით იყო დაახლოებული საქართველოს დიდ ფეოდალებთან. ნიკოს ქალიშვილი კესარია სამურზაყანოს მფლობელ შერვაშიძეს ჰყავდა ცოლად. გიორგის ქალიშვილი ცუცუ აფხაზეთის მთავრის მიხეილის მეუღლე იყო. მაგრამ მრავალ ნათესაობასა და მოყვარეს შორის გიორგის მაინც ბლომად ჰყავდა მოწინააღმდეგენი თვით მთავრის ოჯახის წევრებსა და სამთავროსთან დაახლოებულ თავადაზნაურებში. ძმებს შორის გიორგი ყველაზე შეუპოვარი იყო. ასეთმა თვისებებმა გიორგის მრავალი მოწინააღმდეგე გაუჩინა.

მიხეილის სასახლიდან გამოქცეულმა მაიამ თავის ძიძისა და მორდუს სახლს შეაფარა თავი სამეგრელოში. იმ დროს, როცა ნოლაში ძიძიშვილები აბინაუებდნენ მონაზვნად ალკეცილ მაიას, სოხუმში ალექსი შერვაშიძის გასვენების სამგლოვიარო ცერემონიალი იმართებოდა.

ალექსის ასვენებდნენ აფხაზური წესით. სეფადან დაწყებული ჭიშკრამდე შავად შემოსილი მამაკაცები ორმხრივად იყვნენ ჩამწკრივებული. მიცვალებული ხალიჩებით და ცოცხალი ყვავილების გვირგვინებით მორთულ ფანჩატურში ესვენა. მიცვალებულთან ახლო ნათესაუები და მეგობრები იდგნენ, რადგან ალექსი შერვაშიძეს მამა და ძმა არა ჰყავდა. ჭირისუფლის ადგილზე ხუფმოხდილ კუბოს თავთან მიხეილი იდგა. მიხეილის უკან დიდგვაროვანი ფეოდალები განლაგებულიყვნენ.

უზოში ადამიანთა ტევა არ იყო. მოდიოდა და მოდიოდა მოტირალთა ნიაღვარი, თან მოჰყავდათ შავად შესუდრული ხარები.

ახალმოსული მამაკაცი თუ ახლობელი იყო ან საპატიო, დედის წინ გაჩერდებოდა, მიუსამძიძირებდა, ან მორიდებულად ჩაივლიდა „ავა-ვას“ ძახილით.

მამაკაცთა ორ მწკრივს შორის გამოჩნდებოდნენ თმაგაშლილი ქალები დასისხლიანებულ-დაკაწრული ლოყებით, რომლებიც მიცვალებულს გულზე ბლუჯა-ბლუჯა თმებს აყრიდნენ. პუპი დადიანის ქალს მოეხვეოდნენ მუხლებზე, იტირებდნენ გრძნობით სავსე სიტყვებით, შემდეგ ან იქვე ან უკანა რიგებში დასხდებოდნენ და ნელი ხმით მოთქმას გააბამდნენ. ეს მოთქმაც რიგრიგობით იწყებოდა და მთავრდებოდა. რომელიმე კარგი მომთქმელი ქალი ნაზად აიღებდა ორივე ხელს, ოდნავ შეკუმშავდა, თავზე შემოირტყამდა და ნელი ხმით დაიწყებდა „ავავას“, მერე მოულოდნელად შეცვლიდა კილოს, თანდათან სევდა მძლავრდებოდა იმის ხმაში, ქვითინად იქცეოდა. ამ ქვითინს ის „ეხ-ეხ-ს“ დააყოლებდა, რომელსაც იმავე ხმით, მოძახილივით, სხვა ქალებიც აჰყვებოდნენ. პირველი მომთქმელი გაჩერდებოდა, მას მეორე ქალი ჩამოართმევდა მოთქმას, რომელიმე მის სიტყვას გამოიჭერდა, ამაზე ახალ სიტყვებს

აკინძავდა, კრიალოსანივით ამარცვლავდა, სევდას და გულის ვარამს ისევ ახალ სევდას დაუმატებდა. ასე მწყობრად, განუწყვეტლად და ნაზად გადადიოდა ეს მოთქმა ერთი ქალიდან მეორეზე. ქალები მოთქმას მხოლოდ მაშინ შეწყვეტდნენ, როდესაც ვინმე საპატიო პიროვნება ჭირისუფლის წინ შეჩერდებოდა, რომ სამძიმრის თქმა ეცლიათ და პუპისთვის საშუალება მიეცათ თვითონ დაეტირა თავისი ძვირფასი შვილი. მოტირალეები რიგრიგობით მიჰყავდათ სეფაში, სადაც გაწყობილი სუფრა სავსე იყო პურ-ღვინით და სამარხვო სანოვაგით.

მოსული მტირალი ჭიშკართან ჩამოხტებოდა ცხენიდან, მას აქ ცხენს ჩამოართმევდნენ საგანგებოდ მიჩენილი, შავებში ჩაცმული ახალგაზრდა ვაჟები, რომელნიც აღვირს უნაგირის ტახტზე გადააგდებდნენ და ცხენს დიდ მინდორზე საბალახოდ გაუშვებდნენ, ეზოში შემოსულები შედგამდნენ თუ არა ფეხს მამაკაცთა მწკრივში, გაისმოდა გულშემზარავი შეძახილები: „ავავა, ავავა“ და შუბლზე ხელის შემოკერით მიდიოდნენ ფანჩატურისაკენ, ხოლო გაღმა-გამოდმა მწკრივად მდგარი ნათესავ-მოყვრები თავზე ხელისცემითვე უპასუხებდნენ. კუბოს ბოლოში მიწაზე დამხობილიყო ალექსის პირდასის-ხლიანებული ძიძა, რომელსაც კივილისაგან ხმა სრულიად ჩახლჩოდა. უგონოდ ახელდა თვალებს და ვოველ მომტირებელს ჩაწყვეტილი ხმით ეტყოდა: „ნანა, ალექსი, ჩემი თვალის სინათლე აღარა მყავსო“ — და ძუძუებს იგლეჯდა...

ლევანსა და სხვა დადიანებს აფხაზეთის მთავრისაგან ალექსის სატირალზე მოსაწყვევი ქაღალდები ნიკოსა და დავითის ჩამოსვლის შემდეგ მოუვიდათ.

ყველაფერი წინდაწინ იყო გამოანგარიშებული მიხეილის მიერ, ალექსის დასაფლავებამდე კიდევ ოთხი დღე რჩებოდა. ასე რომ, სამეგრელოს მთავარს საკმაო დრო ჰქონდა ღირსეულად მომზადებულიყო დასაფლავებაზე ჩამოსასვლელად. ლევანიც უმაღლესად მზადებას. შეადგინა სია დიდგვარიან ფეოდალებისა, რომლებიც თან უნდა ხლებოდნენ მთავარს და მხარი დაემშვენებინათ მისთვის. გარდა ამისა, ლევანმა სასწრაფოდ დაიბარა ეპისკოპოსი ჭყონდიდელი.

გიორგიმ გადაწყვიტა სატირალში არ წასულიყო, თავის

დედობილს მართას ბოდისა და სამძიმრის წერილი მისწერა, უხსნიდა თავის უხერხულ მდგომარეობას მაიას საქციელის გამო.

სატირალში წასვლის ორი დღით ადრე ზუგდიდში სამეგრელოს ყოველი კუთხიდან შეიკრიბნენ ლევანის მიერ მოწვეული პირები. ისინი დილით ადრე უნდა გასულიყვნენ ზუგდიდიდან, რომ სოხუმში დროულად ჩაეღწიათ.

სტუმრები სასახლის სხვადასხვა ოთახში იყვნენ განლაგებული.

მართა ჭყონდიდელთან და თავის ვაჟთან დავითთან საუბრობდა.

— სულიერო მამავ, — ეუბნებოდა დედოფალი ჭყონდიდელს. — ჩემი უბედური შვილიშვილი აუცილებლად ვიღაც ბოროტის მიერაა მოკლული. საზოგადოდ, მოგეხსენებათ, ოსმალების მრავალი წლის ბატონობამ აფხაზეთს ბევრი უსიამოვნება მოუტანა. ხალხში დათესა შუღლი და უბედურება. გადაკიდა ერთმანეთს ძმები და ნათესავეები. მათი სარწმუნოება, მოგეხსენებათ, მკაცრია, ვერ გამიგია რას ემსხვერპლა ობლობაში გაზრდილი ჩემი ალექსი.

— მართალსა ბრძანებთ, — ამოიხვნეშა ჭყონდიდელმა, — საქართველოს უმშვენიერეს კუთხეს — აფხაზეთს, საქართველო ვერ ექცევა ჯეროვანი ყურადღებით, თორემ იქ ასე ძლიერად არ უნდა მოეკიდა ფეხი ოსმალთა ზნე-ჩვეულებებს.

— საინტერესოა, რა მდგომარეობაშია თვით სოხუმი და საერთოდ ლიხნის მხარე. ის სოფლები ხომ აფხაზეთის გულია? — შეეკითხა დედას დავითი.

— იქ, შვილო აფხაზები იმ ზომამდე არიან გამუსულმანებული, რომ მშობლიურ ენაზე თურმე არც კი ლაპარაკობენ. — გულისტკივილით თქვა მართამ.

— ყოველი ღონე უნდა ვიხმაროთ, — დაიწყო მისთვის ჩვეული სიდინჯით ჭყონდიდელმა და დავითს მიუბრუნდა. — რომ ხალხი თავის რჯულს და ენას დაეუბრუნოთ.

— ეს არც ისე იოლი საქმეა, დიდ შრომას, გონივრულ მოქმედებას და ხანგრძლივ დროს მოითხოვს. მოგეხსენებათ, აფხაზეთის მთავარი მიხეილი და ბევრი დიდგვარიანი

ფეოდალი ამაში ხელს არ გვიმართავს. ოსმალებს, როგორც წინათ, ახლაც ჰყავთ ხელისშემწყობნი თვით აფხაზეთის სამთავროში. ისინი ოსმალეთთან ერთად საუკუნეების მანძილზე აბნელებდნენ ხალხის გონებას, ტანჯავდნენ აფხაზებს თავიანთი ფანატიზმით. უღირსი ჩვეულებანი: ძალმომრეობა, მრავალცოლიანობა და ბევრი სხვა სიავე, მტკიცედ ჩაბეჭდილია მათ გულში. ალექსის სატირალში მოსული აფხაზების ერთ მეათედსაც არ ექნება ნანახი ჩვენი ტრადიციული საღეთო ჩვეულებანი. ქრისტიანობა ხომ მარტო სარწმუნოება არ არის, ეს ამავე დროს კაცობრიობის მიერ მრავალი საუკუნის მანძილზე შექმნილი კულტურაა. ჩვენ ახლა ხელსაყრელი დრო გვაქვს ალექსის პატივისცემის ნიშნად აფხაზებს ქრისტიანობა მივაღებინოთ. ალექსი ისე უყვარდა ხალხს, ისეთ პატივს სცემდა, რომ ბევრი აფხაზი არა მარტო რჯულს გამოიცვლის მისთვის, სიცოცხლესაც გაწირავს.

— მხოლოდ ერთი რამის გათვალისწინებაა საჭირო, ბატონო დავით, — ჩაურთო ჭყონდიდელმა. — მომზადებული უნდა გვყავდეს ჩვენი თანამგზავრი გველენიანი პირები, რომელნიც კარგ განწყობილებაში არიან აფხაზეთის თავკაცებთან. ამას კიდევ შედარებით ადვილად მოევლება, შეილო ჩემო, მთავარია თვით მიხეილთან საერთო ენის გამონახვა.

— არა მგონია მიხეილთან საერთო ენა გამოვნახოთ. ჩვენ უნდა ვეცადოთ ხალხის მიმხრობას, — დაფიქრებით თქვა დავითმა და განაგრძო. — მე მოსვენებას არ მაძლევს ალექსის საიდუმლოებით მოცული, უცნაური სიკვდილი. ალექსი დაუძინებელი მტერი იყო იმ აფხაზებისა, რომელთაც ოსმალეთისკენ უჭირავთ თვალი. მე დარწმუნებული ვარ, ალექსი მოკლულია!

— რას ამბობ შეილო! — გაიოცა ჭყონდიდელმა.

დედამ შესფოთებით შეხედა შეილს.

დავითმა განაგრძო:

— თუ ჩვენ აღმოვაჩინთ ალექსის მკვლელს, იმის კვალსაც მივაგნებთ, თუ რატომ მოკლეს იგი. როცა ხალხი ალექსის მოკვლის მიზეზს გაიგებს, მისი მობრუნება ოსმალეთიდან ჩვენკენ უფრო გაადვილდება...

სამეგრელოს რჩეულ თავადაზნაურობას წინ ლევან ბატონი და ეპისკოპოსი ჭყონდიდელი მიუძღოდა. მთავარს მარჯვნივ მიჰყვებოდა უფროსი ვაჟი, დავითი, რომელიც მამის მიერ უკვე სამეგრელოს მთავრად იყო გამზადებული. მარცხნივ გრიგოლი — შუათანა ვაჟი, შემდეგ ყველაზე უმცროსი, სულ ახალგაზრდა კონსტანტინე, რომელიც რუსეთიდან ახალდაბრუნებული იყო. ნელ-ნელა მიჰყვებოდნენ გრძელ გზას, ზოგიერთ სოფლებში ჩერდებოდნენ.

პუპი მოუთმენლად ელოდა მამას, ძმებს, თავისიანებს. რას მოუტანდა მათი მოსვლა? მისი თვალის სინათლე ალექსის ხომ არ გაუცოცხლებდა? გამწარებული დედა მარტო შვილის სიკვდილით როდი იყო ზარდაცემული. ამ უბედურებას ემატებოდა შიში: ალექსის უეცარ სიკვდილს რაიმე უბედურება არ გამოეწვია აფხაზეთსა და სამეგრელოს შორის. შვილის სიკვდილი თუ წვაკდა, როგორც დედას, როგორც ქვეყნის ბედობლით დაინტერესებულ ქალს ისიც ტანჯავდა, რომ მისი შვილის მიერ დაწყებული საქმეები არ დასამარებელიყო. ან დასაფლავების დღესაც რამე ცუდი არ მომხდარიყო ამდენი სხვადასხვა აზრისა და ჯურის ხალხის თავმოყრით.

ხალხი თავის აზრს გამოთქვამდა მომხდარ უბედურებაზე. ლაპარაკი და მითქმა-მოთქმა უფრო გამწვავდა, როდესაც სამეგრელოს მთავარი და მისი შვილები გამოჩნდნენ. დამხდურნი შესახვედრად დაეწყვნენ. ზოგი ძალიან გულგრილად უყურებდა ალექსის სიკვდილს. კარგად ესმოდა, რომ ასეთი ძლიერი მეტოქის ჩამოშორება მათ ხელ-ფეხს უხსნიდა სამოქმედოდ.

თვით თავადი მიხეილი დიდად დამწუხრებულად აჩვენებდა ხალხს თავს. როდესაც დევანი და მისი შვილები ჭიშკართან გამოჩნდნენ, ის საპატიო თავადებით მიეგება მათ.

შვებით შემოსილი მიხეილი ყველას პატივით მიესალმა. პეტრეს განსაკუთრებით თავმდაბლად ეამბორა მკერდზე და მორიდებით ჰკითხა:

— ბატონო პეტრე, გიორგი რომ არ მობრძანდა, რაიმე ხომ არ შეემთხვა?

— არა, ბატონო, — უპასუხა პეტრემ, — თქვენთვის ძნელმისახვედრი არ უნდა იყოს მისი მოუსვლელობის მიზეზი.

მაშინლა მიხვდა მიხეილი, რომ მაიას გამო სიმამრის გული და ნღობა სამუდამოდ დაჰკარგა.

ჰყონდიდელი და ლევანი თავისი ახლობლებით მათთვის განკუთვნილ ოთახში მიიწვიეს. ჰყონდიდელმა სუფრა აკურთხა. მიცვალებულს შენდობა მისცა, წესისამებრ პურს ღვინო დააჰკურეს. მიხეილი თავს დასტრიალებდა სტუმრებს, უფრო დავითს ეკედლებოდა, რადგან იცოდა, რომ დავითი მალე მთავარი გახდებოდა, მისი გულის მონადირება უფრო საჭირო იყო, ვიდრე ლევანისა, რომელიც ტახტს ტოვებდა.

გვერდით მჯდომ მიხეილს დავითმა ასე მიმართა:

— ალბათ თქვენი სიმამრი ძალზე უგუნებოდ ბრძანდება, რომ პუპის შვილი არ იტირა, არც ჩვენ გაგვიწია ანგარიში.

დავითს ასეთი ნართაულით უნდოდა ალექსის სიკვდილზე გავრცელებული ხმები შეემოწმებინა.

— რა ბრძანებაა, ალბათ უგუნებოდაა ჩემი სიმამრი. მაიამ თავისი უმსგავსო საქციელით მეც შემარცხვინა, დამამცირა და, მით უმეტეს, მამამისიც შეურაცხყო.

ამ ლაპარაკს ყური მოჰკრა კონსტანტინემ. სუფრიდან ადგომის შემდეგ ახალგაზრდა და დაუდევარი კონსტანტინე დავითს მოსვენებას არ აძლევდა.

— ზომ თავის ცოლისდაზე გელაპარაკებოდა მიხეილი? რარიც მაინტერესებს ამ ქალიშვილის ნახვა?

— რა დროს ამაზე ლაპარაკია, როცა ჩვენი პუპი ასე შეწუხებული გვყავს, — წყენით უთხრა დავითმა უმცროს ძმას.

ალექსის ცხედარი ჯერ კიდევ ფანჩატურში ესვენა, როდესაც გუდაუთელი აფხაზები ეპისკოპოსს ეკლესიაში შეუყვანეს. ჰყონდიდელი მათ თარჯიმნის მეშვეობით ქადაგით და თხოვნით უხსნიდა, თუ რამდენად უფრო კაცთმოყვარე და ღმობიერი იყო ქრისტეს ცნება, ვიდრე მაჰმადიანებისა. სთხოვდა მიეღოთ ქრისტიანული სარწმუნოება. შემდეგ ეუბნებოდა, რომ ალექსი, რომელიც აფხაზი ხალხის საქმისათვის იბრძოდა, ქრისტიანი იყო და მის ერთ-ერთ ოცნებას მუსულმან თანამემამულეთა გაქრისტიანება შეადგენდა. უჩვენებდა ძვირფას ფრესკებს, ჯვარცმულ იესოს, ქრისტიანობისათვის თავი

დადებულ წმინდანებს, საკურთხეველზე დასვენებულ ოქროდ-მოჭედულ ხატებს. საცეცხლურიც კი ახდენდა მაჰმადიან აფხაზებზე შთაბეჭდილებებს. ჯერ კიდევ ალექსის ცხედარი გამოსვენებული არ იყო, რომ აფხაზების ერთი ნაწილი ქრისტიანებად მოინათლნენ.

პუპის გულს მალამოდ ეცხებოდა ეს ამბავი. ჩემს მკვდარ ალექსისაც სარგებლობა მოაქვს თავისი ქვეყნისთვისო, — თვალცრემლიანი ეუბნებოდა იგი თავის მამას ლევანს და ძმებს.

ალექსის დაკრძალვის მეორე დღესაც არ იღეოდა მოსანათლავი აფხაზები ალექსის კარის ეკლესიაში. რაკი ხმა გავარდა, ნათელასთან ერთად ეპისკოპოსი და მისი კრებული მშვენიერად გალობნო, თან მონათლულებს ურიგებდნენ ოქროცურვილ ჯვრებს, პატარა ხატებს ჯვარცმის გამოსახულებით, ამ უჩვეულოდ მოწყობილ და კელაპტრებივით განათებულ პატარა ეკლესიას უამრავი ხალხი მოაწყდა. მიხეილის მეუღლე ცუცუ, მამიდამისი კესარია — ოჩამჩირიდან ჩამოსული და სხვა დედაქალები მხურვალე მონაწილეობას ღებულობდნენ მაჰმადიან აფხაზთა გაქრისტიანებაში.

დადიანები რამდენიმე დღე დარჩნენ აფხაზეთში. მიხეილმა ისინი დიდი პატივით მიიწვია თავის სასახლეში, რომელიც ევროპულ ყაიდაზე ჰქონდა მოწყობილი. აფხაზეთის მთავარმა არაფერი დაიშურა სტუმრებისათვის. იგი აფხაზების გაქრისტიანებაშიც უწყობდა ხელს დავით დადიანს და ჭყონდიდელს. მაგრამ ამას იმიტომ კი არ აკეთებდა, რომ მაჰმადიან აფხაზთა სჯულის შეცვლა უნდოდა, ამით დავითის გულის მოგებას ცდილობდა, თან ეჩქარებოდა აფხაზეთიდან მათი წასვლა, ეშინოდა ალექსის მკვლელობის შენიღბული ამბავი არ გამო-აშკარავებულიყო.

მართალია, მიხეილს საშიშ მოწინააღმდეგედ მიაჩნდა ალექსი, მაგრამ ჯერჯერობით მისი თავიდან მოშორება არ უფიქრია. მთავარს უნდოდა ალექსის ხელით ჯერ თავისი საქმე მოეგვარებინა და მხოლოდ ამის შემდეგ გასწორებოდა მას.

მთავარმა ალექსის ბევრი დავალება მისცა რუსეთში გამგზავრების წინ. მიხეილის მიზანი იყო თვალი აეხვია მეფისათვის, მოჩვენებითი ხრიკებით მოეგო მისი გული და ამით

დროებით მაინც შეეყოვნებინა აფხაზეთის სამთავროს გაუქმება.

ალექსი ფრიად კმაყოფილი მიემგზავრებოდა აფხაზეთიდან. მართალია, მიხეილის გულწრფელობაში მას ეჭვი ეპარებოდა, მაგრამ, რასაც მთავარი ამჯერად ავალებდა და რის გაკეთებასაც სთხოვდა, ამაში ხომ საეჭვო არაფერი იყო. ჯერჯერობით ესეც საკმარისად მიაჩნდა ალექსის თავის ქვეყანაში რუსეთის საუკეთესო შეილების მოწინავე აზრების დასანერგავად.

ყველაზე მეტად მიხეილს ალექსი ახლა იმისათვის სჭირდებოდა, რომ სამურზაყანოს ფულის მიღების საქმეში დახმარებოდა. ამიტომ გაისტუმრა იგი ასე ფიცხლად რუსეთში.

მაგრამ, მისდა უნებურად, საქმე უკუღმა შეტრიალდა. მიხეილის საიდუმლოების და ბნელი საქმეების მოთავემ ხასანმა იცოდა, რომ მთავარს ადრე თუ გვიან ალექსი თავიდან უნდა მოეშორებინა, იფაქრა ამ საქმის გასაკეთებლად ყველაზე ხელსაყრელი დრო ახლა არისო, ალექსის ფეხდაფეხ გაჰყვა სოხუმიდან და კისლოვოდსკში მოუსწრაფა სიცოცხლე.

დადიანები აფხაზეთიდან ისე დაბრუნდნენ, რომ ალექსის სიკვდილის ნამდვილი მიზეზი ვერ გაიგეს. ერთი რამ კი მათთვის უდავო იყო: ალექსის მკვლელობაში მიხეილი აშკარად ერია. მაგრამ, რადგან ამის დასამტკიცებელი საბუთი ჯერჯერობით არ გააჩნდათ, გაჩუმება არჩიეს.

სამთავროში დაბრუნებისთანავე ლევანმა საბჭო შეკრიბა, რათა დავითისათვის სამთავრო გადაეცა. როდესაც ნიკო დადიანმა შეკრებილთ სამთავროს ვითარება და ხაზინის მდგომარეობა გააცნო, ყველა მწუხარებამ მოიცვა. სამთავრო განადგურებამდე იყო მისული. სახაზინოს თხუთმეტი ათასი მანეთი ვალი ედო.

დავითი წარბშეკრული უსმენდა ნიკო დადიანს, რომელიც ნათლად და ზედმიწევნით ზუსტად გადმოსცემდა შეკრებილთ სამთავროს სურათს. დავითი ხედავდა, რომ იგი დღეს სამთავროს ტახტზე კი არ აღიოდა, სამთავროს მძიმე უღელში ებმებოდა. სიამოვნებით იტყოდა უარს სამთავროს მიღებაზე, რომ თავისი ძმების — გრიგოლისა და კონსტანტინეს იმედი ჰქონოდა სამთავროს გაძლოლისა; სამთავროს კი ახლა, როგორც არასდროს, სჭირდება გულშემატკივარი პატრონი,

ნასწავლი, რუსეთის მოწინავე საზოგადოების იდეებით გამსჭვალული. „არა, არა მაქვს უფლება უარი ვთქვა სამთავროს პატრონობაზე“, — ფიქრობდა დავითი და იგი გულში უკვე გემებს აწყობდა, თუ რა უნდა გაეკეთებინა პირველ რიგში, როგორ გადაეხადა ხაზინის ვალი, როგორ გაეყვანა გზები, აეშენებინა ხიდები, სკოლები. ნიკო დადიანის მიერ ჩამოტანილი, სამურ-ზაყანოში მიღებული ფული ყველაფერს ამას, რასაკვირველია, არ ეყოფოდა. თხუთმეტი ათასი ჯერჯერობით ვალად რჩებოდა.

ხალხი დავით დადიანის გამთავრებას ერთგვარი იმედით შეხვდა. ყველაზე მეტად ამ ამბით გიორგი დადიანი იყო კმაყოფილი. თუმცა მისი გული საყვარელი ქალიშვილის ამბით იყო მოშხამული. მაგრამ დავითის ტახტზე ასვლამ რამდენიმე ხნით გადაავიწყა პირადი მწუხარებაც და ლევანთან მოსული უთანხმოებაც.

* * *

მიხეილ შერვაშიძის სასახლიდან გამოქცეულ ქვეითად მიმავალ მაიას გზაზე ბევრი ჭირი გადახდა. ტყე-ტყე, ბილიკ-ბილიკ დღითა და ღამით მიმავალ მაიას ერთადერთი ნუგეში მისი ერთგული მოახლე თუთანა იყო. რამდენიმე დღე გულდამწუხრებული ხეტიალით მაია ისე იყო დაღლილი, რომ თავისი მშვენიერი ნაწნაუები მძიმე ტვირთად აწვა ზურგზე. ქლიავისფერი თვალები ხან ცრემლით ევსებოდა, ხან რისხვით.

ასეთ წუთებში ლამაზი ბაგე უჩვეულოდ მაგრად ეკუმშებოდა. თვალებს მოშორებოდა ის ხალისი და ცეცხლი, რომელიც ალექსის ერთადერთ ამბირს ალბეჭდა სულ რამდენიმე დღის წინათ.

წარბები მალიმალ ეღუშებოდა. მაია შესვენებისას შალს მოიხდიდა, შენამულ ფართო შუბლსა და ფიქალ ღაწვებს ცხვირსახოცით მოიწმენდა, თითიდან, რომელიც სპილოს ძელისაგან გამოთლილს ჰგავდა, ბეჭედს მოიძრობდა და დიდხანს უტკეროდა; შემდეგ სწრაფად ადგებოდა და კვლავ გზას განაგრძობდა.

საკმაოდ ბნელოდა. ახალი მთვარე მკრთალად უნათებდა გზას მაიას და თუთანას. ისინი მშვიდობით შევიდნენ სოფელ ნოლაში. შორიდან მოჩანდა ნოლას ციხე, რომელიც სოფელს მალლიდან გადმოჰყურებდა. ეკლესიის ახლოს მიწაში ღრმად ფესვებგადგმული დიდი ცაცხვი იდგა, მის ჩრდილქვეშ თუნდ ასი კაცი დაისვენებდა. აქა-იქ მიწიდან ამოჩრილი ფესვები, ზოგი ფართო, ზოგი ზურგიანი სკამისმაგვარი, მგზავრს დასასვენებლად იწვევდა.

მაიაც აქ ჩამოჯდა, ციხეს თვალს არ ამორებდა, მას უკავშირებდა ხალხის ძლიერებას, სამშობლოს სიყვარულს. ამ ცაცხვის ძირში ყოველთვის იმართებოდა „ჯარიანობა“ და ღამის თევა, ჭიაკოკონობა. მაიას ძიძის სახლში უდარდელად გატარებული ბავშვობა მოაგონდა, მერე მამის ოჯახში გავლილი დღეები და ნებივრობა გაიხსენა.

ერთხელ თექვსმეტი წლის მაია დიდი ხნის უნახავ ძიძას ესტუმრა.

ძიძიშვილებმა, მაიკომ და ტატუმ, მარილიანი კვერები გამოაცხვეს, მაიასაც აჭამეს, რომ იმ ღამეს საბედო დასიზმრებოდა. აკი დაესიზმრა კიდეც. მაშინ ამისათვის ყურადღება არ მიუქცევია. მას შემდეგ ზუთმა წელმა განვლო, მაიას კი გუშინდელი დღესავით ახსოვს, სიზმარში მშვენიერ ვაჟკაცს ცხენოსნობაში რომ ეჯიბრებოდა. მხედარი ცხენიდან ჩამოვარდა. მაიას გაუხარდა, რომ ვაჟკაცს ცხენოსნობაში აჯობა. მაგრამ ამ დროს უცხოოდ ჩაცმული კაცი შეეფეთა. მაიას შეეშინდა და გამოეღვიძა. არც მაშინ აუხსნეს ძიძიშვილებმა ეს სიზმარი კარგად — საქმრო არ მოგიკვდესო, ეხუმრებოდნენ.

„რა საოცრად დაემთხვა სიზმარი სინამდვილეს“, — ფიქრობდა გულმოსხამული ქალი.

კიდეც რამდენი რამ მოაგონდა მაიას ბავშვობასა და ქალიშვილობაში ბედნიერად გატარებული დღეებიდან.

როგორ უყვარდა ძიძის ოჯახი, თვით სოფელი ნოლა. განსაკუთრებით ეს დიდი ცაცხვი თავისი ფესვებით; როგორ ოცნებობდა, რომ ალექსის აქ მოიყვანდა და უჩვენებდა ამ ადგილებს, სადაც ბედნიერი ბავშვობა გაატარა. ხელები მუხ-

ლებზე შემოიხვია, ბეჭედი შეიგრძნო, ახლა ბეჭედზე გადაიტანა ფიქრი.

რუსეთში წასვლის დროს როგორ სთხოვდა ალექსი ეს ბეჭედი მაიას დაეტოვებინა, თითხედაც მოაზრომა, სახე გაუბრწყინდა და თქვა: მთლად შენი თითის ზომა ყოფილაო. ტანში ჟრუანტელმა დაურბინა ალექსის გამოთხოვების მოგონებით.

რუსეთში გამგზავრებისას ალექსი დიდი სიყვარულითა და პატივისცემით გამოეთხოვა ცუცუს, მერე მაიასთან მივიდა და მოულოდნელად ხელზე აკოცა. ქალიშვილი დაიბნა, ვერც ხმის ამოდება მოასწრო, ვერც გაბრაზება, ვინაიდან ალექსი უეცრად მაიას გაშორდა, ისევე ცუცუსთან მივიდა და უთხრა:

— ბატონიშვილო და ბატონის მეუღლე, შენ ჩემთვის დედაც ხარ და რძალიც, მაია ჩემი სიცოცხლეა. მე უკვე ოცდათორმეტი წლის კაცი ვარ, ასეთი სიყვარული ჩემს გულს არ გამოუცდია. შენ გაბარებ ჩემს მაიას, ჩემს სიცოცხლეს.

— დაწყნარდი, ძმავო, ვაჟკაცს არ ეპატიება ასეთი გულჩვილობა.

— მე უკადრისი რამ არ ჩამიდენია არასოდეს, ახლა მე თვითონ არ მომწონს ჩემი სისუსტე, მაგრამ რა ვქნა. ეს გრძნობა ჩემს ძალას აღემატება, როგორც კი რუსეთიდან დავბრუნდები, ჩვენ ჯვარს დავიწერთ. გიორგის მოციქულს გავუგზავნი, ნუთუ უარს მეტყვის?

— რად გეტყვის უარს. შენ საქმე დაამთავრე რიგიანად, მშვიდობით დაბრუნდი და ყველაფერი მოგვარდება, რაკი ერთმანეთი გიყვართ...

მაიას ახლა გული დაწყდა, რომ ცუცუს მკაცრი წერილი მისწერა.

„რა ბრალი ჰქონდა ცუცუს. ის გულუბრყვილო ქალია, თავის ბოროტ ქმარს ვერ იცნობს, ენდობა. იქნებ ცუცუს გულახდილობამ იმსხვერპლა ალექსი? მიხეილი წინააღმდეგი იყო ჩვენი შეუღლებისა. იქნებ მე ვიმსხვერპლე ალექსი? გული არ მიწევს სამგზავროდო“ — აი, რაზე ფიქრობდა ცაცხვის ჩრდილში ჩამომჯდარი მაია.

ტკბილ-მწარე მოგონებებისა და ხანგრძლივი სიარულისა-
გან მოქანცული მაია თუთანას თანხლებით ძიძის ეზოში ჩუმაღ
შევიდა.

კარგად ახსოვდა გამზრდელების ოჯახში დამკვიდრებული
ჩვეულება, რომ ვახშმობამდე ძაღლებს არ აუშვებდნენ. ფეხაკ-
რეფით მიუახლოვდა ოდას. სახედაკაწრული ძიძა დაბალ სკამ-
ზე იჯდა კერის პირას, იქვე შორიახლო მისი რძალი, დიმიტ-
რი გაბედავას ცოლი ნინო და სხვა შინაურები უსხდნენ
ცეცხლს.

ძიძა ნელი ხმით მოთქვამდა და ბუტბუტებდა: „სადა ხარ
გაზრდილო, ჩემო თვალის სინათლევ?“

მაიას მოთქმა ესმოდა. წინასწარ არ გააფრთხილა მასპინ-
ძლები, კარი წყნარად შეაღო და ნელი ნაბიჯით შევიდა ოთახ-
ში.

იქ მყოფმა ქალებმა დაინახეს თუ არა მაია და თუ თანა,
ერთხმად შეჰკვივლეს. შიში და სიხარული ერთმანეთში აირია.
ზეწამოჭრილი ძიძა მალე გამოერკვა. გაზრდილს მოეხვია და
მის საკოცნელად დახრილ მაიას მარჯვენა ხელი რამდენჯერ-
მე შემოავლო თავზე.

— შემოგველოს ძიძა, ცოცხალი გნახე, აწი თუნდაც მოვ-
კვდე, არ მენანება.

მაია მკერდზე მიეკრა ძიძას, დაკაწრული დაწვები დაუკოც-
ნა. მერე უსიტყვოდ დაეშვა გრძელ ტახტზე. შეშინებული ძიძა
არაფერს ეკითხებოდა, რადგან ხედავდა ადამიანის ფერი არ
ელო მაიას. ფეხებთან დაუჯდა და მუხლებზე მოეხვია.

ნინო შორიახლო იჯდა, თავი ზედმეტად მიაჩნდა აქ: „ვინ
იცის, რა უნდა გაუზიაროს ძიძას, მე ხელს ვუშლი“. — გაი-
ფიქრა და წამოდგა.

— ნინო ბიცოლა, შენი დასამალავი რა მაქვს, იყავი ჩვენ-
თან. ძიძა, ვახშამი დაგვიჩქაროს, ძალიან მშობია.

ძიძიშვილი მაიკო სწრაფად წამოდგა. ამ წუთში იქნებო
ყველაფერი, — თქვა სიხარულით და ოთახიდან გავიდა, მაიამ
კი ისევ ქალებს მიმართა:

— დღეს ოთხშაბათია, არა? სრული ეროი კვირაა, ხეირიანი

საჭმელი და ძილი არ გველირებია. გზაც ხშირად გვეშლებოდა. საწყალი თუთანა მარჯვედ იყო, ციყვივით ძვრებოდა ეკალბარდებში, ერთნაირად უჭრიდა თვალი ბინდში და სინათლეში. თქვენ, ალბათ, მეორე დღესვე შეიტყვეთ ჩემი ამბავი, გამომაღვენეს კაცები, ხომ?

— კი, შენი ჭირიმე. შენი მორღუს ძმა იმ დღესვე გაეშურა შენს საძებნელად. — უპასუხა ნინომ.

სანამ მაიას გაქცევის შიში თავზარსა სცემდა, ძიძა სხვაზე არაფერზე ფიქრობდა, ოღონდაც იგი ცოცხალი ენახა, ახლა როდესაც მაიას უენებელს ხედავდა, მასში თავმოყვარეობის გრძნობამ გაიღვიძა. ეს გაპარვა და ტყე-ღრეში მხლებელი ქალის ამარა ყაჩაღივით ხეტიალი არ მოსდიოდა ჭკუაში დედაკაცებში გაზრდილ დარეჯანს. თავჩაქინდრული იჯდა და ფიქრობდა:

„განა ამისათვის მომწონდა თავი მაიას ძიძაობით, რომ ხანში შესულს თავზე ასეთი სირცხვილი დამტეხოდა? ამ ამბავს ხომ მთელი ქვეყანა გაიგებს, ჩემი გვარის ქალები ისედაც შურით მიცქეროდნენ, რომ დიდი ნიკოს შვილიშვილი ჩემი ძუძუთი გავზარდე. გიორგისა და მისი ცოლის წყალობით ასე წელში გავიძარტე, ოდა ავიშენეთ, კვამლიან სახლში ვინ გამაზრდევინებდა მაიას. მათი დამოყვრების პატივით ორი ქალიშვილი აზნაურებს მივათხოვე, უფროსი ქალიშვილი ჩაჩიბაიამაც სიამოვნებით შეირთო. ჩემი უფროსი ვაჟი, ვარლამი, უფრო ხშირად სასახლეშია. უმცროსი ძუძუდან მოვიგლიჯე და ჩემს მოგვარე ქალს გავაზრდევინე, ისიც შეჩვენებულ ჯოდორია დგებიას ძმის ცოლს — ჯგერენაიას. ამ კუთხეში ჩემი ქმარ-შვილი აზნაურებს ტოლს აღარ უდებენ ცხენ-უნაგირით, ჩოხა-ახალუხით. ადრე დავექრივდი, მაგრამ ქვრივ-ობლობა არ უგრძენია ჩემს ოჯახს. ახლა მტრების სასიხარულო ამბავი მომივიდა. ზეზეულად მკვდარი ვარ“.

მაიამ იგრძნო გამზრდელის რისხვა. ძიძის ასეთი ჯიუტი დუმილი ოღნავადაც არ გამოხატავდა მისადმი თანაგრძნობას და თვითონ მაიამ დაარღვია სიჩუმე:

— სად არიან ჩემი ძიძიშვილები? სად არის ბიძია დიმიტრი? — იკითხა მაიამ.

— ბიძათქვენი კურზუშია, ვარლამი კი კიწიაში წავიდა. ალბათ, ამ საღამოს დაბრუნდება, ჭუტულა ისევ ჭკადუაში

გვეუშვით. ძიძა ვერ დავამშვიდეთ, სახლში ვის დაედგომებო-
და, ისეთი ცეცხლი გვეკიდებოდა, ბატონიშვილო! რაკი კარგად
გვეყვხარ, ამის შემდეგ ნეტავ რა შეგვაწუხებს? — მიუგო ნინომ.

ძიძა ისევ ღუმდა, თავდახრილ მაიას, რომელსაც მუხლებზე
დაყვრდნო მშვენიერი ხელები, არ ეფერებოდა, რადგან გულ-
მოსული იყო მასზე.

მაიამ ღონე მოიკრიბა და ძიძას უთხრა:

— ძიძა გეტყობა ძალიან მიწყრები, რომ ჩემთან ლაპარაკი
არ გსურს.

— რაზე გელაპარაკო, ძიძა გენაცვალოს, როდესაც პატარა
იყავი, მაშინ არაფერი ჩაგიდენია ცუდი და საძრახისი, ახლა,
როცა ოცი წლისა გახდი, შენი აჩქარება როგორ გამახარებს,
რა შენი საკადრისი მოხდა, რომ არ შევეწუხებიან?

— რატომ არ გეცოდები, ძიძა? რატომ არ გიკვირს რა
მაიძულა ასე უდიერად მოვექცეოდი ჩემს თავს, ჩემს ძვირფას
მშობლებს და ნათესაებს? ჩემს საყვარელ გამზრდელებს? ვიცი,
ყველანი მემღურით, მაგრამ ამაზე შემდეგ, მგონი ვახშამიც
მოაქვთ.

თუთანა კუთხეში იდგა, იგი ყველას დაეიწყებოდა და, ფეხ-
ზე ჩამომწყდარი, მოქანცული თვალებით შეჰყურებდა მაიას.

— თუთანა, ფეხზე დგახარ? დაჯექი, შე უბედურო. ამ
წუთში ვივახშმებთ. ამაღამ კი დაგვეძინება უშიშრად... იცი,
ძიძა? გზაზე თუთანას მუხლებზე დამეძინებოდა, ის დიდხანს
არ მალეძებდა, თვითონ კი სულ ფხიზლობდა საცოდავი.

დარეჯანმაც მხოლოდ ახლა შეამჩნია თუთანა.

— დაჯექი, შვილო, დაისვენე, ვახშამიც მალე იქნება. —
შემდეგ მაიასკენ მიბრუნდა, — შვილო, ეს ის გოგო ხომ არ
არის, შენ რომ თათრებს წაართვი?

— დიახ, ის გახლავთ, ძიძა. — უპასუხა მაიამ.

მაიას მისთვის მიჩნეულ ოთახში გოგოებმა დიდი სპილენ-
ბის ტაშტი დაუდგეს და ქვაბები შემოიტანეს, რომ ნამგზავრს
აბაზანა მიეღო.

მაია ლოგინში ჩაწვა და ძიძა იხმო, თავის გვერდით წამო-
წოლა სთხოვა, თავი მკერდში ჩაუღო. დარეჯანსაც მოუღბა
გული, ცრემლებს ღვრიდა და ლულულულით ევედრებოდა მაიას.

— გამიხსენი, შვილო, გული, რა გიჭირს, რა მოხდა?

— შემდეგ, ძიძა, ახლა დამასვენე, გონს მოვიდე.

დარეჯან ხვიჩიას ქალი ჯერ კიდევ ტკბილ ძილში იყო, რომ ძაღლების ყეფა, ცხენების ფეხის ხმა და ფრუტუნი შემოესმა. ალბათ, ვაჟები ან მაზლი დაბრუნდაო, — იფიქრა და უკანა კარებიდან გასძახა:

— რომელი ხარ?

გარედან მაშინვე გამოეხმაურნენ: ვარლამი და ჭუტულა ვართო და ორივე ვაჟი საჩქაროდ დედის ოთახში შემოვიდა. მაიას დაბრუნება მოულოცეს; ახლა იმას წუხდნენ, რომ დიმიტრი ამაოდ წავიდა სვანეთში.

— კურზუს იქით არ წავიდოდა, — დაამედა შვილები დედამ. — იქით ჩემს მაზლს მოყვრებიცა ჰყავს. არა, ის ძაღვ დაბრუნდება. რაკი ღმერთმა ჩემი მაია ცოცხალი მაჩვენა, რაღა მაქვს სადარდებელი. ახლა, შვილებო, რომელიმე თქვენგანი ჭკადუაშში უნდა წავიდეს, გიორგი დადიანი ნახოს და მაიას დაბრუნება ახაროს.

დაქანცულები იყვნენ, ძილი ყველაფერს ერჩივნათ, მაგრამ მაიას ამბავი აინტერესებდათ და უნდოდათ რაც შეიძლება მეტი გაეგოთ დედისაგან მის შესახებ.

ისინი ხმადაბლა ლაპარაკობდნენ, რომ მაია არ გაელვიძებინათ.

მეორე დილით საუზმე მზად იყო, როდესაც მაიას გაელვიძა. ვარლამი და ჭუტულა ცას ეწივნენ სიხარულით. მაია ღვიძლ დას ერჩივნათ. ვარლამი უფროსი ვაჟი იყო; ჭუტულა, როგორც მაიას ძუძუმტე, შეთამამებული იყო მასთან და ერთმანეთს უფრო მეგობრობდნენ.

მაია ვერ შეხვდა ძიძიშვილებს უწინდელი სიხარულითა და სიყვარულით. თავს ძალას ატანდა სჩვენებოდა მათ უდარდელი, მაგრამ ვერ ახერხებდა. ვარლამმა და ჭუტულამ ეს შეამჩნიეს. მისი მართო დატოვება არჩიეს. ნასაუზმევს რაღაც საქმე მოიმიზეზეს და სახლიდან გავიდნენ.

ძიძა და მაია მართო დარჩნენ.

— როგორც უკვე გითხარი, მე გადავწყვიტე აქ, შენთან დავრჩე, ჩემო საყვარელო ძიძა, — დაიწყო მაიამ დიდი ხნის დუმილის შემდეგ და თვალი ცრემლით აევსო. — მხოლოდ არა ამ ოთახში, სადაც სიხარულით სავსე დღეები გამიტარებია.

მომიდგით სახლზე მოლობილი ფაცხა, მიყიდეთ შავი ძაძა, შავად წავიდა ჩემი საქმე და შეურიგდით ჩემს უბედურებას, ჩემო ერთგულებო! ვარლამი და ნინო დღესვე წავიდნენ და მამაბატონს ეახლონ, ჩემი სურვილი და გადაწყვეტილება მოახსენონ. სთხოვონ მშობლებს ჩემი სურვილის წინააღმდეგ ნუ წავლენ, მომიტევეთ და ნუ შემრისხავენ, თორემ ამ სულიერ ტანჯვას მამისა და დედის რისხვა თუ დაემატა, თავს არ ვიცოცხლებ. მე ახლა ნურავინ მინახულებს, არცა მაქვს ვინმეს ნახვის სურვილი. თან ისიც მოახსენეთ, რომ ცუცუსა და და მიხეილს არავითარი ბრალი ჩემს წინაშე არ მიუძღვით.

მეორე დღეს ვარლამი და დარეჯანის რძალი ნინო ჭკადუაშის გზას დაადგნენ, რომ გიორგი დადიანისათვის მაიას გადაწყვეტილება მოეხსენებინათ. საბრალოები, შიშით აღარ იყვნენ; გიორგის შეეძლო თავისი რისხვა მაიას ამბის მომტანებზე დაეტეხა. იმ დროს, როცა ვარლამი და ნინო მძიმე ფიქრით დანადვლიანებულნი ჭკადუაშისკენ მიიჩქაროდნენ, მაია ჭუტულას ასეთ დავალებას აძლევდა:

— ჩემო ჭუტუ, შენ დღესვე შეუდექი თადარიგს, ჩემი ბინა ამ სახლზე უნდა მიაშენოთ. მხოლოდ განცალკევებული იყოს, დაბალი და ბნელი.

— დაიცადე, შვილო, — აცრემლებულმა ძიძამ მაიას — მოვიდეს ჩემი მაზლი და ის გააკეთებს ყველაფერს, რასაც მოისურვებ.

* * *

როდესაც ნინო და ვარლამი ჭკადუაშში მივიდნენ, ძმები: გიორგი, ბესარიონი და პეტრე დადიანები აივანზე ისხდნენ და ჭადრაკს თამაშობდნენ. ბესარიონი არ იყო კარგი მოჭადრაკე, უფრო ნარდს ეტანებოდა, გიორგი და პეტრე კი ნიადაგ ჭადრაკის თამაშში იყვნენ გართულნი და ხან ცხენს წააგებდნენ ერთმანეთთან, ხან უნაგირს.

გიორგიმ შორიდანვე იცნო ვარლამი და ნინო, შეკრთა, მაგრამ თამაში მაინც არ მიატოვა, მხოლოდ ეცადა აივანზე სტუმრების ამოსვლამდე დაეშამათებინა მოწინააღმდეგე. ნინო და ვარლამი აივანზე ამოვიდნენ, გიორგიც წამოდგა და პეტრეს უთხრა:

— კარგი, შენ უნდა წაგეგო რიგით, მაგრამ დედოფალმა მიღალატა.

გიორგი გულთბილად მიეგება სტუმრებს. პეტრე და ბესარიონიცი მიესალმნენ ნინოსა და ვარლამს.

— ხომ კარგის მახარობელი ხართ? — ჰკითხა მოსულებს ბესარიონმა.

— კარგის, ბატონიშვილებო ჩვენი გაზრდილი ჯანმრთელად და უვნებლად გახლავთ, ჩვენს სახლშია და თქვენს მშვიდობას უფალს შესთხოვს, — უპასუხა ვარლამმა და მდაბლად თავი დახარა.

სახეზე ყველას სიხარულის სხივი მოეფინა.

— დაბრძანდით, სული მოითქვით, — მიმართა მოსულებს გიორგიმ. — ვარლამის გარდა, ყველანი დასხდნენ.

— ახლა კი მიბრძანეთ, რატომ უნებებია ჩემს შვილს ეს მისთვის და ჩვენი ოჯახისათვის შეუფერებელი საქციელი? — იკითხა გიორგიმ და ნინოს გადახედა, რომელიც მოკრძალებით იჯდა, ეტყობოდა ლაპარაკის დაწყება ეძნელებოდა.

გიორგის მეუღლის ყურამდეც მიაღწია ნინოსა და ვარლამის მოსვლის ამბავმა.

დადეშქელიანის ქალს თავიდანვე გული ეუბნებოდა, რომ მაიას რაღაც უჭირდა და დედას უმაღლედნენ. მან სასახლის მოურავი გოჩა ხვიტია დაიბარა, ქმართან გაგზავნა, რათა გაეგო საქმის ვითარება. გოჩა ხვიტია აივანზე გამოვიდა და ვარლამს ანიშნა, რომ მასთან მისულიყო. ვარლამისაგან გაგებულნი ამბით გახარებულმა გოჩამ სიხარულით თავი ვერ შეიკავა, დაავიწყდა, რომ ქალბატონმა მაიას შესახებ არაფერი იცოდა და დაუფიქრებლად უთხრა:

— ბატონიშვილი მაია კარგად ყოფილა, თავის ძიძასთან მიბრძანებულა.

შეშფოთებულმა დედამ ოჯახში დამყარებული ჩვეულება დაარღვია, აღარ დაუცადა, თუ როდის მოახსენებდნენ საქმის ვითარებას და სასწრაფოდ აივანზე გამოვიდა, ყველანი ფეხზე წამოდგნენ.

— მშობელი დედა გარ თუ ვინ, რომ მაწამებთ და არაფერს მეუბნებით? მითხარით, რა მჭირს! — აღელვებით მიმართა მან იქ მყოფთ.

ახოვანი ქალი, რომლის ამაღლებულ ხმას სასახლეში წლიდან წლამდე ვერავინ გაიგონებდა, თავშეუკავებელი გამხდარიყო. სიმართლითა და სათნოებით სავსე ქალი ახლა ძალიან გაბრაზებული ჩანდა. ქმარს მაინცდამაინც არ ემადლიერებოდა, რადგან ქალის გულს ხშირად ეჭვი კაწრავდა. მას გიორგი ლამაზი ქალების თაყვანისცემაში ჰყავდა შემჩნეული.

გიორგიმ წარბები შეიკრა, ხოლო პეტრე დარბაისლურად მიუახლოვდა რძალს, ხელი მოხვია და სკამზე დასვა.

— დამშვიდდი, ჩემო რძალო. ყველაფერი კარგადაა. მაიას არა უჭირს რა, ბატონიშვილი თავის ძიძის ოჯახშია. — თქვა ეს და რძალს მოკლედ უამბო მაიას გაპარვის ამბავი.

როგორც კი პეტრე გაჩუმდა, ნინო წამოიჭრა და ქალბატონს მუხლებზე მოეხვია.

— მოუტევეთ, ქალბატონო, ჩვენს გაზრდილს, ნუ გაგვირისხდებით, ნება მიბოძეთ, რაც დაგვაბარა, მოგახსენოთ!

ყველანი ცნობისმოყვარეობამ შეიპყრო. ნინომ წვრილად მოუთხრო მაიას დანაბარები.

დედ-მამა შეაძრწუნა ამ ამბავმა. ბიძებიც შეწუხდნენ, მაგრამ ისიც იცოდნენ, რომ ერთხელვე ნათქვამს ვერავინ გადაათქმევინებდა ბავშვობიდანვე თავნება მაიას. ხოლო თუ რამ გამოიწვია მაიას ასეთი დამგლოვიარება, ყველასათვის აშკარა გახდა.

ამაზე ერთი სიტყვა არავის უთქვამს. ქალბატონი უსიტყვოდ წამოდგა და ნინო თან წაიყვანა, თავის ოთახში ბევრი იტირა.

ბიძები მრავალნაირად აფასებდნენ მაიას საქციელს, სიყვარულის განცდაში თანაუგრძნობდნენ, მხოლოდ ალექსის სიკვდილის ირგვლივ დარხეული ხმები კი არ სჯეროდათ.

* * *

გიორგის სახლიდან ნინო და ვარლამი მშვიდობით დაბრუნდნენ. მაიასა და დარეჯანს ყველაფერი უამბეს: ქალბატონი მთელი ღამე ტიროდაო, თვალის სინათლე ქალიშვილი. ცოცხლად დაეკარგეო, ვინ უნდა დამიტიროსო. გიორგის კი შემოუთვლია: მე და დედამისს გული მოგვიკლა, საქვეყნოდ შეგვარცხვინა, აწი ჯანდაბამდის გზა ჰქონია, გინდ თქვენთან დარჩე-

ნილა, გინდ ყმას წაჰყოლია, მისი ავისა და კარგის გამკითხავი არა ვართო.

მაიამ გულდასმით მოისმინა ყოველივე, ერთი მწარედ ამოიოხრა და მხოლოდ ესა თქვა:

— ყველაფერი გათავდა, ამიერიდან გთხოვთ ამაზე ნულარ ვილაპარაკებთ, ნურც თქვენ შეწუხდებით, ნურც მე შემაწუხებთ.

მალე დიმიტრიც ჩამოვიდა.

სულ რამდენიმე დღეში მაიას ოთახი მოაწყვეს, შავებიც მოიტანეს. მაია როგორც კი თავის ოთახში დაბინავდა, ნინოსა და თუთანას შეაკერინა სრული და გრძელი შავი კაბები, მერე ხელში მაკრატელი აიღო, მშვენიერი ნაწნავეები თავისი ხელით ძირში მოიჭრა; თუთანას უბრძანა მისთვის თავი გადაეპარსა. გადაპარსულ თავზე შავი ძაძა წაიკრა და მონაზონივით შავად შეიმოსა. ძიძამ თმის მოპარსვა რომ გაიგო, შეიცხადა, რამდენიმე დღე არც კი მიჰკარებია გაზრდილს.

— რამ გადარია ეს ქალი, — წყრებოდა დარეჯანი, — რატომ იმ დღეს არ მოკვდი, როცა მაგას პირველად ძუძუ ვაწოვე. ის უბედური კაცი, ჩემი პატრონი არ მომკვდარიყო, ამას არ გააბედვინებდა. ახლა მოგვერია ყველას ეს თავაშეებული გოგო, — ტიროდა გამწარებული ძიძა.

მაიამ რამდენიმე დამე ალექსიზე ფიქრში თეთრად გაათენა. დილით კი დარეჯანს თუთანა აახლა, მოსვლა სთხოვა. შემოსულ ძიძას გულში ჩაეკრა და უთხრა:

— ნება მომეცი ყველაფერი გითხრა ჩემს ალექსიზე. მე დარწმუნებული ვარ, როცა ჩემს ამბავს დაწვრილებით გაიგებ, მომიტევებ, რაც გაწყენინე. ნუ მირისხდები, ძვირფასო ძიძა!

— განრისხება რაა იმასთან შედარებით, რაც ამ დღეებში გადავიტანე შენი საქციელის გამო. სად გაგონილა თავის ასე დასჯა! როგორ შეელიე შენს მშვენიერ თმას? ან მე რატომ არ გებრალეები შენი საქციელით უღმერთოდ რომ მტანჯავ?

— მომიტევე, ძიძა, შენ ხარ ჩემთვის ყველაფერი. ხომ ხედავ, მივატოვე დედ-მამა, და-ძმა, შენ მოგენდევი, ნუ მიღალატებ, ყველაფერს მოგიყვები.

— მომიყევი, იქნებ გულის დარდი შეგიმსუბუქდეს.

მაია ერთხანს ჩაფიქრდა. მერე ოდნავ გასაგონ ხმაზე აჩურჩულდა:

— რა ვქნა, ძიძა ძვირფასო, შემიყვარდა, შემიყვარდა პირველად ჩემს სიცოცხლეში ახალგაზრდა, ლამაზი, გულადი და ნასწავლი ვაჟკაცი. ჩემმა უსინდისო სიძემ სამუდამოდ ჩამომავორა, რუსეთში გაგზავნა და ის უბედური გზაში გარდაიცვალა. მე დარწმუნებული ვარ, რომ ჩემმა სიძემ, მიხეილ შერვაშიძემ მოაკვლევინა იგი. ჩემი სიძე ხარბია, გაუტანელი, მტრად გადაეკიდა ალექსის, არ გაუწია ანგარიში იმას, რომ ჩვენ ერთმანეთი გვიყვარდა, — პირში სულ ეფერებოდა, სადილად ხშირად პატიჟობდა. გულში კი არ ინდობდა იმის შიშით, რომ სამთავროში მეტი გავლენა არ მოიპოვოსო. ალექსი განათლებული კაცი იყო, იცი, ძიძა, ვიზე ვლაპარაკობ?

— როგორ არ ვიცი, პუპის ვაჟზე. დაწყნარდი, შვილო, ეს რა გიფიქრია მიხეილზე?!

— რა დამაწყნარებს, ძიძა გენაცვალე, გულში ცეცხლი მინთია. დანამდვილებით ვიცი მიხეილმა მომიკლა ალექსი და მასთან ერთად მეც სამუდამოდ დამასამარა. — მაია გაჩუმდა, მკაცრი და უღმობელი იყო მისი ფერწასული და გალახული სახე. დიდი ხნის დუმილის შემდეგ ძიძას შეხედა და თითქმის ბრძანებით უთხრა:

— მე აქ, შენთან ვრჩები სამუდამოდ. ადამიანი ამ ეზოდან გადასულს ვერ დამინახავს. ჩემი სიცოცხლე გლოვაში და მწუხარებაში უნდა გავლიო. ისეთი ადამიანი დაეკარგე, ჩემო საყვარელო ძიძა, რომელსაც ვერასოდეს ვერ გამოვიტირებ. — მაიამ ისევ თავი დახარა, თვალებიდან ღაპაღუპით წამოსული ცრემლები ღაწვებს უსველებდა. მწარე მოგონების ციბცხელებაში მყოფი უყვებოდა ძიძას თუ როგორ გაიცნო და შეუყვარდა ალექსი. რა სათნო და ყურადღებიანი ადამიანი იყო იგი. როცა დაუვიწყარი ალექსის მოგონებით გულს იოხებდა, ძალაუნებურად გულქვა მიხეილის ბოროტი სახე თვალწინ დაუდგებოდა. არ ვიცი, რა ვიფიქრო, — განაგრძობდა გულდამწვარი ქალი, — მიხეილი ალექსის თითქოს თანაგრძნობით ექცეოდა, თითქოს ხელს უწყობდა სურვილების განხორციელებაში. ალექსიმ მამისეული სასახლის ეზოში დანგრეული ტაძარი შეაკეთა, განაახლა, ეპისკოპოსს მწირველი

მღვდელი გამოსთხოვა, მასვე მიანდო გლეხების ბავშვებისათვის წერა-კითხვა ეასწავლებინა. მან აფხაზეთის სხვა ტაძრებზეც დიდი ფულადი შეწირულება გაიღო.

ალექსის ასეთი ადამიანური თვისებები, როგორც ჩანს, მიხეილს არ მოსწონდა, თუმცა მისადმი შურს და მტრობას არასოდეს არ ამჟღავნებდა. მაგრამ დღემდე ვერ ვიპოვეთ რატომ ჩააცვიდა ჩემი სიძე ალექსის რუსეთში წასულიყო? რატომ თვითონ არ წავიდა? შესაძლოა იმედოვნებდა, რომ ალექსი უფრო კარგად გააკეთებდა საქმეს, ვინაიდან იქ მას გავლენიან პირებთან ჰქონდა კავშირი. მაგრამ მე ისევ ეჭვი მიღრღნის გულს: არა, არა, ძიძა! ჩემი სიძე დამოუკიდებელ მოაზროვნეს ვერ იტანს. ის შურიანი და დაუნდობელია, ჩემი უბედური ალექსი კი სულ სხვა ადამიანი იყო. მართალი, პირდაპირი, პირში მთქმელი. მთავარი გრძნობდა, რომ ადრე თუ გვიან ალექსი ამხელდა მის ბოროტებას, სამარცხვინო ბოძზე გააკრავდა ბნელ საქმეში ხელგაწაფული მთავრის ყველა სისაძაგლეს. ამიტომ, ბუნებრივია, მიხეილს უნდოდა მოესპო ასეთი საშიში მეტოქე და მოწინააღმდეგე. მიხეილი თავისი ბოროტი ზრახვების სისრულეში მოსაყვანად ხელსაყრელ მომენტს ეძებდა და აი გამონახა კიდევ — ალექსი შორეული რუსეთის გზას გაუყენა. თითქოს გრძნობდა აღსასრულის მოახლოებას — როგორ არ უნდოდა ჩემი მოშორება, როგორ სთხოვდა ცუცუს დაეჩქარებინა ჩვენი შეუღლება, მაგრამ ჩემი და უძლური აღმოჩნდა. მიხეილმა თავისი მუხანათობით გზა გადაგვიღობა, ჩვენი სურვილები ნიავ ქარს გაატანა. რა დამავიწყებს ალექსის უკანასკნელ სიტყვებს: „მაია, შენ შეგნებული ქალი ხარ და უნდა მომიტეო, რომ საზოგადოებრივი მოვალეობის შესრულებას ვუთმობ ჩემს დიდ გრძნობას. დროებით უნდა დაგშორდეთ“...

ღარეჯანი სულგანაბული უსმენდა მაიას და მის სახეზე საშინელი მწუხარება იხატებოდა.

— ვაი შენს ძიძას უბედურს! ახლა ნახე შენი პენტეზილია, დამწუხრებული, გაბოროტებული. ვაი ჩვენს დღეს და მოსწრებას. შენ დაიღუპე, ნიჭიერი და უანგარო ადამიანი, ვერაფრის გაკეთება ვერ მოასწარი.

— ცოცხალი ადამიანი ყოველთვის მოძებნის სიცოცხლის

მიზანს. ჩემი ალექსი საზოგადოებრივ საქმეს შეეწირა. ახლა მე სულ იმაზე ვფიქრობ, ძიძა, რომ ნეტავ შევძლებდე ალექსის კეთილ მიზნებს უანგაროდ ვემსახურო და განვაგრძო მისი მოღვაწეობა ჩვენი ხალხისა და ქვეყნის საკეთილდღეოდ.

ძიძა იჯდა ჩუმად, ცრემლმორეული თვალებით უყურებდა გაზრდილის ერთდროს ნაწნავებით დამშვენებულს, მაგრამ ახლა გადაპარსულს და შავი ნარმით შემოხვეულ თავს. არც უნდოდა მიეხედა იმ კედლისაკენ, სადაც წაბლისფერი სამი ნაწნავი ეკიდა.

— ახლა ხომ მომიტყევებ, ჩემო ერთგულო ძიძავ! — ამოიკენესა მაიამ.

— დაწყნარდი, ძიძა შემოგველოს. ცხოვრება უღმობელია, თავი არ დაისნეულო. განა მე ისეთი უვიცი ვარ, რომ შენი მწუხარება ვერ გავიგო? ცეცხლი შედება შენს ტანჯვას რომ ვხედავ. ჩვენც შეგვიბრაღე, ნუ გავგამწარებ, ახლა მოისვენე, ადამიანის ფერი არ გადევს, შვილო!

ძიძა გავიდა, მარტო დარჩენილი მაია კვლავ ფიქრებს მიეცა.

მისი ფიქრები ახლა საქვეყნო ამბებს გადაწვდა. უნდოდა მოენახა თავისი უბედურების კავშირი იმ დიდ საზოგადოებრივ მოვლენებთან, რომელნიც იმ დროს საქართველოს, მის ყველა კუთხეს ერთნაირად აღელვებდა და რის მსხვერპლადაც მიაჩნდა თავისი ალექსი.

მეცხრამეტე საუკუნის პირველი ნახევარი, მართლაც, სავსე იყო უაღრესად დიდი სოციალური მოვლენებით. რუსეთთან კავშირი საქართველოს სპარსელებისა და ოსმალების შემოსევისაგან იცავდა. საქართველოს და მისი პროვინციების მმართველებიც ნდობით უცქერდნენ ერთმორწმუნე რუსეთს, მაგრამ ჯერ კიდევ აქა-იქ იყვნენ გაუთვითცნობიერებელი ბნელი პირები, რომელთა შეგნებაზე ჯერჯერობით გავლენას ვერ ახდენდნენ მოწინავე ადამიანები. ამ ადამიანებს კი გარკვევით სწამდათ საქართველოს კუთხეების ისტორიული განუყრელობა, მათი ერთმორწმუნეობა, ძველთაძველი საერთო კულტურა.

მეცხრამეტე საუკუნის პირველ ათეულ წლებში სულთანი კიდევ ცდილობდა თავისი გავლენა არ დაეკარგა აფხაზეთსა

და მის მეზობელ სამფლობელოებზე. ბევრი დიდი ფეოდალი მოხიბლულა სულთნის უხვი საჩუქრებითა და დაპირებებით, ასეთი ფეოდალები თავის მხრივაც თავაზობდნენ სულთანს ლამაზ ქალ-ვაჟებს. ხალხი გმინავდა, გლეხობა დაუღალავად ებრძოდა შინაურსა და გარეშე მტერს. ხალხს არც ის აკმარეს, რომ პირუტყვივით ყიდდნენ, თურქებს საქართველოს ყოველ კუთხეში, განსაკუთრებით აფხაზეთში. ჰყავდათ თავიანთი აგენტები, რომელთა მეშვეობითაც წვრილ აზნაურებს, გლეხებსა და მათ მებატონეებსაც ბოროტი ზრახვებით ოსმალეთში ეპატიჟებოდნენ. ხალხს არც რუსეთის მეფის მოხელეები უშლიდნენ ხელს აფხაზეთიდან წასვლაში. მკვიდრი მოსახლეობისაგან შავი ზღვის თვალწარმტაცი სანაპიროების დაცლა ხომ მათი ოცნება იყო!

გლეხობისათვის უცნობი არ იყო მუსულმანების მთავრობა, მათი ძალმომრეობა, ჰარამხანებში გამეფებული არაადამიანური ცხოვრება. ისინი ოსმალეთში ნებით არ მიდიოდნენ, სამშობლოს არ ტოვებდნენ, ცდილობდნენ თავიანთ ოჯახებში დარჩენილიყვნენ და ადამიანური უფლებები მოეპოვებინათ.

თავადაზნაურობა გლეხს პირიდან ლუქმას აცლიდა, ტყავს აძრობდა, სულს ხდიდა, რომ, რაც შეიძლება, მეტი ემუშავა ყმას, მეტი მიეღო ბატონს მისგან. დაბეჩავებული გლეხობა ვეღარ აკმაყოფილებდა მუქთახორა ბატონების გაუმაძღარ სურვილს. ფეოდალები თავიანთი მდგომარეობის გაუმჯობესებას ცდილობდნენ ერთმანეთის მიწა-წყლის მიტაცებით და გლეხების განუკითხავი ჩაგვრით. ასეთივე იყო სამურზაყანოს საკითხი, რომლის გამო დავა დიდხანს გრძელდებოდა. ამ გარემოებამ ყველაზე მეტად სამურზაყანოელი გლეხები დატანჯა და გაანადგურა. აფხაზეთის მთავარს, მიხეილს ამ დროს იმისთვისაც კიცხავდნენ, რომ რუსეთს მოჩვენებით დაემორჩილა, მისი „ჩინ-მენდალი“ დაიკიდა. ამ კუთხის მოწინავე ადამიანები მიხეილისაგან მოითხოვდნენ, რომ აფხაზეთი სრულიად გაეთავისუფლებინა ოსმალეთის გავლენისაგან, უფრო მეტობრული განწყობილება ჰქონოდა საქართველოსთან და რუსეთის მოწინავე საზოგადოებასთან.

მიხეილს ამას განსაკუთრებით მისი სიმამრი, გიორგი დადიანი ურჩევდა. გიორგის საჭიროდ მიაჩნდა მთავარს ჩამო-

ეშორებინა საეჭვო პირები, რომელნიც მათზე ცუდ გავლენას ახდენდნენ. გიორგი ცდილობდა შთაეგონებინა სიძისათვის, რომ ეზრუნა აფხაზეთის ეკონომიურ წინსვლაზე, სწავლა-განათლებაზე, კულტურის აყვავებაზე.

იმხანად აფხაზეთში მოულოდნელად რამდენიმე შერვაშიძე გარდაიცვალა. მათთან მიხეილს მტრული დამოკიდებულება ჰქონდა. ხალხში ხმა დაირხა, თითქოს ამ გავლენიან პირებს მთავარი თავიდან იშორებდა, რათა მათი მამულები ხელში ჩაეგდო და აფხაზეთში უფრო თავისუფლად ებატონა...

ფიქრებში ჩაძირულ მაიას ყველა ეს ამბავი მოაგონდა. ჭორები ხომ მრავალჯერ სმენია თავისი მამის ოჯახში. ბევრჯერ უნახავს მამა და ბიძები ამ საკითხით აღელვებულნი.

„ნამდვილად მიხეილია ალექსის მკვლელი. ღმერთო ჩემო, ამ პირსისხლიანი კაცის ცოლია ჩემი და... მე კიდევ რა საშინელი წერილი მიეწერე ცუცუს. მე ჩემს ალექსის უკვე მიცვალებულს ვტირი, მას კი ცოცხალი ქმარი გაუუხადე სატირელი“, — ამოიოხრა მაიამ.

უკვე გათენებული იყო, მაიას სადგომში მზემ შემოიხედა.

მ ა ი ა

ფიქრებით მოქანცულ ძიძას თვალწინ წარმოუდგა მაიას ბავშვობა. მაია დაბადებიდანვე ლამაზი იყო.

მაიას დაბადებამდე ერთი თვით ადრე წაიყვანეს ძიძა-დარეჯანი გიორგი დადიანის სასახლეში. რამდენი ცრემლი ღვარა მაშინ საცოდავმა გლეხის ქალმა, როცა გადაწყდა, რომ სამი თვის ჭუტულა გულიდან მოეგლიჯათ მისთვის და იქვე ახლოს თავის მოყვარე მართა ჯგერენაისათვის მიეცათ.

— არ მინდა, ბატონო, ასეთი დიდი კაცის შვილის ხელის მოკიდება, — შეევედრა თავის ქმარს, საჩინოს, დარეჯანი. — რომ ვერ მოვეუარო, ხომ დავიღუპე? ვიცი, რომ მერე ჩემს ბიჭს არ გამაკარებენ. — წუხდა დარეჯანი.

— ქალო, ხომ არ გადაირიე. ამაზე უფრო კარგ საქმეს რას გაუკეთებ ჭუტულას და შენს სხვა შვილებს? მათ საუკუნო ლუკმას დაუტოვებ, კაცებში გარეე. ეგებ იმას ფიქრობ,

რომ მეზობელი გლეხის ქალებისთანა დღეში იქნები? — უთხრა ცოლს საჩინომ.

— რაც არ უნდა იყოს, არავის არაფერს ვერჩი, დამაყენონ მაგ დალოცვილებმა ჩემს სახლში. რაღა მე ამომიჩეძა დადეშქელიანის ქალმა, მისი შვილის გაზრდას ყველა სიხარულით მოჰკიდებდა ხელს.

— მოეწონე, ქალო, — უთხრეს, სუფთა ქალია, ჯანმრთელია, ახალგაზრდაა, აზნაურების მონათლულია, ზრდილობიანიო. აბა, ტყუილად ხომ არ მიყვარხარ, — გაეხუმრა საჩინო.

დარეჯანი ცოტათი მოალობო ქმრის ალერსიანმა სიტყვამ, მაგრამ მაინც წუწუნებდა.

— ბავშვს ერთხელ ხელს რომ მოვკიდებ, შემდეგ სახლიდან აღარ გამომიშვებენ, ოჯახი დაგვექცევა.

— დარეჯანის ჭირიმე, ნუ სწუხარ, ოთხი შვილი გვყავს, „მებერგეები“ ვართ, რა ოჯახი გვაქვს, შე ქალო, ისეთი, რომ დაგვექცეს? ბავშვები წამოზრდილი არიან. მათ დედაჩემიც მოუელის. ბატონიშვილის გაზრდა კი ბევრ სიკეთეს მოგვიტანს, ბავშვებსაც ხშირად აქეთ გამოგვატანენ.

— სად უნდა მოვიყვანოთ, კაცო, დიდი კაცის შვილი ჩვენს ქოხში?

— შე ქალო, ჩვენს კვამლიან ქოხში რომ ვერ მოვიყვანოთ, მეც ვიცი, მაგრამ, დიდი კაცი რომ დაგვიმოყვრდება, მერე ყველაფერი იქნება, ბუხრიან სახლსაც მალე წამოვჭიმათ.

* * *

დარეჯანს საუკეთესო ბინა მიუჩინეს სასახლის ახლოს, სასტუმრო სახლში. ახალგაზრდა გოგონა დამხმარედ მიჰგვარეს, ჭუტულაც დედასთან ჰყავდათ, რათა მისი გასაზრდელი ბავშვის დაბადებამდე მომავალ ძიძას ძუძუ არ გაშრობოდა.

დარეჯანს წინათაც ენახა დიდკაცური ცხოვრება თავისი ნათლიის დეკანოზ ანჯაფარიძის ოჯახში, მაგრამ ისეთი მრავალრიცხოვანი და მდიდარი როგორც იყო გიორგის ოჯახი, მას ოცნებითაც არ წარმოედგინა. დარეჯანს ხშირად იხმობდა ქალბატონი, ხან აკერვინებდა, ხან აქსოვინებდა.

გიორგის ქალი შეეძინა, მაია უწოდეს სახელად. ძიძას

ახლა თვით სასახლის ერთ-ერთი ოთახი მიუჩინეს ქალბატონის საწოლი ოთახის გვერდით, ორი დღის შემდეგ მართა ჯგერენაია მოიყვანეს და ჭუტულა მას გაატანეს.

ჭუტულას გაჰყვა დარეჯანის სული და გული, ცრემლს ყლაპავდა, ერიდებოდა, რომ მის თვალზე ცრემლი არაეის შეენიშნა. ფარჩა-დარაიით შემოსილ აკვანთან იჯდა დაღვრემილი და ჭუტულა აგონდებოდა. მაგრამ თანდათან შეიყვარა პატარა მათა. ლამაზი და ფუნჩულა მათა დღითი დღე მიმზიდველი ხდებოდა. ახლა დარეჯანის ქმარი ხშირად იყო სასახლეში. მას, როგორც ბატონიშვილის გამზრდელსა და ერთგულს, მოურავი ნდობით ექცეოდა, სხვადასხვა დავალებას აძლევდა.

დარეჯანი ბავშვს თავის შეილებში ვერ არჩევდა, თავზე ევლებოდა, ცივ ნიავს არ აკარებდა. ხანდახან კი მწვავე სევდა დაუფლებოდა ოჯახსა და შეილებზე ფიქრით.

ეს შეუმჩნეველი არ დარჩა დადემქელიანის ქალს.

— ჩემი მათას ძიძა კარგი ქალია, ერთგული, ბავშვს კარგად უვლის, მაგრამ ცოდვია, ოჯახი ეღუპება. ბავშვი სიარულს იწყებს, ჯანმრთელია, აწი შეიძლება იქეთაც გავატანოთ, თორემ გამიგონია შეწუხებული ქალის რძე ბავშვსაც არ მოუხდებარ, — უთხრა ერთხელ მათას დედამ გიორგის.

— მართალს ამბობ, ჩემო კარგო. ჩვენ შეუბრალებლობას ვიჩინებთ, ვეტყვი მოურავს; მგონი, სახლი არ უნდა იდგეთ. კარგი, დავეხმარები.

დადიანის შემწეობით ორი-სამი თვის შემდეგ საჩინომ ბუხრიანი ოდა დადგა. დარეჯანი მათასთან ერთად დიდძალი საჩუქრებით გაისტუმრეს, მეწველი ძროხაც გაატანეს. მათა კარგად გრძნობდა თავს გაბედავების ოჯახში, ლაღად დახტოდა ფართო ეზოში, თამაშობდა ტოლებთან, გაბედავას ოჯახიც თანდათან ფართოვდებოდა. გიორგი დადიანმა ცხენიც არუქა ძიძას, საჩინო კი თავის მხლებლად ჩარიცხა.

უკვე ოთხი-ხუთი წლის გოგონა ისე მიეჩვია ძიძას, რომ, როცა ჭირვეულობას დაიწყებდა, სასახლეში გაგზავნილი აშინებდნენ.

ბავშვი მთელი დღე თავის ძიძიშვილთან ჭუტულასთან თამაშობდა. უფროსი ძიძიშვილები — ვარლამი, ტატუ და მელიკო

მთელი დღე ბავშვების მოვლა-გართობაში იყვნენ. მათ ალარ კმაყოფილდებოდა მარტო ძიძიშვილებთან თამაშით, მეზობლის ბავშვებს ხშირად მოინახულებდა.

— ძიძა, რატომ აცვია ძაბუს დახეული კაბა?

— არა აქვს, შვილო, უკეთესი და იმიტომ. |

— რატომ არა აქვს, დედამ არ შეუკერა?

— დედა როგორ არ შეუკერავდა, მაგრამ საყიდელი ფული არა აქვთ.

— რატომ არ მისცა ფული მორდუმ?

ან კიდევ მოირბენდა მათა და ძიძას შესჩივლებდა:

— ძიძა, რა ვნახე, გუდუ გაბედავას ბავშვები მარტო პრასას და ცივ ღომს ჭამდნენ!

— რა ქნან, შვილო, მათი დედა ღომის საცეხვავეში წავიდა, ბეგარა აქვს შესასრულებელი, კერძი არ ექნებოდა მოსახარში, ყველიც არა აქვთ, აბა რა ეჭამათ?

— ყველი კატამ შეუჭამა?

— არა, ძიძა გენაცვალოს, ძროხა არა ჰყავთ. |

— ვინ წაართვა?

— დამანებე, შვილო, თავი, ათასი საქმე მაქვს. — ძლივს მოიშორებდა გაზრდილს დარეჯანი.

ხუთი წლის მათა მშობლებმა შინ წაიყვანეს, მაგრამ ზაფხულს მაინც ძიძასთან ატარებდა. გაზრდილს ისე უყვარდა ძიძა, რომ ზაფხულის მოახლოებას მზის ამოსვლასავით ელოდა.

ძიძეულში მათას ჩასვლა დიდი სიხარული იყო ძიძიშვილებისა და მეზობელი ბავშვებისათვის. პატარა მათამ უკვე წერა-კითხვა იცოდა. ჯერ სასახლის მღვდელი ასწავლიდა შვილებს, მერე გიორგიმ ქუთაისიდან დაიბარა მასწავლებელი.

მშვენიერი მოსაუბრე მათა ჩაჯდებოდა ხოლმე ძიძიშვილებში, მეზობელ ბავშვებში და უკითხავდა მათ წიგნებს, უყვებოდა ზღაპრებს, ხოლო ჭუტულას, კითხვასაც ასწავლიდა.

მათა თანდათან დაქალიშვილდა. უფრო პატივდებულად მიჰყავდათ ჭკადუაშიდან მორდუსა და ძიძიშვილებს. ის ახლა უფრო შეგნებულად აკვირდებოდა სოფლის ცხოვრებას.

დარეჯანი მალე დაქვრივდა, მაგრამ მაინც სულით არ

დაეცა. შრომისმოყვარე ქალი დღესა და ღამეს ასწორებდა, ოჯახს კარგად უვლიდა, თავს არავის აჩაგვრინებდა.

ისეთ მრისხანე თავადს, როგორც ჯოლორია დგებუაძე იყო, დარეჯანი არ ეპუებოდა, მეტადრე მაშინ გაცხარდებოდა, როდესაც გაიგებდა ჯოლორია ჭუჭუტულას გამზრდელ ჯგერენაიებს უსამართლოდ მოექცაო. :

— ქვეყანა ჩალით ხომ არ არის გადახურული. ჯოლორიას იქით კიდეც არიან ქვეყნის ბატონ-პატრონები, — იტყოდა დარეჯანი ისეთ ადამიანებთან, რომელნიც, დარწმუნებული იყო, მის სიტყვებს ჯოლორიას მიუტანდნენ.

— ვიცით, ვისი წელიც აქვს, თორემ... — იტყოდა ჯოლორიას ერთგული მოურავი.

— ჯოლორიას ერთი ხვიჩიას ქალი კი არა, მთელი სალიპარტიო შიშის ქვეშ ჰყავს, მაგრამ დარეჯანი მაია ბატონიშვილის ძიძაა. ჯოლორიას ისიც ეყოფა, რომ მთავარი არ წყალობს, გიორგი ბატონიშვილიც რომ გადაიმტეროს, მისთვის ხელსაყრელი არაა, მით უფრო, როგორც ამბობენ, არც გიორგის უყვარს მთავარიო. — ამბობდნენ ხალხში.

— მთავარსაც არ ახატია თურმე გულზე დიდი ნიკოს შვილები.

— ვერ გაიყვეს ქვეყანა, ვერ გაძდნენ მაგ ოხრები? — ბოლმით ამბობდნენ ბატონყმობით განაწამები ვლევები.

თან წაღებული საიდუმლოება

დავით დადიანის გამთავრების შემდეგ სამეგრელოს ცხოვრებაში ბევრი რამ შეიცვალა. დავითი და დიდი ნიკო მათთვის ჩვეული სიღინჯით და წინდახედულებით შეუდგნენ სამთავროს საქმეების მოგვარებას, მაგრამ მოულოდნელად ნიკო დადიანი გარდაიცვალა და სამთავროს მართვის მთელი სიმძიმე დავითს დააწვა კისერზე.

ნიკოს სიკვდილს ყველაზე მეტად დავითის მეუღლე, დედოფალი ეკატერინე განიცდიდა. ეკატერინეს რჩევით დავითმა ნიკო დადიანის ადგილზე მისი შვილი პეტრე დადიანი დანიშნა.

პეტრე იყო ღინჯი, დაფიქრებული და მშვენიერი შესა-

ხედავი ვაჟკაცი. მას მამის ბევრი კარგი თვისება ჰქონდა და ამიტომ მეუღლის წინადადება უყოყმანოდ მიიღო დავითმა.

ეკატერინეს რჩევით მთავარმა თავისი ძმები გრიგოლი და კონსტანტინე დაიბარა პეტერბურგიდან. დავითი ავადმყოფი კაცი იყო, თვითონაც გრძნობდა და საჭიროდ თვლიდა ძმები ახლოს ჰყოლოდა.

ეკატერინეს მეშვეობით სასახლის ცხოვრება დღითი დღე ევროპულ ხასიათს იღებდა. მოხუც ლევანს არ მოსწონდა სასახლის ახალი წესები. ის განმარტოებულად ცხოვრობდა. უმეტეს დროს ნადირობაში ატარებდა. მისი ეჭვი ალექსის უცნაური სიკვდილის შესახებ თანდათან ღრმავდებოდა. ბოლოს იქამდე მივიდა, რომ გადაწყვიტა გამგზავრებულიყო აფხაზეთში და ჩუმად გამოეძია საქმის ნამდვილი ვითარება.

დავითს უთხრა, პუპის ნახვა მომენატრა და აფხაზეთში მივიდვიარო. დავითმა არ ურჩია წასვლა. ამ სიშორე გზაზე ძნელია შენი ასაკის კაცისათვის მგზავრობაო. ამაღას გაგზავნი და პუპის აქეთ ჩამოვაყვანიებო.

ლევანმა, რასაკვირველია, შვილს არ დაუჯერა. მეორე დღეს იგი მცირე ამალით შეუმჩნეველად გავიდა ზუგდიდიდან.

ლევანმა მთელი თვე დაჰყო პუპისთან. იგი ხშირად ბატი-ჯობდა მიხეილის კაცებს, ჰქონდა მათთან ხშირი სჯა-ბაასი, ზოგი მათგანი მოისყიდა კიდეც და მალე ალექსის სიკვდილის ნამდვილ მიზეზს გარდა ისიც კი გაიგო, რომ მიხეილი დიდად უკმაყოფილო იყო სამურზაყანოს საკითხის დადიანების სასარგებლოდ გადაწყვეტით და დაუქადნია: დადიანებს სისხლად ამოვადენ სამურზაყანოს ფულსო. ლევანს ამ დაქადნების არ შეშინებია, არც განაწყენებულა, მაგრამ იმ ამბავმა, რომ ალექსი მიხეილის მოკლული იყო, უსაზღვროდ აღაშფოთა ყოფილი მთავარი.

იგი საჩქაროდ გამოემგზავრა სამეგრელოში. ბუნებით მშვიდი და გულკეთილი ლევანი ცოფს ჰყრიდა. აჩქარებდა ცხენს, უნდოდა მალე ჩასულიყო და დავითისთვის გაემხილა ეს საზიზღარი საიდუმლოება.

ლევანი არ დაერიდა აღიდებულ ენგურს, არც ფონი უძებნია, პირდაპირ შეაგდო ცხენი მძვინვარე ტალღებში და მშვიდობით გავიდა მეორე ნაპირზე. მაგრამ მოხუცის ეს აჩქარებუ-

ლი საქციელი საბედისწერო აღმოჩნდა, თავიდან ფეხებამდე გაწუწული ლევანი, როგორც ჩანს, გაცივდა, შემოსული იმ სალამოსვე ლოგინში ჩაწვა, მაღალი სიციხე მისცა. სასწრაფოდ იხმო შვილები, რათა მიხეილის ამბავი მათთვის გაემზილა, მაგრამ სანამ დავითი, გრიგოლი და კონსტანტინე მივიდოდნენ, მოხუცს ბოდვა დააწყებინა, გონება დაკარგა, მეორე დღით გარდაიცვალა და თან წაიღო ალექსის მკვლევლობის საიდუმლოება.

უ უ ზ ლ ე ბ ო ნ ი

სამთავროში მომხდარი ამბები განდევილად მცხოვრებ მაიას ყურამდეც აღწევდა. იგი დიდი ინტერესით ადევნებდა თვალს სამეგრელოსა და აფხაზეთის საზოგადოებრივ ცხოვრებას. ამავე დროს ის ბევრს კითხულობდა. მისი მცირე ბიბლიოთეკა უმთავრესად წამებულ ქალთა სათავადასავლო წიგნებიდან შედგებოდა. ამ წიგნების კითხვით ახალგაზრდა ქალი გულს იოხებდა.

მაია თანდათან შეერჩია მწუხარებას, მისი დაუდგარი ბუნება უკვე მოქმედებას ითხოვდა. მაიამ საძიძიშვილოში თავი მოუყარა ახალგაზრდა გოგონებს და დაიწყო წერა-კითხვის და ხელსაქმის სწავლება. მათ შორის დიდ ყურადღებას აქცევდა უკვე მოწიფულ ქალიშვილს, თავის მოახლე თუთანას. კიდევ უფრო თბილი გრძნობა ჰქონდა მაიას ლერწამისასადმი. მის დანახვაზე ხშირად მოაგონდებოდა პატარა ათი-თორმეტი წლის გოგონა, რომელიც ცუცუს გამზრდელმა საროსტანისამ აფხაზეთში მოყვანისთანავე ლერწამისად მონათლა, არავის უკითხავს ბავშვისათვის რა ერქვა, ან ვისი შვილი იყო. მან თვითონ უთხრა გამზრდელს, ობოლი ვარ და ამით გათავდა ლერწამისას ვინაობის გამორკვევა. მაიას ლერწამისასთან დაკავშირებით აგონდებოდა ალექსის უეცარი სიკვდილი, ლერწამისას ხელით დისადმი გაგზავნილი წერილი და მტრედით შემკრთალი გოგონა; ეს მაღალი, წერწეტა, ცისფერთვალეა ქალიშვილი ყველას ხიბლავდა.

გვიან შეამჩნია მაიამ, რომ ლერწამისა ზამთარ-ზაფხულ

თავსაფრით დადიოდა; როდესაც მოახსენეს, თქვენი ძიძის ბრძანებით ატარებს თავსაფარსო, გაიცინა და ძიძას უსაყვე-
დურა:

— რას ერჩი, ძიძა, ლერწამისას, რატომ ამალვინებ ლამაზ ნაწნავეებს?

— ახლა თუ ასეთმა ბავშვებმა თმა მხრებზე არ გადაიყარეს, ისე არ დაედგომებათ? მოესწრებიან, დაუდგებათ მაგისი დროც. მაგ გოგოს ისედაც ვერ აშორებენ თვალებს ყმაწვილები. გელა ჯგერენაია, ჭუტულას ძიძიშვილი, სულ აქ ტრიალებს.

— მერე რა, ძიძა, დაგავიწყდა ახალგაზრდობა? შეიყვარონ ერთმანეთი, იყონ ბედნიერი, — თქვა მაიამ და ამოიოხრა.

— ლერწამისაზე უფროსია თუთანა, მაგრამ არ კოპწიაობს.

— ყველას ხომ ერთი ხასიათი არ ექნება, ლერწამისა ბუნებას შეუმკია გარეგნობით და ნიჭით, მშვენივრად სწავლობს წერა-კითხვას, ხელსაქმეც ეხერხება... თუთანა უფრო დინჯია. ის ხომ ჩემი ტოლია, ჩემო ძვირფასო ძიძა. ეს ქალები ჩემთვის ფრიად საყვარელი არიან, მაგონებენ ჩემს უდარდელ ცხოვრებას; რა გაზარებული ვიყავი, ისინი თურქებს რომ წაართვეს ჩემმა მხლებლებმა.

მაია მშობლიური ენის დიდი მოყვარული იყო. ბევრჯერ იხუმრებდა, რაკი პოეტობით ვერ გამოვემსგავსე ჩემს მამასა და ძმებს, ქართული ენის ზედმიწევნით ცოდნა მაინც უნდა იყოს ჩემი კუთვნილებაო. მაიას მართო ეს როდი აკმაყოფილებდა. ის ბევრ მნიშვნელოვან საერთო საქმეზე ფიქრობდა. ხშირად ძილი გაუტყდებოდა ხოლმე. ფიქრში მყოფ მაიას ერთხელ განთიადისას ასეთი საუბარი მოესმა:

— არა, მე ის უნდა მოკვლა, როგორ აწამა საბრალო მამა-ჩემი. ხომ შენც მოუსწარი, ჭუტულა, რამდენ ხანს აწვალა. მე დღეის შემდეგ ვაჟაკი მქვია? ლაჩარი ვარ, მაგრამ თუ არ მოკვდი, მაგის სისხლს დავლეე!

— დაწყნარდი, ბიჭო, აჩქარება საქმეს არ შეეღის. ახლა მთავარია, მამა სიკვდილს გადაარჩინო, სხვა ყველაფერს მოესწრები.

— ყაჩაღად გავიჭრები, თავს გაეწირავ და მაგას მაინც არ ვაცოცხლებ!

— ნუ აჩქარდები, მამაშენს არაფერი გაუჭირდება. ახლა

შენი ძმა ბანძაში მისული იქნება. ზაქარიას მალამომ რომ არ მოარჩინოს, ისეთი ჭრილობა კაცს არ გაუგონია.

მაია გულდასმით უგდებდა ყურს საუბარს, თუმცა ბევრი ვერა გაიგო რა, რადგან ვაჟები ხმადაბლა ლაპარაკობდნენ. უნდოდა დაეძახა მათთვის, მაგრამ ძიძის გაღვიძებისა მოერიდა. მაიამ მხოლოდ მეორე დილას გაიგო, თუ რა აღელვებდა ასე მწარედ გელა ჯგერენაიას.

ჯოლორია დგებუაძე განთქმული იყო თავისი სიმკაცრით. მას არა ერთი და ორი ყმის ოჯახი აუწიოკებია. არა ერთი და ორი უმანკო, საქორწინოდ გამზადებული ყმა ქალი გაუუპატიურებია და გაუუბედურებია. არავის გაუგონია იმ სახის სასჯელი, რომელიც მან ერთ დღეს სცადა გელა ჯგერენაიას მამის დასასჯელად.

თურმე იმ დილით ჯოლორიას მოურავისთვის უთქვანს, გაგზავნე რომელიმე ყმა კალმახის დასაჭერად და სადილად მომართვითო. მაგრამ იმ დღეს ვერ დაუჭერიათ კალმახი, განრისხებულა თავადი. სწრაფად უხშია მოურავი.

— რატომ კალმახი არ არის, მოურავო?

— ვერ დაიჭირეს, ბატონო.

— ვინ იყო გაგზავნილი?

— მიხა ჯგერენაია, ბატონო.

— დაუძახე ახლავე!

მიხა ეახლა, მაგრამ მის სახეზე ოდნავ არ ჩანდა თურმე მღელვარება და შიში. ჯოლორია უფრო გააცოფა ყმის ასეთმა გულგრილობამ.

— რატომ ვერ დაიჭირე კალმახი?

— არ მოჰყვა ბადეს, ბატონო.

— რას სულელობ, შე ბრიყვო! ტეხურში კალმახი გაწყდა? დაიჩოქე, შე ტუტუცო, და თქვი სად გადაისროლე ბადე?

— ამის თქმას რა დაიჩოქება უნდა, ისე მოგახსენებ. ბონდის ხიდის ზევით მეგულებოდა კალმახი.

— არ იჩოქებ? კარგი, ვერ მიხვდი, ან ქვევით ჩაყოლოდი მდინარეს, ან მთლად წაჩხურაში წასულიყავი, თუ დაგეზარა?

— წაჩხურაში როგორ წავიდოდი, შე დალოცვილო! შენც იცი, რომ იქ მთავრის გზირები არ გვიშვებენ; სადადიანო არისო, თევზაობის ნებას არ გვაძლევენ.

ველარ მოითმინა ჯოლორია, სკამი ესროლა ჯგერენაიას და თან დაატანა:

— რას მიქვია, შე რეგვენო, სადადიანო? ვერ გაიგეთ, რომ სალიპარტოში მე ვარ უფროსი? მთავარს აქ არ ვცნობ, მაგ ბაყაყჭამიას! კალმახი რა მისი საქმეა, მან ბაყაყი მიირთვას! შენ ჩემს უჭკუო ძმასთან ავთანდილთან, მთავრის მოურავეთან ერთგულობ, მთავარს რომ კულში დასდევს! ვინ არიან ის გზირები, მე იმათ ვუჩვენებ სეირს! მოურავო, ეს ყაზახი დილეგში ჩააგდე, იქ მიხვდება თუ როგორ უნდა ბატონის სიტყყის შესრულება და ბატონთან ლაპარაკი!

ნასადილევს ჯოლორია დგებუაძე მოურავეთან განმარტოვდა და დიდხანს ისაუბრეს.

* * *

ივლისის პაპანაქება იდგა. ჯოლორიას ეზო სავსე იყო გლეხებით და შინაყმებით. ჯოლორიას ახლო მეზობლები, თავადაზნაურები მოუთმენლად ელოდნენ თუ რას უპირებდა იმ დღეს ჯოლორია მიხა ჯგერენაიას. მიხა სივრძით მიაკრეს ცხენს ისე, რომ თავ-პირი ცხენის კულისაკენ ჰქონოდა. რაკი საჭირო იყო მეორე მხარეზეც იმავე სიმძიმის ჩამოკიდება, ჯოლორიამ აქეთ-იქით გაიხედა, უნდოდა ყმებს შორის გამოეძებნა ვინმე დიდი დამნაშავე, რომ მიხასთან ერთად დაესაჯა. შინაყმები მიუხვდნენ განზრახვას და ცხენს მეორე მხრით ხის მორი მიაკრეს, ხოლო ორი ყმა სავსე ჯამიდან თაფლს იღებდა და ხელით თეთრ ცხენს ხან გავაზე, ხან თეძოზე უსვამდა. შემდეგ ერთი მათგანი ცხენს აღვირში წვდა და წინ გაუძღვა. თაფლით შეთხუპნულ ცხენს მალე ბუზები დაეხვია. ცხენი წამდაუნწმ კუდს აშხლართუნებდა ბუზების მოსაგერიებლად და და მიხა ჯგერენაიას ცხვირპირსა და გაღელილ გულ-მკერდში სცემდა. ნახევარი საათი მაინც ასე აწამეს მიხა. მისი გასისხლიანებული ცხვირ-პირი საშინლად ზიზღს იწვევდა ჯოლორიაში. დიდხანს ყვიროდა მიხა, ხან იხვეწებოდა მომიტევეთო, ხან ილანძღებოდა, მაგრამ ვინ იყო გამკითხავი? გელამ იმ დროს მიუსწრო მამის ტანჯვას, როდესაც უკვე უგრძნობელი მიხა ცხენიდან ჩამოხსნეს და სასახლიდან კარგა მოშორებულ ქოხში

შეიტანეს ცოცხალ-მკვდარი. გელა თავისი ხელით ბანდა მამას სისხლს და ყოველ წუთს იმეორებდა გულში ფიცს, რომ ჯოლო-რიაზე შურს იძიებდა.

მიხა შინ წაიყვანეს. მოხუცი დედა და ცოლი ხმის ამო-ღებას ვერ ბედავდნენ, სახეს იკაწრავდნენ და ჩუმად ტიროდ-ნენ. მოხუცმა დედამ ჩვრებში გამოკრული წამლები მოძებნა, მალამო გააკეთა და შვილს ჭრილობაზე წაუცხო, ხოლო უმც-როსი ვაჟი ნაშუალამევს მეწამლე ზაქარიასთან გაგზავნეს ბანძაში მალამოს მოსატანად.

ჭუტულა გაბედავამ, რომელიც შემთხვევით შესწრებოდა ამ დავიდარებას, გელა შინ წაიყვანა. მაიამ გელას წერილად გამოკითხა მამის დასჯის ამბავი. მაია და მთელი მისი ძიძის ოჯახი ძლიერ ააღელვა ასეთმა უმსგავსოებამ, მაგრამ გელას მამის უბედურობით ყველაზე უფრო ლერწამისა დაიტანჯა. მას სხვებზე უკეთ გაეგებოდა ყმის გასაჭირი. ლერწამისა ძლიერ გააკვირვა ჯილორიას სითამამემ. როგორ გაბედა მან მაია ბა-ტონიშვილის ახლოს ასეთი ცუდი საქმე ჩაედინა, მაშინ რო-დესაც გელას ჩემი პატრონი და მისი ძიძიშვილები კარგი თვა-ლით უყურებენო.

* * *

დრო შეუმჩნევლად გადიოდა. გიორგიმ არ ისურვა მაიას ნახვა, დედამ კი მხოლოდ სამი წლის შემდეგ ინახულა ქალიშ-ვილი, ძმები და ბიძაშვილები კი ხშირად აკითხავდნენ საყვა-რელ მაიას, მზიარულება შეჰქონდათ მის ბინაში. საკანში თით-ქოს ადამიანებთან ყოფნის სურვილი ღვივდებოდა, მაიას მხოლოდ წიგნები და ხელსაქმე აღარ აკმაყოფილებდა, ხალხში ყოფნა სწყუროდა, ცხოვრებისა და მათი ჭირ-ვარამის გაგება-გაზიარება უნდოდა.

ამიტომ ძიძას, ძიძიშვილებს თავისი ოთახიდან დიდხანს არ უშვებდა, მოაყოლებდა ქვეყნის ამბებს. საუბარი უფრო ხში-რად მთავრის ოჯახს, იქაურ ჭორსა და მართალს შეეხებოდა.

ერთხელ ჭუტულა მოჰყვა დავით დადიანის ძმის, კონსტან-ტინე დადიანის ნადირობის ამბავს. აღწერა კონსტანტინეს ლამაზი გარეგნობა, ჩაცმულობა, მისი ცხენ-უნაგირი, ისიც არ დაივიწყა, თუ როგორ უტევდა ბატონიშვილი მწვეარ-მეძებ-

რებს, რა ბოხი ხმა ჰქონდა, აქ ჭუტულამ ჩაახველა და კონსტანტინეს წაბაძვით მწევარს ბოხი ხმით დაუძახა.

დედამ დატუქსა, ვის უბედავ, შე უზრდელო დაცინვას, შენი ბიძაშვილები ხომ არ გგონიანო. ძიძა მაიას მიუბრუნდა:

— მართლაც მშვენიერი ვაჟკაცია, ორივე ძმაზე უკეთესი შესახედავია.

ძიძის გულში უეცრად რაღაცამ გაიელვა, მაგრამ არ გამოამჟღავნა გულისნადები, ისე უსიტყვოდ შეაქცერდა მაიას. იგრძნო ძიძის თვალები რაღაცას ემუდარებოდა მას.

ახალგაზრდა ქალი შეერთა, თითქოს ძიძის გულში ჩაიხედა, ნაფიქრს მიუხვდა, ძიძამ ეს შენიშნა, საქმე მოიმიზეზა და ოთახიდან გავიდა.

მარტო დარჩენილმა მაიამ ახლა საკუთარ გულში ჩაიხედა, წუთით ძიძისადმი გულისწყრომაც იგრძნო. იმის წამოდგენამაც კი შეაშინა, რომ მან ალექსის უღალატოს და ვინმე მოეწონოს. აბეზარი ფიქრები გულიდან განდევნა.

* * *

მაიასთან სულ უფრო ხშირად ჰყვებოდნენ კონსტანტინეს ამბავს. მაიას ეს სიამოვნებდა. თავადაც გრძნობდა, რომ მასში ქალის ბუნება იღვიძებდა. თრგუნავდა გრძნობას, რომელიც სიამოვნებასა და ცხოვრების ინტერესს უღვიძებდა, თუნდაც წუთიერად. მიუხედავად იმისა, რომ გარკვევით არაფერსა და არავისზე არ ფიქრობდა. ატყობდა თავის არსებაში რაღაც ახალი გრძნობა იბადებოდა.

გიორგის ბევრი რამ ჰქონდა გაგონილი თავისი ქალიშვილის ცხოვრებაზე, მაგრამ თითქოს არ იცისო, უყურადღებოდ ტოვებდა ყოველივეს. ბოლო ხანებში გიორგის გული გაუტყდა. მისი თავმოყვარეობა შეილახა, როგორც ოჯახური უსიამოვნებით, ისე მის გარშემო შექმნილი მითქმა-მოთქმით. მისი მოწინააღმდეგენი ავრცელებდნენ, თითქოს გიორგის შეუვალ ეზოსა და სასახლეში თავშესაფარს პოულობდნენ მთავრის მოწინააღმდეგენი. ლევან დადიანი იმდენი ეცადა, რომ თავის სიცოცხლეშივე დაარწმუნა დავითი გიორგის ორგულობაში. ეჭვიანმა მთავარმა მიუხედავად იმისა, რომ გიორგის დიდ

პატივს სცემდა, მისგან თავი შორს დაიჭირა. ამბობდნენ დიდი ნიკოს სიკვდილი სწორედ იმან დააჩქარა, რომ მისი გაზრდილი დაეითი ასე განერიდა გიორგის და მის ძმებსო.

მართალია, დაეითმა კარგად იცოდა, რომ მისი გამთავრების დაჩქარებაში ყველაზე მეტი ღვაწლი გიორგი დადიანს მიუძღოდა, მაგრამ მაინც ვერ მოიბრუნა მისკენ გული. თუმცა სადღაც გულის სიღრმეში უყვარდა გიორგი, მისი ძმები და ოჯახი. გიორგისთან დაახლოებას არც იმან შეუწყო ხელი, რომ გიორგის ძმა, პეტრე, დაეითის მრჩეველი იყო და დიდი ნიკოს ადგილი ეკავა.

გიორგიმ იცოდა, თუ როგორ უყურებდა დაეითი მას, წუხდა, რომ დაეითი მამის მიერ შეცდომაში იყო შეყვანილი, მაგრამ თავმოყვარე თავადი თავის თავს ნებას არ აძლევდა მისულიყო მასთან და ახსნა-განმარტება მიეცა.

ჭკადუაშსა და ზუგდიდს შორის მცირე მანძილი იყო, მაგრამ მაინც არ დადიოდა სასახლეში, არ ღებულობდა მონაწილეობას იმ წვეულებებსა და ნადიმებში, რომლებსაც ეკატერინე დედოფალი ხშირად მართავდა და რომელზეც ყოველთვის იწვევდა გიორგი დადიანს თავის მეუღლესთან ერთად.

ეკატერინეს გაგონილი ჰქონდა გიორგის მწიგნობრობის ამბავი, ისიც იცოდა, რომ იგი ლექსებს წერდა და ამიტომ ალექსანდრე ჭავჭავაძის ლიტერატურულ სალონში აღზრდილი ქალისთვის გიორგი დადიანი, რასაკვირველია, სასურველი სტუმარი იქნებოდა.

ეკატერინეს, რომელმაც თავისი მშვენიერი ახალგაზრდობა ნიკოლოზ ბარათაშვილის, ალექსანდრე გრიბოედოვის და ორბელიანების საზოგადოებაში გაატარა, ახლა აქ, დადიანების სასახლეში, სადაც მხოლოდ პოლიტიკურ საკითხებზე და სამთავროს მართვა-გამგეობის ვარდაქმნაზე იყო მსჯელობა, მოწყენილობა და სევდა იპყრობდა.

დაეითს არ ეცალა ეზრუნა ახალგაზრდა მეუღლის მოვლისა და გართობისათვის, ამიტომ ეს საქმე თავის ძმას კონსტანტინეს მიანდო, პეტერბურგში დიდხანს ნამყოფ და იქაურ კულტურასა და განათლებას ნაზიარებ კონსტანტინეს ამ მხრივ დიდი სამსახური შეეძლო გაეწია თავისი რძლისათვის. მათ ბევრი რამ აერთიანებდათ: ევროპული აღზრდა, რუსული და ქართუ-

ლი ლიტერატურის ცოდნა და სიყვარული, საერთო ნაცნობე-
ბი პეტერბურგიდან და თბილისიდან; იმდროინდელი ევროპუ-
ლი წვეულებების, სალონების წეს-ჩვეულების ზედმიწევნით
ცოდნა და მხიარულებისა და დროს ტარების სურვილი.

სამეგრელოს თავადები, მათი ცოლები და შვილები აღტა-
ცებულნი იყვნენ ეკატერინეს სილამაზით, მისი ხელგაშლი-
ლობით, მისი განათლებით და ყველაფერი იმით, რაც მან სა-
სახლის ცხოვრებაში შეიტანა.

დავითი იშვიათად იღებდა მონაწილეობას ოჯახურ ზეიმებ-
სა და მხიარულებაში. მთავრის მეუღლე და მისი მაზლი ხში-
რად დადიოდნენ სასეირნოდ თავიანთი ამალით. დავითი კი,
მრჩევლებითა და ხელქვეითებით გარემოცული, ასეთ დროს
თავდახრილი იჯდა თავის სამუშაო ოთახში და სამთავრო
საქმეებს არჩევდა ან კითხულობდა.

კონსტანტინე ბატონიშვილი ძმის ოჯახში დროს ტარებით
როდი კმაყოფილდებოდა. ის, საუკეთესო ბედაურზე მჯდარი,
რჩეული მხლებლებით დაჰქროდა სამეგრელოს ერთი კუთხიდან
მეორე კუთხეში. ყოველ თავადს ან აზნაურს დიდ ბედნიერებად
მიაჩნდა თუ კონსტანტინე პატივს დადებდა და ესტუმრებოდა.
იმართებოდა დაუსრულებელი სადილ-ვახშამი, ნადირობა,
ყაბახზე სროლა.

კონსტანტინეს სტუმრიანობის მთელი სიმძიმე სოფელს
აწევბოდა თავზე, როგორც მატერიალურად, ისე ზნეობრივად.
ყმა ქალი ხომ ადამიანად არ ითვლებოდა. ქეიფის შემდეგ
კონსტანტინესა და მის მხლებლებს ყმა ქალებს მიჰკვირდნენ
გასართობად. ესეც რომ მობეზრდებოდა, კონსტანტინე მოხუც
მასპინძლებს ან მხლებლებს გვერდით მოისვამდა და ძველ ამბებს
მოაყოლებდა.

ერთხელ კონსტანტინე ტარიელ ჩიქოვანთან იყო სტუმრად.
ტარიელ ჩიქოვანი მთავრის ოჯახის ძველი მეგობარი იყო.
ტარიელი ხშირად უძღვნიდა კონსტანტინეს ხან უცხო ნახე-
ლავ თოფ-იარაღს, ხან მწვეარ-მეძებარს.

სამაგიეროდ, კონსტანტინე მას რამდენიმე კომლ გლეხს
აჩუქებდა ხოლმე. ნასადილევს ტარიელმა სტუმარს დავითზე
და მის საქმეებზე ჩამოუგდო საუბარი.

— გონივრულად უძღვის სამთავროს ბატონიშვილი, წაღმა

შეატრიალა ჩვენი საქმე. სამთავროს მტრებიც საგრძნობლად შემცირდნენ...

— მტერი მაინცა ჰყავს მთავარს, — თქვა ერთ-ერთმა სტუმარმა. — მას თავისიანებიც არ ინდობენ, მაგალითად გიორგი დადიანი. მართალია, აშკარად არა მტრობს, მაგრამ ყველა ვგრძნობთ, სძულს მთავრის ოჯახი.

— მაშ პეტრეს ასე რად იახლოებს მთავარი, თუ მისი ძმა მტერია? — იკითხა გუმა ჩიქოვანმა.

— არა, თავადო, — ჩაერია საუბარში სალიპარტიოელი თავადი, — გიორგი და მისი ძმები დავითს არ უღალატებენ. რაც შეეხება პეტრეს, ის ბრძენი კაცია. მთავარმა იცის მისი ფასი და პატივისა სცემს.

— გიორგი, პეტრე და ბესარიონი, სამეგრელოს ეს „სამი“ მუშკეტერი“ მტკიცე და უდრეკი ხასიათისა არიან, — განაგრძობდა ტარიელი, — თავმოყვარენი; შვილებიც მათ დაემსგავსნენ. ყველამ იცით ალბათ მაიას ამბავი. მონაზონივით ცხოვრობს და იმ უბედურ თქვენს დისწულს შეწირა თავი.

— საკვირველი სულგრძელობა გამოიჩინა გიორგიმ თავისი ქალიშვილის მიმართ, — ჩაერია ლაპარაკში პეტრე ფაღავა.

— სწორედ გითხრათ, არ გავაბედვინებდი ქალიშვილს კი არა, ვაჟიშვილსაც ასეთ საქციელს, — უკმაყოფილოდ თქვა ბახვა ჩიქოვანმა.

— ვერაფერს გახდებოდი, თავადო! — უპასუხა თეთრწვერა აზნაურმა, ფარნა გაბუნამ. ხომ გაგიგონიათ, ბატონებო, თუ ქალმა გაიწია, ცხრა უღელი ხარიც ვერ დააკავებსო.

კონსტანტინე სმენად გადაიქცა. ეს შვიდი-რვა წლის წინათ გაგონილი ამბავი, რომლითაც იმ დროს ისე გატაცებული იყო, მას დავიწყებასათვის მიეცა. მისი უდარდელი ცხოვრება იყო ალბათ იმის მიზეზი, რომ ერთხელაც არ უკითხავს ამ ქალის ამბავი. სტუმრებმა ერთხმად სთხოვეს ტარიელს მოეთხრო მაია ბატონიშვილის ამბავი.

ტარიელმაც სიამოვნებით უამბო მათ, როგორ ცხოვრობს ეს თავისებური სიმტკიცის მქონე ქალი, როგორ გაატარა შვიდი წელიწადი ეულად, არც მწიგნობრობა დაივიწყა, არც ხელსაქმე და, საერთოდ, მისი ხასიათის სიმტკიცე ძალიან შეაქო.

— ახლა როგორია შესახედვად? — იკითხა ამ ამბით გაკვირვებულმა კონსტანტინემ.

— ბატონო, ის ნამდვილი მზეთუნახავია, თუ სჯობს ჩვენს დედოფალს, თორემ ნაკლები არ არის, ტანი აქვს ლერწამივით, სახით კი მასზე უკეთესს ვერაფერს ნახავს კაცის თვალი. ამას წინათ საჩაჩიბაიოში გახლდით, მაიას ძიძა ვინახულე. ის ხომ დედაჩემის ნათლული გახლავთ.

— თვითონ მაია თუ ნახე, ტარიელ, — ჰკითხა კონსტანტინემ მოუთმენლად.

— მაია ბატონიშვილის ნახვის უფლება თავის გამზრდელების მეტს არავის აქვს. სალაპარაკოდ არც მე მინახავს, არ გამობრძანდა ჩვენთან. ეზოში რომ ჩავდიოდი, მაშინ მოვკარი თვალი, ძალიან ცხელოდა და ხის ძირში იჯდა, გარშემო გოგოები უსხდნენ, მგონი, წერა-კითხვას ასწავლიდა მათ. როგორც კი დამინახა, ირემივით აიმართა, თმები ისეე გაზრდია, კოჭებამდე სწვდება ნაწნავეები, რა წერწეტაა. იმ შავნაოჭიან კაბაშიც კი იცნობა, რა ტანადიცაა.

— ვის ჰგავს ასეთი მშვენიერი? — სიტყვა ჩაურთო ბახვამ, — გიორგის ცოლი არც ისეთი ლამაზია.

— არც შერვაშიძის ცოლი, ცუცუ არის განსხვავებული ლამაზი, — თქვა კონსტანტინემ, — ჩემი დისწულის ტირილში ენახე აფხაზეთში.

— ყველანი კარგები არიან, ვაჟკაცებიც მშვენიერი მოესწრო გიორგის, მაგრამ მაია ვარსკვლავია ამ ოჯახის, ნამდვილი ვარსკვლავი. გაჯიუტდა დალოცვილი და გაიმწარა თავისი ქალიშვილობა. დედ-მამაც შეაწუხა, — დაუმატა ისეე ტარიელმა.

პეტრა ფაღავა ადგა და უკმაყოფილოდ თქვა:

— სულ წიგნების ბრალია, ბატონებო, დაიჩემეს ამ ახალგაზრდა ქალებმა სატრფიალო წიგნების კითხვა და ყველამ ნესტანდარეჯნობა მოინდომა.

* * *

მალე დაიშალნენ. დეძინების წინ კონსტანტინემ ტარიელ ჩიქოვანი იხმო.

- მე ნუ მოგიკედები, რალაცას გეტყვი და უნდა ამისრულო.
- როდის არ შემისრულებია შენი ბრძანება, ბატონო!
- მაია უნდა მაჩვენო.

მასპინძელმა მრავალმნიშვნელოვნად გაიღიმა.

— შე მგონია ეს ძნელი არ იქნება, ბატონიშვილო! ვესტუმროთ მის ძიძას და მაიასაც ვნახავთ.

— მხოლოდ წინდაწინ ნუ გააფრთხილებ, ჩემო ტარიელ, თორემ შეიძლება მაია დაგვემალოს.

— ის მაინც დამალულივითაა, ბატონო, თავის ოთახიდან არასოდეს არ გამოდის.

— ისევ მგლოვიარედაა?

— დრო ყველაფრის წამალია. შეიდი-რვა წელიწადი დიდი დროა. მაია თავმოყვარე ქალია, ფიცის გატეხას არ კადრულობს, თორემ ისე, შესაძლოა, ალექსი აწი გადავიწყებუ-ლიც ჰყავდეს.

კონსტანტინეს ეამა გამოცდილი კაცის სიტყვები. თვითონაც გარკვევით არ იცოდა, რა მიზანი ჰქონდა მაიას ნახვას, ასე ძლიერ რომ მოიწადინა.

დ ა რ ბ ა ზ ო ბ ა

სოფელს უცებ მოედო კონსტანტინე დადიანის ჩამოსვლის ამბავი. ბევრს შიშის ზარი დაეცა ვაითუ მე მესტუმროსო. სტუმრები ოცდასუთ კაცამდე იყვნენ, ახლა მათი მწევარ-მეძებრებიც. ადვილი როდი იყო რომელიმე აზნაურის ან თუნდაც თავადისათვის მათი გამასპინძლება. გლებობა ხომ მთლად წელში წყდებოდა, როდესაც მის მებატონე თავადს ან აზნაურს ესტუმრებოდნენ. ეს მთელი სოფლის მოთარეშებას ნიშნავდა.

კარგა დაღამებული იყო, როცა ვარლამ გაბედავას ჭიშკარს სტუმრები მოადგნენ. კონსტანტინემ და მისმა მსლებლებმა განგებ შეიგვიანეს, რომ სოფელს ჰგონებოდა ნადირობაში შემოღამებიანთო და მათი სტუმრობა უბრალო შემთხვევისათვის მიეწერათ.

ჭიშკარი გაიღო, ძაღლებმა ყეფა ატეხეს. მასპინძლები ხელში ნაძვის ჩირაღდნებით გამოეგებნენ. პირველი თოვლით

გადაფიქვული ეზო ცხენების ფლოქვებმა ააჭრელეს, ვარლამი და მისი უმცროსი ძმა ჭუტულა სიხარულით შეეგებნენ დიდებულ სტუმარსა და მის მხლებლებს. ისინი დარბაზში შეიყვანეს. ფართო ბუხარში ცეცხლი გიზგიზებდა. ლელავდნენ გაბედავები: ასეთი მოსარიდებელი სტუმარი მათ თავიანთ სახლში დიდი ხანია არ ენახათ. მამა რომ ცოცხალი იყო, დიდი ნიკოს შვილები კი დადიოდნენ აქ. გაბედავებს ისიც მოაგონდათ, თუ რამდენი ხარჯი და დავიდარაბა მოჰყვებოდა ასეთ სტუმრობას.

გაბედავების ოჯახი სტუმრობას თითქმის გადაეჩვია, მაგრამ ვარლამი და ლელამისი დარეჯანი მაინც გახარებული შეხვდნენ დადიანს. მთელი ოჯახი და მეზობლები მაშინვე ვახშმის თადარიგს შეუდგნენ.

— კარგი ვაჟები მოგსწრებიან, დარეჯან, — უთხრა კონსტანტინემ დაიასახლისს და თან უსაყვედურა: — არც შენ მეკარები და ვერც შენს შვილებს ვიცნობდი, სადმე რომ შემხვედროდაო.

— რა ვქნათ, ბატონო, ჩვენ იქით ვერ შემოგბედეთ, შენ კი, რაც ბატონი ლევანი გარდაიცვალა, სულ არ მოგვიკითხე, არც მხლებლად, არც მოსამსახურედ.

— ყველაფერს მოვესწრებით, ოღონდ კარგად ვიყოთ, — უპასუხა კონსტანტინემ.

თუ ზევით ოდაში სტუმარ-მასპინძელი ერთმანეთის მოკითხვით იყვნენ გართული, სამზარეულოსა და საჯინიბოში ერთი ორომტრიალი იდგა.

მხლებელთაგან უფრო მდაბიონი სამზარეულოს გვერდით დიდ, განიერ სახლში შეიყვანეს, რომ სიცივისაგან დამზრალი ხელ-ფეხი გაეთბოთ... ბიჭები ცხენებს ბლომად უყრიდნენ სიმინდს, თივას, ჩალას, ნაბდებიც გადაახურეს: ნათოვარზე ყინვას იწყებდა, ეშინოდათ, რომ გაოფლიანებული ცხენები სიცივეს არ დაეხუთა.

ცხენების დაბინავების შემდეგ ზოგი ოდაში ადიოდა, ზოგიც ფართო ორთვალთან სამზარეულოში შუაცეცხლთან ჯდებოდა.

სამივე ნაჭა ამუშავდა იმ დამეს სამზარეულოში და ცეცხლზე გადაიდო დიდი კეცები, მთელი დღის ნაშრომი ქალები ხან თონესთან, ხან კერიის ცეცხლთან ტრიალებდნენ. მიუხე-

დავად თებერვლის სუსხისა, მათ ოფლი წურწურით ჩამოსდიო-
დათ სახეზე. ხშირად დაგროვილ ბოდმას ვედარ იკაებდნენ და
დაბადების დღეს იწყევლიდნენ. კონსტანტინესა და მის მხლებ-
ლებსაც შეუკურთხებდნენ ჩუმად და მიაწყევლიდნენ, თან სეე-
დით დასძენდნენ: ნუთუ არასოდეს არ მოედება ბოლო ჩვენს
ტანჯვასა და ამათ მუქთახორობასო.

სტუმრები ეზოში რომ შემოვიდნენ, მათ თავის სადგომში
ისვენებდა. იგი გააოცა სტუმრების სიმრავლემ, მაშინვე თუთა-
ნა გაგზავნა ამბის გასაგებად. მალე ძიძა შევიდა მაიასთან და
მოახსენა, ვინც ესტუმრათ, მერე გაზრდილს მოუბოდიშა: არ
მომიწყინდე, ძიძა გენაცვალოსო, და სამზარეულოს მიაშურა.

მარტოდ დარჩენილი მათა ფიქრს მიეცა. რამდენი ხანია მას
ასეთი სტუმრიანობა არ უნახავს, სიხარული არ უგრძენია მის
გულს.

— „ეს მერამდენე ზამთარი დააწვა შენს გულს, შე უბე-
დურო!“ — ამოოხვრით უთხრა მათამ თავის თავს და ფანჯარა-
ში გაიხედა.

ცოტა ხნის შემდეგ მათა ფერიასავით იდგა ბუხრის წინ და
ფიქრობდა: „აი კონსტანტინეს რა პატივისცემით ხელებიან,
ხარობს ეს ახალგაზრდა კაციო“.

მაიას კანტიკუნტად ჰქონდა გაგონილი იმ უდარდელი
ცხოვრების შესახებ, რომელსაც კონსტანტინე ეწეოდა. ერთ
წუთს გული დაწყდა, რომ მან ასე გაიმეტა თავი, თავისი
ახალგაზრდობის საუკეთესო წლები გამოკეტილ ოთახში გა-
ატარა.

ვინ იცის, ალექსი რომ არ დაღუპულიყო, ეგების ის ბედ-
ნიერი ქალი გამხდარიყო. მასაც მისცემოდა საშუალება ქვეყ-
ნისათვის რამე კარგი გაეკეთებინა. მწარე ფიქრებში ჩაძირული
მათა აღრე დაწვა, მაგრამ მის თვალებს ძილი არ ეკარებოდა.

კონსტანტინეს ძალიან სურდა მათა იმ ღამესვე ენახა,
მაგრამ ტარიელმა არ ურჩია. უხერხულია ამდამ მისი შეწუხე-
ბაო. კონსტანტინეც დათანხმდა, მაგრამ მოწყენა დაეტყო.
უსაღისოდ იჯდა სუფრასთან. მისი უგუნებობა ყველას გადა-
დებოდა, ამიტომ ვახშამს თავიდანვე არ დაჰყვა ხალისი.

თუ რამ მოაწყინა ეს სიცოცხლით სავსე ახალგაზრდა,
ამაზე თვითონაც ვერაფერს გეტყოდათ.

რალაც იღუმალი ეჭვები დაჰქროდა მის გულში. ალექსი თითქოს საფლავიდან ეცილებოდა მის ნება-სურვილს, ჯობნიდა ამ მეტოქეობაში. სულ რამდენიმე ნაბიჯი აშორებდა სიცოცხლით სავსე ვაჟკაცს მაიასაგან.

მაია არ დაინტერესდა კონსტანტინეს პიროვნებით, არ გამოვიდა მასთან. ალბათ ისევ უყვარს ალექსი, პატივს სცემს მის სახელს, თვითონაც არ იცოდა რატომ, მაგრამ ასე მოეჩვენა თითქოს ეს შეურაცხყოფდა კონსტანტინეს და ამავე დროს მაიას მისთვის უფრო სანეტაროს ხდიდა.

სუფრასთან კონსტანტინეს დიდხანს არ დაუყოვნებია, დაღლილობა მოიმიზეზა და მოსასვენებლად წავიდა.

მეორე დღით კონსტანტინემ ტარიელ ჩიქოვანს სთხოვა: მაიას ეახელი და საუზმეზე მოიწვიეო.

მაიამ ყურადღებით მოისმინა ჩიქოვანის ნათქვამი.

— რად დასჭირდა კონსტანტინეს ჩემი ნახვა? — ჰკითხა მაიამ.

— ბატონიშვილო თქვენ მისი ახლობელი ხართ, რა გასაკვირია, რომ თქვენი ნახვა სურდეს? — უპასუხა ტარიელმა.

— აბა ასე მოახსენეთ მთავრის ძეს: გიორგის ქალიშვილი იქით ჯერ არავის ხლებია, არც ახლობელს და არც შორეულს. რაკი კონსტანტინეს ჩამი ნახვა სურს, თვითონ მობრძანდეს ჩემთან. მართალია, ღარიბულად ვცხოვრობ, მაგრამ იმედია, არ დამძრახავს. მე საზოგადოებაში გასვლას გადავეჩვიე. ვინც მომიგონებს და ჩემთან მობრძანდება, მადლობის მეტი არა მეტქმის რა.

მაიამ თავი დაუკრა მოციქულს და მოხდენილად შებრუნდა. ამით ანიშნა — მეტი არაფერი მაქვს სათქმელიო.

ტარიელ ჩიქოვანი აღაფრთოვანა როგორც მაიას გარეგნობამ, ისე მისმა სიტყვებმა. ნამდვილი სადედოფლო ქალიაო, გაიფიქრა. ხომ შეიძლება მაია კონსტანტინემ ცოლად შეირთოს, ან სად გამოჩნდება მასზე ლამაზი და შესაფერი ქალი მთავრის ოჯახისათვის. ტარიელს დავითის მეუღლე ეკატერინე არ მოსწონდა. ყოველთვის ეხამუშებოდა ეს მისი შეხედულებით თამამი და ამპარტავანა ქალი. ასეთი ფიქრებით წარუდგას კონსტანტინეს, სიტყვა-სიტყვით უამბო ყოველივე, თან თავი ვერ შეიკავა და მაიას მშვენიერება ერთხელ კიდევ შეაქო.

კონსტანტინეს გაელიმა და ოდნავი უხერხულობა იგრძნო, შიშობდა გამოცდილ ტარიელს მთლად არ ჩაეხედა მის გულში. საქმე მაინც მოგებულად მიაჩნდა, რომ ასე მალე დაითანხმა ეს ქედმაღალი ქალი და ნახვის დასტური მიიღო.

კონსტანტინეს უნდოდა მოჩვენებითი გულისწყრომა გამოეთქვა, მაგრამ იმდენად მოიხიბლა ამ ქალის პასუხით, რომ ძლივს იკაეებდა თავს, ტარიელს კი ვითომ გულგრილად უთხრა:

— ოთახში ჩაკეტვით ბატონიშვილს, მგონი, თავაზიანობაც დაჰკარგვია. რას იზამ, როდესაც ქალი ასეთ პასუხს გაძლევს, უნდა მიხვდე, რომ მისთვის სასურველი სტუმარი ხარ, უბრალო რაინდული წესი უნდა შეასრულო, ეახლო.

მაიას მოახსენეს მთავრის შვილი მობრძანდებო, ძიძა და ნინო წინასწარ მაიას სკამის უკან დადგნენ. მაია ღელავდა, მაგრამ არ იმჩნევდა.

მთავრის ძე ჩქარი ნაბიჯით შემოვიდა ოთახში, უკან ტარიელ ჩიქოვანი მოჰყვებოდა. კონსტანტინე მივიდა მაიასთან, თავი დაუკრა, მერე მოწიწებით ეამბორა ხელზე და დაკვირვებით ჩახედა ქალს თვალებში.

მამაკაცის სანდომიანმა და ცეცხლიანმა თვალებმა სიაშე მოჰფინა ქალის გულს, მაგრამ ეს არ აგრძნობინა სტუმარს. მშვიდი და ოდნავ ცივი იღვა მის წინ. კონსტანტინეს არ გამოჰპარვია მისი ეს მოჩვენებითი სიმშვიდე.

— თუ არ ვცდები, ბატონიშვილო, თქვენ მე ნათესავად მომხვდებით, — ამ სიტყვებზე კონსტანტინემ ისე გაიღიმა, რომ ჭკვიანი და ნაკითხი მაია კი არა, თხუთმეტი წლის ქალიც მიხვდებოდა — ნათესავები ასეთი ღიმილითა და გამომეტყველებით არ ეცნობიან ერთმანეთს. მაიამ ეს იგრძნო, მაგრამ არ იწყინა, მხოლოდ აზიდული წარბები კიდევ უფრო აზიდა და თავი დახარა. მასში კვლავ გაიღვიძა ქალმა.

— თუ ნებას მომცემთ, რამდენიმე წუთი ბედნიერად გავატარო, დაბრძანდით და მეც ნება მიბოძეთ დაგვადე! — თქვა კონსტანტინემ და მაიას სკამი მიაწოდა.

მაია დაჯდა მისთვის გაკეთებულ უბრალო სამფეხა სკამზე. კონსტანტინემ მასთან ახლო დაიდგა სკამი და მაიას მშობლები მოიკითხა.

— მამათქვენს არ ვუყვარვართ, მაია, სათოფეზე არ გვეკარება სასახლეში.

— მამაჩემი დაამცირეს სასახლის კარზე. ბევრ უმართებლო ამბებს უვრცელებენ, ამან შეურაცხყო ის და თავის ოჯახში ჩაიკეტა.

— ამბობენ, გიორგი და მისი ვაჟები მწერლობით არიან გართულიო, ეს ძალიან სასიამოვნოა, მწერლობას დიდი სარგებლობა მოაქვს ქვეყნისათვის.

— მამაჩემისა და ძმების მწერლობამ რა სარგებლობა უნდა მოუტანოს ხალხს? ალბათ, თავს იქცევენ საზოგადოებრივ ცხოვრებას ჩამოშორებული თავადები.

თუ მაიას გარეგნობამ და ხასიათის სიმტკიცემ თავიდანვე მოხიბლა კონსტანტინე, ახლა ამ ოთხ კედელში ჩაკეტილი ქალის საღი მსჯელობა და აზრის სიმდიდრე აკვირვებდა. ბატონიშვილმა ოთახს მოავლო თვალი. კუთხეში, უბრალო თაროზე მრავალი წიგნი დაინახა. თაროსთან მივიდა, წიგნებს თვალიერება დაუწყო. თანდათან აღტაცებაში მოდიოდა. ამდენი წიგნების კითხვა! კონსტანტინეს თუ აქამდე მხოლოდ ტრფიალებით უნდოდა ამ ქალიშვილის გულის დაპყრობა, ახლა მისი შეხედულება წუთებით იცვლებოდა: პატივისცემით განიმსჭვალა მაიასადმი... საერო წიგნების დათვალიერების შემდეგ სასულიეროზე გადავიდა. სარწმუნოებისა და მამულისათვის წამებულ ქალთა სურათებმა მაიას თვითგვემა მოაგონა. მაიასკენ შებრუნებულმა კონსტანტინემ თანაგრძნობითა და აღტაცებით შეხედა ამ მშვენიერ ასულს.

მაიამ კონსტანტინეს მიმოხვრა და სახის გამომეტყველება ალექსისას მიამსგავსა. ერთ წუთს კიდევ გაახარა ამან და გულიც დაწყვიტა. მწარედ ამოიოხრა, რამაც კონსტანტინე დააჟკვა. იქნებ შევაწუხო, გაიფიქრა წიგნები თავის ადგილას დადო, ბოდიში მოიხადა და წასვლის დროს ქალიშვილს ისევ ხელზე ეამბორა.

— ნება მიბოძეთ კვლავ გინახულოთ, მაია. თუ რამე კარგი წიგნები ვიშოვე, მოგართმევთ, გეტყობათ, კითხვა ძალიან გიყვართ.

— რა ვქნა. მხოლოდ წიგნები დამრჩა ამქვეყნად, მათ ვესაუბრები; ისინი მიქარვებენ დარდსა და მწუხარებას. სხვა

მეგობარი, თანამგრძნობი, არავინ მყავს ქვეყნისგან განდგომილს.

— თქვენს მეგობრობაზე ვინ იტყვის უარს, ძვირფასო მაია — უთხრა კონსტანტინემ და იმის შიშით, რომ მეტად არ გადაეხსნა გული მისთვის, სწრაფად გავიდა სადგომიდან.

კონსტანტინემ ნაჩქარევად ისაუბმა, საქმეები მოიმიზეზა, ოჯახის სადღეგრძელო რომ დალია, მასპინძლებს დიდი მადლობა გადაუხადა, ვარლამს ცხენი და უნაგირი უბოძა, ხოლო უმცროს ძმას, ჭუტულას — ვერცხლით მოსევალებული დამბაჩა, შემდეგ წასვლა ბრძანა და საჩაჩიბაიო დატოვა.

კონსტანტინე ფიქრებდამძიმებული მიდიოდა. იშვიათად გამოეხმაურებოდა თანამგზავრებს, არც ნადირობა ისურვა. ტარიელ ჩიქოვანიც არ არღვევდა მის მყუდროებას. პირიქით, უხაროდა, კონსტანტინეს თუკი რამე დაადინჯებდა. თან თავის სიყმაწვილეს იგონებდა. „რა ძალა აქვს ამ წყეულ სიყვარულს, ასე რომ გამოცვლის ადამიანს! სიყვარული განა მარტო ახალგაზრდობის ცეცხლია? განა მეც არ მომიყვანა ალტაცებაში მაია ბატონიშვილმა? მაგრამ ჩემთვის რაა იგი! სამოცდახუთი წლის კაცს ვერ აამჩატებს ვერავეითარი შთაბეჭდილება“. — ფიქრობდა გულში ტარიელ ჩიქოვანი და მთავრის შვილს ფარულად აკვირდებოდა.

ნოლიდან გზა ორად იყოფოდა: ერთი გზა ნოქალაქე-სენაკისაკენ მიდიოდა, მეორე — პირდაპირ ზუგდიდისაკენ. ტარიელმა არ იცოდა, საით მოისურვებდა მთავრის შვილი წასვლას. ორად გაყოფილ გზას რომ მიაღვნენ, კონსტანტინემ ცხენს მათრახი გადაჰკრა და ზუგდიდისაკენ იბრუნა პირი. ყველანი ღუმდნენ. თუ რამეს იტყოდნენ, მხოლოდ ჩუმად. კონსტანტინეს მაიას ნახვით აღძრული ფიქრები და სურვილები გზადაგზა გადაწყვეტილებად გადაექცა. თავის გულში მაია საცოლედ დანიშნა, მხოლოდ ამის აღიარების ეშინოდა. ხომ შეიძლებოდა ამ ქალს მისთვის უარი ერთქვა.

— მაია ძლიერი ნებისყოფის ქალია, დიდი ნიკოს შვილიშვილი, ყველაფერი წესიერად უნდა მოხდეს, — გაუელვა თავში კონსტანტინეს. ამ დილით, როდესაც მაიას უყურებდა, გრძნობები ჩრდილავდა გონებას. თუ მაშინ მას თავისი სურვილი ადვილად შესასრულებელი ეგონა, ახლა, რაც უფრო მეტს ფიქრობდა ამ

საკითხზე, მით უფრო მეტი დაბრკოლებანი ზედებოდა წინ. მთავარი ასაღები სიმაგრე თვით მაიას გული იყო.

კონსტანტინე ზუგდიდისაკენ მიიჩქაროდა, რომ მალე გაეზიარებინა თავისი განზრახვა დავითისათვის. მას იმედი ჰქონდა, რომ მისი დინჯი და გონიერი ძმა ამ საქმეს კარგად მოაგვარებდა. ისე ჩავიდა ზუგდიდში, გზაზე არსად გაჩერებულა. ნამგზავრმა არც კი მოისვენა, მხოლოდ ტანისამოსი გამოიცვალა და პირდაპირ შევიდა ძმის სამუშაო ოთახში, სადაც დავითი და მისი მრჩეველები ისხდნენ. ისინი რაღაცაზე გაცხარებით ბჭობდნენ...

მისაღმების შემდეგ კონსტანტინემ ძმა გადაკოცნა და რუსულად უთხრა:

— Дату, дорогой, мне очень нужно видеть тебя наедине, ты вечно занят!

— Я буду свободен, после десяти часов.

— Словом, два часа спустя буду у тебя! — თქვა კონსტანტინემ, ოთახიდან გავიდა და ეკატერინეს მისაღებ ოთახში შევიდა. იქ სიძე მუხრან-ბატონი, თვით ეკატერინე და მისი და ნინო გრიბოედოვისა ისხდნენ. ისინი რუსეთიდან მიღებულ ახალ ჟურნალს ათვალეერებდნენ. ბანოვანთ ამით სურდათ ზუგდიდის მოსაწყენი ცხოვრება ცოტათი მაინც გაემხიარულებინათ. კონსტანტინეს შემოსვლის დროს, ნინო მოთხრობას უკითხავდა ეკატერინეს და მუხრან-ბატონს.

კონსტანტინეს მოწყენილობა ეკატერინეს თვალში ეცა.

— რამ მოგაწყენა, გეთაყვა? — შეეკითხა ეკატერინე.

რძლის ყურადღებით განებივრებულმა კონსტანტინემ ვითომ დაიმორცხვა, ეკატერინეს ზელზე აკოცა და თავისი მოწყენის მიზეზად დაღლილობა მოიმიზეზა. ვერ შეეგუა ამ საღამოს თავისი რძლის სალონს, დიდი ზღვარი იყო ამ ადამიანებსა და იმ გარემოს შორის, რომელიც მან დილით ნახა. ხშირად საათს დახედავდა, საუბრის დროსაც დაბნეულობა ეტყობოდა. ათ საათამდე ძლივს გაძლო, გამოეთხოვა ყველას და ძმის სამუშაო ოთახში შევიდა. დავითი მარტო იჯდა და რაღაცას წერდა.

— დათუ, მოიცალე ჩემთვის, თუ გიყვარდე, დამეხმარე! ვერ ხედავ, შენი ქარაფშუტა ძმა დაგიღონა რაღაცამ? მგონი სიყვარულმა.

დავითმა ძმას თვალეში შეხედა, გაიღიმა და უპასუხა:

— ეს კიდევ რა ახალი ამბავია, სად შენ და სად სიყვარული? ალბათ, ვინმე საპატიო ოჯახიშვილი ან სხვისი ცოლი მოგეწონა და არაფერი გამოგივიდა? დამიღონდი?

— ნუ მეხუმრები, დათუ, მე რაღაც უჩვეულო ამბავი შემემტხვა, ჩემს ჭკუაზე არა ვარ. ძნელი ყოფილა სიყვარული.

— არ იტყვი ვინ არის შენი გულისუფალი ამ დროებით?

— არა, დათუ, ეს დროებით დაუფლების ამბავს არ ჰგავს, რაღაც სიზმარივით, მოჩვენებასავით მომეგვინა. მთელი ჩემი სული აავსო და ააფორიაქა, გრძნობა, რომელიც მე ახლა ასე მაწვალებს, არ ჰგავს არც ერთ ჩემს წარსულ გატაცებას, რომელიც ჩვენში ან რუსეთში გამომიცდია.

— ნუ გადამაყოლე, დრო არა მაქვს, კონსტანტინე. ქვეყნის საქმეებისაგან მაცდენ შენი სამიჯნურო ამბების გამო. — ღიმილით უთხრა უმცროს ძმას დავითმა.

— ახლავე გეტყვი. არ გეწყინოს და არც დამიშალო მისი ცოლად შერთვა. მე თაყვანიყვებამდე მიმიყვანა გიორგი დადიანის ასულის, მაიას, მშვენიერებამ, ჭკუამ და გამჭირახობამ.

— ეს ხომ ის მაიაა, საქმროს ასე უცნაურად რომ გლოვობს.

— ის არის, დათუ. თუ არ შევირთე, ჩემს ცოლს ვერასოდეს ვერ ნახავ. რუსეთში გადავიკარგები, ან საზღვარგარეთ წავალ.

— კონსტანტინე, იმის მაგივრად, რომ მხარში ამომიღგე, სამთავროს აღორძინებას ხელი შეუწყო და დამეხმარო, შენ გადაკარგვას აპირებ?! გრიგოლი სულ რუსეთში ან თბილისშია. შენ ხომ ნადირობისა და დროს ტარების მეტს არაფერს აკეთებ. მუდამჟამს ხანმოკლე გრძნობებს აყვები ხოლმე. რარიგ გავხარ განსვენებულ მამაჩვენს. შენც, როგორც მამას, ქარიშხალივით დაგეჯახება სურვილი, რომელიც თვალში სინათლეს დაგიკარგავს. ასე არ ვარგა, დაწყნარდი, დამშვიდდი, მოვიფიქროთ, განვსაჯოთ და როგორც აჯობებს, ისე გავაკეთოთ ყველაფერი.

— ვერ წარმოიდგენ, რა ქალია. მაღალი, ლამაზი, დინჯი, დარბაისელი, მტკიცე და, რაც მთავარია, მეტად განათლებული.

— ვიცი, ვიცი, კონსტანტინე. მაია დადიანის ქება-დიდება ბევრჯერ მსმენია. გიორგის ქალიშვილი არ შეიძლება კარგი არ იყოს. სამწუხაროა, რომ გიორგის ოჯახი ასე ჩამოშორდა სასახლეს. მისი განდგომა ჩვენგან დიდი დანაკლისია სამთავროსათვის. მამამისს, დიდ ნიკოს, უნდა ვუმაღლოდეთ ჩვენ, რომ

დღემდე შერჩა სამეგრელოს სამთავრო. ტყუილა როდი დაგაყენე ნიკოს ადგილზე პეტრე, გარდა იმისა, რომ იგი მამასავით დინჯი და გონიერი კაცია, მინდოდა მისი მეშვეობით გიორგიც ჩამება სამთავროს საქმეებში, მაგრამ ამაოდ... ახლა იქნებ მაიამ გადოს ზიდი ჩვენს შორის.

— თუ ეს ასე მოხდა, მაიაზე ჩემს ჯვარისდაწერას საქვეყნო მნიშვნელობა ექნება, — გაიცინა კმაყოფილებით კონსტანტინემ. — ჭკვიანი კაცი ხარ, ჩემო დავით. ამას მე ვერასოდეს ვერ მოვიფიქრებდი.

— გიორგი უნდა დავიახლოვოთ უსათუოდ, კონსტანტინე. ის კარგ სამსახურს გაუწევს სამთავროს. ჩემი მიზანია ისე წარემართო ქვეყნის საქმე, რომ, არათუ ჩემი ძმები და ნათესავები, მთელი ჩვენი კუთხე წელში გაიმართოს. ეს ხელს შეუწყობს საქართველოს საერთო სიმტკიცეს.

— მე ქალზე გელაპარაკები, ჩემო დათუ, შენ კი საზოგადო საქმეებზე. — კვლავ გაიცინა კონსტანტინემ. — მე ქალის სიყვარულით ვარ გაბრუებული, შენ კი ქვეყნის საქმით.

— საქვეყნო საქმეზე უფრო საზრუნავი ახლა ჩემთვის არ არსებობს.

— მართალი ხარ, დათუ, მართალი, მაგრამ ვაითუ მაიამ უარი მითხრას.

— ჩემო კონსტანტინე, ეს უკვე შენს ვაჟკაცურ ხელოვნებაზეა დამოკიდებული. ამაში მე ვერაფერს დაგეხმარები. აბა, რა კაცი ხარ თუ ერთ გაჯიუტებულ ქალს ვერ მოინადირებ. ყველა ხერხი უნდა იხმარო მაია ბატონიშვილის გულის მოსაგებად. — დავითი მოღიმარი თვალებით უყურებდა უმცროს ძმას.

— ასეა თუ ისე, დავით, შენ უნდა დამეხმარო, ვფიქრობ, დავითანხმებ. შენ უნდა მიპატრონო, ჯერ ერთი, რომ მთავარი ხარ, მეორეც, უფროსი ძმა და მამის ადგილი გიჭირავს. ყველაფერი შენს ნებაზე იყოს.

დავითმა ტარიელ ჩიქოვანი გაგზავნა მაიასთან შუამავლად და შეუთვალა, რომ დიდად ბედნიერად ჩათვლიდა თავს თუ კონსტანტინეს უარს არ ეტყოდა წინადადებაზე.

მაიას თავმოყვარეობა მეტად დააკმაყოფილა კონსტანტინეს მოსვლამ. ქალური ალლო არ ღალატობდა, გრძნობდა, რომ ძლიერი შთაბეჭდილება მოახდინა კონსტანტინეზე. მაია უკვე

ოცდაათ წელს იყო მოახლოებული. როგორც ყოველ ქალს, თავისი წლოვანების ეშინოდა, თუმცა სარკე, რომელშიც იშვიათად იხედებოდა, დიდ იმედებს აძლევდა. მისი ქალური თავმოყვარეობა იმიტაც ზეიმობდა, რომ ასეთ გართულსა და ქვეყანაშემოვლილ კაცს მოწინებით ათხოვია ნებართვა, რათა მისი ნახვის ღირსი გაეხადა.

ახლა იმაზე ჩაფიქრდა მაია, რომ თუ ცოლობა მთხოვა, როგორ მოვიქცეო. გული აუჩუყდა, რადგან მაშინვე ალექსი მოაგონდა. რა არის მისთვის გათხოვება, ქმარ-შვილი?! მაიასათვის ზომ ყოველივე ეს გათავდა. მისი ახალგაზრდობა ამ ქოხში ჩაკვდა. მაშ რა აზრი ექნება მის გათხოვებას?

მაიამ თითქოს გული დააჯერა, ყველაფერი გათავდაო, მაგრამ იმავე წუთს სხვა ფიქრები დაეპატრონა მის გონებას. გარდა იმისა, რომ მთავრის ოჯახის რძალი გახდებოდა, პატივი და დიდება მოელოდა, საშუალება მიეცემოდა გაეღენა მოეხდინა თავის ახალგაზრდა და სუსტი ხასიათის ქმარზე და მისი მეშვეობით მონაწილეობას მიიღებდა საზოგადოებრივ საქმეებში.

ეკატერინეს ბირველობამ სამეგრელოში, მის სილამაზესა და განათლებაზე ლაპარაკმა ბუნებით პატივმოყვარე მაიას ქალური შურიც გაუღვივა გულში. ამ წუთში ის ყველაფერზე დათანხმდებოდა, ოღონდ საშუალება მისცემოდა ამ ქალს გათანასწორობოდა. ახლა კონსტანტინე რომ შემოსულიყო ოთახში და მაიას ხელი ეთხოვა, უყოყმანოდ დათანხმდებოდა.

ბაღაფყდა

ტარიელ ჩიქოვანი მეორე დღესვე გაემგზავრა ნოღაში, განგებ შემოიღამა, რომ ნათლულის სახლში გვიან მისულიყო და დამე იქ გაეთია. დარეჯანი დააეჭვა ტარიელის ასე მალე მეორედ სტუმრობამ. მაგრამ სტუმარს არაფერი შეამჩნევინა, სიხარულით შეეგება და გულუხვად გაუმასპინძლდა. გუმანით იგრძნო რისთვის იყო მოსული თავადი.

ტარიელმა დარეჯანი, დიმიტრი და ვარლამი გვერდით მოისვა და დიდი საიდუმლოებით გაანდო მათ თუ როგორ შეუყვარდა მთავრის შვილს ბატონიშვილი მაია.

— თუ ეს ქალი მისი ცოლი არ გახდა, კონსტანტინე ამ დარდს ვერ გადაიტანს — ჩუმად ეუბნებოდა ტარიელი მათ. — ყოველგვარი დროს ტარება მიატოვა, მისი რძლის სასტუმრო ოთახშიც იშვიათად შედის, უფრო ხშირად დავითის ოთახში ზის. თათბირებში მონაწილეობს, ძალიან შეიცვალა, დადინჯდა და უფრო საქმიანი გახდა.

დარეჯანს არ გაჰკვირვებია ტარიელის ნათქვამი. გული ეუბნებოდა, რომ ეს ასე უნდა მომხდარიყო. დიმიტრი და ვარლამი მეტად გაახარა ახალმა ამბავმა. გარდა იმისა, რომ მაიას მონაზნობას ბოლო მოეღებოდა და ამ ქორწინებით მისი საგამზრდელო ყველას თვალში ამალღებოდა, გაბედავები პირველი კაცები გახდებოდნენ სალიპარტიოში.

— რა ვქნათ, ნათლულო? მე მოვახსენო ბატონიშვილს მთავრის დანაბარები თუ შენ მოელაპარაკები? — ჰკითხა ტარიელმა დარეჯანს.

— არ ვიცი, რა ვქნა, როგორ ეუთხრა. ხომ იცი, რასაც იტყვის, ჩემი ნათქვამი რომ არ მოეწონოს? ერთხელ უარი რომ თქვას, მერე ძნელი მოსაგვარებელი იქნება ეს საქმე, — მიუგო მასპინძელმა.

— ჯობია შენ მოახსენო. მაიამ რომ უარი უთხრას, ეს კონსტანტინეს და მთავრის შეურაცხყოფა იქნება და ქალსაც სახელი გაუტყდება. მაგრამ არა მგონია... ქალი მაინც ქალია. მე ახლავე მოვახსენებ მაიას თქვენს მობრძანებას.

მაია გულისძგერით ელოდა ძიძას, გუმანით გრძნობდა რისთვისაც იყო მოსული ტარიელ ჩიქოვანი და ღელავდა. ის აზრი უტრიალებდა თავში, რომ ეკატერინე დედოფალს ამოუდგებოდა მხარში და იქნებოდა მთავრის რძალი, პირველი ქალი სამეგრელოში.

— რა გასჭირვებია ტარიელ ჩიქოვანს, ძიძაჩემო, რომ ასე უცებ მოგიბრუნდათ უკან ორი დღის წასული სტუმარი? — ისეთი კილთით უთხრა ძიძას მაიამ, თითქოს უკმაყოფილო იყო ტარიელის მოსვლით.

— გაჭირვებას არ მოუყვანია, შეილო ჩემო, ტარიელ ჩიქოვანი ჩვენთან. ისეთი პირი უჩანს, რომ კარგი და სასიხარულო საქმისათვისაა მოსული, შენ თუ არ ჩააგდებ გასაჭირში.

— მე?! — თითქოს გაიოცა მაიამ. — მე რა ხელი მაქვს ტარიელთან?

— შენი ხელი... — ძიძამ დროზე დააჭირა ენას კბილი. — ტარიელი მთავარს გამოუგზავნია შენთან, შვილო.

— რა საქმე აქვს ნეტა ჩემთან მთავარს? — გულმა რეჩსი უყო მაიას. თხოვე ტარიელს, მობრძანდეს! — წამოცდა მაიას, მაგრამ უმაღლვე გადაიფიქრა, — არა, დილით მოვიდეს. ახლა თავი მტკივია, ძიძა, და უნდა დაეწვე. ხომ საკადრისად გაუმასპინძლით სტუმარს?

— არაფერი დაგვიკლია, ძიძა შემოგველოს, — გულში გაეღიმა ძიძას. იგრძნო, რას ნიშნავდა მაიას უკანასკნელი სიტყვა.

მთელი ღამე თეთრად გაათენა მაიამ. ნანობდა რომ დილისათვის გადადო სტუმრის მიღება. მერე და როგორი სტუმრის. ასეთი სასურველი სტუმარი არასოდეს სწვევია და მან კი რამდენი ზნით დააყოვნა იმ ამბის გაგება, რომლის მოლოდინმა ასე აუფორიაქა გული და გონება.

მაიამ დილით ადრე მიიღო ტარიელ ჩიქოვანი. მისალმებისა და მოკითხვის შემდეგ პირდაპირ საქმეზე გადავიდა სტუმარი და მოკლედ მოახსენა მთავრის დანაბარები.

— მოახსენეთ მთავარს, — კარგა ხნის დუმილის შემდეგ დინჯად დაიწყო მაიამ, — თუ მე რაიმეთი შევძლებ სამთავროს საქმეს სარგებლობა მოუტანო, არაფრის წინ არ დავიხევ. მოხარული ვიქნები მამაჩემის ოჯახი რომ კელავ იქცეს სამთავროს ერთ-ერთ ბოძად. კონსტანტინეს კი გადაეცით მინახულოს.

ჩიქოვანმა მდაბლად თავი დაუკრა და ოთახიდან გავიდა. სანამ ჩიქოვანი საუზმობდა, დარეჯანი, დიმიტრი და ვარლამი ერთმანეთს ულოცავდნენ მაიას გულის მობრუნებას.

ჩიქოვანი გახარებული მიდიოდა ზუგდიდში. მალე კონსტანტინეს სასიხარულო ამბავი მიუტანა, თან ძიძის დანაბარები გადასცა, რომ მაია ბოლო ღროს ძალიან გამოცვლილიყო და გახალისებულიყო.

კონსტანტინემ ბევრი აღარ დააყოვნა, ტარიელთან ერთად სამი რჩეული მხლებლით საჩაჩიბაიოში გასწია.

როდესაც მაიას მოახსენეს, კონსტანტინე მობრძანდაო, იგი წიგნს კითხულობდა, ისე შეკრთა და დაიბნა, რომ შეშინებული-

ვით წამოიჭრა ფეხზე. ალექსის ბეჭედს ხელი მოჰკიდა და შემფოთებით თავისთვის ჩაიჩურჩულა:

„ნუთუ ამის მეტი არაფერია სიყვარული? მე მეგონა, რომ ჩემთვის ყველაფერი გათავდა. ხედავ, ჩემო ალექსი? მე ისევე ცხოვრებას ვუბრუნდები. მომიტევე, ჩემო ძვირფასო“.

შემდეგ მაია ისევე მოგონებების მორევში გადაეშვა.

ოთახში კონსტანტინეს შემოსვლამდე ძიძა შემოვიდა მაიასთან, გაზრდილს ახედ-დახედა და მის ბრძანებას დაელოდა. მაია ღმობიერად მოეხვია გამზრდელს და უთხრა:

— ძიძა, დამლოცე და მარტო დამტოვე კონსტანტინესთან. ხატის წინ შემავედრე უფალს, რომ შენი ტანჯული მაია ამიერიდან მაინც იყოს ბედნიერი.

კონსტანტინე მარტო შემოვიდა მაიას სადგომში, დიდი მღელვარება ეტყობოდა. ცოტა ხანს ფეხზე იდგა და დუმდა. მერე ისევე მაიას მოაგონდა მასპინძლის წესი, სტუმარს სკამისაკენ მიუთითა და თვითონაც დაჯდა. სიჩუმე კონსტანტინემ დაარღვია:

— ძვირფასო მამუ, შენმა პასუხმა ფრთები შემასხა. ჩემზე ბედნიერი კაცი ქვეყანაზე არ დადის ახლა.

მაია თვალს არ აშორებდა კონსტანტინეს. ხედავდა, რა დიდი სიყვარული ღვიოდა მის გულში და თვითონაც ბედნიერად გრძნობდა თავს.

— ჩემი თხოვნა იქნება, — განაგრძობდა კონსტანტინე. — ახლავე შეუდგეთ სამზადისს ქორწილისათვის.

— ბატონო კონსტანტინე, მე მშობლები მყავს. როგორც წესი და რიგია, შენ მამას უნდა თხოვო ჩემი ხელი. მამას სახლიდან უნდა წამიყვანო. დარწმუნებული ვარ, მამა უარს არ გეტყვის. მე ხვალვე დავუბრუნდები მშობლებს...

კონსტანტინე წამოდგა, მაიას ხელზე ეამბორა, მაგრამ უცებ შეკრთა, ტურქებზე ცივად მოხვდა ოქროს ბეჭედი. თავი ასწია და მაიას შეხედა შეცბუნებულმა ვაჟკაცმა, მერე სწრაფად გაიძრო თითიდან ბეჭედი, გაუწოდა მაიას. მაიამ უხმოდ ჩამოართვა.

— ალექსის ბეჭედს ეს მხოლოდ მაშინ შეცვლის, როცა მამაჩემისაგან თანხმობას მიიღებ.

— მაშ მოუთმენლად დაველოდები იმ დღეს, როცა შენ მამის ოჯახს დაუბრუნდები.

— მე არ დავაყოვნებ ერთი დღითაც კი, კონსტანტინე, — უთხრა მაიამ და ამით აგრძნობინა, რომ მათ შორის საუბარი დამთავრებულია.

* * *

მაიამ მეორე დღესვე წერილი მისწერა მამას და შინ დაბრუნების ნებართვა გამოსთხოვა. დედ-მამა ქალიშვილის წერილმა ძლიერ გაახარა. სასახლეში მაიას დაბრუნება მის მკედრეთით აღდგომას ნიშნავდა მშობლებისათვის. დედა სისარულით ცას ეწია, ჩემს ჭკვიან ქალს თავისი სიმტკიცითა და პატიოსნებით რა კარგი ქმარი უშოვნიაო. ახლა ცოტა თავიც მოსწონდა, აფხაზეთისა და სამეგრელოს მთავრების სიდედრობა პატივმოყვარეობას აღვიძებდა მის გულში. ყველაფერზე უფრო მასში დედობრივი გრძნობა ნეტარებდა, რომ მისი სიამაყე ქალიშვილი გონს მოვიდა და ცხოვრებას დაუბრუნდა.

ძმებიც გახარებული იყვნენ, მხოლოდ მამის ბრძანებას ელოდებოდნენ, რომ დის მოსაყვანად წასულიყვნენ. გიორგიც არ იყო უკმაყოფილო ქალიშვილის გადაწყვეტილებით, უხაროდა ამდენი ხნის უნახავი ქალიშვილის ნახვა, თანაც გულში მიმალული აზრები და სურვილები თავს არ ანებებდა, იმედს ამყარებდა ამ ახალ კავშირზე, რომ სამეგრელოს სამთავროზე მაინც მოეხდინათ დადებითი გავლენა მას და მის შვილებს.

გიორგის ორი მოწიფული ვაჟი ჰყავდა დავითი და კოწია. დავითი დინჯი, წინდახედული და ჭკვიანი იყო, ის ბიძამის პეტრეს ჰგავდა, ხოლო კოწია დაუდგარი, მგრძნობიარე და გულის ამყოლი იყო. მათ განუხორციელებელი სურვილები აწუხებდათ. საზოგადო საქმეებს ჩამოშორებული ახალგაზრდობა, რომელსაც დროის შესაფერი განათლება მიელო ქართულ და რუსულ ენებზე, მოზღვავებულ ენერგიას დარდიმანდობასა და ტრფიალში ხარჯავდა. გატაცებული იყო პოეზიითაც.

გიორგის თავისი შვილები რუსთა ხელმწიფის სამსახურში არ შეჰყავდა, ხოლო სამთავროში სხვა მათი შესაფერი სამსახური არაფერი იყო.

მაიას შესახებ ისინი მამას არწმუნებდნენ, რომ ეს დამოყვრება დიდ სარგებლობას მოუტანდა როგორც სამთავროს, ისე მათ ოჯახს. გიორგიმაც თანხმობა განუცხადა მოციქულებს, მაიას კი მისწერა: „შენ მაგონებ იმ შვილს, რომელიც ოჯახს გაექცა, მთელი თავისი ქონება გააბნია, შემდეგ ცარიელი დაუბრუნდა ოჯახს, ხოლო მამამ მას ცხვარი დაუკლა და პატივი სცა. მე ეს სახარებაში ამომიკითხავს, ალბათ შენც გეცოდინება, იქ უფრო ლამაზად წერია. თუ დაგვიბრუნდები, პატრონობას და სიყვარულს არ მოგაკლებთ“.

დარეჯანმა ვარლამი და დიმიტრი ზუგდიდში გაგზავნა მაიასათვის შალისა და აბრეშუმის საკაბეების საყიდლად.

— აბა შავებში ხომ ვერ გავისტუმრებთ, შვილო, ხომ არ შევერცხვებით. ბევრი გაწვალათ ჩემმა გაზრდილმა, მაგრამ ბევრსაც გაგახარებთ და თავისი წყალობით აგავსებთო, — მოუბოდიშა ბოლოს დარეჯანმა და შვილს ვერცხლის უზალთუნები ჩაუჩხრიალა ხელში.

დიმიტრიმ და ვარლამმა იყიდეს თხელი შალის საკაბეები, დიბა-ფარჩები, მრავალი წვრილმანიც და გახარებული დაბრუნდნენ ნოლაში.

მაია ნასიამოვნები დარჩა ძიძის ყურადღებით და დიმიტრისა და ვარლამს ნავაჭრი მოუწონა. სხვა დროს ასეთ იაფფასიან საკაბეებს იგი ზედაც არ შეხედავდა, მაგრამ ახლა ისინი უმშვენიერესად ეჩვენებოდა. ბედნიერებით თავბრუდახვეული მაია თავის ოთახში შევიდა, ნინოს სთხოვა, რომ ერთი თეთრი კაბა ახლავე დაეჭრათ და შეეკერათ. მაიამ ყველანი გაისტუმრა ოთახიდან და მარტო დარჩა.

ნუთუ კვლავ ცხოვრებას დავუბრუნდები. კვლავ გავალ ხალხში, მოვშორდები ამ ქოხს? ნუთუ მიყვარს მე კონსტანტინე და გულიდან ამოვირეცხე ალექსი, ვისთვისაც რვა წელი გავატარე ტანჯვასა და მწუხარებაში? — შიშით გაიფიქრა მაიამ. ფიქრებს რომ მორეოდა, ადგა, ხელსაქმე დაკეცა, წიგნები დაალაგა და შემდეგ ოთახში დაიწყო სიარული. ესეც რომ მობეზრდა, ისევ საქმეს მიჰყო ხელი: ხან ცეცხლს შეუკეთებდა, ხან წიგნს აიღებდა ხელში, ხან ისევ ხელსაქმეს, ხან კი უაზროდ გაჩერდებოდა... როდესაც სახელდახელოდ შეკერილი თეთრი კაბა მოართვეს, მან შავები გაიხადა: ღელავდა, გულმოსუ-

ლიც იყო თითქოს, მაგრამ მიზეზი რომ გეკითხათ, ვერაფერს გეტყვოდით. თვითონაც არ იცოდა რამ მიაღებინა ახალი გადაწყვეტილება და ბოლომდე რატომ ვერ მიიყვანა ყმაწვილქალობისას გადადგმული ახირებული ნაბიჯი. ახლა მიხვდა, რომ მის მიერ მიტანილი მსხვერპლი არაუადრეს სჭირდებოდა. ამ ხნის განმავლობაში ვერაფერი გააკეთა ვერც ალექსისათვის, ვერც თავისთვის და ვერც ქვეყნისათვის. აფორიაქებული გული ისევ მოგონებებით დაიწყნარა.

„მეც გიღალატე, ჩემო ალექსი! მხოლოდ დედაშენი შეგრჩა ერთგული, — შეესიტყვა მაია მოძალეებულ ფიქრებს... წუთით ისიც კი გადაწყვიტა, რომ კონსტანტინესათვის ბეჭედი უკან გაეგზავნა და კვლავ ჩაკეტილ ცხოვრებას დაბრუნებოდა, მაგრამ გულს გონება მოერიდა, — ისევ შამის რისხვა? კონსტანტინეს აბურხად აგდება? კვლავ სიტყვის გატეხვა? არა, ეს შეუძლებელია!“ — წამოდგა, ახალ კაბას დახვდა. ამ დროს თვალი შეასწრო, რომ ძიძა შავ ძაძებს ცეცხლში ყრიდა, ხოლო ქიშმირის შალს ვერ შელევოდა და კუთხეში მიეგდო.

მაიას თვალი აუცრემლდა. საჩქაროდ ქამარი გაისწორა, თავზე თეთრი ბატისტის მანდილი გადაიფარა და, ის იყო უკანმოუხედავად ოთახიდან გასვლას აპირებდა, რომ ძიძამ გზა გადაუჭრა:

— შეილო, შენ იმდენი რამ ჩაიდინე ჩემდა უნებურად, მაგრამ არასოდეს საყვედური არ მიკადრებია, არც არაფერი მითხოვია. ახლა გთხოვ, რომ ის ალექსისეული ბეჭედი მე მომცე. შენ არ უნდა ატარო იგი. დღეს თუ ხვალ კონსტანტინეს ცოლი გახდება და სხვას შენს გულში ადგილი არ უნდა ეჭიროს. ეს ცოდვა იქნება, შეილო, არ ვარგა, მომეცი ბეჭედი, რომ ცეცხლში დავწვა!

— ეჰ, ძიძა, ძიძა! საუბედუროდ ოქრო ცეცხლში არ იწვის. ჰა, გქონდეს. ძალიან გთხოვთ ნუ დამიკარგავთ.

— როგორ გეკადრება, შეილო! მე ღმერთმა დიდებული სიძე მომცა და ამ ბეჭედს როგორღა გაგაკარებ? რატომ არ დაიქცა ის დღე, შენ რომ ამ ბეჭდის პატრონი შეგიყვარდა. კარგი, რაკი მთხოვ, შეგინახავ, შემოგვეღვე, ოღონდ შენ მიატოვე წარსულზე ფიქრი. ვერ ხედავ, რა ბედი გაგეხსნა?

თეთრებით მოსილი მაია ოთახიდან გამოვიდა, ლერწამისას

უბრძანა: წიგნები და ხელსაქმის ნიუთები აქეთ გადმომიტანეთო, თვალზე ცრემლი შეიშრო და გარეგნულად სრულიად დამშვიდებული მიუახლოვდა გაშლილ სუფრას. ძიძიშვილებიც შემოუსხდნენ სუფრას. ჭუტულამ სიმღერაც კი შემოაპარა. მერე გადამეტებული სიმთვრალეც მოიგონა. გამიშვით დადიანის მოსაკლავადო, — იმუქრებოდა, ხან კიდევ ოსტატურად ჰბაძავდა კონსტანტინეს ბოხ ხმას, სიარულს. მაია გრძნობდა, რომ ეს მის ძიძიშვილს სიყვარულით მოსდიოდა და თვითონაც გულიანად იცინოდა. მაიას ბედნიერებით ყველა გახარებული იყო, მაგრამ გული წყდებოდათ, რომ ის ეთხოვებოდა მათ ოჯახს. თუთანამ და ლერწამისამ იცოდნენ, რომ მაია მათ არ დატოვებდა, თან წაიყვანდა. თუთანას თუ გარემოს გამოცელა და თავის ქალბატონთან ერთად მდიდრულად მოწყობილ სასახლეებში ყოფნა გულს უხარებდა, ლერწამისა ცულ გუნებაზე იყო. ის უნდა გაშორებოდა იმ არემარეს, სადაც გელა ჯგერენაიას კვირაში ერთხელ მაინც ხვდებოდა. გელა მამის დასჯის შემდეგ დაჯავრიანებული დადიოდა, სულ ჯოღორიას მოკელის სამზადისში იყო. გელას მამა დიდხანს ვერ წამოღგა ფეხზე. მოკეთების შემდეგ იძულებული გახდა ისევ ჯოღორიას დადგომოდა მსახურად.

მიხამ იცოდა, თუ რა ელო გულში გელას. მამა ყოველნაირად ცდილობდა შთაეგონებინა შვილისათვის, რომ ჯოღორიას მიკვლით ოჯახს დაღუპავდა, ჯოღორიას კაცები დიდიან-პატარიანად ამოხოცავდნენ ჯგერენაიებს. გელა მამას არ უჯერებდა, ოჯახიანად გაიქცა და ნათესავებს აფარებდა თავს. ამის გამო ლერწამისას იშვიათად ნახულობდა.

„ამ ქისას მაინც დაუტოვებ გელას ბატონიშვილი თან რომ წამიყვანს“, — იმედოვნებდა ლერწამისა და თვალეზაცრემლებული გულმოდგინედ ქსოვდა ნაირფერი მძივებით მოქარგულ ქისას.

— რა იყო, რა გატირებს? — ჰკითხა მაიამ გაკვირვებით. i

— არაფერი, ბატონო, თვითონაც არ ვიცი, რატომ წამომივიდა ცრემლები.

— მე კი ვიცი. შენ აქედან წასვლაზე გწყდება გული, ხომ? — თვით ძლიერი ნებისყოფის მქონე მაიაც მოეშვა წუთით, მასაც ცრემლი მოადგა თვალზე, მაგრამ თავი შეიკავა, ლერწა-

მისას ხელი მოხვია, გულში ჩაიკრა, იცოდა რა აწუხებდა უმწეო, უუფლებო გოგონას და ქალიშვილს მხოლოდ ეს უთხრა:

— ცოტა ხნის შემდეგ ორივენი მოდით ჩემთან — შენ და თუთანა.

მაია ოთახში დაღვრემილი მიმოდიოდა, თან ფიქრობდა:

„რა ძალაა ეს სიყვარული, დიდსა და პატარას ერთნაირად რომ ედება. ახლა მე ვერაფრით დავეხმარები ჩემს შვილივით გაზრდილ ლერწამისას. ამჟამად ჯოღორიასთან დამოკიდებულების გამწვავება არ ვარგა. მოიცადოს ლერწამისამ. ის ჯერ ცხრამეტი წლისაც არ არის. მე კი მეტიცა ვიყავი მაშინ...“ ის იყო მაია დაჯდა, რომ თუთანამ მორიდებულად შემოაღო კარი. ლერწამისაც თან შემოჰყვა.

— ჩემო ერთგულო, თუთანა, მე და შენ ბევრი ჭირი გადავიტანეთ ერთად. — უთხრა მაიამ თუთანას და გვერდით მოისვა. — მერე პატარა ლერწამისა მოგვიყვანეს აფხაზეთიდან, ესეც ჩემს თვალწინ დაქალდა. ეს ოჯახი სამივეს გვზრდიდა და პატივს გვცემდა. ახლა უნდა დავტოვოთ. მე თქვენ ხომ ვერ მოგიშორებთ. ალბათ, თქვენ გაგიხარდებათ ჩემი დაშორება, არა? — მიმართა მათ მაიამ.

— რას ბრძანებთ, ბატონო, უშენოდ ჩვენ ერთი დღე არ გვინდა სიცოცხლე. — დაიწყო თუთანამ. — დედა არ მყავდა, კი მომიხსენებია შენთვის, დედინაცვალი ჩუმად უწყობდა ხელს ჩემს გაყიდვას. ეს საწყალი ლერწამისაც ხომ სახლიდან გაეყიდათ. უღედმამო გოგო ვის წვავდა გულს? ის იყო, მფარველ ანგელოზად მოგვევლინე, დაგვიხსენი ურჯულოთა ტყვეობისაგან, გაგვზარდე. ჩვენ შენს ჩრდილს ვერ მოვშორდებით.

ლერწამისა ჩუმად იდგა, მხოლოდ ცდილობდა, თვალებში დაგუბებულ ცრემლს კიდევ არ გაეცა მისი ხვაშიადი.

— ახლა ორივე შეუდექით ტანისამოსისა და თეთრეულის წესრიგში მოყვანას. ყველაფერი ჩაალაგეთ, შეიძლება ჩვენი წამყვანები მამაჩემის სახლიდან სულ მოულოდნელად მოვიდნენ, — თქვა თუ არა ეს, მაია ადგა და ძიძის ოთახისკენ წავიდა.

თუთანა და ლერწამისა კარგა ხანს იდგნენ უსიტყვოდ. თუთანამ ლერწამისას გამომცდელი თვალებით შეხედა.

— გოგო, რა იყო, ენა რომ ჩაგივარდა და ჩვენს პატრონსა

და მხსნელს ერთი სიტყვა ვერ უთხარი, ეშმაკები ხომ არ შეგივდა?

— ტყუილს ვერ ვიტყვი. განა თვითონ ვერ მიხვდება, რომ მე აქედან წასვლა შეძნელება? თვითონაც ხომ კინალამ გადაჰყვა სიყვარულს, დალოცვილი. განა მარტო ბატონებს აქვთ გული, თუ თანა?

— გოგო, შენ ხომ არ გაგიჟდი? ვის ადარებ თავს, სხვასთან არ წამოგცდეს, ვინმე ენას მიუტანს, ეწყინება, შეძულდები. ან რამ შეგაყვარა ის ჯგერენაია, იმას ცოლად ჩემი მტერი გაჰყვა. მტრად გადაკიდებული ჯოღორია არ გაახარებს.

— ბატონიშვილს ჩვენ არ შევძულდებით, მტირალს შემომისწრო, მომეფერა. ის ჯოღორიაც ჩაძაღლდება და ჩვენც რამე გვეშველება.

— მაგას თუ უცადე, ჩემსავით დაბერდები, ჩემო ლერწამისა.

— შენ რამ დაგაბერა, არავინ გიყვარს, თორემ ახლა ხარ გასათხოვარი. ბატონიშვილი შენზე ორი წლით უფროსია და ხომ ხედავ, ახლა თხოვდება.

— გოგო, ნუ სულელობ, ბატონიშვილი ბატონიშვილია და ჩვენ ყმები ვართ, ვერ გაიგე? მაინცდამაინც ბატონიშვილს უნდა დაეტოლო?

— დაიჩემე ერთი, ყმები, ყმები! ჩვენ ვითომ ადამიანები არა ვართ?

— გოგო, შენ ბეერს ნუ ტიტინებ, თორემ შენ და შენს გელას სტამბოლის ბაზარზე ამოგაყოფინებენ თავს.

— სხვასთან ხომ არ ვიტყვი, შენთან ვამბობ, თუ თანა, შენ ხომ ჩემი უფროსი და ხარ.

— გოგო, სად ხარ, ლერწამისა? — გაისმა დარეჯანის ხმა. ლერწამისა უცებ კარებთან გაჩნდა.

— რას მუსაიფობთ ამდენს? სტუმრებით ეზო აივსო, ესენი კი სხედან არხეინად! მაიას თავისი ძმების მობრძანება მოახსენეთ!

ქალიშვილები შეკრთნენ, გულამგერებული შევიდნენ მაიასთან და მოახსენეს ყველაფერი.

— მე უკვე დავინახე ისინი. დამშვიდდით, ყველაფერი მოესწრება! — უთხრა მაიამ. თვითონ ღელავდა, სხვებს კი ამშვიდებდა.

მაიას წასაყვანად ძმების მოსვლამ არათუ დარეჯანის ოჯახი, მთელი ახლომახლო სამეზობლოც გამოაცოცხლა.

აღელვებულმა დარეჯანმა კიბე დინჯად ჩაიარა, დარბაის-ლურად შეეგება სტუმრებს და ისინი მაიას ოჯახში მიიწვია. მაია ძმებს გადაეხვია, ხოლო მისი სკამის უკან მდგარმა ლერწამისამ ფანჯრიდან თვალი მოჰკრა, თუ როგორ დატრიალებდა ცხენებსა და მხლებლებს შორის გელა ჯგერენაია, თან გულში ფიქრობდა: „გათავდა, აწი შორიდანაც ველარ დაეინახავ გელასო“.

და ბ რ უ ნ ე ბ ა

ძიძის ოჯახმა დიდი ძღვენი გამოუწყო მაიას. დარეჯანი შეიღებოდა, მაზლითა და შინაურებით თან გაჰყვა გაზრდილს.

დიდი ხნის უნახავ დედ-მამას მაია სტუმრებთანაც ეალერსებოდა. ცოტა დარცხვენილიც იყო, რომ ასე შეაწუხა მისთვის ძვირფასი აღამიანები. მამას თმა და წვერი შევერცხლოდა, ქალიშვილს ძალიან ტკბილად შეხვდა. წარსულზე ლაპარაკი ყველას ეძნელებოდა, უფრო მეტად ქვეყნის ამბებსა და მწერლობაზე გააბეს საუბარი. გიორგიმ თავისი შეიღების და საკუთარი ლექსებით სავსე რვეული გამოუტანა მაიას. მაშინ გავრცელებული ჩვეულება — ნათესავთა ერთმანეთში გაშაირების, ერთმანეთისადმი ლექსების მიძღვნისა და ამ ლექსების შემონახვის წესი გიორგის ოჯახში დაცული იყო.

ყოველთვის ჩუმი და სიტყვაძუნწი მაიას დედა ახლაც ჩუმად იყო. ქალიშვილი გვერდით უჯდა, თავზე ხელს უსვამდა და ხშირად გულში იკრავდა.

მთელი სასახლე გამოცოცხლდა მაიას მოსვლით. განსაკუთრებით მოახლე ქალები აფუსფუსდნენ. ზოგს ებრალებოდა განდგეილი მაია და უზაროდა მისი გათხოვება, ზოგი კი შურით იცხებოდა. მაიამ ეზო დაიარა, ქალების ოთახები დაათვალიერა, ყველგან შეიხედა, ყველა მოიკითხა, მასაც თბილად შეხვდა რეა წლის მიტოვებული ოჯახი.

მაია თანდათან გაართო სასახლის ცხოვრებამ, მამისა და ძმების საუბარმა. პეტრე და ბესარიონიც მოვიდნენ. ყველანი

გახარებული იყვნენ ოჯახში მაიას დაბრუნებით და სასიძოც მეტად მოსწონდათ. გიორგი და პეტრე დიდხანს ლაპარაკობდნენ მაიასა და კონსტანტინეზე. ორივეს სჯეროდა, რომ ეს დამოყვრება, თუ დიდ მიზნებს ვერ განახორციელებდა, ყოველ შემთხვევაში სარგებლობას მოუტანდა მათ ოჯახს.

მაიას მოსვლის შემდეგ ერთი კვირაც არ გასულიყო, რომ გიორგის სახლის ჯებირს შუადღისას ათი-თორმეტი ცხენოსანი მოადგა. ესენი მთავრის მიერ გამოგზავნილი შუამავლები იყვნენ. შუამავლებს მუხრან-ბატონი მოუძღოდა — მთავრის სიძე, ქუთაისის გუბერნიისა და სამეგრელოს ჯარების უფროსი. მუხრან-ბატონს ახლდნენ: მრჩეველი ივა ჩიქოვანი, ბესარიონ დგებუაძე და ბეჟან აფაქიძე საპატიო აზნაურებით, მხლებლებითა და ყმებით. მუხრან-ბატონს ბევრი ლაპარაკი არ უყვარდა. როდესაც გიორგიმ და მუხრან-ბატონმა ერთმანეთი მოიკითხეს, შუამავალმა პირდაპირ საქმეზე დაიწყო ლაპარაკი და ბოლოს დასძინა: ბატონიშვილმა მაიამ იცის, თუ რა თავდავიწყებით შეუყვარდა ჩემს ცოლის ძმას ქალთა შორის ეს უმშვენიერესი არსება. ახლა მხოლოდ თქვენზეა საქმე, ბატონო გიორგი. გამოცდილი კაცი ბრძანდებით, თქვენს ლექსებში ბევრჯერ გიმღერიათ სიყვარულის უძლეველ ძალაზე და დარწმუნებული ვართ ამჯერადაც შეგნებულად მოიქცევით.

არც ივა ჩიქოვანი ჩამორჩა მუხრან-ბატონს ოქროპირობაში.

გიორგი სტუმრებს დიდებულად გაუმასპინძლდა, ლხინმა რამდენიმე დღეს გასტანა. ამ ოჯახის პურ-მარილის ამბავი მთელმა სამეგრელომ იცოდა, მაგრამ მასპინძლის ახლანდელმა ხელგამლილობამ ყოველგვარ მოლოდინს გადააჭარბა.

განსაკუთრებით მუხრან-ბატონი იყო მოხიბლული და აღტაცებული გიორგის სუფრით, მისი მეუღლის — მარიამის თავაზიანობით, სიღარბაისლით და ყველაფერ იმით, რაც ამშვენებს და აკეთილშობილებს სიბერეში შესულ ქალს. მაიას სილამაზემ, მისმა ჭკუამ, ქცევამ, კვდამამოსილებამ ხომ თავბრუ დაახვია და აღტაცებაში მოიყვანა გენერალი.

წასვლისას სტუმრებს დიდი საჩუქრები და ძღვენი მიართვა გიორგიმ. ეს წესად ჰქონდა თავის ოჯახში დადიანს. პატივსაცემ სტუმარს ხელცარიელს არ გაუშვებდა. გიორგი ამას თავ-

მოსაწონად ან სხვისი გულის მოსაგებად კი არ აკეთებდა, ამა-
ში თვითონ ხედავდა რაღაც სიამოვნებას და კმაყოფილებას.

ახლაც მის გულს სიამე მოეფინა, როცა მუხრან-ბატონმა
ვერცხლით მოოჭვილი ძველთაძველი საომარი მუზარადი მო-
უწონა. მართლაც არ შეიძლებოდა ამ მამა-პაპათა მიერ ათას-
ჯერ ბრძოლაში გამოწრთობილ, მრავალ ნახმლევ მუზარადს
აღტაცებაში არ მოეყვანა მნახველი.

ივა ჩიქოვანს, როგორც სამეგრელოს კანონმდებელს, ვან-
ტანგ მეფის კანონების ვერცხლის ყდაში ჩასმული წიგნი მი-
ართვეს.

ყველა გააკვირვა ბესარიონ დგებუაძისათვის მირთმეულმა
საჩუქარმა — ყაბარდოულმა შავმა ულაყმა. ბესარიონ დგებუა-
ძე მთელ საქართველოში განთქმული იყო ცხენოსნობით. რა
ჯიშის ცხენს არ ნახავდით მის საჯინბოში. ამგვარი ცხენი კი
ჯერ ჩემს თვალებს არ უნახავსო, ამბობდა გახარებული თა-
ვადი.

გიორგის პასუხით, მისი პურ-მარილით და საჩუქრებით
კმაყოფილი შუამავლები დაბრუნდნენ თუ არა, სამეგრელოს
მთავარი დაუყოვნებლივ შეუდგა სარძლოს დანიშენისათვის
მზადებას. დავითის აჩქარების მიზეზი მართო ის კი არ იყო,
რომ მალე მოეყვანა ცოლი ძმისათვის. მთავრის სურვილი იყო
გიორგი დადიანის ჩქარა შემორიგება. ამ გავლენიანი და დიდი
თავადის მხარში ამოდგომით დავითი ბევრი სასარგებლო საქ-
მეების გაკეთებას ფიქრობდა სამთავროსათვის. გარდა ამისა,
დავითს ბევრი მტერი ჰყავდა და გიორგის დამოყვრება თუ ყვე-
ლას არა, ნაწილს მაინც ჩამოაშორებდა. გიორგი დადიანი მა-
შინვე მიხვდა მთავრის ზრახვებს, კმაყოფილი იყო, რომ დავი-
თი გვიან, მაგრამ მაინც გაერკვა სიმართლეში და მოუბრუნდა
მისკენ გული. გიორგი ბუნებით ღვარძლიანი კაცი არ იყო და
არ შეეძლო შეენახა გულში ის შეურაცხყოფა, რომელიც მას
ჯერ ლევან დადიანისა და შემდეგ მისი მემკვიდრის დავითისა-
გან ხვდა წილად.

ასლა უკვე კონსტანტინეზე და მათზე მეტად დავითი და
გიორგი ესწრაფებოდა ქორწილს და ეს დღეც მალე დადგა.

მაისის მიწურული იყო. თითქოს მწვანედ შემოსილი ბუნე-
ბაც ემზადებოდა მაიასა და კონსტანტინეს ქორწილისათვის.
სამეგრელოს მთავრის ძმა გრიგოლი თავისი ამალით და თა-
ვადახნაურთა მაყრიონით, მაიას მოსაყვანად გაემგზავრნენ ჭკა-
ღუაშში.

გიორგიმ ბევრი მაყარი გამოაყოლა მაიას, სტუმრები აფხა-
ზეთიდან, იმერეთიდან, სვანეთიდან, გურიიდან და ლეჩხუმიდან.
აფხაზეთის მთავარი მიხეილი და თავისი მეუღლე ცუცუ გი-
ორგის არ მოუწვევია ქორწილში, რადგან დარწმუნებული იყო,
რომ ალექსი მიხეილის ხელით იყო მოკლული და თავისი სიძე
სამუდამოდ ამოირეცხა გულიდან.

სასახლეში საქორწილო მზადებას თვით მთავარი ხელმძღ-
ვანელობდა. ყოველნაირად ცდილობდა დავითი ღირსეული
ქორწილი გადაეხადა და ამით მოეგო გიორგი დადიანის
გული.

ჯერ კიდევ მზე ამოსული არ იყო, რომ საწერეთლოდან მან-
დილოსნები ეტლით და მამაკაცები ცხენებით მოვიდნენ. ესენი
დიდი ზურაბ წერეთლის შთამომავალნი იყვნენ. აუარებელი
ოქრო და მარგალიტი მოდიოდა მოსალოცად, მაგრამ ყველაზე
ძვირფასი იყო ირმებისა და შვლების ჯოგი. საწერეთლოს მოსვ-
ლამ განსაკუთრებით გაახარა დავითი. დედულეთს არ დავიწყე-
ბოდა ნათესავეები. ახლა დავითსა და კონსტანტინეს მხოლოდ
ის აფიქრებდათ, რომ ეკატერინე დედოფალი თბილისელი
სტუმრებით არსად ჩანდა, არც მოსულებმა იცოდნენ ამის შე-
სახებ არაფერი. დავითი უფრო დელავდა, ვაითუ პატარძლის
მოყვანამ დაასწროს იმათ მოსვლასო. ეს ძალიან უხერხულად
მიაჩნდა. ვინ უნდა დახვდეს მაიას, თუ არა უფროსი რძალიო,
ფიქრობდა ყველაფერში წესრიგის მოყვარული მთავარი.

არც კონსტანტინეს მოსწონდა მეგობარ რძლისაგან ასეთი
უყურადღებობა, მაგრამ არაფერს ამბობდა, პირიქით, ძმას
არწმუნებდა: მოვლენო.

ყოველი კუთხიდან მოდიოდნენ გუნდ-გუნდად სტუმრები.

დიდ ეზოში ჯგუფ-ჯგუფად ისმოდა საცეკვაო სიმღერა და
ტაში, მწყობრად იდგნენ ქართულად თავდახურული მანდი-

ლოსნები, ქირმანის შალებით შემოსილი, ყანაოზისა და დიბაფარჩებით მორთულები.

მთვარის შუქი სჭარბობდა საღამოს ბინდბუნდს, როდესაც ზუგდიდის სასახლის ჭიშკარში ორი ეტლი და რამდენიმე ცხენოსანი შემოვიდა. ეტლში ისხდნენ მთავრის მეუღლე ეკატერინე ბავშვებით და მათი აღმზრდელი ქალებით, კონსტანტინე მუხრან-ბატონი ცოლით, ნინო გრიბოედოვისა, რაფიელ ერისთავი, გრიგოლ ორბელიანი, გრაფი როზმორდუკი, ვინტგენშტეინი. მათ მოყვებოდათ ცხენოსნები, ზოგი სამეგრელოდან წასულიყვნენ ეკატერინეს შესახვედრად, ზოგი ქართლ-კახეთის თაყაიდები, ქორწილში საგანგებოდ მოწვეულნი.

დავითს არ უნდოდა იმ გაზაფხულზე ეკატერინეს თბილისში წასვლა, მაგრამ დედოფალს, რომელიც ვერ კმაყოფილდებოდა პროვინციაში ცხოვრებით, ისეთი პლიერი სურვილი დაეუფლა თბილისში ჩასვლის, თავისი საყვარელი სახლისა და მეგობრების ნახვის, რომ ამ სურვილის დათმობა მისთვის შეუძლებელი ხდებოდა.

წასვლის სურვილს ერთოდა საგაზაფხულო და საზაფხულო სეზონისათვის მომზადება. დავითმაც ველარ დაუშალა. ეკატერინე მარტის დამლევს ბავშვებიანად თბილისში გაემგზავრა.

დიდხანს არ გაუვლია, რომ მახარობელიც მოიჭრა, დამბანა დაცალა და ამით ამცნო ხალხს პატარძლის მოახლოება, შემდეგ ცხენიდან გადმოხტა: ერთ-ერთმა ლამაზმა და საპატიო ქალიშვილმა ფარჩის საახლოზე შემოახვია კისერზე, უნდოდა დაება, გაშვებას არ უპირებდა, მაგრამ ცქვიტი, მოზდენილი მიხა მხეიძე მოხერხებულად გაუსხლტა, ფარჩა გაიტაცა, კვლავ მოახტა ცხენს და დამბაჩის სროლით ეზო-ჭიშკარი გადაიჯირითა და მოახლოებულ მაყრიონს შეეგება.

მაია პირდაპირ გაცისკროვნებულ საყდარში შეიყვანეს. კონსტანტინე ზღურბლზე დაუხვდა საცოლეს. მისი სიხარულს საზღვარი არა ჰქონდა, როცა მაიას სილამაზემ საყოველთაო აღტაცება გამოიწვია საყდარში შეკრებილ და ეზოში მიმოფანტულ ხალხში. მთავარს უნდოდა, რომ პატარძალს ეკატერინე შეჰკებებოდა ოქროს ლარნაკით, შაქრით და პურიით მიელოცა სიტკბო და დოვლათი.

ეკატერინე კი რაღაც აუსსნელი მიზეზებით თუ დაღლილობით, სრულებით არ იყო საზეიმოდ განწყობილი და ქმრის სურვილი უგულოდ შეასრულა.

მდიდრულად, მაღალი გემოვნებით ჩაცმული და ძვირფასი სამკაულებით მორთული, მთავრის ცოლი პურითა და შაქრით დახვდა პატარძალს.

ორმა ბ. ნოვანმა ერთმანეთი გადაკოცნა. მათ მომავალი ნათესაობის შეტი არაფერი აკავშირებდათ ერთმანეთთან. რძალთან შედარებით, მაია უფრო უბრალოდ იყო ჩაცმული. მაიას მარამა ყელს, რომელიც ოდნავ მოჩანდა საყელოდან, ბრილიანტის გულქანდა ამშვენებდა, პატარა, ლამაზ ყურებს — ალმასის საყურეები. აბრეშუმის ქსოვილი, რომელზეც ბაჯაღლო ოქროს ქინძისთავეები იყო დაბნეული, მსუბუქად მოედო თმებზე. ტანთ ეცვა თეთრი ყურთმაჯიანი კაბა, რომლის ფარჩის გულისპირი და სარტყელი მარგალიტის მძივებით იყო მოქარგული. ფარჩის სახელოები მჭიდროდ ეხვეოდა ჩამოსხმულ ფიქალ მაჯებს. წერწეტა წელს კი ვიწრო სარტყელი ეკეროდა. ტანის რხევასთან ერთად სარტყლის ბოლოებიც იშლებოდა. ფარჩის შარიშური ფოთლების შრიალს მოგაგონებდათ. განიერი კაბის კუდი გრძლად იშლებოდა იატაკზე. თვალმარგალიტით მორთული ქოშები ოდნავ მოჩანდა კაბის წინა ნაწილიდან. აშადრევანებული ოთხი ნაწნავი თვალწარმტაცად სრიალებდა აბრეშუმის თეთრ კაბაზე.

მაიას საგვირგვინო ტანისამოსი საგანგებოდ შეაკერვინა და მოაქარგვინა კონსტანტინემ თავისი რძლის გამზრდელ ანა ცომიას ქალს, რომელიც მთელ სამეგრელოში განთქმული იყო თავისი ხელსაქმით. სამეგრელოს მონასტრის ტრაპეზები არა ერთხელ დამშვენებულა ანას ნაქარგ-ნაქსოვებით.

კონსტანტინემ იცოდა მაიას გემოვნება, ტანისამოსი მის ნება-სურვილს შეუფარდა. საქმროს მიერ მორთმეული ბაჯაღლო ოქროს ძეწკვი ქალს ყელზე ეკიდა. მაიას ისე მედიდურად ეჭირა თავი, რომ მნახველი ვერასოდეს ვერ იფიქრებდა, თუ ის ჭკადუაშისა და ქალაქ სოხუმის გარდა არსად იყო ნამყოფი. თბილისიდან ჩამოსული სტუმრები აღტაცებით უყურებდნენ მშვენიერ პატარძალს, ადარებდნენ უფროს რძალს ეკატერინეს

და აღარ იცოდნენ, თუ ვისი გარეულობისა და სილამაზისათვის მსიქათ უპირატესობა.

უფროსი რძლის ჩაცმულობა დიდად განსხვავდებოდა პატარძლის ჩაცმულობისაგან. ეკატერინეს გულ-ყელი ძალიან დიდზე ჰქონდა მოღელილი, ბეჭები მთლიანად უჩანდა, პატარა აფარჩული სახელოები იდაყვებსაც არ უფარავდა. მარმარილოს მსგავს ყელს შემოხვეოდა ბრილიანტებით მოიჭვილი ოქროს გულქანდა, რომელიც თეთრ ფიქალ გულ-მკერდს კიდევ უფრო ასხივოსნებდა, ბრილიანტის საყურე პოეტებისათვის საყვარელ ჩრდილს აფენდა. ხშირ წაბლისფერ თმებს დიადემის ბოლო ამაგრებდა. შავი ბრილიანტის დიადემა მის მაღალ შუბლს სამეფო იერს აძლევდა. ტუნიკიანი კაბა უხდებოდა ჯეირანივით მოხდენილ ტანს.

ნეფე-დედოფალი მათთვის განკუთვნილ ცალკე მაგიდასთან მიიწვიეს, რათა მილოცვები მიეღოთ.

პირველად მთავარმა დავითმა და გრიგოლმა მიულოცეს გაბუნნიერება. დავითმა თავისი სურვილები ამნაირად გამოხატა:

— მე და ჩემი ძმა გრიგოლი, ახლადშეუღლებულთ ვულოცავთ გაბუნნიერებას. — მიმართა დავითმა რძალს და ძმას. — მიბოძებია თქვენთვის სოფელი ჭაქვინჯი, თავისი ციხით, წისქვილებით, გაღმა-გამოღმა სოფლებით, სახნავეთა და სათესით, ტყითა და საძოვრებით. ჭაქვინჯი ახლოა მთავრის სამყოფელთან, როდესაც მოგესურვებთ, ახლად გამართულ ოჯახს ინახულებთ და დაამშვენებთ, არადა ჩვენი საერთო ოჯახები: ზუგდიდში, გორდში, სალხინოში ყოველთვის განუყოფელი იქნება ძმათა შორის, ბატონებო!

მთავრის მილოცვის შემდეგ, რიგრიგობით ულოცავდნენ სიძეს მუხრან-ბატონი, დედულეთი...

საწერეთლომ ძვირფასი სამკაულები მიართვა, გარდა ამისა, საჩხერედან ჯერ კიდევ დილით მოდენეს ირმებისა და შვლების ჯოგი.

მუხრან-ბატონმა და მისმა ცოლმა ნინომ მოიტანეს: ვერცხლის სურები, ჭინჭილები, ლარნაკები, თასები ოქროთი მოზარნიშებული, ორმოცდაოთხი კაცის მისაღებად გათვალისწინებული.

გურულები შაირობდნენ, ლოცავდნენ ნეფე-დედოფალს, უხ-

ვად აწყობდნენ მაგიდაზე ვერცხლის აზარფეშებსა და ოქროს ჯაჭვით გადაბმულ ყანწებს.

პატიოსანი თვლებით შემკული ხატები მოულოცეს ახალგაზრდებს დადემქელიანებმა.

დადემქელიანების შემდეგ გიორგი წარსდგა თავისი ქალიშვილისა და სიძის წინ. გარდა ნივთულობისა, მამამ უამრავი ცხენი, ხარი და ძროხა მიულოცა მათ.

გიორგის ძმამ, პეტრემ, სიძეს დიდებული თოფ-იარაღი მიართვა, ხოლო ორივეს — საუკეთესო ბიბლიოთეკა. დაბეჭდილი და უძველესი ხელნაწერი წიგნებით სავსე კარადაში ფაქიზად ეწყო: მოოქროვილყდიანი „ვეფხისტყაოსანი“, სულხან-საბა ორბელიანის „ლექსიკონი“, „ქილილა და დამანა“, მარიამ ბატონიშვილისეული „ქართლის ცხოვრება“, „სარკეთქმულთა“, თეიმურაზ მეორის ლექსები და პოემები, „ვისრამიანი“, ჩახრუხადის „თამარიანი“. „რიტორიკა“, „კატელორიების სახელმძღვანელოები“, „კაზმულსიტყვაობა“ და მრავალი სხვა საეკლესიო თუ საერო წიგნი.

ბესარიონი წინ მიუძღოდა მწყემსებს, რომელთაც სანოვანით სავსე დიდი ხონჩა ეჭირათ ხელში. ხონჩაზე სამფუთიანი გადაზედილი სულუგუნი იდო. სულუგუნის შუაზე — ყველის დიდი ბურთი, ამ ბურთიდან მაიას თმების შესადარად ყველის ოთხ-ოთხი ნაწნავი ჩამოჰყვებოდა ხონჩის ორივე მხარეს. ამავე ხონჩაზე, ერთმანეთის პირდაპირ, ორი უზარმაზარი თიხის ქილა იყო, ოქროსფერი თაფლით სავსე.

ხონჩის უკან მწყემსებსა და მათ თავკაცებს მოჰყავდათ ცოცხალი შვლები, რომელნიც, უჩვეულო გარემოში მყოფნი, შიშისაგან ერთმანეთს ეკვროდნენ. მწყემსებს ზოგს ირმის რქები, ზოგს კიდევ ვეფხვის, დათვის, მელიისა და სხვათა ტყავები ეჭირათ ხელში მოსალოცად. ბევრი მათგანი გულში კი ამბობდა: გლეხებს მჭადი ენატრებათ და ამ გაუმძღვრებს კი ჩიტის რძეც კი არ აკლიათ, ოხრად დაურჩეთ ყველაფერიო.

— ბატონებო! ჩვენმა მწყემსებმა, იმის გარდა, რასაც თქვენი მოწყალე თვალი ხედავს, ცხრაას ოთხმოცდა ცხრამეტი სული ცხვარი მოგართვათ, ორასი ფუტკრის სკა, თან მოგახსენეს: იცოცხლოს და იმრავლოს მთავრის შვილმა კონსტანტინემ და მისმა მეუღლემ — მაია ბატონიშვილმა, სანამ მისი თმა მორთ-

მეული ყველის ნაწნავებივით არ გათეთრდებაო, — თქვა ბესარიონმა.

აგიაშვილებმა, დადიანების სიძეებმა, საუკეთესო ნივთებთან ერთად, ფარშავანგის გუნდები მოასხეს მოსალოცად.

ხელოსნებმა საეარძლები და სხვადასხვა დგამი მოართვეს.

მეურნეებმა მტრედისა და ციცრის გუნდები, ათასი ინდური, ორი ათასი ქათამი, იხვები, ბატები; მექოთნეებმაც არ დატოვეს ისინი უსაჩუქროდ: ასკოკიანი ქვევრები, ყველა ზომის დოქი და კოკა მოეტანათ.

მდიდარი და გულუხვი იყო ვაჭრების საჩუქარი: დათა ჭედია, მაქსიმე ხოჭოლავა და კოსტა დარჯანია ვერცხლის ფართო ლარნაკებით წარსდგნენ ახლად დაგვირგვინებულთა წინაშე.

როდესაც მილოცვები დამთავრდა, ნეფე-დედოფალი დიდ სეფაში წაიყვანეს, გვერდით მთავარი და მისი მეუღლე მიჰყვებოდნენ, უკან კი — სამეგრელოს დიდებულები და ჩამოსული სტუმრები. ნეფე-დედოფლისათვის ცალკე იყო სუფრა გაწყობილი. სახელდახელოდ გაკეთებული იატაკი და კედლები ნოხებით იყო მოფენილი. ფართო სუფრის თავში დავითი იჯდა, მის მარცხნივ ეკატერინე, ხოლო მარჯვნივ მაია, რომელიც კონსტანტინეს უმშვენებდა მხარს. ეკატერინეს გვერდით გრიგოლ ორბელიანი დასვა დავითმა.

გრიგოლის გვერდით დასხდნენ დედაქალაქიდან ჩამოსულეები: ივანე ბაგრატიონ-მუხრან-ბატონი, ამილახვარი, ანდრონიკაშვილები, ჩოლოყაშვილები. დანარჩენებიც განლაგდნენ წოდებისა და ღირსების მიხედვით. შუაზე კი დარჩენილი მოზრდილი ფართობი სასიარულოდ და საცეკვაოდ იყო დატოვებული.

ქართული ცეკვის საუკეთესო შემსრულებლები — ციციშვილი და ჩოლოყაშვილი ერთმანეთს არ უთმობდნენ ეკატერინეს მეგობარს, იმ დროს ცნობილ ქართველ მოცეკვავე ჯორჯაძის ქალს, რომელიც მთელ საქართველოში განთქმული იყო შესანიშნავი ცეკვიით. გათავდა ქართული ცეკვა და თბილისიდან ჩამოსულების რიგებიდან სმენის დამატკობელი ქართული სიმღერები გაისმა, ამას მოჰყვა რუსული სიმღერა. შემდეგ საქართველოს სხვადასხვა კუთხის წარმომადგენლები ამღერდნენ.

ვერცხლის აზარფეშებს ვერცხლის დოქები და ყანწები ცვლიდა. ახალგაზრდა ჩოლოყაშვილმა ალექსანდრე ჭავჭავაძის მუხამბაზი იმღერა. ქორწილი ისე მწყობრად მიდიოდა, რომ ზემეტ ლაპარაკს ვერ გაიგონებდით, ორი ათასი კაცი უჯდა სუფრას.

* * *

ქორწილი დამთავრდა. დავითის სასახლეს თანდათან აკლდებოდნენ სტუმრები. ეზოში სიწყინარე მყარდებოდა. სახლიუხუცესი ჩიქოვანი ცდილობდა ჩვეულებრივი წესრიგი დაემყარებინა სასახლეში. ხუროები სეფას არღვევდნენ. ახლა ლხინი უფრო ვიწრო წრეში გაჩაღებულიყო. მთავრის სადგომის დიდ დარბაზში გაეშალათ სუფრა. აღმოსავლეთ საქართველოს შორეული კუთხეებიდან მოსულ სტუმრებს დავითი არ უშვებდა.

— დაღლილი ხართ, შორი გზა გიძევთ წინ. ვინ იცის, როდის შეეხვდებით შემდეგ ერთმანეთს. დარჩით აქ რამდენიმე დღე. ილხინეთ, მოისვენეთ.

— რა დაგვასვენებს, თქვენო უგანათლებულესობაე! — გაეხუმრა მას გულბაათ ჭავჭავაძე. — არ გეშინიათ, მთავარო, ბევრი ღვინო დაელიოთ?

ამაზე დავითს გაეცინა.

— მაშ, მე ასეთ წინადადებასაც მოგცემთ, თქვენ ღვინო სვით იმ სასმისებით, რომელსაც თვითონ აირჩევთ, იმ პირობით, რომ ყოველი გამოცლილი ჭურჭელი თქვენს საკუთრებად დარჩეს.

— თქვენ ნახეთ, ბატონებო, თუ დღეს მე მთავრის სასახლეში დიდი ქონების პატრონი არ გავხდე. — თქვა გულბაათმა დარიხიანად გაიცინა.

სწრაფად გაჩნდა დავითის წინ ვერცხლით მოჭედილი ყანწები, ვერცხლის აზარფეშები, ჩინური ფაიფურისა და ბროლის ჭიქები, ლარნაკები.

გულბაათ ჭავჭავაძემ ჩოხის სახელურები დაიკაპიწა, დაიწყო ქეიფი. გულბაათის მხლებელი, კახელი ახალგაზრდა აზნაური ჭავჭავაძის მიერ დაცლილ ჭურჭელს იქვე მეშის თახჩაში ალაგებდა. დავით დადიანი მალე დარწმუნდა, რომ სანაძ-

ლეო წაგებული ჰქონდა. მაგრამ ეს არ ადარდებდა, ოხუნჯობდა, იცინოდა. სახლთუხუცესი ჩიქოვანი კი წარბშეკრული იყო: „რაც უნდა ჭკვიანი გეგულეობდეს ლევან დადიანის მოდგმა, საღმე მაინც დაკრავს მისი სიმჩატე. ეს რა ოხერი სანაძლეო მოიგონა მთავარმა, ლამის მთელი საგანძური ჭავჭავაძემ სახლიდან გაზიდოსო“. — ფიქრობდა იგი.

როდესაც ჭავჭავაძის მხლებელმა მაგიდიდან უკანასკნელი ბროლის ჭიქა აიღო, დავითი ადგა და გულბათს მიმართა:

— მოხარული ვარ, ბატონო გულბათ, რომ მასახელეთ. ასეთი მსმელი სტუმარი ნუ მოუშალოს ღმერთმა ჩემს ოჯახს. შეგარგოთ, გაამოთ!

* * *

ქორწილის შემდეგ ზუგდიდში დიდხანს არ დარჩენილან მათა და კონსტანტინე. მათას ერქარებოდა ზუგდიდის სასახლიდან მალე წასვლა. ერთობ ოფიციალური და ძალდატანებული იყო მათასა და ეკატერინეს დამოკიდებულება, სხვადასხვა გარემოში გაზრდილი, სხვადასხვა ბუნების ქალები ერთმანეთს ვერ ეგუებოდნენ. მათ დამოკიდებულებაში იგრძნობოდა სიცივე და არაგულწრფელობა. მათა კმაყოფილი იყო მაზლებით, მეტადრე დავითით, რომელიც მას გულთბილად ეპყრობოდა. დინჯს და გარეგნობით ყოველმხრივ შემკულ მათას მამასავით მფარველობდა. მათას სულითა და გულით უნდოდა მალე დაბინავებულიყო დავითის ნაჩუქარ ჭაქვინჯში, საკუთარი სასახლე, საკუთარი წრე გაეჩინა, თავის გარშემო შემოეკრიბა ძმები, ბიძები, ბიძაშვილები და მეგობრები, მის სასახლეს გაეღენა მოეპოვებინა სამეგრელოში.

მეტისმეტად შეყვარებულ ქმრად გამოიყურებოდა კონსტანტინე. მათა ამ ძლიერ გატაცებასა და სიყვარულზე ამყარებდა იმედებს, სურდა რომ ქმარი თავის გაელენის ქვეშ ჰყოლოდა. ეს ზაფხული პატარძალს გორდში უნდა გაეტარებინა, რადგან გორდის ჰაერი განთქმული იყო მთელ სამეგრელოსა და ლეჩხუმში.

ეკატერინე თავისი სტუმრებით იქ იყო საზაფხულოდ.

მათამ უარი შეჰბედა ქმარს და მაზლს, მე ჭაქვინჯს წავალ

ამ ზაფხულს, ჩემს კერას მივიჩნევ, იქ მუშაობას დავიწყებ სასახლის ასაგებად. შემდეგ, როდესაც თქვენ იქ მოეწყობით, მეც გაახლებით.

გულში კი ფიქრობდა: მაშინაც ავიცდენ იქ წასვლასო.

— შემოდგომაზე ხომ სალხინოში მობრძანდები, შენი ოჯახის სანახავად? — შეეკითხა დავითი რძალს, გულში კი მოსწონდა რძლის განზრახვა საკუთარი სახლ-კარის მოსაწყობად.

მაიამ მაზლი და ქმარი დაიყოლია, ხოლო ჭაქვინჯში წასვლა მაინც არ მოეწყო ისე ჩქარა, როგორც მას უნდოდა. ახლა კონსტანტინე დაბრუნდა სიდერისა და სიმამრის სანახავად, შემდეგ გიორგიმ და ძმებმა ინახულეს ისინი. ყველა ამ ურთიერთ მონახულებას ბევრი დრო უნდებოდა.

როდესაც მამა და ძმები მის სანახავად მოვიდნენ, მაიამ ისინი არ გაუშვა, სთხოვა: ახლა წავიდეთ ჭაქვინჯში, თქვენ ამომარჩევინეთ სამოსახლო ადგილიო.

გიორგისაც ერჩია, რომ ქალიშვილი და სიძე ცოტა მოშორებით ყოლოდა ზუგდიდიდან, რომ თავისუფლად შეძლებოდა მათთან ყოფნა, მათი ნახვა. პეტრე ჭაქვინჯის ახლოს ესახლა, სამთავროდან მოშორებული სიძე უფრო მათი გავლენის ქვეშ მოექცეოდა. ამ მოსაზრების გამო გიორგი დიდი სიამოვნებით გაჰყვა ქალიშვილსა და სიძეს.

უ ა ნ ბ ა რ ო ნ ი

მაიას დანიშნა, გათხოვება, ორი დიდი ქორწილი, ჯერ ჭკადუაშში და შემდეგ ზუგდიდში, დიდ შთაბეჭდილებას ტოვებდა რვა წელიწადს თითქმის ჩაკეტილ და არცთუ მდიდრულად ნაცხოვრებ თუთანასა და ლერწამისაზე.

ქალიშვილები განცვიფრებით უყურებდნენ ბატონების სიმდიდრესა და დროს ტარებას. თუთანა, როგორც უფროსი და გამოცდილი, ლერწამისას პატრონობდა, არიდებდა მას ყმა ქალებზე მონადირე თავადისა და აზნაურების ხარბ თვალებს.

ლერწამისა თვითონაც გაურბოდა წუთიერ სიამოვნების სურვილით შეპყრობილ ვაჟებს. ბედნიერი დღეები დადგა ლერწამისასათვის, როდესაც მაიას საქორწინო სამზადისის დროს

ვარლამი და ჭუტულა გაბედავები გამოჩნდნენ გიორგის სასახლეში. სხვა მხლებელთა შორის, გელა ჯგერენაიაც მოჰყვებოდა მათ. აღმურმოდებული ლერწამისა თუთანასთან გაიქცა, მოეხვია და შეეკითხა:

— აბა თუ მიხედები, ვინ მოჰყვა ვარლამს და ჭუტულას?

— მაგას რა მიხვედრა უნდა? შენი გელა მოსულა. ჭკუით იყავი, არავინ არაფერი შეგამჩნიოს, ხომ იცი, მაიას არ უყვარს ასეთი სითამამე.

— კარგი ახლა, ნუ მომიშხამავ სიხარულს!..

მათ ლაპარაკი დამთავრებული არ ჰქონდათ, რომ უკანა კიბეზე ფეხის ხმა მოისმა და მერე ვილაყამ რიხიანად იკითხა:

— თუთანა, ლერწამისა, სადა ხარ? — ქალიშვილების ოთახის კარი, როგორც შინაურმა, მორიდებულად შემოაღო ჭუტულამ.

— შენი ჭირიმე, ჭუტულა! — შემოეხვივნენ ქალები.

— როგორ ხარ, ქალიშვილებო, არ მოგწყინდათ უჩვენოდ? ასე მალე დაგავიწყდათ ნოლა?

— როგორ დაგვავიწყდი, ხომ ამდენ სიმდიდრესა და დიდებას ვუტკებრით, ასეთ მშვენიერ ხალხში ვტრიალებთ, კარგს ვსვამთ, კარგს ვჭამთ, მაგრამ ერთი თქვენს ეზოში გავლა ყველაფერს გვირჩეენია, — უპასუხა თუთანამ.

— შენ, გოგო, ჭკუითა ხარ? აქაც ხომ არ გაგიჩნდნენ საქმროები? — შეეკითხა სიცილით ჭუტულა ლერწამისას.

ქალიშვილი გაწითლდა, თავი დახარა.

— უი, მაგის სიკვდილი, სულ სამწყემსავი მყავს! — გაიციინა თუთანამ.

საქორწილო სამზადისის დღეებში გელა სულ გიორგისას ტრიალებდა, გვერდში ედგა ვარლამსა და ჭუტულას, ამიტომ ლერწამისა და გელა ხშირად ხვდებოდნენ ერთმანეთს. რა ბედნიერად მიდიოდა მათთვის ეს დღეები.

თუთანა და ლერწამისა სწორედ იმ ბარგიანი ურმით მიდიოდნენ ზუგდიდში, რომელსაც გელა ახლდა. ისინი პატარძლის წამოყვანამდე წამოვიდნენ სხვა ურმებთან ერთად ჭკადუაშიდარ. ჭუტულა ცხენით მიჰყვებოდა ურემზე მეთვალყურედ. გელა თავდაჭერილი ვაჟი იყო. თავის ურემზე მჯდარ ქალიშვილებს იშვიათად ელაპარაკებოდა, ხოლო ცეცხლოვან თვალებს ხში-

რად შეანათებდა ლერწამისას. ლერწამისა სახეზე წამოენთებოდა, თაყს დახრიდა და ხარებს შოლტს გადაუქნევდა. ზუგდიდს რომ მიუახლოვდნენ, ქალები ურმიდან ჩამოვიდნენ და მხოლოდ მაშინ მოახერხა ლერწამისამ გამოლაპარაკებოდა გულის თანაზიარს.

— ზუგდიდიდან მალე წახვალ?

— ჭუტულასთან ერთად გავბრუნდები. მხოლოდ ერთი კვირით გამათავისუფლა ჯოღორიამ. შავ დღეს დააყრის მამას დროზე რომ არ მივიდე.

— შავი დღე გაუთენდეს ჯოღორიას, მე კი მეგონა ორისამი დღე მაინც დარჩებოდი.

— შენთან, ლერწამისა, სამი დღე კი არა, სამასი წელი რომ მამყოფა... — დაიწყო გელამ, — მაგრამ შერცხვა გულახდილობისა და სიტყვა სხვა საგანზე გადაიტანა. — მე თუ ჯოღორია არ ჩავაძალღე, ისე ჩემს ოჯახს ამ ქვეყანაზე არ დაედგომება.

— იმის ჩაძაღლებას შენც შეეწირები, გელა.

— ასეთ სიცოცხლეს სიკვდილი არ მირჩევნია? განა მართო მე მაქვს მისგან სიცოცხლე გაძაღლებული! მთელი სოფელი გმინავს მის უღელქვეშ.

— ბარემ სხვა მოძულემ მოჰკლას! რაღა მაინცდამაინც შენ უნდა გადაჰყვე ამ საქმეს?

— რატომ წუხხარ, შემოგეველე? იუ მომკლეს, შენი სიყვარული მიწაში თან ჩამყვება.

— შენ არ დაიღუპო, თორემ, მე შენს შემდეგ სიცოცხლე რად მინდა!

დაღონებული ქალ-ვაჟი ზუგდიდში შევიდა. მეტი აღარ ეცალათ სალაპარაკოდ, თავთავიანთ საქმეს შეუდგნენ.

ზუგდიდში კიდევ შეხვდნენ შეყვარებულნი ერთმანეთს სალაპარაკოდ. ვერაფერი საიმედო ვერ უთხრა გელამ ქალს, მხოლოდ დაპირდა: ამ ზაფხულზე როგორმე კიდევ გნახავო.

ხ ი ბ უ ლ ა

ჭაქვინჯში მოუთმენლად ელოდნენ კონსტანტინეს ახალშერთული ცოლითა და მოყვრებით. ჭაქვინჯელ გლეხებს — ქანთარიებს წინასწარ აცნობეს სასახლიდან: ბატონები მობრძანდებიანო.

ვლებები წელზე ფეხს იდგამდნენ, რომ კარგად დახვედროდნენ მთავრის შვილს. სოფელი ორმაგად იბეგრებოდა სურსათ-სანოვაგით.

როდესაც კონსტანტინე მრავალი მხლებლით სოფელში შედიოდა, ყმები მუხლებზე ეცემოდნენ და ისე სცემდნენ თაყვანს.

— ღმერთმა ნუ ქნას მთავრის შვილის აქ დასახლება, — ამბობდნენ ვლებები, — წელიწადში რამდენჯერ ჩამოუვლიდნენ სოფელს დადიანის მოურავები და მაშინაც გეაჩანაგებდნენ, თორემ კონსტანტინე თუ აქ დასახლდა, მარტო მაგისი მწივეარ-მეძებრები ეყოფა სოფელს წელში გასაწყვეტად. ჯერ დასახლების ხარჯი და შრომა ჩვენს კისერზე გადავა, შემდეგ მთელი სასახლის შენახვა...

ორ დღესა და ღამეს გასტანა ბატონების ქეიფმა, ვახშმებმა და სადილებმა.

მესამე დღეს მაია და გიორგი სამოსახლო ადგილის არჩევას შეუდგნენ. კონსტანტინე არ ჩაერია ამ საქმეში. მას გარჯა და შრომა ჭირივით ეჯავრებოდა. მამუ, შენ თვითონ შენი გემოვნებით აირჩიე სამოსახლო ადგილი, მე ეს უფრო გამიხარდებაო, — უთხრა მაიას კონსტანტინემ და დილაადრიანად სანადიროდ წავადა.

გიორგის თან ახლდა მიხეილ შერვაშიძისაგან გამოქცეულა, გიორგის ხელში დავაჟაკებული, დავეზ არშბა. გიორგი დავესა არაფერს უმილაედა, ერთგულ კაცად მიაჩნდა. პირველი უსიამოვნება გიორგის დავეხის გამო შესხდა. მიხეილისაგან გამოქცეული დავესი უკანვე მოითხოვა პატრონმა. გიორგიმ ჯერ ტკბილად სთხოვა: მყავდეს მე ეს ბიჭი, გამოვასწორობ, თუ რამე დააშავაო. სიძე გაჯიუტდა: მაინცდამაინც გამომიგზავნეო. ეს გიორგიმ იწყინა, ნუთუ მეტად არ ვიღირდი, რომ ამაზე ლაპარაკი შექმენი, არ დაგიბრუნებ და რაც გინდა, ის ქენიო — მისწერა გაგულისებულმა გიორგიმ.

მაია, გიორგი და დავეხი მდინარის პირას მიდიოდნენ და მიდამოს ათვალიერებდნენ. მალე უღრან ტყეში შევიდნენ. საცალფეხო ბილიკზე ძლივს მიდიოდნენ ცხენები. წინ მიმავალი შინაყმები ბარდსა და ეკალს კაფავდნენ. ლევა, ჩაგუ ქანთარებსა და ონისიმე ქარცხიას ეგონათ, რომ მდინარის პირას, ტყის იქით დიდი მინდორი მოეწონებოდა ბატონს სამოსახლოდ.

სწორედ ეს მინდორი აირჩია მაიამ. თვალუწვდენელ მინდორზე სულ რამდენიმე მუხა და ერთი დიდი ცაცხვი იდგა. მინდორი მალლობზე იყო გაშლილი და ერთი მხრივ ჭანისწყალს გადაჰყურებდა, ხოლო მეორე მხრივ მას პატარა ღელე ჩაუდიოდა, ღელის კალაპოტი თეთრი ქვებით იყო მოკირწყლული. მისი პატარა ტალღა აქა-იქ დიდ ქვებსაც აწყდებოდა, რაც საამურ ჩხრიალს იწვევდა. მინდორზე ოდნავი ნიავი ქროდა. დაეხმა მიიხედ-მოიხედა და აღტაცებით წამოიძახა:

— ჰაიტ, ნამდვილი „ახიბლ“ ეს ყოფილა! — შესძახა აფხაზურად.

გიორგი და მაია დაინტერესა ამ სიტყვამ.

— ეს, ბატონო, ნიშნავს ოქროს თვალს. — უპასუხა დაეხმა.

— მამა ბატონო, ეს მშვენიერი სახელი უნდა დაეარქვა ღელე-იდან ჩვენს სოფელს, — თქვა მაიამ და თან რამდენიმეჯერ გაიმეორა „ახი-ხიბლ“. მის გულს რაღაც მოეფონა ეს აფხაზური სიტყვა...

ამნაირად ჭაქვინჯის ამ ნაწილს ხიბულა დაერქვა.

კონსტანტინე ძლიერ კმაყოფილი იყო, რომ მაიას ასე მოეწონა მისი სოფელი. სამოსახლო ადგილისათვის მინიჭებული სახელით ხომ აღტაცებაში მოვიდა.

გიორგი რამდენიმე ღლე დარჩა ხიბულაში, შემდეგ კონსტანტინესთან ერთად ზუგდიდს გაემგზავრა.

მაია პირველ რიგში სახლის აშენების თადარიგს შეუდგა. ლეჩხუმიდან გამოგზავნილ ხუროთმოძღვარს დაწერილებით გააცნო თავისი მოსაზრება, თუ როგორი სახლი უნდოდა. ძველი, გამოცდილი ოსტატი გაოცებული იყო მაიას ფანტაზიით, მისი გემოვნებით და დაკვირვებით. იგი აღფრთოვანებული შეუდგა გეგმის შედგენას.

ამ დროს კი ლეჩხუმიდან მოწვეული ხუროები სახლის მასალას ამზადებდნენ. ხე-ტყე მოჰქონდათ სამეგრელოს სხვადასხვა კუთხიდან. ასობით ურემი ეზიდებოდა მასალას უსასყიდლოდ. მთელი სოფელი მუშაობდა სამოსახლო ადგილის გაწმენდაზე. ყმებს საჭმელსაც კი არ აჭმევდნენ. ლეჩხუმიელი ხუროებისათვისაც სოფელს უნდა მოეტანა საჭმელი.

კონსტანტინე ხომ არ ხედავდა რა ძვირად უჯდებოდა ხალხს მისი სასახლის მშენებლობა, მაგრამ მაიაც თვალს ხუჭავდა.

იგი შეპყრობილი იყო მხოლოდ ერთი სურვილით: როგორმე არ ჩამორჩენოდა ეკატერინე დედოფალს და ამ სურვილის განხორციელებისათვის არაფერს დაერიდებოდა, მზად იყო არა მარტო ყმები, თავისი ნათესავეებიც კი გაეწირა. მაია ისეთ სახლს აშენებდა, რომელიც მთავრის სასახლეს არ ჩამოუვარდებოდა.

უზარმაზარი სახლი, როგორც სამეგრელოში ამბობენ „დოხოზე“ კი არა, ჯარგვალი არ აშენებულა ისე სწრაფად, მაიას სახლი რომ აშენდა. მის სანახავად საიდან არ მოდიოდნენ! „დოხოზე“ ყველაში აღტაცებას იწვევდა, როგორც მშვენიერად შერჩეული ადგილით, ისე თავისი არქიტექტურით. მაიას სიხარულს საზღვარი არ ჰქონდა, იმას კი არ დარდობდა, თუ რამდენ გლეხს იმ წელიწადს ყანა დაუთესავი ან აუღებელი დარჩა, რამდენს ხარ-კამეჩი მოუკვდა ურემში, რამდენი დაშავდა ხეტყის დამზადების დროს და რამდენმა კიდეე თქვენი ჭირი წაილო აუტანელ შრომაში.

არა, ყველაფერი ეს შორს იყო მაიასაგან. ახლა იგი იმის ცდაში იყო, რომ რაც შეიძლება ძვირფასი ავეჯით მოერთო სახლი. საიდან არ იწერდა, ვინ არ უგზავნიდა ნივთებსა და ავეჯს, დიდი გემოვნებით რთავდა სახლს.

მაია კარგად ხედავდა, რომ კონსტანტინეს გული შინ არ მოუწევდა. მისი ფიქრი და აზრი მხოლოდ იმაზე ტრიალებდა, თუ როგორ გაეტარებინა დრო; სად ენადირა, ვის წვეოდა. სრულიად არ ერეოდა საოჯახო საქმეებში, არ ფიქრობდა შეძენაზე, დასახლებაზე, სიმდიდრეზე. მაიას ზვიადმა ბუნებამ ვერ დაიმორჩილა კეთილი და სუსტი ნებისყოფის კონსტანტინე.

მაია მალე დედა გახდა. სამეგრელოში არსებული წესის მიხედვით მას პირველი ბავშვისთვის ძუძუ არ უწოვებია. ბავშვი ძიძას მისცეს გასაზრდელად.

მაია სულიერ სიმართლეს განიცდიდა. მისდა საბედნიეროდ, ის შეეხება გამდიდრების, სახელის, დიდებისა და ეკატერინე დედოფალთან მეტოქეობისათვის ბრძოლაში პოვებდა. კონსტანტინეზე გული გატეხილი ჰქონდა, ამ საქმეში ის მხარში ვერ ამოუდგებოდა. მაია ახლა იმასაც ხედავდა, რომ ქმარი ყოველ ფეხის ნაბიჯზე ღალატობდა. სპეტაკ და სუფთა გულის

ალამიანს არ შეეძლო არ გასცივებოდა თავისი ჯრძნობები კონსტანტინესადმი. თუმცა გარეგნულად ამას არაფრით ამჟღავნებდა, თავი ისე ეჭირა, ვითომ არაფერი იცოდა მეუღლის სამიჯნურო ამბებზე. დაკვირვებული და გულისხმიერი მეუღლე ერთი შეხედვით შეატყობდა, რომ მათა ის აღარ იყო, რაც გათხოვების პირველ ხანებში, მაგრამ კონსტანტინეს თავისი გული მრავალ ლამაზ ქალზე ჰქონდა განაწილებული და ამიტომ ვერ ხედავდა მეუღლეში მომხდარ ცვლილებას. ის ძველებურად ალერსიანად ექცეოდა მათას, დიდი პატივისცემით და ერთობ დიდად აფასებდა მის ჭკუასა და საქმეს. არ თაკილობდა, რომ ხიბულას პატრონი და მბრძანებელი მათა იყო, მამულის მართვა-გამგეობა მათას ებარა და არა მას. ამით მათა კმაყოფილი იყო და უკმაყოფილოც. მას აღიზიანებდა და აბოროტებდა ის, რომ მისი ნიჭი და უნარი ასე წვრილმან და უმნიშვნელო საქმეებს ეწირებოდა.

მათასთან ხშირად იკრიბებოდნენ ცნობილი თავადები და მემამულეები — ჩინუები, ღებუაძეები, ფაღავეები, მხეიძეები, რომლებიც ამავე დროს მთავრის სასახლის ხშირი სტუმრებიც იყვნენ და სამთავროს საქმეებში მონაწილეობდნენ.

მათასთან მთავრის მოწინააღმდეგენიც დადიოდნენ, მათა რატომღაც მათ უფრო მეტი პატივისცემით და ყურადღებით ექცეოდა. თუმცა მას დავითი არ სძულდა, არც ემტერებოდა. ამას ეკატერინესადმი შურით აკეთებდა. ოღონდ ეკატერინესთვის ენო, მისთვის რაიმე ჩრდილი მიეყენებინა და მათა ყველაფრისთვის მზად იყო.

ამას კარგად ხედავდა გიორგი და ხშირად არიგებდა შვილს გულიდან ამოელო ეს მისთვის შეუფერებელი და საძრახისი წადილი. რამდენი არ ეცადა მათა დაჰყოლოდა მამის ნებას, მაგრამ ამაოდ. მართლაც რას ერჩოდა ეკატერინეს, მას ხომ არაფერი დაუშავებია მისთვის, გარდა იმისა, რომ დედოფალი, ულამაზესი და განათლებული ქალი იყო. ხშირად შერცხვებოდა მათას თავისი საქციელის, როცა დაუფიქრდებოდა, მაგრამ გულიდან მაინც ვერ ამოიღო თავისი უმგვანო ზრახვები.

მთავრის მტრებმა კარგად იცოდნენ მათას გულის საიდუმლოება, მაგრამ დავითის საწინააღმდეგოდ არასოდეს არ ლაპარაკობდნენ მასთან. იმიტომ კი არა, რომ კონსტანტინესი ეში-

ნოდათ. არა, კონსტანტინე ხომ ნახევარჯერ არ იყო შინ. არ ენდობოდნენ მაიას. მაინც ქალია, რაც არ უნდა იყოსო, ფიქრობდნენ ისინი.

დავითთან მტრობა სახუმარო საქმე არ იყო. ასეთი მკაცრი მთავარი არც ახსოვდათ სამეგრელოში. დავითი დაუნდობელი და შეუბრალებელი იყო ყველა ურჩისა და მოღალატის მიმართ. ის, ალბათ, საკუთარ შეილსაც არ დაინდობსო, თუ დასჭირდებო, ფიქრობდნენ მისი მტრები და ვერც ფარულად, ვერც აშკარად ვერ ბედავდნენ მის წინააღმდეგ ბრძოლას. მათ კარგად ახსოვდათ, თუ რა დღე დააყენა მთავარმა თავისი კანცელარიის ერთ-ერთ მოხელეს, ანდრო გეგეჭკორს ურჩობისათვის.

ახალგაზრდა ანდრო გეგეჭკორი ფრიად ნაკითხი და განათლებული კაცი იყო. ამავე დროს გულკეთილი და ჰოეზიით გატაცებული, ხალხის გულშემატკივარი და მოსარჩლე. სიმართლისათვის ის არავის და არაფრის წინ არ დაიხვედა და ერთხელ ისე გაკადნიერდა, რომ მთავარსაც კი შეედავა.

ლაშხიები ლევანის მთავრად ყოფნის დროს სამთავრო დალას იშვიათად იხდიდნენ. ლევანის უყურადღებობისა და დაუდევრობის გამო სულ მიატოვეს ღალის გადახდა.

დავითმა ეს ამბავი რომ გაიგო, არ მოეწონა; მართალია, მან მშვენივრად იცოდა, თუ რა ღარიბები იყვნენ ლაშხიები, მაგრამ იფიქრა: დღეს ლაშხიებმა მიატოვეს ღალის გადახდა, ხვალ მათი მიბაძვით ფილიპიები, ბუკიები, კვიკვინიებიც უარს იტყვიანო და ერთ მშვენიერ დღეს მთელ სამთავროში არც ერთი გლეხი არ დარჩება ღალის გადამხდელიო.

სასწრაფოდ იხმო ანდრო გეგეჭკორი და უბრძანა შეედგინა ბრძანების წიგნი ლაშხიებისათვის ძველი და ასალი ღალის გადახდევინების შესახებ.

— ბატონო დავით, ნუ ინებებთ ასეთ ცოდვას, — უპასუხა გეგეჭკორმა მთავარს, — შიმშილით კუჭი უხმებათ იმ საცოდავებს, ტანზე არ აცვიათ და ფეხზე, არაფერი არ გააჩნიათ, როგორ შეძლიან ღალის გადახდა.

— ჭკუას მარიგებ, ყმაწვილო? — აენტო მთავარი.

— ისინიც ადამიანები არიან, დიდო ბატონო, — ანდრო გა-

ჩემდა. დაინახა, რომ მთავარს ადამიანის ფერი აღარ ედო. მიხვდა, რა დღე დაადგებოდა.

მართლაც, დავითმა ანდრო გეგეჭკორი ისე მაგრა გაალახვინა, არავის ეგონა თუ გადარჩებოდა. მართალია, ანდრო გეგეჭკორი არ მომკვდარა, მაგრამ ჭკუიდან შეიშალა.

დავითი თვითონვე შეაწუხა თავისმა საქციელმა, მაგრამ დარწმუნებული იყო რომ სწორედ მოიქცა. თუ ქვეყნის მმართველს კანცელარიის უბრალო მოხელემ ურჩობა და ჭკუის სწავლება დაუწყო, იქ მალე აირევა მონასტერიო, ფიქრობდა იგი და ამით უნდოდა გაემართლებინა თავისი მკაცრი სასჯელი, დაემშვიდებინა თავი. გარეგნულად არ ამჟღავნებდა თავის სინანულს, გული კი შესტკიოდა ახალგაზრდა და ნიჭიერი კაცი რომ ასე გაიშეტა.

დავითს არავინ არ მოუწონა ანდრო გეგეჭკორის დასჯა. არც ახლობლებმა და არც შორეულებმა. ყველაზე მეტად მისი ძმა გრიგოლ დადიანი იყო აღელვებული.

— ვერ მოგიწონებ, ჩემო ძმაო, ანდროს გაუბედურებას, — უთხრა გრიგოლმა დავითს, ანდროს დასჯის მეორე დღეს, როგორც კი დაიმართოხელა. — შენ მეტყვი, რომ ამის გაკეთება სამთავროს მართვის განმტკიცებისათვის იყო საჭირო. მაგრამ ჩვენ უნდა ვეცადოთ, ისედაც წელში გაწყვეტილი და დაბეჩავებული ხალხი უფრო მეტად არ დავტანჯოთ, როგორმე მცირედ მაინც შეეუსუმბუქოთ ტანჯვა-წამება. შოლტითა და ხაჯალურებით კი არ ემართოთ ქვეყანა — სიმართლითა და დიდი გულით. შენს დიდ ღვაწლს ასე პატარა დროის მანძილზე დიდად აფასებს ხალხი. ქვეყნის ადმინისტრაციულ ოლქებად დაყოფა და ამ ოლქებში დიაბეგების დანიშვნამ დიდად შეუწყო ხელი ქვეყნის წელში გამართვას. შენს მიერ მიღებულმა ღონისძიებებმა მებაბრეშუმეობისა და ვაჭრობის განვითარების საქმეში არ შეიძლება კარგი შედეგი არ გამოიღოს. ეს ყველაფერი კარგია, ჩემო დავით, მაშინ თუ შოლტის ტყლაშუნის ხმას და ხაჯალურების საკეტის ჟღარუნს არ გაიგონებს ქვეყანა.

დავითი ბოლთას სცემდა ბუხრის წინ. ის დაფიქრებული და შუბლშეკრული იყო. ყურადღებით უსმენდა ძმას. აფასებდა მის ჭკუას, ანგარიშს უწევდა მის აზრს და კონსტანტინეზე უფრო უყვარდა იგი.

— მართალი ხარ, გრიგოლ, — შედგა დავითი გრიგოლის წინ. — მაგრამ ხაჯალურების და შოლტის ერთბაშად გადაგდება არ იქნება. ჯერ კიდევ ჩვენ შორსა ვართ იმ დღიდან, როცა ქვეყანას დიდი გულითა და სიმართლით გაუძღვებიან. შენში ახლა მხოლოდ პოეტი მეტყველებს და არა ქვეყნის მმართველი. სხვა სხვის ომში ბრძენი, ძმაო, ერთი ჩემს გულშიც ჩაგახედა! რომელი ქრისტიანის სმენას დაატკობს, გრიგოლ, შოლტის ზუზუნი და ხაჯალურის ხრჭიალი, მაგრამ, რა ვქნა, უამისოდ ვერავინ ვერ გაუძღვება დღესდღეობით ქვეყანას.

— მტერსა და ხალხის გულშემატკივარს ერთნაირად არ უნდა მოექცე, დავით. ანდრო გეგეჭკორი ხალხს გამოესარჩლა, ჯოლორია დგებუაძე კი დაუძინებელი მტერია სამთავროსი. შენ ორივეს ერთნაირი სიმკაცრით მოექცე, ანდრო გაალახვი-ნე, ჯოლორია გააკრეჭე.

— გრიგოლ, გრიგოლ, — მხარზე ხელი დაადო ძმას დავითმა. — აკი გითხარი შენში პოეტი მეტყველებს-მეთქი. ანდრო გეგეჭკორისთანა კაცი უფრო საშიშია სამთავროსათვის, ვინემ ჯოლორია დგებუაძე. ანდრო ხალხის სახელით იბრძვის, ჯოლორია მხოლოდ თავისი ინტერესებისათვის. არც ერთის და არც ათი კაცის ინტერესი ვერაფერს დააკლებს სამთავროს, მაგრამ თუ ხალხი აღგვიდგა, მერე მშვიდობით! აი რატომ გავიმეტე საბრალო ანდრო, — დავითი ძმის პირდაპირ სავარძელში წაჯდა. გაფითრებული და აღელვებული იყო. პაპიროსს-პაპიროსზე წევდა. — თუ გლახმა ღალა არ გადაიხადა, თუ ბევარაზე არ გამოვიდა... — როგორ ფიქრობ, ევროპა, რუსეთი თავისით გაშენდა? — განაგრძობდა დავითი. — ჩემზე კარგად მოგეხსენება, რამდენი მსხვერპლი დასჭირდა პეტერბურგის აშენებას. პეტრე დიდი არაფერს ერიდებოდა საქვეყნო საქმისათვის. მან არამცთუ კანცელარიის მოხელე, საკუთარი შვილიც არ დაინდო. უმსხვერპლოდ არ კეთდება ხალხის საქმე, გრიგოლ.

— ისინიც ასე ამბობდნენ, ჩემო დავით, ვისაც ფრანგი ხალხი აუჯანყდა. ხომ იცი, რატომ იფეთქა საფრანგეთის რევოლუციებმა? ოდესმე რუსი ხალხიც ასწევს თავს და ვინ იცის, ამ ხაჯალურებზე დააბრძანოს მეფე და მთავრები.

— მართალი ხარ, გრიგოლ. ეს ასე იქნება ადრე თუ გვიან; მაგრამ სანამ ეს არ მომხდარა, ჩვენ ჩვენი უნდა გავაკეთოთ.

შე დარწმუნებული ვარ, რომ სამთავროები მალე გაუქმდება, მაგრამ მანამდე ჩვენ გულხელდაკრეფილი არ უნდა ვისხდეთ.

— შეიძლება ვცდები, ჩემო დავით, — უკან დაიხია გრიგოლ-მა. — მაგრამ მე მხოლოდ შენი და ხალხის სიყვარული მალაპარაკებს.

ამ საუბრის შემდეგ ძმები ტკბილად დაშორდნენ ერთმანეთს. გრიგოლი ბიბლიოთეკაში შევიდა ფოსტის გადასასინჯად. დავითმა კი თავის სამუშაო ოთახს მიაშურა და „ვაჭრობის მინისტრი“ დათა ჭეღია იხმო.

ეტყობოდა დათა დიდი ხანია უცდიდა მთავარს. ახოვანი და მალალი იგი სწრაფი ნაბიჯით შემოვიდა, მდაბლად თავი დაუკრა დავითს. მთავარმა სავარძელზე მიუთითა.

— გაუნაწილე სოფლებს საქონელი? — ჰკითხა ჭედიას მთავარმა.

— დიახ, დიდო ბატონო.

— რა პირობით?

— ზოგს ნისიად მივეცი, ზოგმა...

— ნისიად! — გაიმეორა დავითმა და შუბლი შეიკრა. — ასე არ ივარგებს, დათა. აჯობებს წვრილ ვაჭრებს სესხი მივეცეთ. ისე, რომ ას მანეთზე ოცი მანეთი გადაიხადონ.

— ოცი მანეთი ბევრია, მწყალობელო, — გაოცდა ჭეღია. — დიდი, დიდი თუშანი გადავახდევინოთ. ისიც გაუჭირდებათ. მათაც ხომ უნდა დარჩეთ რაღაც მოგება. ნუ დაგავიწყდება, დიდო ბატონო, სავაჭრო ღუქნებს თავისი გადასახადი აქვს კიდევ. თუ სესხის პროცენტს დიდს გადავახდევინებთ, ამ გზით ვაჭრობა ფეხს ვერ მოიდგამს.

— კარგი, მაგ საქმეს შენ უფრო კარგად იცნობ, მაგრამ რა ვქნა, ხაზინას უჭირს. სავაჭრო საქონლის შემოსატანად გაცემულმა თანხებმა თუ მოგება არ მოგეცა, აბა რაღა ვაჭრობა იქნება ეს?

დათა ვერ ბედავდა, თორემ ენაზე ედგა საპასუხო სიტყვა: შე დალოცვილო, რას ეძახი სამთავრო ხაზინას, ის ხომ შენი პირადი ხაზინაა. ვაჭრებს თუ სიმწრით შენამენ ფულს ხელიდან გამოაცლი და შენი სასახლის პირადი ფუფუნებისათვის, მამულებისა და ოქრო-ბრილიანტის შესაძენად დახარჯავ, ქვე-

ყანას რითი გაამდიდრებო, მაგრამ ამის თქმას აბა როგორ გაბედავდა.

— ხაზინის გაჭირვება ქვეყნის გაჭირვებაა, დიდო ბატონო, რაიმე სხვა წყარო უნდა გამოვნახოთ შემოსავლისა. ამას წინათ მიბრძანეთ ცაიშის აბანოს შეკეთებაზე. ის აბანო დიდი შემოსავლიანი იქნება. გარდა აბანოს შემოსავლისა, იქ ყოველგვარი საქონლის ვაჭრობის გაჩარხვაც შესაძლებელია. უფრო უნდა გავშალოთ ხე-ტყის დამზადებაც.

— მე ამ საკითხზე რუსული კანცელარიის უფროსს პოტოცკის მოველაპარაკები. არ მინახავს ხელშეკრულება, რა პირობებით ამუშავენ ამხანაგობები ხე-ტყეს. სად გააქეთ, ან რა გადასახადს იხდიან. შენ ეს მითხარი, ახალი ვაჭრებიდან ვინ აწარმოებს საქმეს კარგად. ვინ მიგაჩნია სანდო კაცად?

— ვატა პაჭკორია, სოფელ ეკიდან. მას შესანიშნავი მალაზია აქვს სენაკში. ბეჟან ქავთარაძემ ჩვენ მიერ მიცემული ფული სულ მალე ათასებად აქცია; კიდევ წულეისკირი, დარჯანია და სხვები. დარჯანიამ ისე მოიმაგრა ფესი ვაჭრობაში, რომ ახლა სხვებს აძლევს საქონელს. მანვე სოფელ ქვალონში მაქსიმე ხოჭოლაკას გაახსენებინა სავაჭრო. ორივენი დიდ მოგებას ღებულობენ, რადგან ქვალონის ახლომახლო ბევრი სოფელია: ხორში, ზენი და სხვა მრავალი. ვაჭრობის საქმეები რომ კარგად მიდის, ამას ჩვენი ბაზრობები გვიჩვენებენ. აუარებელი ხალხი აწყდება, როგორც მოგეხსენებათ, ზუგდიდს, ყულევს, ფოთს, ანაკლიას, ხობს...

— ვაჭრობის ასე განვითარებას, ჩემო დათა, ხელი შეუწყობ გზების შეკეთებამ, ხიდების გაღებამ.

— აუცილებლად, დიდო ბატონო!

— მახსოვს, რამდენს მაძაგებდნენ, ხალხი შრომით დახოცაო. შრომა ადამიანს არ კლავს, პირიქით, აჯანმრთელებს, ქვეყანას კი ზრდის და აყვავებს.

დავითს ასეთივე საუბარი ჰქონდა მეორე დღით რუსული კანცელარიის მმართველ პოტოცკისთან, რომელსაც მთავარი პოლიტიკურ საკითხებში არცთუ ისე ეთანხმებოდა, მაგრამ ისე კი დიდად ენდობოდა. მეტად სინდისიან და ნასწავლ კაცად მიაჩნდა; როდესაც პოტოცკისთან საუბარს დაამთავრებდა, ყო-

ველთვის მაღლობის გრძნობით მოიგონებდა თავის სიმამრს, ალექსანდრე ჭავჭავაძეს, რა საიმედო კაცი მომიყვანაო.

პოტოცკი, მართლაც, საიმედო იყო დავითისათვის იმ მხრივ, რომ განათლებული და პატიოსანი კაცის ხელში რუსული კანცელარია დიდად სასარგებლო საქმეებს აკეთებდა სამთავროსათვის.

მართალია, დავითს თავი სამეგრელოს მთავრად ეგულე-ბოდა, მაგრამ რუსი ხელმწიფე, მთავარმართებელი და თვით გუბერნატორიც მას მხოლოდ მმართველად, სამეგრელოს მფლობელად თვლიდნენ. დავითს უფლება არა ჰქონდა დამოუკიდებლად გადაეწყვიტა სამეგრელოს მნიშვნელოვანი საკითხები. ასეთ ვითარებაში პოტოცკი, რა თქმა უნდა, მისი მარჯვენა ხელი იყო.

პოტოცკის სხვა დიდი ღირსებაც გააჩნდა. ის ყოფილი დეკაბრისტი იყო, ალექსანდრე ჭავჭავაძის დიდი მეგობარი. ეკატერინეს სალონში ერთ-ერთ საუკეთესო მოსაუბრედ იყო მიჩნეული, რუსულ და უცხოეთის ჟურნალ-გაზეთებს უკითხავდა ჭავჭავაძის წიგნისმოყვარე ქალებს, მსჯელობდნენ წაკითხულის გარშემო. თუ გრიგოლი და კონსტანტინე სასახლეში იყვნენ, ისინიც მზურვალე მონაწილეობას იღებდნენ საუბარში.

დავითი იშვიათად ესწრებოდა ასეთ საღამოებს: ერთ საღამოს თუ ვაჭრობის გაძლიერებაზე ბჭობდა, მეორე საღამოს მამულების შესახებ იძლეოდა მითითებებს, თუ როგორ წარემართა საღავო მამულების საქმე.

მთავარი კერძო საუბარში თავის მრჩეველებთან და ახლო პირებთან ყოველთვის აცხადებდა:

— ჩვენ ბანკები არა გვაქვს. თუ საშუალება არ გვექნება მივაწოდოთ ფული ისეთ წამოწყებებს, როგორიც არის ტილოს, აბრეშუმისა და შალის ქსოვილების დამზადება, ისე მათი წარმოება ვერ განვითარდება. ოდესმე ხომ უნდა მოელოს ბოლო ჩვენი ქალების ტანჯვას, რომელნიც ყველაფერ ამას ხელით აცოდვილებენ. ახლა ჩვენ მივალწიეთ ისეთ დიდ საქმეს, რომ ჩვენს ქვეყანაში ფეხს იკიდებს საქსოვი მანქანები, გვაქვს აბრეშუმსაქსოვი ფაბრიკა. არათუ ჩვენ, კერძო კაცს, გეთიას თავისი ხარჯით მოუტანია მანქანები; ამ დღეებში განცხადებით შემოვიდა, მთხოვს, მივცე დახმარება, რათა წარმოება

გააფართოოს, აგრეთვე თხოულობს მიეცეთ ამ საქმის მცოდნე ადამიანი, რომ მანქანებზე მუშაობა ასწავლოს ახალგაზრდა ქალებს, რომელნიც დაქირავებულნი იქნებიან ქსოვის ათვისების შემდეგ. მან თვითონ იცის ეს საქმი, პრაქტიკულად შეუსწავლია, მაგრამ ემინია საკუთარი ძალით გაუძღვეს მას. ამ კაცს უნდა დავეხმაროთ, ვინ ჩამოთელის რამდენი ჰყავს ხაზინას დასახმარებელი. როდესაც მეაბრეშუმეობა ასე კარგად ვრცელდება ჩვენში, აუცილებელია თუთის ხეების პლანტაციების გაშენება. ყოველ გლეხს უნდა დაევალოს ამ ხეების დარგვა, აგრეთვე ჩემს მამულშიც უნდა გაშენდეს იგი.

— აუცილებელია, ბატონო, — უპასუხებდნენ მრჩეველები. — ის გეთია, მართლაც, დახმარების ღირსია, ყოჩალი და თავისი საქმის მცოდნე კაცია.

მეაბრეშუმეობის საქმის მოსაგვარებლად დავითმა მართლა მოიწვია სპეციალისტი.

სამთაერო თანდათან მდიდრდებოდა, გლეხების მდგომარეობა კი სულ უფრო და უფრო უარესდებოდა, გლეხს თანდათან მეტი ტვირთი აწევებოდა, იზრდებოდა გადასახადები იმისდა მიხედვით, თუ რამდენად მატულობდა მთავრისა და სსვა ფეოდალის მოთხოვნილებანი სხვადასხვა სავაჭრო საქონლის შემოსვლასთან დაკავშირებით. გაღატაკებული გლეხი ვეღარ აკმაყოფილებდა მებატონეთა გაზრდილ მოთხოვნილებებს და ამიტომ მაღაგახსნილი ფეოდალები გლეხებს შეუძრალებლად ეპყრობოდნენ.

გლეხები ჯერ თითო-თითოდ გარბოდნენ მებატონეებისაგან; ხოლო შემდეგ უკვე მთელი გვარი აიყრებოდა ხოლმე დედიანბუდიანად. გახშირდა მებატონეების მკვლელობა. არა მარტო მებატონეები ეპყრობოდნენ გლეხებს ცუდად, ხშირად თვით მთავარი ყველაზე მეტად ცოდავდა მათ წინაშე.

მღელვარება ძლიერდებოდა და ეს დიდად აფიქრებდა დავით დადიანს. არეულობა ხელს უშლიდა მის მიერ დაწყებული სამუშაოების შესრულებას.

ერთდროულად კეთდებოდა და ლამაზდებოდა ზუგდიდის ბაღი და ზუგდიდის სასახლე. კიდევ უფრო უკეთესი გეგმონებით შენდებოდა მთავრის საზაფხულო სამყოფელი გორდი,

რომლის ხეივნების სილამაზე და მრავალფეროვნება რუსეთი-დან და უცხოეთიდან ჩამოსულ სტუმრებსაც აკვირვებდა.

— ქვეყანა თუ გლეხებიდან დაიცილება, რით განვითარდეს, ბატონო ჩემო, მეურნეობა და ახლად დაწყებული ვაჭრობა-მრეწველობა? — მიმართაჲდა დავითი იმ თავადებს და აზნაურებს, რომელთაც გლეხები გაურბოდნენ.

— აბა როგორ მოვიქცეთ, ბატონო! თავზე ვერ დავისვამთ ყმებს. მსახურად ვერ დაუდგებით. თუ შენ არ მიიღებ ზომებს, ჩვენ მარტო რა გავვივა.

— ნუ ჩააყენებთ გლეხს ისეთ დღეში, რომ თავი მოსძულდეს და გაგექცეთ, — არიგებდა სხეებს მთავარი, რომელიც პირველი თვითონ აძრობდა ტყავს და პირიდან ლუკმას აცლიდა.

გლეხს ახლა ახალი მფარველი ეგულებოდა. ის რუსთა ხელმწიფის მოხელეებისაგან მოელოდა სამართალს, გვერდს უვლიდა მთავარს და პირდაპირ გუბერნიის მმართველს ან ადგილობრივ პოლიციას მიმართავდა თავის დასაცავად.

დავით დადიანს კლასობრივი ბრძოლის ყველა ფორმაზე მეტად ასეთი ბრძოლის ფორმა აშინებდა. თავმოყვარეობა ელახებოდა, გლეხების ეს მოქმედება მთავრის უძლურების დამამტკიცებლად მიაჩნდა. ამიტომ ის გლეხს უფრო მკაცრად ექცეოდა. მეტს სთხოვდა, არ ინდობდა.

მთავარს ბევრი განზრახვა ჰქონდა. მართალია, ესენი საქვეყნო საქმეები იყო, მაგრამ ყოველ საქმეში დავითი თვითონ იგებდა უმეტესს. გადაწყვეტილი ჰქონდა ზუგდიდიდან შავ ზღვამდე წყალსაწრეტი არხი გაეყვანა და ამ უზარმაზარ მიწებზე ჭაობები დაეშრო. იქვე ნავსადგურის აშენებასაც აპირებდა. მუშაობა უკვე დაწყებული იყო, რომ დავითი მძიმედ აუად გახდა.

ეკატერინე ჭავჭავაძის ქალს, დაინტერესებულს დავითის გეგმებით, მრავალი მოვალეობა დააწვა თავზე. ახლა თითქმის ის მართავდა სამთავროს. თვითონ ხელმძღვანელობდა საგარეო და საშინაო საქმეებს.

ეკატერინე ქმრის კარგად ყოფნის დროსაც ახლო იდგა სამეგრელოს მმართველობის საქმეებთან.

მას სურდა საქართველოს ერთ-ერთი კუთხე ისე მოეწყო,

როგორც მამამისს ჰქონდა მოწყობილი: თბილისში – სასახლე, ხოლო კახეთში – სოფლები.

დედაქალაქსა და წინანდალში აღზრდილი ქალი სიამით იკონებდა თბილისის სასახლის მორთულობას. ბალებითა და ვაზის ზერებით განთქმული წინანდლის მოგონება ყოველთვის სურვილს უღვივებდა, რომელიმე თავისი მამული მის მსგავსად მოეწყო, როგორც გარეგნული სიმდიდრით და სილამაზით, ისე შემოსავლიანობითაც.

ეკატერინე, იმ დროისათვის განათლებული ქალი, ბავშვობიდან საქართველოს მოწინავე საზოგადოებაში აღზრდილი, ვერ კმაყოფილდებოდა იმ წრით, იმ ადამიანებით, რომელნიც სამეგრელოში გარს ეხვივნენ მას; ხშირად აგონდებოდა თავისი ნებიერი ქალიშვილობა, ახალგაზრდობის მეგობარი ნიკოლოზ ბარათაშვილი, გრიგოლ ორბელიანი და სხვა ნაცნობ-მეგობრები, რომელნიც გუნდრუკს უკმევდნენ მის სილამაზეს.

ეკატერინეს გარეგნობა, ტკბილი სიმღერა, კლავიშებზე თლილი თითების სრიალი, ცეკვა, გონიერული საუბარი არა ერთი და ორი ქართველი პოეტისათვის გამხდარა შთაგონების წყარო. ყოველივე ამას მოკლებული ქალი ახლა წიგნების კითხვით, საზოგადო საქმეებითა და შეილების აღზრდით იყო გატაცებული. ამჟამად თავისი ნიჭი და განათლება სხვა უფრო სასარგებლო საქმისათვის გამოიყენა: მხურვალე მონაწილეობა მიიღო ზუგდიდში აბრეშუმის ფაბრიკის აშენების საქმეში. ფაბრიკა ააგო, მაგრამ გლეხის ქალებმა თავი შორს დაიჭირეს, არ უნდოდათ ფაბრიკაში მუშაობა. ეკატერინემ არ იცოდა რა ექნა.

– როგორა სჯობს, დავით, გეთაყვა! ფაბრიკა რად გვინდა; თუ მუშახელი არ გვეყოლება?

– არაფერია, დავითანხმებთ, ქალებს ღომის ცეხვაც არ უყვართ, მაგრამ ვაცეხვინებთ. თუ გაჭირდა, ძალასაც დავატანთ, სულაც ბეგარად დავადებ ფაბრიკაში მუშაობას.

– შენ ყველაფერში ძალა და ბეგარა უნდა იხმარო. მანქანაზე მუშაობა ღომის ცეხვა როდია, ხომ შეიძლება ძალით გამოყვანილმა, გაგულისებულმა ქალებმა მანქანები დაგვიმტვირონ?

– აბა რა ვქნათ?

– მე წავალ ქალებთან, შეეაგონებ ტკბილი სიტყვით, ვინძ-

ლო დავითანხმო. მათ ხომ ჯამაგირი ექნებათ იქ, ამასაც ავუხსნი გარკვეულად.

— როგორც გენებოს, მართალი გითხრა, მაინცდამაინც სასახელო არაა ჩემთვის მეუღლე ჩემი კარდაკარ დადიოდეს და დედაკაცებს ეხვეწებოდეს, მოდიოთ, იმუშავეთო. ეს ამბავიც ჩვენი უძღურების დამამტკიცებელია.

— როგორ გეკადრება ასეთი ქედმაღლობა, ძვირფასო ჩემო? ჩემი მოქმედება სრულებით არ შელახავს შენს თავმოყვარეობას და არც ჩემსას. მოიგონე, რა ჰქნეს ინგლისის მქსოველსა მუშებმა, როდესაც პირველად საქსოვ მანქანაზე გადაიყვანეს წარმოება. ყველაფერს მიჩვევა უნდა.

მთავარს გაელიმა, ცოლს წერწეტ წელზე ხელი მოხვია და გაეხუმრა:

— ისე როგორც შენ შეეჩვიე მიყრუებულ ზუგდიდს თბილისის სალონების შემდეგ, არა?

— მიყრუებულ ზუგდიდს კი არ შევეჩვიე, შენ და ჩვენს შვილებს შევეჩვიე, ამ კუთხის გამშვენიერებისა და გამდიდრების აზრს შევეჩვიე.

ეკატერინე გრძნობდა, რომ დავითი კარგ გუნებაზე იყო და მოინდომა ამ განწყობილებით ესარგებლა, მეუღლეს საუბარი გაუმართა ზუგდიდის ბაღზე.

— სანამ უნდა იყოს, ჩემო ძვირფასო, ჩვენი დიდი პარკი, ეგ-ზომ მდიდარი ძველთაძველი იშვიათი ჯიშის ხეებით, ასე დაყრუებული და გავერანებული? ბავშვები ვერ გამიტარებია ბაღში, ისეთი ეკალ-ბარდი აკრავს. დიდი სურვილი მაქვს ბაღი ჩემი გემოვნებით მოვაწყო, თუ შენ თანხები არ გემეტება ამ საქმისათვის, მე მზად ვარ შენ მიერ ჩემთვის წვრილმანი საჭიროებისათვის განკუთვნილი თანხა დაეხარჯო.

— ლამაზად გაშენებულ ბაღში მე შრომითა და ფიქრით დაღლილი შენს გვერდით დავისვენებ; იმ ბედნიერ და უდარდელ ახალგაზრდობას მოვიგონებ, როდესაც შენზე ვოცნებობდი, — უთხრა ღიმილით დავითმა.

ეკატერინე იმ დღიდან შეუდგა ბაღის კეთილმოწყობას. საფრანგეთიდან გამოითხოვა გამოცდილი მებაღე, შეუდგინა გეგმა თუ როგორ გაეშენებინა ბაღი, სხვადასხვა ქვეყნიდან გა-

მოიწერა ძვირფას მცენარეთა თესლი, დეკორატიული ხეების ნერგები და მუშაობა გააჩალა.

სულ მალე ზუგდიდის ბალი ხეივნებითა და ყვავილნარით შეიმოსა, მაგრამ ყველაზე მეტად ბაღს ამშვენებდა ხელოვნური კუნძული, რომელიც ტბის შუაგულში ამართულიყო.

ტბაში თავისუფლად დაცურავდნენ პატარა ნავეები. ხშირად თვით ეკატერინე ახსნიდა ნაპირზე მიბმულ ნავს, ჩაჯდებოდა შიგ და ხალისით უცქეროდა თეთრ გედებს, რომელნიც დინჯად დაცურავდნენ ტბაში. ისინიც გაკვირვებული უცქეროდნენ ნავით მოსეირნე დედოფალს.

ეკატერინეს შეილებს ძლიერ უყვარდათ ნავით სეირნობა. მაგრამ დედა მათ ერთგულ გამზრდელებსაც არ ანდობდა, თვითონ დაყვებოდა ყოველთვის.

— მეშინია, გეთაყვა, გედების დაჭერის სურვილმორეული ბავშვები არ გადაცვივდნენ ნაეიდან, — ეტყოდა ის მომწულე ქალებს. მრავალშვილიანი ეკატერინე სანიმუშო დედა იყო. მან ბევრი მწუხარება გადაიტანა. რამდენიმე ბავშვი ახლად დაბადებული მოკვდა, ახალგაზრდული სიხალისე და სიცოცხლისადმი სიყვარული მაინც მორეოდა შეილების დაკარგვით გამოწვეულ მწუხარებას. გონებრივი საზრდო და მოქმედების დიდი არე ხელს უწყობდა დაეძლია ყოველგვარი გასაჭირი. ეკატერინეს ბოლომდე შერჩა საკუთარი დამოუკიდებელი სულიერი ცხოვრების მოთხოვნილება. გულიც კი მოითხოვდა გართობას და ოცნებაში განავარდებას. ხშირად მარტო წავიდოდა თავის საყვარელ კუნძულზე, რომლის შუაგულს დიდი ტალავერი იდგა და ამაყად გადაჰყურებდა ტბას. ტალავერში სელის საეარძლები და სკაძები თითქოს სტუმრებს ელოდნენ, მაგრამ ეკატერინეს აქ კენტად მისვლაც უყვარდა, თან წაიღებდა საკითხავ წიგნებს და საათობით იჯდა ხოლმე იქ, წიგნში ყოველთვის ჩადებული ჰქონდა ტატო ბარათაშვილის ლექსების კრებული, რვეულში ლამაზი ხელით ჩაწერილი.

მოწიწებით გადაშლიდა ამ რვეულს და, ვინ იცის, მერამდენეჯერ წაიკითხავდა ძვირფას სტრიქონებს. ეს სტრიქონები მისთვის იყო მიძღვნილი, მას ეკუთვნოდა, თვითონ იყო აქ დახატული და ნაქები.

მწარედ შემოეჭდებოდა გულზე სევდა დაკარგულ მეგობარ-

ზე. ვინ იცის, ალბათ თავსაც ადანაშაულებდა ბავშვობის მეგობრის, ტატოს უბედურებაში.

ეკატერინე რომ ტატოს ტრაგიკულად დაღუპვის ამბავს გაიხსენებდა, უნებურად თავისი მეუღლის ჯანმრთელობაზე დაფიქრდებოდა. დავითს დღითი დღე სულ უფრო მაგრა ჰქიდებდა ხელს ავადმყოფობა. ერთ დღეს მთავარი მძიმე ავადმყოფი ჩაწვა ლოგინში. ეკატერინე, გრიგოლი და კონსტანტინე თავზე ადგნენ დავითს, უვლიდნენ. მაია სასოებით დასტრიალებდა თავს საპატიო მაზლს, ჩვეულებისამებრ არ მიიჩქაროდა ხიბულის სასახლისაკენ. ნებივრობას მიჩვეული მაია არად აგდებდა ღამის თევასაც.

დავითის ავადმყოფობამ და საბედისწერო მომავლის შიშმა ოჯახის წევრები ერთმანეთს დაახლოვა, უფრო თავაზიანი იყვნენ ერთმანეთთან. ხოლო გრიგოლის ცოლი, გურიის მთავრის ქალიშვილი, რომელიც ეკატერინეს არ უყვარდა, თავს არიდებდა ზუგდიდისა და გორდის სასახლეში ხანგრძლივად ყოფნას; უფრო ხშირად ქუთაისში ცხოვრობდა, უმეტესად კი პეტერბურგის სტუმარი იყო.

ობილისიდან და ქუთაისიდან საგანგებოდ მოწვეული სახელმძღვანელო მკურნალები უძღურნი აღმოჩნდნენ...

ზამთრის მიწურულს სამეგრელოს მთავარი დავითი უდრტვინველად გამოესალმა წუთისიოფელს...

სასახლე ძაძით შეიმოსა. გამწარებული ძმები და მაია მწარედ დასტიროდნენ მიცვალებულს და თან ანუგეშებდნენ დამწუხრებულ ეკატერინეს, რომელსაც თავი ისე ეჭირა, რომ მასთან დავითის დაკრძალვის შესახებაც არაფრის თქმა არ ხერხდებოდა, თორემ სხვა რამეზე ლაპარაკი ხომ შეუძლებელი იყო.

გრიგოლი თავისი შეხედულებებით ლიბერალი კაცი იყო, ცოტა რამ ადამიანურ შეღავათს თუ გლეხისთვის გაიმეტებდა, საკმარისად მიაჩნდა. ახლა ის დაინტერესებული იყო იმით, თუ რა სახეს მიიღებდა სამეგრელო დავითის შემდეგ, როგორ წარმართავდა ის ძმის მიერ წამოწყებულ საქმეებს, როგორ შეძლებდა მკაცრი მებატონეების აღაგმვას, უკმაყოფილო გლეხთა დაშოშმინებას და სხვა საქმეების უმტკივნეულოდ მოგვარებას.

— ჩვენი ხალხი, ბატონებო, ჩვენზე კარგად გრძნობს ქვეყ-

ნის მომავალს. ხმები დადის, რომ ომია მოსალოდნელი, — ეტყოდა ის კონსტანტინესა და პოტოცკის. — წარმოვიდგინოთ რა მდგომარეობაში ჩავარდება საქართველო და პირველ რიგში სამეგრელო-აფხაზეთი, თუ თურქებმა რუსეთთან შეებმა გაბედეს. რა დროს გამოგვეცალა ხელიდან ჩვენი გონიერი და მტკიცე ნებისყოფის მქონე ძმა.

— დავითს ველარ დავიბრუნებთ, გრიგოლ, — უპასუხა ძმას კონსტანტინემ. ახლა შენ უნდა აღიჭურვო მისი თვისებებით და განაგრძო მის მიერ დაწყებული საქმეები, ჩვენც მხარში ამოვიდგებით.

კონსტანტინე დარწმუნებული იყო, რომ გრიგოლი ყოველგვარ წინააღმდეგობას გაუძლებდა და გულწრფელად აღიჭურვა საუკეთესო სურვილებით. პოტოცკიმ კი დასძინა:

— სრულიად დარწმუნებული ვარ, რომ თქვენი უბრწყინვალესობა, თავადო გრიგოლ, არ იქნება ცუდი მთავარი. თქვენ კიდევ უფრო ღრმად ჩაიხედავთ ხალხის გულში, ბევრ ცვლილებას შეიტანთ ამ კუთხის ცხოვრებაში. დიდი დანაკლისია თქვენი ძმის სიკვდილი. ჯერ ის საკმაოდ ახალგაზრდა იყო, მას კიდევ ბევრის გაკეთება შეეძლო. რამდენადაც ფიცხი და მკაცრი იყო, იმდენად კეთილი და გამგონე თავისი ერთგული შრჩეულებისა.

— სამწუხაროა, ბატონო, რომ ჩემს გონიერ ძმას ესოდენ დიდი ნაკლი ჰქონდა. მე მაგონდება გეგეჭკორის ამბავი, რომელიც ჩემი ძვირფასი ძმის პიროვნებას ჩრდილს აყენებს.

— მე ეს ამბავი გაკვრით გამიგონია. — უპასუხა პოტოცკიმ.

— რად გინდათ, ნურც ახლა გაიგონებთ.

დავითი დიდი პატივით დაკრძალეს. არავინ იცოდა, თუ რითი გათავდებოდა სასახლის კუთხეებში ატეხილი ჩურჩული იმის შესახებ, თუ ვინ იქნებოდა მთავარი. ყველა დაძაბულად ელოდებოდა დავითის შემცვლელ კაცს.

დავითის შვიდეგ

დავითის სიკვდილმა და ეკატერინეს მძართველად დანიშვნამ გრიგოლ დადიანი კალაპოტიდან ამოაგდო.

ძმის სიკვდილის შემდეგ მას ბუნებრივად და კანონიერად მიაჩნდა სამეგრელოს მთავრად თავისი დანიშვნა, ვიდრე კანონიერი მემკვიდრე, ექვსი წლის ნიკო, სრულწლოვანი გახდებოდა.

— პირადი განდიდების და ძალაუფლების ხელში აღება რომ არ მიზიდავდა, ეს თქვენც კარგად იცით, — არწმუნებდა გრიგოლი უმცროს ძმასა და პოტოცკის, — მე მინდოდა ამ კუთხის საქმე კარგად მომეწყო. ჩემი რძალი ეკატერინე კონსერვატორი ქალია, არაფერს არ შეცვლის მართვა-გამგეობაში. თვით ნახავთ, რა დაემართოს სამთავროს მის ხელში. მართალია, ეკატერინე გავლენიანი ქალია, რუსი ხელმწიფიდან მოყოლებული ადგილობრივ რუსეთის მოხელეებამდე, მას ყველა პატივს სცემს, ყველამ კარგად იცის მისი ოჯახიშვილობა. ის გარსევეან ჭაუჭავაძის შეილიშვილია და იმპერატრიცის ნათლულის, ალექსანდრეს ქალიშვილი, მაგრამ ეს არ კმარა.

— არც ასე გადაწყვეტით ითქმის, თქვენო ბრწყინვალეებავ! ეკატერინე ჭკვიანი ქალია. მმართველობის საქმესაც იცნობს განსვენებული თქვენი ძმისაგან. თუ ამას დაეძინთ მეფის განკარგულებას, მაზლებმა მას დახმარება უნდა აღმოუჩინოთ საჭიროების მიხედვით. არა, მე ვფიქრობ, ის შეძლებს მმართველობას. — დაასკვნა პოტოცკიმ.

მან მშვენიერად იცოდა რატომ არ დანიშნა მეფემ გრიგოლი მთავრად, მეფის მოხელეებმა დაეითის გარდაცვალებისთანავე აცნობეს რუსეთის იმპერატორს რა შეხედულებების და მსოფლმხედველობის კაცი იყო გრიგოლ დადიანი. რასაკვირველია, ლიბერალური იდეებით გატაცებული გრიგოლი მთავრად არ გამოადგებოდა რუსეთის თვითმპყრობელობას და ამიტომ ამჯობინეს ეკატერინეს გამთავრება.

ამის გამხელა პოტოცკის გრიგოლთან არ შეეძლო და ამიტომ გრიგოლი, ცოტა არ იყოს, გაკვირვებული დარჩა მისი პასუხით.

გრიგოლი გრძნობდა, რომ ვერავითარ გავლენას ვერ მოახდენდა კონსერვატიულად განწყობილ რძალზე, ამიტომ გადაწყვიტა არ ჩარეულიყო სამთავროს საქმეებში, მიუხედავად იმისა, რომ მას ძმებთან შედარებით ერთგვარად შესტკიოდა

გული ხალხისათვის. თუ წინათ იგი სამთავროს დამოუკიდებლობის აზრისა იყო, ახლა სამთავროს გაუქმებას აირჩევდა, ნაკლები ეყოლება მუქთახორა სარჩენი ხალხს. მაინც რუსეთის თვითმპყრობელობის ხელში ვართ და ერთი პატრონი ჰყავდეს ხალხს ისა სჯობია, ვინემ ორი პატრონიო.

ამ აზრს იზიარებდნენ გიორგი დადიანი და მისი ძმები პეტრე და ბესარიონი. ისინი ასე იმიტომაც ფიქრობდნენ, რომ ქვეყნის გამგებლად ქალის ყოფნას ვერ ურიგებდნენ. მართალია, სამთავროს კი არა, თამარის სახით მთელ საქართველოს ჰყოლია ქალი გამგებლად, მაგრამ ის სხვა ქალი იყო, დროც სხვა იყო. მათ გაგებულნი ჰქონდათ რატომ დასვა რუსეთმა ეკატერინე ტახტზე და ამჯობინებდნენ რუსეთის თვითმპყრობელობას თვითონ გაეკეთებინა ის, რასაც ეკატერინეს გააკეთებინებდნენ თავის ხელით.

ამ დროს რუსეთ-ოსმალეთის ომი დაწყებული იყო და ოსმალეთი ყოველნაირად ეცდებოდა ჯავრი ეყარა სამეგრელოზე, რომელმაც მას ზურგი შეაქცია და რუსეთს შეაფარა თავი, იმავე გრძნობით იყო თურქეთი განწყობილი აფხაზეთისადმიც. საჭირო იყო რუსის ჯარის განლაგება შავი ზღვის სანაპიროზე და მის საზღვარზე. დადიანები რომ ამ ფიქრში იყვნენ, ოსმალეთი გულხელდაკრეფილი არ იჯდა. თურქების მიერ სევასტოპოლის დაპყრობისთანავე ოსმალეთმა აფხაზეთში ჯარი გადმოსხა.

მიხეილ შერვაშიძე სრულიად მოუმზადებელი იყო, არ ელოდა მტრის ასეთ უცნაურ თავდასხმას. ძლივს მოასწრო ცოლშვილის სამეგრელოში გახიზვნა და ოსმალეთის ჯარის სარდალს ომერ-ფაშას პურ-მარილით შეეგება, რომ სამთავრო აოხრებისაგან გადაერჩინა. მთავარი ისე იყო დაბნეული, არ იცოდა რა გზას დადგომოდა, ომერ-ფაშას მიკედლებოდა, თუ რუსეთის ერთგული დარჩენილიყო. თუმცა საყოყმანო რა ჰქონდა. რასაკვირველია, ისევ ერთმორწმუნე დიდ რუსეთთან მეგობრობა ერჩია, მაგრამ ამის გამყლავნება ახლა არ არგებდა, მაშინ ამკარად უნდა შებმოდა ომერ-ფაშას. საამისოდ ან ჯარი სადა ჰყავდა ან იარაღი სადა ჰქონდა! ისევ ხერხით და მოტყუებით თუ დაიხსნიდა თავის ხალხს განადგურებისაგან. ოსმალეები მაშინვე მიუხვდნენ მთავარს.

— პურ-მარილით კი მხვდები, მთავარო, — მიმართა ომერ-ფაშამ შერვაშიძეს, — პირში მიცინი, მაგრამ გული რომ შავი გაქვს?

— რად მკადრებთ მაგას, სარდალო?

— აბა, რად გახიზნე ცოლ-შვილი სამეგრელოში?

მიხეილი არ დაიბნა.

— მეუღლე ავად მყავს და მამახთან გავგზავნე სამკურნალოდ. ცნობილი დოსტაქარი თურმანიძე ჰყავს ჩემს სიმაგრს იძერეთიდან დაბარებული.

ომერ-ფაშა მიუხვდა ეშმაკობას მთავარს, მაგრამ არ აგრძნობინა და ასე უპასუხა:

— ოსმალთ დოსტაქრობაში ბადალი არა ჰყავთ ქვეყანაზე, საჩქაროდ გამოიხმე უკან შენი ჯალაბი. შენს ცოლს ჩვენ გამოუენახავთ მკურნალს.

მთავარს ცეცხლი წაუკიდა სარდლის სიტყვამ, მაგრამ რა გზა ჰქონდა, თავისი რისხვა გულში უნდა ჩაეკლა.

— მადლობის მეტი რა მეთქმის ასეთი კეთილი სურვილები-სათვის, — მიუგო მიხეილმა სარდალს.

— აქვე დაწერე წერილი და ჩემი მალემსრობოლი წაიღებს სამეგრელოში.

თითქოს სილა გააწნესო მთავარს, მაგრამ სხვა გამოსავალი არ იყო, აქაც შეიკავა თავი. დაჯდა და ომერ-ფაშას წინ დაწერა წერილი. იმავე ღამეს კი გიორგი დადიანთან მსტოვრი აფრინა, რათა ომერ-ფაშას კაცისთვის ჩაესწრო. მსტოვარს ამბავი მიჰქონდა ცუცუსთან, არ წამოსულიყო აფხაზეთში. ახლავე ჩაწოლილიყო ლოგინად და წერილზე ეპასუხნა: მძიმე ავადმყოფობის გამო ჩემი მგზავრობა შეუძლებელიაო. თვითონ კი ფიცხელ მზადებას შეუდგა შეეგროვებინა რჩეული ვაჟკაცები და სამეგრელოში წასულიყო. დღეს თუ ხვალ ომერ-ფაშა სამეგრელოზე გაილაშქრებდა და მიხეილი იქ, მეგრელებთან ერთად, შეებმოდა ოსმალთა ჯარს.

ეს ამბავი მიხეილმა თავის ერთგულ ხასან მარღანიას გაანდო მეორე დღეს.

— ჩვენი ერთადერთი ხსნა რუსეთია. ვცდებოდით, ჩემო ხასან, აქამდე ოსმალეთისაკენ რომ გვეჭირა თვალი. საუკუნეების მანძილზე ვერ გამონახა საქართველომ ოსმალეთთან საერთო ენა

და ახლა ერთხელ კიდევ დავრწმუნდი, რომ ვერც ვერასოდეს გამონახავს. ჩვენ ოსმალეთის მეშვეობით ვიმედოვნებდით სრული დამოუკიდებლობის მიღებას, მაგრამ ამაოდ. თათრის უღელს, ისევ მეფის რუსეთის...

— უღელი სჯობიაო, გინდათ ბრძანოთ, არა? — გააწყვეტინა სიტყვა მთავარს ხასანმა.

— არა, ამის თქმა არ მინდოდა, — ცოტა ხნის ღუმილის შემდეგ უპასუხა დაფიქრებულმა მთავარმა. — მეფის რუსეთს საქართველოსათვის მაინც სინათლე მოაქვს, თათარს — სიბნელე. მე უკვე გადავწყვიტე არ გავყვი ომერ-ფაშას სამეგრელოს დასალაშქრად. შენ ამაღამევე გაგზავნი კაცებს და შეატყობინებ ერთგულთ მოემზადონ ცხენ-იარაღით და საგზლით. ყოველმა თავადმა და აზნაურმა თან იყოლიოს ყველა, ვისაც კი ხმლის ხმარება შეუძლია და ხვალ ენგურს გაღმა დამელოდოს.

— ნუ აჩქარდებით, ბატონო მიხეილ, — შებედა სიტყვა ხასანმა. — დავიცადოთ, ვნახოთ ვინ გაიმარჯვებს, ოსმალთ თუ რუსეთი და ამის მიხედვით გადავწყვიტოთ საით გადავვლით ნაბიჯი. რუსეთს ჩვენ გზად და ხილად ვუნდივართ, რომ აზიამი გზა გაიკვლიოს, ოსმალს კი...

— ვიცი, ვიცი, ჩემო ხასან, არც ერთს არ ვახატივართ გულზე, მაგრამ ამ ორში მაინც რუსეთი ჯობია ჩვენთვის, საქართველო რუსეთთანაა, ჩვენ ვერ განუდგებით ჩვენს ქვეყანას. სადაც მთელი საქართველოა, იქ ჩვენც.

— ეხ, მთავარო, მაინც საქართველო გიზიდავს. გონებას დაუჯერე და არა გულს. დროს მოუუცადოთ, საითაც სასწორი გადასძლევეს, ჩვენც იქით გადავიხაროთ.

— არა, ხასან, მაგ გონებას მე ვერ დაუჯერებ და გაფრთხილებ, შენც ხელი აიღე ასეთ აზრზე, დრო არ იცდის, გასწი და შეასრულე, რაც გიბრძანე! თუ ხვალვე არ გავედით ენგურზე, მერე ყველა გზები შეკრული ექნებათ ოსმალებს. ჩვენ ამაღამევე უნდა გავიდეთ ქალაქიდან. ომერ-ფაშა ჯარის ახალ ნაწილებს ელის. აბა, გასწი, ხასან, ღმერთი გწყალობდეს!...

მიხეილი თავისი მცირე რაზმით უთენია გავიდა ქალაქიდან და პირდაპირ ენგურისაკენ გაეშურა. რჩეულ ცხენებზე იჯდა მთავარი და მისი ამაღლა, მათ ქარიც ვერ დაეწეოდათ, არც ეშინოდათ მღევრისა. ასამდე თავზეხელაღებული აფხაზი და

მეგრელი ახლდა მიხეილს, ისინი ათას კაცს იოლად გაუმკლავდებოდნენ.

ენგურს გაღმა ნაპირზე სოფელ კოკთან სამეგრელოს ჯარი იდგა. გამოღმაზე ფონთან მიხეილს აფხაზები ელოდნენ. მოაგდო თუ არა მიხეილმა ცხენი ფონთან, არ დააყოვნეს დამხედურებმა, გადაეშენნენ წყალში და მალე მეორე ნაპირზე გავიდნენ.

* * *

რუსის და სამეგრელოს ჯარების სარდალი გენერალ-მაიორი მუხრან-ბატონი სასწრაფოდ შეუდგა ოსმალეთთან ომის სამზადისს. მცირერიცხოვანი ჯარი კოკთან და რუხის ციხესთან განალაგა. მისი ვარაუდით მტერს მხოლოდ ამ ორ ადგილას შეეძლო გადმოსვლა. გენერალი ყოველ წუთს მოელოდა ოსმალეთის თავდასხმას და მზად იყო თავდაცვითი ომისათვის.

მუხრან-ბატონის სიხარულს საზღვარი არა ჰქონდა, როცა აცნობეს, აფხაზეთის მთავრის მიხეილ შერვაშიძისა და მისი ჯარის გადმოსვლა ენგურზე.

ალექსის მოწამელისა და სამურზაყანოს ფულის სამეგრელოსათვის მიკუთვნების შემდეგ ორ მოძმე სამთავროს შორის კარგი დამოკიდებულება აღარ იყო. არც ეკატერინე დედოფალი, არც მუხრან-ბატონი არ ფიქრობდნენ, რომ მიხეილ შერვაშიძე სამეგრელოს ამოუდგებოდა გვერდში.

ამ დროს მუხრან-ბატონის რჩევით ეკატერინე ენგურის მახლობლად სოფელ ქვაშიხორში დაბინავდა, რომ აქედან ელევნებინა თვალი თავისი მცირერიცხოვანი მილიციისა და ჯარისთვის.

მიხეილ შერვაშიძე ენგურზე გადმოვიდა თუ არა, თავისი მებრძოლები აქ დატოვა და ამაღასთან ერთად ზუგდიდს გაეშურა, რათა იქ კავკასიის მეფისნაცვალ მურავიოვს ხლებოდა.

მეფისნაცვალი ზუგდიდში ახალჩამოსული იყო. ის სამეგრელოს იმ თავადებთან აწარმოებდა მოლაპარაკებას, რომლებიც რუსეთის ორგულად ეგულებოდა. ის კი არ იცოდა მურავიოვმა, რომ რაც გინდ სძულებოდა ამ თავადებს რუსეთის თვითმპყრობელობა, ოსმალეთზე მაინც არ გაცვლიდნენ და მტრის წინააღმდეგ ბრძოლაში გვერდით ამოუდგებოდნენ. ეს ასეც

მოხდა. მურავიოვი ძლიერ ნასიამოვნები იყო თავადებთან თათბირით და შუა დღის საუზმეს მიირთმევდა, როცა მიხეილ შერვაშიძის მოსვლა მოახსენეს.

მურავიოვი მთავარს ცივად შეხვდა. მისალმებისა და ერთმანეთის მოკითხვის შემდეგ მეფისნაცვალმა პირდაპირ მოურიდელებელი საყვედურებით მიმართა მიხეილს.

— როგორ მოხდა, მთავარო, რომ მტერს გულხელდაკრეფილი დახვდით და ისე შემოუშეით სოხუმში, ერთი თოფი არ გავარდნილა, თქვენ ხომ დღე დღეზე მოელოდით ოსმალებს.

— ისევე, როგორც თქვენ, — ცივად და წარბშეუხრელად მიუგო შერვაშიძემ. — რუსეთს საკმაო ჯარი ჰყავს ქართლ-კახეთში, ჩვენ თურქების მოსვლამდე ამ ჯარს მოველოდით სამეგრელოსა და აფხაზეთში, მაგრამ იგი ჯერაც არა ჩანს. ჩემი ერთი მუჭა მეომრებით ომერ-ფაშას ოცდაათი ათასიან ლაშქართან შებმა მხოლოდ უგუნურება იქნებოდა. აქამდე ორივე ფეხზე იდგა. უცებ მურავიოვი სავარძელში ჩაჯდა. მას შერვაშიძისათვის დაჯდომა არ შეუთავაზებია. ეს კი მთავარმა მურავიოვის ქედმაღლობას მიაწერა და თვითონ დაჯდა. მურავიოვი ახლდა მიხვდა თავის უტაქტობას. — მე ჩემი მეომრები უკვე შეეუერთე მუხრან-ბატონის ჯარს, მაგრამ, ჩემდა გასაოცრად, თქვენს ჯარებს ახლაც ვერ ვხედავ სამეგრელოში. ომერ-ფაშა გაიგებს რა ჩემს ლალატს, აღარ დააყოვნებს, პირდაპირ გამოსწევს სამეგრელოსაკენ. მან კარგად იცის, რომ აქ რუსის ერთი ჯარისკაციც არა დგას.

მეფისნაცვალი არ ელოდა ასეთ შემოტევას. მთავარი მართალი იყო. აბა რა ეთქმოდა მურავიოვს საპასუხო. ხომ ვერ ეტყოდა, რომ რუსეთს საქართველოში არ ჰყავდა იმდენი ჯარი, რამდენსაც მთავარი ფიქრობდა, რომ რუსეთს ძლიერ უჭირდა მთავარ ფრონტზე, რომ იგი ყარსის გარემოცვისათვის ემზადებოდა, მთელი ძალები იქ ჰყავდა გადასროლილი. ვერც იმას იტყოდა მეფისნაცვალი, რომ საქართველოდან იქ გაიგზავნა ჯარის დიდი ნაწილი. ხოლო იმ ორი ათას ჯარისკაცს, რომელიც მის ხელთ იყო, აბა რა დახმარება უნდა გაეწია სამეგრელოსათვის.

— უნდა მოგახსენოთ, მთავარო, რომ თქვენ ნაწილობრივ მართალი ხართ. ჩვენ დაგვაგვიანდა ჯარის გადმოყვანა, მაგრამ ამას თავისი მიზეზები აქვს. ახლა ჩვენი ეალია ენგურს გამოლ-

მა არ გადმოუშვავთ მტერი. ჩვენ ჯერჯერობით მხოლოდ ორი ათასი ჯარისკაცის მოცემა შეგვიძლია.

— ორი ათასი?! — გაოცდა მთავარი. — თქვენ ხომ იცით, რომ ომერ-ფაშას ოცდაათი ათასი ჯარისკაცი ჰყავს.

— ვიცი.

— რით გაუმკლავდეს სამეგრელო და აფხაზეთი ასეთ ძლიერ და მრავალრიცხოვან მტერს, რომელიც ფეხიდან კბილამდე იარაღშია ჩამჯდარი! გამოდის, რომ იარაღით აღჭურვილ მტერს, ცულითა და წალღით უნდა დაუხვდეთ. თითო კაცზე თითო მოწინააღმდეგე რომ მოდიოდეს, კიდევ ვიხმარებდით რაიმე ღონეს, მაგრამ როცა ერთ ჩვენს მებრძოლზე თხუთმეტი ოსმალო მოდის, აბა იქ რა გული უნდა გვექონდეს. თქვენი ჯარისკაცების იარაღითაც ვერ დავეიტრაბახებთ. აბა, რას მოვაკაჟიანი თოფი მიენის შაშხანასთან.

მურავიოვმა ვერაფერი უთხრა მთავარს სანუგეშო. აღშფოთებული მიხეილი თავისი სიმამრის, გიორგი დადიანის სანახავად გაეშურა. ალექსის დალუპვის შემდეგ მათ ერთმანეთი არ ენახათ. გიორგის გადაწყვეტილი ჰქონდა არასოდეს ენახა თავისი სიძე, მაგრამ ახლა, ქვეყნის გასაჭირის ჟამს, არ შეეძლო მეგობრული ხელი არ მიეშველებინა კაცისათვის, რომელიც იმისათვის მოვიდა, რომ თუ საჭირო იქნებოდა, მასთან ერთად თავი დაედო სამშობლოს დასაცავად.

გიორგი დადიანის სასახლე და ეზო-კარი ლტოლვილებით იყო სავსე, მაგრამ მასპინძელმა სტუმარი მაინც დიდი პატივით მიიღო. მიხეილს თავისი ცოლ-შვილი არც კი მოუკითხავს, სიმამრმა და სიძემ მაშინვე საქმეზე დაიწყეს ლაპარაკი. მიხეილი აღშფოთებით უყვებოდა მეფისნაცვალთან საუბრის შინაარსს. მაგრამ გიორგის არ გაკვირვებია მოსმენილი, თითქოს მან ყველაფერი ეს უკვე იცოდა.

— რუსი ჩვენ ახლა ჯარს ვერ მოგვცემს. ომის ბედს ყარსი გადაწყვეტს. თუ იქ მოიგო ომი რუსმა, ომერ-ფაშა იმ დღესვე დატოვებს ჩვენს ქვეყანას. ვილოცოთ ყარსზე გამარჯვებისათვის! — უთხრა გიორგიმ მიხეილს. — მილიციას გრიგოლ დადიანი მეთაურობს, ხალხს ჩვენ ჩაუდგეთ სათავეში. საბედნიეროდ, სამთავროს შინაური მტრებიც იარაღით და სურსათით გამოდის ქულზე კაცი.

— გარეშე მტერთან ჩვენ ყოველთვის ერთად შეკრული გამოვდიოდით, გიორგი. ეს ახლაც ასე იქნება და მომავალშიც...— ერთხანს იყუჩა აფხაზეთის მთავარმა და მერე დაეჭვებით განაგრძო: — მაგრამ მე მაინც მგონია, რომ რუსეთს შეეძლო ახლა ჩვენთვის იმდენი ჯარი გამოეყო, რომ ომერ-ფაშა არ შემოეშვა ჩვენს მიწაზე. ჩანს, თვითმპყრობელ მეფეს ჩვენი გაჩანაგება უნდა, რომ უფრო მაგრა შეგვადგას უღელი. გახსოვს ტოტლებენის ღალატი ასპინძის ომში? აი რა გეიქნა რუსეთმა მაშინ.

— მახსოვს, — დაფიქრებით მიუგო გიორგიმ. — მაგრამ ტოტლებენის ღალატი რუსის ღალატი არ იყო. თუ არა ვცდები, ტოტლებენი გერმანელი გახლდათ.

— მაგას რას მნიშვნელობა აქვს, ხომ რუსის გენერალი იყო, ჩემო გიორგი.

— რუსის გენერალი! — გაიმეორა გიორგიმ. ის ბოლთას სცემდა ოთახში. შედგა მთავრის წინ. — რუსის გენერალი კი არა, რუსეთის დაქირავებული გენერალი... — თქვა ხაზგასმით. — მაგრამ დავანებოთ ამას თავი. რუსეთისათვის ასპინძის განმეორება არ იქნება ახლა ხელსაყრელი. ჩვენ ყოველგვარი ღონე უნდა ვიხმაროთ, რომ ომერ-ფაშა როგორმე შევაკავოთ, სანამ ყარსში რუსი გაიმარჯვებდეს, რუსი რომ ყარსში გაიმარჯვებს, ამაში დარწმუნებული ვარ. მართალია, აფხაზსა და მეგრელს აგერ ორმოცი წელიწადია არ უომნია, მაგრამ ჩვენს ხალხს იარაღის ხმარება და მომხდურის დახვედრა არ დავიწყებია.

მართლაც ხალხი, თავადები თუ გლეხები ყველაფერს აკეთებდნენ იმისათვის, რომ მტერს მზად დახვედროდნენ. ამ განსაცდელის ყამს მაიამაც გამოიღო ხელი. მისი გლეხებიდან ქუღზე კაცი გამოვიდა საომრად. მაიამ თვითონ შეიძინა მათთვის იარაღი, ვისაც ფეხსაცმელი არ ჰქონდა, ჩააცვა. ოქროვერცხლი არ დაიშურა, გახსნა თავისი განძეულობის ყუთი და ნახევარზე მეტი გაუგზავნა ივანე მუხრან-ბატონს ჯარის საჭიროებისათვის. არც თავადს, არც აზნაურს და ღარიბ გლეხსაც კი არაფერი დაუშურებია. თვით ჯოღორია დგებიაც დიდად გულუხვობდა, თუმცა უფრო იმისათვის, რომ სხვას არ ჩამორჩენოდა.

დაიძრა ლაკადიდან ხალხი. ეს მთის სოფლები ყოველთვის ცნობილი იყო გულადობით და ვაჟკაცობით. ლაკადის გლეხები

ისეთივე შეუდრეკელი მეომრები იყვნენ, როგორც ფშავ-ხევსურები. მთის გლეხობას ხელმძღვანელობდა მჭედელი უტუ მიქავა — სახელმძღვანელო ხელოსანი, გლეხობის მოსარჩლე, მათი ინტერესების შეუპოვარი დამცველი.

როგორც კი უტუმ ომერ-ფაშას აფხაზეთში შემოსვლის ამბავი გაიგო, მაშინვე მიხვდა, რომ იგი დღეს-ხვალ სამეგრელოზე გამოილაშქრებდა და სასწრაფოდ შეუდგა ხალხის შეგროვებას. მისი სამჭედლო დღე და ღამე მუშაობდა, ჭედდნენ საომარ იარაღს, ძველს აახლებდნენ, ლესდნენ, პირავდნენ.

გლეხებს, დიდსა და პატარას, სამჭედლოში მოჰქონდათ თურაიმე ძველი რკინის ნაჭერი მოეძებნებოდათ — უვარგისი თოხი, ბარი, ბორბლის სალტე. ყველაფერ ამას ადნობდნენ, რუსული ხიშტის მაგვარ იარაღს ამზადებდნენ, შინდის ან კაკლის ხის ტარებს უკეთებდნენ.

რამდენიმე დღეში საკმაოდ კარგად შეიარაღებული უტუს რაზმი ენგურში ჩამოვიდა და გრიგოლის მილიციას შეუერთდა.

ომერ-ფაშა რუხის ციხესთან უყრიდა თავს ჯარის მთავარ ნაწილებს. მზვერავებმა მუხრან-ბატონს ამბავი მოუტანეს, რომ მტერი სწორედ რუხის ციხის მიდამოებში აპირებდა ენგურის გადმოლაზვას და გენერალმა აქ განალაგა თავისი შერეული ჯარის საიმედო ნაწილები.

გიორგი დადიანმა და მიხეილ შერვაშიძემ არ მოიწონეს მუხრან-ბატონის ასეთი გეგმა. მათაც თავისი მზვერავები ჰყავდათ შეგზავნილი თურქთა ჯარში და მოტანილი ამბის მიხედვით, ომერ-ფაშა სოფელ კოკთან აპირებდა ენგურზე გადმოსვლას. ისინი თავიანთი მეომრებით კოკთან დარჩნენ და იქ გამაგრდნენ. მათთან დარჩა უტუ მიქავაც და ჯოლორია ღვებიაც. ჯოლორიას გიორგი დადიანის გულის მოგება უნდოდა. ფიქრობდა: თუ გამიმართლდა და თავი ვისახელე, გიორგისთვისაც სახელი იქნება, მადლიერი დამრჩება, თუ გაგვიჭირდა, დროზე ვუშველი თავს, თურქი თუ შემოვიდა, გიორგის მომადლიერება რაღად მინდაო.

მართლაც მიხეილის და გიორგის ვარაუდი გამართლდა. ომერ-ფაშამ დაიწყო თუ არა შეტევა რუხთან, მაშინვე უკან დაიხია, თავდაცვით ბრძოლაზე გადავიდა. მუხრან-ბატონისათვის თვალს რომ აეხვია, ჯარის დიდი ნაწილი კოკისკენ გააპარა და

იქ მთელი სიძლიერით შეუტია გიორგის და მიხეილის ერთ მუჭა გუნდს.

მუხრან-ბატონი გვიან მიხვდა თავის შეცდომას. სწრაფად მოხსნა ჯარის დიდი ნაწილი რუხიდან და კოკისკენ გამოეშურა.

სანამ მუხრან-ბატონის ჯარი კოკამდე მოაღწევდა, გიორგისა და მიხეილის მეომრები თავგანწირვით ებრძოდნენ ათჯერ უფრო მრავალრიცხოვან მტერს. იმ წელს შემოდგომა გვაღვიანი იყო, სულ ერთავად ტაროსი იდგა, ენგური დაპატარავდა და კოკთან ფონზე გასვლა ქვეითადაც შეიძლებოდა. ამიტომ მტრის ჯარი ერთბაშად შემოვიდა მდინარეში, გიორგის და მიხეილის მებრძოლები ენგურის კალაპოტში შეეგებნენ მტერს და შუა მდინარეში გაიმართა ხელჩართული ბრძოლა. პირველი გიორგი ეკვეთა მტერს. თავის ყაბარდოულ ვაყაზე მჯდარი, იგი მარჯვნივ და მარცხნივ ჩეხდა მტრის ქვეითებს.

ერთხანს ჯოღორია დგებია გვერდიდან არ მოშორებია გიორგის, ლომივით იბრძოდა გულადი თავადი, მას თან ახლდა თავისი ყმა გელა ჯგერენაია. ის არ იჯდა ისეთ ცხენზე, როგორზეც მისი ბატონი, არ იყო ჯავშნით შემოსილი, არც ხმალი ჰქონდა და არც თოფი, მას უტუ მიქავას მიერ გამოჭედილი ორარშინიანი სატევარი ეპყრა ხელთ და ერთი დაკვრით შუაზე აპობდა ურჯულს. გიორგის, ჯოღორიას და უტუს გმირობით აღტაცებული გელა ვერ ამჩნევდა როგორ თხელდებოდა მათ გარშემო გუნდი, მაგრამ აი დაინახა, როგორ აარიდა თავი ჯოღორიამ გიორგი დადიანზე მიჭრილი მტრის ახალ ჯგუფს და იქით მიუშვა ცხენი, სადაც უფრო მეჩხერად უტევდა თურქი. ასეთი ღალატით გაოცებული გელა სახტად დარჩა, მაგრამ ეს მხოლოდ ერთი წამით, მერე გზა გადაუჭრა თავის მრისხანე ბატონს.

— საით, ჯოღორია?! ვერა ხედავ რა დღეშია გიორგი დადიანი?

გაბოროტებულმა ჯოღორიამ, პასუხის ნაცვლად, ხმალი მოუქნია თავხედ ყმას, რომ თავი წაეგდებინებინა, მაგრამ გელამ დროზე უგანა. ჯოღორიას მოქნეული ისეთი ძლიერი იყო, რომ კინაღამ თან გადმოყვა ხმალს, მეორედ შემობრუნების ჟამი აღარ იყო, ამ დროს თურქთა გუნდის ყიჟინა გაისმა მახლობლად. ჯოღორიამ იფიქრა, ამ გველის წიწილს მაინც მოუუსწრა-

ფებ სიცოცხლესო, მე კი სჯობს თავს ეუშველოო და ქუსლი ჰკრა თავის ცხენს.

— სად გარბიხარ, შე მოლალატევე! — შესძახა გელამ ბატონს, იძრო უცებ ქარქაშიდან რქისტარიანი მეჯოგის გრძელი დანა, რომელიც ხანჯალს არაფრით ჩამოუვარდებოდა, ესროლა ჯო-ლორიას და შიგ ბეჭებში გაუყარა. მერე შემოტრიალდა და გი-ორგისაკენ მიუშვა ცხენი.

მძიმედ დაჭრილ გიორგი დადიანს ორი თურქი ერთად ებრ-ძოდა. ერთი ის იყო უკანიდან მიეპარა და თავში კონდახი დას-ცხო, როცა გელა დააცხრა ზედ ურჯულოებს. ერთს მხარი ჩა-მოათალა, მეორეს თავი წააგდებინა, შემდეგ დაწვდა გონებადა-კარგულ გიორგის, წინ დაიგდო უნავირზე და გაქუსლა.

თურქები უმალ დაედევნენ თავზეხელაღებულ ჭაბუკს, მაგ-რამ მათ უტუმ გადაუჭრა გზა და კედელივით აიძვრათ მათ წინ.

ამ დროს მუხრან-ბატონის რუსის ჯარი და გრიგოლის მი-ლიციის ნაწილები გამოჩნდნენ. მუხრან-ბატონმა მაშინვე შე-ატყო, რომ მტრის შეკავება შეუძლებელი იყო. ქართველებმა აქაც და რუხთანაც დიდი ზარალი ნახეს. ათასამდე მოკლული მეომარი ეყარა ენგურის პირას. ერთი იმდენი წყალმა წაიღო. უაზრო იყო მტერთან პირისპირ შეხება. გენერალმა გადაწყვიტა ნელ-ნელა დაეხია უკან თავისი მთავარი ნაწილით, ხოლო საუ-კეთესო ჯეომრებს, რამდენადაც შესაძლებელი იყო, მტრის სწრაფი წინსვლა უნდა შეეკავებინათ. ამ თავგანწირულ მებრ-ძოლებში იყვნენ მეგრელები, რუსები, აფხაზები და გურულები. გრიგოლთან ერთად იბრძოდა უშიშარი, დევური აღნაგობის და ღონის კონსტანტინე, რომელსაც არც სიძარდე აკლდა და არც იარაღის ხმარებაში გაწაფულობა. იგი რისხვად ატყდებოდა გათამამებულ მტერს თავზე.

მუხრან-ბატონის ჯარი სწრაფად იხევდა სოფელ ხეთისკენ. ოსმალეთის ჯარის მეტი ნაწილი ენგურზე გადმოვიდა, გენე-რალს ეშინოდა ალყა არ შემოერტყათ და მთლად არ ამოეწყვი-ტათ მისი ჯარი.

ენგურზე გადმოსულ თურქებს მუხრან-ბატონის მებრძო-ლებმა წინსვლის საშუალება არ მისცეს. რუსთა სახაზო ბატა-ლიონმა, რომელსაც აფხაზი პოლკოვნიკი ზეამბაია მეთაურობ-და, საოცარი სიმამაცე გამოიჩინა. მართალია, ზეამბაია პირველ

შეტაკებისთანავე დაეცა, მაგრამ ბატალიონს უმაღლეს პოლკოვნიკი იოსელიანი ჩაუდგა სათავეში და სამჯერ დაახვეინა უკან მტერს. იოსელიანი შტუცერის ტყვიით დაიჭრა მკერდში. წელამდე წყალში მდგარმა პოლკოვნიკმა თავისი ხელით შეიხვია მძიმე ჭრილობა და კვლავ მტერს შეუტია. იგი მანამდე იბრძოდა, სანამ სისხლიდან არ დაიცალა და გონდაკარგული არ მიესვენა უტუ მიქავას ხელებზე.

არც იოსელიანის დაღუპვით შეკრთა რუსთა ბატალიონი, მათ ახლა კურინის პოლკის ბატალიონის მეთაური, მაიორი ივინი ხელმძღვანელობდა.

მტერი კვლავ კალიასავით მოდიოდა... ომერ-ფაშას ნაბრძანები ჰქონდა რაღაც არ უნდა დაჯდომოდო, მიხვილ შერეაშიძე შეეპყრათ და ცოცხალი მიეგვარათ მისთვის, ხოლო აფხაზები ამოეხოცათ. თურქთა სარდალს ვერაფრით ვერ ეპატიებინა აფხაზეთის მთავრისათვის ღალატი.

გრიგოლ და კონსტანტინე დადიანებმა იცოდნენ ეს და მიხვილი ადრე გადაიყვანეს ბრძოლის ველიდან.

შუა ღამეზე, როცა მუხრან-ბატონისაგან ცნობა მოვიდა, რომ ის თავისი ჯარით სამშვიდობოს იყო გასული, ქართველებმა უკან დახევა დაიწყეს.

* * *

ომერ-ფაშას სამეგრელოში შემოსვლის შემდეგ ეკატერინე დედოფალი ქვაშიხორიდან გორდში გადავიდა, მერე კი — ლეჩხუმში, თავისი ბავშვებიც იქ გახიზნა. ლეჩხუმში დედოფალი დიდი ჰატივით მიიღეს, ბინა მურის ციხეში მიუჩინეს და თავზე ექლებოლნენ.

მურის ციხე კლდეშია გამოკვეთილი. წინიდან იგი მიუვალია. შესასვლელი არა აქვს და მტერს ვოველი შსრიდან შეუვალად ეწვენება. არც ერთი ციხე არ არის საქართველოში ისე ძნელად ასაღები, როგორც მურის ციხე. ერთ-ერთი კარი, რომლითაც მურის ციხეში შესვლა შეიძლება, ეს მთის, ანუ ციხის, უკანა მხარეა, მაგრამ ამ კარს და მასთან მისასვლელ გზას, ვერავინ მიაჩნებს, თუ არ იცის მისი ადგილსამყოფელი.

მუხრან-ბატონის ომერ-ფაშასთან ბრძოლის გამართვა არც

უცდია. ხეთაში შეისვენა თუ არა, იმერეთისკენ გაემართა, რათა ცხენისწყლის გაღმა გასულიყო და იქ დაბანაკებულიყო. ათჯერ უფრო ძლიერ მტერთან შებმას არავითარი აზრი არ ჰქონდა. გენერალი ქართლ-კახეთიდან ჯარს ელოდა და გადაწყვეტილი ჰქონდა რუსის ჯარის მოსვლის შემდეგ განეახლებინა ბრძოლა.

ის იყო ეკატერინემ მურის ციხეში მოაწყო შვილები, რომ მუხრან-ბატონისაგან ამბავი მოუვიდა: მთელი ბარის სამეგრელო თურქების ხელშიაო. გენერალი ურჩევდა გადმოსულიყო შვილებიანად იმერეთში და ხონში დაედო ბინა.

სამეგრელომ არ იცოდა მუხრან-ბატონის ასე უბრძოლველად უკან დახვევის მიზეზი. ხალხი გენერალსა და რუსის ჯარს დალატს სწამებდა და როცა ისიც გაიგეს, რომ მუხრან-ბატონი დედოფალსაც იმერეთში ეპატიჟებოდა, ხალხის აღშფოთებამ ყოველგვარ საზღვარს გადააჭარბა. გლეხი და თავადი, ყველა ერთხმად წინ აღუდგა დედოფლის იმერეთში წასვლას.

მაიამ თავისი ძეუღლე კონსტანტინე სასწრაფოდ აფრინა დედოფალთან, რათა არ აყოლოდა მუხრან-ბატონის რჩევას. კონსტანტინე თავადაზნაურთა გუნდით ლეჩხუმში ეახლა ეკატერინეს.

— ახლა, ამ გასაჭირის ჟამს, სამთავროს მიტოვება დალატს უდრის, — მოახსენა კონსტანტინემ დედოფალს მაიას დანაბარები სიტყვა. — რა ვუყოთ, თუ დროებით დაემარცხდებით, ადრე თუ გვიან რუსის ჯარი უთუოდ მოგვეშეველება. ჩვენ ბევრჯერ ვყოფილვართ აწიოკებული და ბოლოს მაინც საკადრისი პასუხი მიგვიზღვევს მომხდურთათვის. ახლაც ასე იქნება. სანამ სული გვიდგია, ჩვენ ვიბრძოლებთ ოსმალებისაგან განთავისუფლებისათვის, იმერეთში შენი გახიზვნა გულს გაუტეხს ხალხს და ჩვენც დაგვაყრევინებს ფარ-ხმალს.

დედოფალს სული აუფორიაქა ამ სიტყვებმა. თურმე ხალხს მისი იმედი აქვს, ის ეგულება ჭირისუფლად და როგორ მიატოვოს სამთავრო უპატრონოდ ურჯულოს ხელში. დედოფალმა გადაწყვიტა არ წასულიყო იმერეთში.

ამ დროს მან ომერ-ფაშასაგან დიპლომატიური წერილი მიიღო. მთავარსარდალი სწერდა: ოსმალებმა ომი დაიწყეს იმი-სათვის, რომ ბოლო მოუღონ რუსეთის ბატონობას მთელ რიგ

ქვეყნებში. მათ შორის სამეგრელოდანაც გვინდა ავლაგმოთ ისინი, რათა ხალხს დაუბრუნოთ თავისუფლება. მე ამჟამად აქ იმდენი ჯარი მყავს, რომ შემიძლია გავათავისუფლო რუსებისაგან საქართველოს სხვა სამთავროები — მთელი საქართველო. სულთანმა კაცთმოყვარული საქმისათვის გამომგზავნა. ჩვენ გვინდა ტანჯვის უღელი ავხსნათ თქვენს ხალხს. ამიტომ გთხოვთ დაუბრუნდეთ სასახლეს და განაგრძოთ თქვენი ქვეყნის მართვა-გამგეობა, ჩააგონოთ ხალხს თუ რა სწადია ჩემს ხელმწიფეს — სულთანს მისთვის.

ეკატერინემ არ იცოდა რა ეპასუხნა ომერ-ფაშასათვის. სასახლეში მისი დაბრუნება შეუძლებელი იყო, ეს რუსეთისაგან განდგომას ნიშნავდა, უარის თქმაც არ იუარებდა. ეს გაადიზიანებდა ომერ-ფაშას, რომელიც დედოფლის დაბრუნების მოლოდინში საკმაოდ ღმობიერად ექცეოდა ხალხს, ეფერებოდა, რათა მათი გული მოეგო. იმ ჯარისკაცებს, ვინც ძარცვა-გლეჯას ეწეოდა, ხალხის თვალწინ სასტიკად სჯიდა. მაგრამ სამეგრელომ კარგად იცოდა რა ცბიერი იყო მტერი, რომლის მზაკვრობა და აწიოკება არაერთხელ უგემნია. არავენ ეგებოდა ომერ-ფაშას ანკესზე. თავი ისე ეჭირათ, თითქოს სჯეროდათ თურქი მხედართმთავრის გულწრფელობისა. ომერ-ფაშას უნდოდა ცხენისწყლის გაღმა დაბანაკებულ მუხრან-ბატონის ჯარისათვის დაუყოვნებლივ გაემართა ომი, მაგრამ იმერეთის საზღვარი კარგად იყო გამაგრებული და იქ ასე იოლად ვერ გადავიდოდა, როგორც ენგურზე. გარდა ამისა, მუხრან-ბატონის ჯარს იქ გურულთა და იმერთა რაზმები შეემატა! ამიტომ ომერ-ფაშა ცდილობდა სამეგრელოს დედოფლის გულის მოგებას, რომ ხალხის ნაწილი მაინც აეყოლებინა. ცუდად იცნობდა სარდალი სამეგრელოს, ასევე ცუდად იცნობდა იგი დედოფალს, რომელსაც ურჩევდა რუსეთისათვის ზურგი შეექცია და ინგლისის, ოსმალეთისა და საფრანგეთის კავშირს შეერთებოდა.

ხალხის ის ნაწილი, რომელიც უკმაყოფილო იყო უბრძოლველად მუხრან-ბატონის სამეგრელოდან გასვლით, დედოფლის ლეჩხუმში გახიზნით, აშკარად გამოთქვამდა თავის აზრს შექმნილი მდგომარეობის გამო. მათ ეგონათ, რომ სამეგრელოსა და რუსეთს შორის დადებული პირობა რუსებმა გატყვეს და დედო-

ფალსაც არ უნდოდა სამთავროში დაბრუნება. ეს რა გამოდისო, ამბობდნენ ხალხში, თურქის ხელში ჩაგვყარეს, თვითონ კი თავს უშველესო. ხალხის ნათქვამი სიტყვასიტყვით მისდოდა ლეჩხუმში ეკატერინეს. მის ტანჯვას საზღვარი არა ჰქონდა, მაგრამ ვერავითარ გამოსავალს ვერ პოულობდა.

სამეგრელოში რომ ასე ლაპარაკობდნენ, ქუთაისსა და რუსთა წრეებში დედოფალს დალატს წამებდნენ. ეკატერინემ მიწერ-მოწერა გამართა მტერთან სამეგრელოს რუსეთთან ჩამოშორების შესახებო. მალე გაემგზავრება თვითონ ზუგდიდს და ზავს შეკრავს ომერ-ფაშასთანო.

დედოფალს გულს უკლავდა ეს ცილისწამებები, მაგრამ ერთ დროს ხომ გამოირკვევა სიმართლეო და ამით ინუგეშებდა თავს. ის მთელ იმედებს ყარსის სიმაგრის დაცემაზე ამყარებდა. უშუალო მიწერ-მოწერა ჰქონდა მეფისნაცვალთან და კავკასიის ჯარების მთავარსარდალთან — მურავიოვთან, მეფისნაცვლის თანამდებობის აღმსრულებელ თავად ბებუთოვთან. მათგან იცოდა, რომ დღე-დღეზე დაიწყებოდა რუსების იერიში ყარსზე. და აი დადგა ეს სანეტარო დღეც, გიორგობისთვის ოცდაორში ეკატერინემ წერილი მიიღო მურავიოვისაგან ყარსის დაცემის შესახებ.

— მადლობა ღმერთს, ახლა მურავიოვს შეუძლია მომცეს იმდენი ჯარი, რომ ომერ-ფაშას კუდით ქვა ვასროდინო — წამოიძახა აღტაცებულმა დედოფალმა და თვალი სიხარულის ცრემლებით ავესო.

ომერ-ფაშა მოტყუვდა. მას უნდოდა აფხაზეთის, სამურზაყანოსა და სამეგრელოს ალების შემდეგ იმერეთზე გაელაშქრებინა, ამ ლაშქრობით მურავიოვი ყარსიდან გაეტყუებინა, მაგრამ მეფისნაცვალი მიუხვდა ეშმაკობას და იმის მაგივრად, რომ ყარსიდან ჯარი მუხრან-ბატონისათვის გამოეგზავნა, მან საქართველოდან ჯარი ყირიმში გაიწვია, იქ გაიმარჯვა და ამ გამარჯვებით შეშინებულ თურქეთის მთავარსარდალს თვითონ დაახვეინა უკან.

სწორედ იმ დროს, როცა ეკატერინემ მურავიოვის წერილი მიიღო ყარსის დაცემის შესახებ, ომერ-ფაშას ჯარი ცხენისწყლის ნაპირზე იდგა და გაღმა გასვლისათვის ემზადებოდა. მართალია, მან ვერც ერთი მეგრელი და აფხაზი ვერ აიყოლია

იმერეთის წინააღმდეგ საომრად, მაგრამ კარგად იცოდა, რომ სუხრან-ბატონს ქართლ-კახეთიდან ჯარი არ მოუვიდა, რომ მურავიოვმა გურულთა მილიციის ის ნაწილებიც, რომლებიც მუხრან-ბატონს უნდა მიშველებოდა, ყირიმში გაიწვია, რომ იმერეთში დიდი შეშფოთება სუფევდა თურქთა შემოსევის მოლოდინში. ომერ-ფაშას დიდად ხელსაყრელ დროდ მიაჩნდა ეს ჟამი ლაშქრობის დასაწყებად, მაგრამ კოვზი ნაცარში ჩაუვარდა. ყარსის დაცემის ამბავი ყუმბარასავით გავარდა მთელ საქართველოში.

კიდევ ერთ რამესი მოტყუვდა ომერ-ფაშა: ის ეკატერინესათვის მიწერილ წერილში იმასაც წერდა, რომ თუ სასახლეს არ დაუბრუნდებოდა და სამთავროს მმართველობას ხელში არ აიღებდა, მაშინ თავის უფლებას დაკარგავდა სამეგრელოზე. მე იძულებული გაეხდები ოსმალეთის და მისი მოკავშირე სახელმწიფოების სახელით დავნიშნო მთავრად ერთ-ერთი მეგრელი თავადიო.

ეს მუქარა მაშინ რომ შეესრულებინა სარდალს, ახლა იგი იძულებული არ გახდებოდა სწრაფად დაეხია უკან ცხენისწყლიდან. მის მიერ დანიშნული მთავარი, თუ მთლიანად არა, ხალხის ერთ ნაწილს მაინც გადაიბირებდა თავის მხარეზე და ყარსის დაცემით აღტაცებული აფხაზეთი, სამურზაყანო თუ სამეგრელო, როგორც ერთი, არ აღდგებოდა ოსმალეთის წინააღმდეგ და არ დაედევნებოდა უკანდახეულ ჯარს. მაშინ მეფეხს მოვიკიდებდი ამ პროვინციებში, მოვგლეჯდი მათ რუსეთს და ამით მაინც ვიძიებდი მასზე შურსო.

ინგლისისა და საფრანგეთის აგენტს ეს ოცნებაც ჩაეფუშა. ომერ-ფაშასათვის ერთი გზა რჩებოდა — უკან დახევა. ეს კი, რაც შეიძლება სწრაფად უნდა განეხორციელებინა. სწრაფად, სანამ მეგრელები და აფხაზები უკან დასახევე გზას შეუკრავდნენ, სანამ ცხენისწყლის გაღმა დაბანაკებული მუხრან-ბატონის ჯარი იერიშს დაიწყებდა, სანამ დედოფალი ლეჩხუმიდან ჩამოვიდოდა და თავის ხალხს გაუძღვებოდა.

როდესაც ეკატერინემ მურავიოვის წერილი მიიღო, დედოფალთან ამოსული იყო უტუ მიქაევა, დავით გიდელია და გელა ჯგერენაია. დავით გიდელია მრისხანე თავადის მურზაყან დადიანის ყმა იყო. დავითს მეტსახელად მეჯამ-მეგობია შე-

არქვა ხალხმა. დავითი ხისაგან შესანიშნავ ჭურჭელს იღიდა, ბაზარზე ყიდდა და მთელ შემოსავალს ბატონს ახმარდა. იგი იყო უღამაზესი მამაკაცი, თან დევური ღონისა და აგებულების. როგორც კი ომერ-ფაშა ენგურს მოადგა, მან იარაღი აისხა და სამშობლოს დასაცავად გაეშურა. ენგურთან მუხრან-ბატონის დამარცხების შემდეგ ვიდელია უტუ მიქავას შეუერთდა, მასთან ერთად შეადგინა პარტიზანული რაზმი და ხან სად დაატყებოდნენ ომერ-ფაშას ჯარს, ხან სად. უკიდებდნენ ცეცხლს მათ კარებს, ხოცავდნენ ჯარისკაცებს, სტატებდნენ ცხენებს და იარაღს. მუდამ შიშის მოლოდინში ჰყავდათ მტერი.

პარტიზანთა რიცხვი დღითი დღე იზრდებოდა. პარტიზანებს უმთავრესად ემატებოდა ის გლეხები, რომლებიც უკმაყოფილონი იყვნენ დედოფლისა და მუხრან-ბატონის მოქმედებით.

— მათ რომ ხალხის დარდი ჰქონდეთ, ხალხთან დარჩებოდნენ და ცხენისწყლის გაღმა არ გავიდოდნენ!

— ხალხის დარდს ვინა ჩივის, თავის სამთავროს ჯავრი რატომ არ აწუხებთ იმ მამაცხონებულებს!

— სამთავროს რა უჭირს, რასაც თურქები ანგრევენ და წვავენ, ხალხს ააშენებინებს დედოფალი, ჩვენ უნდა დავიდგათ წელზე ფეხი, ჩვენ უნდა ვუზღოთ ნამარცხ-ნაღლეტი. — ამბობდნენ პარტიზანები.

— არა, მეტის მოთმენა აღარ შეიძლება, ვეახლოთ დედოფალს და ვუთხრათ: ან გაგვიძღვეს ან გადადგეს და ისეთ კაცს ჩააბაროს სამთავრო, ვისაც გული შეტკივა და მარტო თავის თავზე არ იფიქრებს.

— მოგეცა ლხენა, გიორგი დადიანი დაჭრილი რომ არ იყოს, ის ივარგებდა ახლა მთავრად, ხო, ხო, როგორ იბრძოდა კოკთან, კაცის შვილი კი არა, დევი გეგონებოდა...

აღარ მოითმინა უტუს რაზმმა: უტუ, გელა და დავითი წარგზავნა დედოფალთან ულტიმატუმით. ეკატერინემ მიიღო ხალხის წარგზავნილები, მოუსმინა და კარგა ხანს იჯდა დაფიქრებული. სრულიად სამართლიანად მიიჩნია ხალხის მოთხოვნა, მაგრამ რა პასუხი გაეცა? და აი მურავიოვის წერილმა გაუხსნა ხელები. დედოფალმა აღუთქვა მათ, რომ თვითონ წარუძღვებოდა ჯარს დაუყოვნებლივ.

— ახლა თურქი თვითონ დაიხვეს უკან. ყარსის დაცემას

უნდა გადაეწყვიტა ჩვენი ბედი. და აი იგი რუსეთის ფეხქვეშაა. ახლა ისე უნდა ესდიოთ მტერს, რომ ვერ შეძლოს ტყვეთა წასხმა, საქონლის გატაცება და სოფლების გადაწვა.

მურავიოვმა დედოფალს შეიდი ბატალიონი რუსი მიაშველა. ამას გურიის რაზმიც მიემატა და მუხრან-ბატონის შევესებული, გაძლიერებული ჯარის სარდლობა თვითონ ეკატერინემ ითავა.

— აი, ამ დღეს ვუცდიდი მე, — უთხრა მუხრან-ბატონმა დედოფალს. — რუსებმა ყარსის ალებით გაგვამარჯვებინეს აქ, საქართველოში. ახლა მაინც გამიგებენ, რატომ მოვერიდე მსხვერპლს, რატომ გავუფრთხილდი ათასობით ადამიანის სიცოცხლეს. ახლა სდით ომერ-ფაშას, ის არსად არ გაგიმართავთ ბრძოლას. გზას გილოცავთ, დედოფალო! ამიერიდან, სანამ რუსი და ქართველი ერთად იქნებიან, ოსმალეთი ფეხს ვერ შემოდგამს ჩვენს მიწაზე. — ასე გამოემშვიდობა მუხრან-ბატონი დედოფალს. ის თბილისში იყო გაწვეული, თავის მაგივრად მან გენერალი ბრუნნერი დაუტოვა ეკატერინეს.

დედოფალი თვენახევარი ცხენიდან არ ჩამოსულა, ბრუნნერთან ერთად იგი კვალდაკვალ მისდევდა მტერს. ამ დროს მთელ სამეგრელოში კოკისპირული წვიმები მოდიოდა. ნაპირებიდან გადასულ მდინარეებს დაეფარათ ჭალები, მინდვრები, გზები. წაედოთ ხიდები. გარბოდა მტერი და გზადაგზა ტოვებდა ზარბაზნებს, იარაღს, ტრანსპორტს. ოსმალებს თავს ესხმოდა უტუ მიქავა. გელა ჯგერენაიას, დავით გიდელიას რაზმები, რუსთა და ქართველთა ჯარი დედოფლის წინამძღოლობით ამოსუნთქვის საშუალებას არ აძლევდა მტერს.

იმ დროს, როდესაც ოსმალთა ცხენისწყლიდან უკან იხევდა, გიორგი დადიანი დაჭრილი იწვა თავის ძიძის სახლში და იქიდან აღევნებდა თვალს ქვეყანას, იქიდან ხელმძღვანელობდა უტუ მიქავას, გელა ჯგერენაიას და დავით გიდელიას პარტიზანულ რაზმებს. ყარსის დაცემის ამბავი რომ აცნობეს, ნახევრად განკურნებული კაცი ლოგინიდან წამოდგა, იარაღი აისხა და თქვა:

— დადგა ჩვენი დღე. ახლა მთელი ქვეყანა დაინახავს მურავიოვისა და მუხრან-ბატონის ჭკუას.

იცოდა, გაბოროტებული მტერი გადაწვავდა ზუგდიდს, წა-

ასსამდა ტყვეებსა და საქონელს, პირწმინდად აღგვიდა მიწის პირიდან რაც წინ დახვდებოდა. „პირველ ყოვლისა, ზუგდიდი უნდა გადავარჩინო“ — ფიქრობდა გიორგი. სწრაფად შეკრიბა პატარა რაზმი და თვითონ გაუძღვა ეს ავადმყოფი და რამდენიმე ადგილას დაჭრილი კაცი. მაგრამ უკვე გვიან იყო. როგორც კი ოსმალებმა ყარსის დაცემის ამბავი შეიტყვეს, იმ დღესვე შეუდგნენ ზუგდიდის ძარცვას და როცა გიორგის რაზმი ქალაქს უახლოვდებოდა, დედოფლის სასახლე ცეცხლის ალში იყო გახვეული.

ამ სურათის ნახვამ კიდევ უფრო გააგულისა დადიანი და მისი რაზმი. გიორგიმ რამდენიმე გუნდად დაჰყო მებრძოლები და ისინი ქალაქს ერთდროულად შეესივნენ ყოველი მხრიდან.

ისეთი გაბედული და ელვისებური იყო ზუგდიდში გიორგი დადიანის შემოსვლა, რომ ოსმალებს თავზარი დაეცათ, ეგონათ გარშემორტყმული ვართო და დაფრთხნენ, აირ-დაირივნენ. ტოვებდნენ ტყვეებს, ჰყრიდნენ ნადავლს და უგზო-უკვლოდ გარბოდნენ. გიორგიმ გაწმინდა ქალაქი მტრისაგან. სასახლეს კი ვერაფერი უშველა, დაიწვა, ჩაიფერფლა. ხანძარმა გაანადგურა სასახლის პარკი, ასე სათუთად ნაშენები და მოვლილი ეკატერინეს მიერ.

გიორგი არ დაკმაყოფილდა ზუგდიდიდან მტრის განდევნით. იგი არც ჩამოსულა ცხენიდან, უკან დაედევნა ოსმალებს. გიორგის რაზმს გზადაგზა უტუსა და მისი ამხანაგების რაზმები უეროდებოდნენ.

ისინი ცდილობდნენ გიორგი როგორმე დაებრუნებინათ თავის სასახლეში, ურჩევდნენ ლოგინში ჩაწოლილიყო და მიეხედა ჭრილობებისათვის, რომელიც საფრთხეს უქადდა მის სიცოცხლეს, მაგრამ ვერაფერს გახდნენ.

ეკატერინეს გმირულმა თავდადება, დაულალავემა ენერგიამ, თვით მისი მოშურნე მათა დადიანიც კი მოიყვანა ალტაცებაში. ფუფუნებაში გაზრდილი ეკატერინე წარბშეუხრელად იტანდა ჯარისკაცის ყოველ გასაჭირს. იგი ზამთრის სიცხევესა და წვიმაში თავის მებრძოლებთან ერთად უშიშრად დადიოდა მდინარეებსა და ჭაობებზე, ხმალამოდებული მიუძღოდა იერიშზე მამაც რუსებსა და ქართველებს, მათთან ერთად ათევედა ღამეს ცის ქვეშ.

... ეკატერინეს ამბავი მთელ საქართველოს მოედო. განსაკუთრებით გაოცდნენ რუსები, როგორც ოფიცრობა, ისე ჯარისკაცები. მამაკაცის ტანსაცმელში გამოწყობილ ულამაზეს ქალს რომ უყურებდნენ, ყაბალახით თავწაკრულს და იარაღში ჩამჯდარს, თვალს არ უჯერებდნენ. აოცებდათ მისი სიმარდე, ცხენოსნობა, სინაზე და ჯარისკაცებისადმი გულისხმიერება, დედური დამოკიდებულება.

იანვრის ბოლოს მთელი სამეგრელო სრულიად გაწმენდილ იქნა თურქებისაგან, ხოლო მარტის დამდეგს ყირიმში თურქებსა და რუსებს შორის ერთი თვით წინასწარი შერიგება მოხდა და პარიზში მოლაპარაკება დაიწყო ზავის შესახებ, რომელიც ცხრამეტ მარტს წარმატებით დამთავრდა.

“ * “

ბეჭებში დანაგარჭობილი ჯოღორია დგებუაძე სიკვდილს იმით გადაურჩა, რომ დანა არ ამოიძრო ჭრილობიდან, რათა სისხლიდან არ დაკლილიყო. ჯოღორიამ იგრძნო მძიმედ იყო დაჭრილი. ფიზიკურად ღონიერი და ჯანმრთელი, დარწმუნებული იყო მოერეოდა ჭრილობას, ოღონდ სახლამდე მიეტანა სული. როგორც კი დაიჭრა, უმაღლესო ცხენის კისერს, ლაგამს ხელი უშვა, ფაფარში სწვდა.

— გასწი შინისკენ! — უბრძანა ულავს.

ცხენმა იგრძნო თუ რა დღეში იყო პატრონი, მოწყდა ადგილს და ტყვიასავით გაიჭრა წინ. თითქოს მიწას ფეხს არ აკარებდნო, ისე მსუბუქად მიაფრენდა, რომ არ დაენჯღრია, ტკივილი შეემსუბუქებინა პატრონისათვის. ჯოღორია შინ უნებლად მივიდა.

დანა მაშინ ამოაძრეს დაჭრილს, როცა ტანთ გახადეს. კერპი და გულქვა თავადი შეშინებულ ბავშვს ჰგავდა. თუ დაჭრილს იგი არც კი ფიქრობდა სიკვდილზე, ახლა ბრძოლის ველიდან შინ მისვლამდე იგი ისე გამოცვლილიყო, გეგონებოდათ ამ კაცისათვის სხეისი გული ჩაუდვიათო. შეუხვიეს თუ არა ჭრილობა, კედლისაკენ შებრუნდა. ბრძანა — სახლში რაც კი საბნები მოიძებნებოდა დაეხურათ, დაენგრიათ გელა ჯგერენიას მამის, მიხას, ქოხი და მისი ფიცრებით დაენტოთ ცეცხლი ყვე-

ლა ბუხარში. მიხა კი გაეკოჭათ და ხაჯალურზე დაესვათ, რომ მერე თვითონ დაესაჯა თავისი ხელით. ციოდა ჯოღორიას და უნდოდა მიხას სახლის ცეცხლით გამთბარიყო, მაგრამ მას სიკვდილის სიცივე ჰქონდა შემჯდარი და ვერაფერი შეელოდა.

ერთ წუთში აიკლეს მიხას სახლ-კარი ჯოღორიას კაცებმა. უბედურმა მიხამ არ იცოდა რითი დაიმსახურა ეს მეორე და უფრო დაუნდობელი, უფრო საშინელი რისხვა ბატონისა. ვერც სხვამ გაიგო. დანა, რომლითაც ჯოღორია იყო დაჭრილი, თურქული არ აღმოჩნდა. მაშინვე იცნეს უტუ მიქავას ხელით გამოჭედილი დანა. ყველას გაუკვირდა მტერთან ბრძოლაში ჯოღორია დგებუაძე მეგრული დანით რომ აღმოჩნდა დაჭრილი. ნუ-თუ ჯოღორიამ ზურგი უჩვენა მტერს? ამის დაჯერება არავის შეეძლო. ჯოღორიამ არ იცოდა რა იყო შიში. გიორგი დადიანის გვერდით კი ის ასწილ გაბედული და შეუპოვარი იქნებოდა. რა მოხდა, რატომაა ჯოღორია ზურგში დაჭრილი! მერე ვისი? გლეხის, თავისი მიწა-წყლის შვილის დანით.

მთელი სასახლე და სოფელი ამაზე ფიქრობდა. ყველაზე მეტად თავზარდაცემული ჯოღორიას ერთადერთი ვაჟი ბეჟა დგებუაძე იყო. მას თვითონ ბრძოლაში მონაწილეობა არ მიუღია. როცა ომერ-ფაშა ენგურს მოადგა, მალარიით დაავადებული ლოგინად იყო ჩავარდნილი. მამა რომ ასეთ დღეში ნახა, ლოგინში ველარ გაჩერდა, მაგრამ ჯოღორიას ახლოს ვერ მიეკარა. არავისი ნახვა არ ინდომა თავადმა, შვილიც არ შემოუშვა ოთახში, მასაც არ გაანდო ვისი ხელით კვდებოდა. „არა, არა! — ყვიროდა ჯოღორია. — მეღორის შვილის დანა ვერ მომკლავს!“ მეორე დღეს უარესად შეიქნა ჯოღორია. ციებ-ცხელებაში აიტანა. ღამით რომ ვერაფერმა გაათბო, ლოგინიდან წამოდგა საბანმოხვეული და მიხა ჯგერენიას ქოხის ფიცრებით აგიზგიზებულ ბუხარს მიუჯდა. უკეთებდა და უკეთებდა ქოხის ფიცრებს ცეცხლს და უხაროდა, რომ იწოდა მიხას ქოხის ფიცრები, ლარტყები, ხარიხები.

— ასე დაგწვავ შენ და შენს შვილს, მიხა, ღორის შვილო! — ღვარძლიანად ჩურჩულებდა აძიგძიგებული თავადი და სულ უფრო და უფრო ახლო იწევდა ბუხრისაკენ. ვერ გაიგო, როგორ მოედო საბნის ტოტს ცეცხლი, არც ის იგრძნო ალი რომ საცვალს წაეკიდა. მხოლოდ მაშინ მოვიდა გონს, როცა ტანს

მისწვდა ცეცხლი. თავზარდაცემული ფეხზე წამოიჭრა, ეტაკარს, მაგრამ კარი ჩაკეტილი ჰქონდა და ვერ გააღო.

სახლში ყველას ეძინა და ვერავინ გაიგო რა უბედურება ტრიალებდა ბატონის ოთახში. როცა ცეცხლი ოღას წაეკიდა, მაშინდა გაიგეს, რომ იწვოდნენ, მაგრამ გვიან იყო. ვერც ჯოლორიას უშველეს და ვერც სახლი გადაარჩინეს დაწვას.

ჯოლორიას ასე უბედურად დაღუპვის ამბავი მთელ სამეგრელოს ელვის სისწრაფით მოედო.

— ცოდვამ უწია იმ არაკაცს!

— მაგისთანების ბოლო ასეთია!

— სიბოროტე არავის შერჩება!

— ღმერთმა შეგვიბრალა, გვიან, მაგრამ მაინც მოგვაშორა მისი თავი. — ამბობდნენ გლეხები.

მამის ამგვარი საშინელი სიკვდილით თავზარდაცემული ბეჟა ციებამ ახლა უფრო მაგრად მიაკრა ლოგინს. მამაზე ფიქრი მოსვენებას არ აძლევდა ავადმყოფს. სხვისთვის იყო ჯოლორია ავი, მაგრამ შეილისათვის თავდადებული მამა იყო და ბეჟასაც განსაკუთრებით უყვარდა.

ჯოლორიას დამწვარი ჩონჩხი ისე დაასაფლავეს, რომ ბეჟა საფლავამდე ვერ მიჰყვა მამას და ერთი მუჭა მიწა ვერ მიაყარა მის კუბოს. და აი ლოგინად ჩავარდნილი სულ მამაზე ბოდავდა. განუწყვეტლად იმაზე ფიქრობდა, რატომ დასვა ჯოლორიამ მიხა ჯგერენაია ხაჯალურზე, რატომ დაანგრევინა მისი ქოხი, რატომ მისი ფიცრებით დაანთებინა ცეცხლი ბუხრებში. ამ ფიქრებით შეპყრობილს ერთხელ გათენებისას ჩაეძინა და სიზმარში ნახა ის, რაც ჯოლორიასა და გელა ჯგერენაიას შორის მოხდა ენგურის პირას. მეორე დღეს ბეჟამ მიხა მოაყვანინა თავის ოთახში და მამის ზურგიდან ამონაძრობი სისხლიანი დანა უჩვენა.

— ვისი დანაა ეს, ყაზახო? — ჰკითხა მიხას.

მამამ შეილის დანა მაშინვე იცნო და მიხვდა, რომ გელას მოკლული იყო ჯოლორია. გული სიხარულით და სიამაყით შეუქანდა მოხუცს.

— ჩემი ბიჭისაა, — უთხრა წარბშეუხრელად ბატონს.

— მაშ, გელას მოუკლავს მამაჩემი.

— ომში მხოლოდ ლაჩრებს და მოღალატეებს ხვდებათ ზურგში მახვილი, — მიუგო მიხა.

— წაიყვანეთ... — იყვირა გაბოროტებულმა ბეჟამ, — ორ ხაჯალურზე ერთად დასვით!

იმ ღამესვე დილეგს, სადაც მიხა ხაჯალურებზე იჯდა, ცეცხლი გაუჩნდა. მცველებმა არაფერი მიუშვეს მის ჩასაქრობად.

ქ ა რ ი შ ხ ა ლ ი

ოსმალთა ჯარების განდევნის შემდეგ საქართველოს ის ნაწილი, რომელიც შავი ზღვის სანაპიროს ახლომახლო მდებარეობდა, ხელახლა აღსადგენი შეიქნა. მმართველი წრეები ამაზე ნაკლებად ფიქრობდნენ. პირიქით, მთელი ზარალის ანაზღაურებას მებატონეები იმ გლეხების ხარჯზე აპირებდნენ, რომელთაც ომერ-ფაშას ჯარის შემოსევა ყველაზე მეტად დააწვათ მხრებზე. მოისრა და გავერანდა ყანები, გარეკილი და გაწყვეტილი იყო პირუტყვი. ტყე-ღრეში გადაცვენილ გლეხთა ოჯახები ომის შემდეგ გაპარტახებულ სოფლებში ბრუნდებოდნენ. გადამწვარი იყო მათი სახლ-კარი. უპირუტყვოდ, უფრინველოდ და უსურსათოდ დარჩენილი გლეხები სულს ძლივს ითქვამდნენ. ბატონები კი უკანასკნელ ლუკმას აცლიდნენ პირიდან. თავადაზნაურნი ცდილობდნენ ომით მიყენებული ზარალი გლეხების საშუალებით აენაზღაურებინათ. პირველი მაგალითი გლეხების გაპარცვისა, მათ ეკატერინემ მისცა, როდესაც გლეხებს თავისუფალი მიწები ჩამოართვეა, რომელიც თავიანთთვის დაემუშავებინათ ომერ-ფაშასთან ომის დროს. დედოფალმა უპატრონო მიწებიც ვერ გაიმეტა გლეხობისათვის. ამასაც არ დაჯერდა: ბრძანა სალხინოს სასახლის სწრაფად დამთავრება. ეკატერინეს განსაკუთრებით უყვარდა სალხინოს ადგილმდებარეობა, მაგრამ მის გემოვნებას ვერ აკმაყოფილებდა ლევანისეული ძველი შენობა: ჯერ კიდევ დავითის სიცოცხლეში იქნა დაწყებული სასახლის მშენებლობა, რომელიც დროებით შეჩერებული იყო. ეკატერინემ სალხინოში ჩასვლისთანავე სახლთუზუცესს დავით ჩიქოვანს მიმართა.

— შეფერხდა, დავით, ამ სახლის აშენება. თქვენ, ალბათ,

მოგეხსენებათ, მე პეტერბურგში ვარ მიწვეული ხელმწიფე ალექსანდრე მეორის ტახტზე ასვლის გამო გამართულ ზეიმზე დასასწრებად. ამ მშენებლობის ხელმძღვანელობას თქვენ განდობთ. სანამ შეიძლება ამ მშენიერ კარ-მიდამოს შესაფერი სასახლე არ ამშვენებდეს? დაამთავრეთ მალე, ამისრულეთ ეს წადილი.

ჩიკოვანი დაადნო ამ ტკბილმა საუბარმა, თავადი მზად იყო ყოველი ღონე ეხმარა ამ თვალწარმტაც და ენამოშაქრული დედოფლის სურვილის შესასრულებლად.

— ნუ იჯავრებთ, დედოფალო, ყველაფერი თქვენი სურვილისამებრ იქნება შესრულებული! — თავაზიანად აღუთქვა დავალების აღსრულება სახლთუხუცესმა.

— კიდევ აი რას გთხოვთ, ჩემო დავით! მინდა ერთ-ერთი აივანი მდინარე წაჩხურუს გადაჰყურებდეს, რომ აქედან ვაყურებიანო ჩემს სტუმრებს კალმახის ჭერისათვის. აივანს მალაღობი მოაჯირი გაუკეთეთ, გეთაყვათ, ბავშვები არ გადაცვივდნენ, რთველზე აქ მინდა მყვანდნენ.

— რას ბრძანებთ, დედოფალო, თქვენს ბავშვებს ფათერაკი უფაღმა აშოროს! მათი მომვლელ-მეთვალყურე აღარ გვეყოლება თუ რა?

— სასახლის სარდაფი გრილი უნდა იყოს, დავით. შეიღებს ყველაფერი მოწყობილი მინდა დაუტოვო, ობლობა რომ არ იგრძნონ.

— რა ბრძანებაა, დედოფალო! სარდაფი ივლისშიც საყინულესავით იქნება. მდინარე წაჩხურუში ხომ ყინულივითაა წყალი, ნამეტნავად ზაფხულის თვეებში. მაგის ერთი ჭიქა წყლის დალევა კაცს გაუჭირდება. ეს მდინარე სასაბლეს გარშემო უვლის, სიგრილე როგორ არ იქნება, ან თქვენი შეიღების ობლობა ვინა თქვა!

— უშამულო და უმამო შეიღები ობლებია, აბა რა არის, თავადო! რას ვუტოვებ მე მათ. ცარიელ-ტარიელი დამრჩება ჩემი საბრალო ბავშვები. ჰო, ვენახს რიგორი პირი უჩანს წელს?

— კარგი, ბატონო ჩემო! ცოტა სიბერეში შევიდა ვაზი. წელს ახალი ვენახი უნდა გავაშენოთ, რამდენი ძირი ვენახის ჩაყრას გვიბრძანებთ?

— რამდენსაც აუვა მუშახელი. მოაგვარე საქმე, რომ სამუშაოები არ დაყოვნდეს. — დედოფალი ყოველივე ამას საჩქაროდ უბარებდა დავით ჩიქოვანს და ამასთან ერთად მრავალ სხვა განკარგულებას აძლევდა.

სამეგრელოს მმართველად ის თავის მზლ, გრიგოლ დადიანს ტოვებდა.

დედოფალი მიწვეული იყო პეტერბურგში ალექსანდრე მეორის ტახტზე ასვლის გამო. რჩეული თავადებისაგან შემდგარ ამაღლას კონსტანტინე ხელმძღვანელობდა.

ეკატერინემ, როგორც იტყვიან, „ცალი ყბით“ შესთავაზა მაიას პეტერბურგში წასვლა. მაგრამ ზვიადმა და თავმოყვარე ქალმა მაშინვე შეატყო რა გულით ეპატიჟებოდა დედოფალი და ცივი უარი მოახსენა. ეკატერინემ იგრძნო, რომ მაია მიუხედავად განზრახვას და შეცდომის გამოსასწორებლად ახლა თვითონ შეუწინადა კონსტანტინე დადიანს, ემოქმედა ცოლზე.

— ვისი მოწვევით წამოვიდე, ბატონიშვილო, პეტერბურგს, რძლის თუ რუსთა ხელმწიფის?

აქ კონსტანტინე შედრკა.

— ყველას ცალკე ხომ არ დაგეპატიჟებდა, მამუ! თავიდა-თავია ეკატერინე, რომელმაც დაპატიჟების ბარათი მიიღო, იქ იგულისხმება მისი ახლობელნი, მისი ამაღლა.

მაიამ ირონიულად გაიღიმა და მეუღლეს ასე უპასუხა:

— მიკვირს, რამ დაგიკარგა თავმოყვარეობა. შენ მზად ხარ დედოფლის ამაღლის წვერი გამხადო. გავიწყდება, რომ ჩვენი ოჯახი არაა ჩვეული სხვის მხლებლობას. ჩემი დისწული ბაბო რომ რუსთა ხელმწიფის სასახლეში ფრეილინად მიიწვიეს, მე და მამამ ერთი სიკვდილი გავათავეთ.

— მამუ, დედოფალს არ შეუძლია არ წავიდეს და ამაღლაც თვალსაჩინო უნდა ჰყავდეს.

— მე შემიძლია არ წავიდე და არც წავალ, ნურც შენ დარჩები იქ დიდხანს. განსაკუთრებით ჩემს რძალს არ მართებს ახლა სამთავროს მიტოვება. ქვეყანა აოხრებულია, სოფლები გაპარტახებულია თურქების მიერ. მტერს აქ უტუსა და გელა ჯგერენაიას რაზმები მოსვენებას არ აძლევდნენ. ღირსეულად უსწორდებოდნენ ამწიოკებლებს. ამ დროს დედოფალი ლეჩხუმში იყო გახიზნული თავისი შვილებით. ხალხის შვილებზე არ ფიქ-

რობდა. მარტო ჯოდორია დგებუაძის და გელა ჯგერენაიას ამბავი გვეყოფა თავადებს სამარცხვინოდ. იმის მაგივრად, რომ გლეხებს ტანჯვა შევეუმსუბუქოთ, ასეთი აოხრების შემდეგ, ჩვენ ბეგარას ვაწერთ, რათა ომში დანაკარგი ქონება ავინაზღაუროთ. დედოფალი ისეე თავის თავზე და თავის შვილებზე ფიქრობს. მალე დააბრუნეთ დედოფალი, თორემ ხალხში ისეთი მითქმა-მოთქმაა, რომ შევრცხვებით. ან რას ფიქრობს ჩემი მაზლი — ბატონი გრიგოლი, ეს განათლებული კაცი, განა საკმარისია ლექსები წერო, ღმობიერი მმართველი იყო და პატიოსანი კაცის სახელი დაგრჩეს ხალხში?

— მამუ, შენ მკაცრი მსაჯული ხარ, ყველაფერი ერთბაშად არ გაკეთდება.

— ბატონო, რა არ გაკეთდება. ჩვენი საჩთაერო ისედაც უპატრონო იყო და ახლა მთლად უპატრონოდ დარჩა. უბედურ ჩემს მაზლს დავითს რომ ეცოცხლა, იქნებ რამე საშველი დადგომოდა ქვეყანას. ნუთუ დედოფლის ყურამდე არ მიდის ის ამბები, რაც სამეგრელოში ხდება!

— რა ხდება, ბატონო, ისეთი, რაც სხვაგან არ მომხდარა?

— არც შენ ხედავ და გესმის, თუ რა დღეშია ხალხი?! ქალწულთა წარყვანა, გლეხების წამება. უკანასკნელ ლუკმას აცლიან მათ პირიდან. ახლა ეკატერინეს ამ შიმშილისა და ცოდვის კითხვის დღეს სალხინოში სასახლის აშენებაც მოუნდომებია.

— საიდან გებულობ, მამუ, შენ პირველი ასეთ ამბებს? ვინ გაწუხებს და გიშლის ძარღვებს?

— თქვენ არ გინდათ თავი შეიწუხოთ, ძარღვებს უფრთხილებით და ხალხის პატრონობას კი ჩემულობთ. არა, ასეთი პატრონი არ გამოადგება ხალხს.

— ერთობ მკაცრი ხარ, მამუ, შენ გინდა ის გააკეთოს ეკატერინემ, რისი გაკეთება დავითმა ვერ შეძლო, ნუ გავიწყდება; რომ ის ქალია და იმდენს ვერ მოვთხოვთ.

— სწორედ ქალს უფრო მეტად უნდა შეტკიოდეს ხალხზე გული. ქალს შეუძლია აღკვეთოს თავადების ბარბაროსობა. ის ხომ აღექსანდრე ჭავჭავაძის ქალიშვილია, მამამისი ხალხმა აღიარა ღარიბთა გამკითხვად. რაღა ჩვენთან იჩენს დედოფალი სიმკაცრეს და გულქვაობას!

— დამშვიდდი, მამუ, გენაცვალე, ხალხი განათლება და თანდათან გაქრება ბარბაროსული ჩვევები.

— ბარბაროსული ჩვევები განათლებით არ მოიხსობა, კონსტანტინე, იგი უნდა აღიკვეთოს.

— აღიკვეთოს! — გაიმეორა კონსტანტინემ. — მერე რა გზითა და რა საშუალებით, მამუ? ჩვენ ხომ საკუთარ კანონებს ვერ შემოვიღებთ სამთავროში. ბატონს რაც უფლება აქვს თავის ყმაზე, იმას ხომ ვერ წაუვართმევთ?

— თქვენ შეუკვეცეთ ფრთები თქვენს უფლებებს და ამით სხვებს მიეცით მაგალითი. მაგრამ ამას დედოფალი როგორ იზამს. პირიქით, ის სხვა უფლებებს აძლევს თავადაზნაურობას, როგორმე ამოხადონ სული ყმებს. გადაეცი ეკატერინეს, დაუფიქრდეს ქვეყნის მდგომარეობას. ნუ მიატოვებს თავის და თუ გინდ მეფას სიამოვნებისათვის სამთავროს ასეთ დღეში.

მაიას სიტყვებმა კონსტანტინე ჩააფიქრა. გადაწყვეილა გრიგოლსა და დედოფალს მოლაპარაკებოდა. მაგრამ ზუგდიდში ჩასვლამდე ისევ გადაიფიქრა: არ ღირს, ჩემს რძალს განწყობილება გაუფუჭდება, საქმეს კი მაინც არაფერი ეშველებაო.

პეტერბურგში ეკატერინეს წასვლის შემდეგ თავადებმა კიდევ უფრო აიშვეს თავი. ისინი ომით წელგაწყვეტილ გლეხებს შეესივნენ. გახშირდა „შინა ჩადგომის“ წესი. ადგებოდა თავადი თუ აზნაური თავისი ცოლ-შვილითა და მხლებლებით, ესტუმრებოდა თავის გლეხს რამდენიმე კვირით, ჩადგებოდა მის ოჯახში, ავალებდა მათ კარგად ეკვებათ და პატივი ეცათ. ასე შოგზაურობდნენ თავადები ერთი გლეხის ოჯახიდან მეორეში, ერთი სოფლიდან მეორე სოფელში. ლაღობდნენ, ნებივრობდნენ, აბახებდნენ გლეხის ქალებს — ცოლებს, ქალიშვილებს, ერთიორად თხოვდნენ გადასახადს.

დედოფლის მოურავი დავით ჩიქოვანი პეტერბურგში ეკატერინეს გამგზავრების დღიდანვე შეუდგა სალხინოს სასახლის შეკეთებას და ბაღ-ვენახების გაშენებას. გლეხებს ყანებიდან ერეკებოდა, ყანა კი სარეველას მიჰქონდა. გლეხები მუშაობდნენ ხე-ტყის დამუშავებაზე, სადურგლო სამუშაოზე, თლიდნენ ქვას, წვაავდნენ კირსა და აგურს, ბარავდნენ და ხნავდნენ მიწას, კაფავდნენ ტყესა და გაჰყავდათ თხრილები. მათ არც ბინას აძლევდნენ, არც სამუშაო იარაღს, არც საჭმელს; უმინდოდ სა-

მინდსაც არ უფქვავდნენ დედოფლის წისქვილში. უკიდურესობამდე მისულმა გლეხებმა მოურავს მართალია თოდუა გაუგზავნეს და შეუთვალეს, სიმინდი მაინც დაგვიფქვი უმინდოდო. მართალია თოდუას დიდი სახელი ჰქონდა მოპოვებული როგორც გლეხებში, ისე თავადაზნაურობაშიც. გლეხებს ეგონათ, რომ დავით ჩიქოვანი მას უარით არ გამოისტუმრებდა, მაგრამ მოლოდინი არ გამართლდა.

მოურავის პასუხი უმაღლ მოედო მთელ სალხინოს. ერთ დღეს ყველამ ერთად შეწყვიტა მუშაობა, თავი მოიყარეს და დავით ჩიქოვანი დაიბარეს.

მოურავი მალე მოიჭრა თავისი ცხენოსნებით მშენებლობაზე. ხალხი რომ ერთად შეყრილი ნახა, წარბები შეკრა, მაგრამ სანამ სიტყვას დაძრავდა, მართალია თოდუამ მუშტი ჰკრა გელა ჯგერენაიას. გელა წინ წარუდგა შავ ულაყნე მჯდარ ნიქოვანს.

— დიღო ბატონო, ხარებს რომ ამუშავებენ, მერე აპეურებს უხსნიან, უღელს აშორებენ და საჭმელს აძლევენ, ასვენებენ. ჩვენ ადამიანები ვართ, მგონი, ღმერთმა ჩვენც თქვენსავით გაგვაჩინა, თქვენს სამუშაოზე ვმუშაობთ. ღმერთი რომ გწამდეთ, საჭმელს უნდა გვაძლევდეთ, მაგრამ ეს არ ინებეთ. ჩვენ სიმინდი მოგვაქვს, ცარიელი მჭადი მაინც შევჭამოთ, თქვენ კი ჩვენი სიმწრით მოტანილ სიმინდს მინდი რომ დაადევით, არც ღმერთის შეგეშინდათ, არც კაცი შეგეცოდათ? თუ მინდს არ მოგვისსნით, ვტოვებთ სამუშაოს და მივდივართ.

ნიქოვანმა არ შეასრულა გლეხების მოთხოვნა.

აღშფოთებულმა გლეხებმა იქვე შეპყიციეს ერთმანეთს, არ შეესრულებინათ ეკატერინესა და მისი სახლთუხუცესის ბრძანება.

— დამშვიდდით, ბიჭებო! — დინჯად დაიწყო მართალია თოდუამ. — ჯერ ვცადოთ ამ საქმის მშვიდობიანი გზით მოგვარება. ავირჩიოთ სამი კაცი, გაეგზავნოთ ზუგდილში გრიგოლ დადიანთან მოსალაპარაკებლად, რომ ეს ახალი გადასახადი მაინც მოგვისსნას.

ატყდა ჩოჩქოლი, მცირე თათბირის შემდეგ სასახლეში გასაგზავნად აირჩიეს მართალია თოდუა, გელა ჯგერენაია და დავით გიდელია.

ისინი იმავე ღამეს წავიდნენ ზუგდიდში გრიგოლ დადიან-თან, აუხსნეს თავიანთი გასაჭირი, მაგრამ გრიგოლმა მათ გადაჭრით არაფერი უთხრა: არც დახმარებას დაჰპირდა, არც ურჩია — ნუ იბრძვით, მაინც არაფერი გამოვაო.

გრიგოლს დავით ჩიქოვანი სძულდა, უნდოდა მისი გავლენა და ავტორიტეტი შეეღებოდა ეკატერინეს თვალში.

სალხინოში შეკრებილ გლეხობას მართალია თოდუამ განუცხადა:

— მე დავრწმუნდი, ძმებო, ნებით მაგათგან ვერაფერს მივიღებთ! რა ბევრი რამ ჩვენ ვთხოვეთ გრიგოლს, რომ არ დაგვეხმარა? ჩვენ სულ პატარა შეღავათი გვინდოდა, გაუქმებინა ახალი ბეგარა, მაგრამ ძალდი ძალდის ტყავს არ დახევესო, ტყუილა კი არ არის ნათქვამი. პატარა რამ მინდის მოხსნა არ დავითმეს, ხომ? ჩვენც ვუჩვენოთ მათ ჩვენი ძალა. — დაამთავრა მუქარით თოდუამ.

გაიგო რა ეს ამბავი ჩიქოვანმა, ყოველივე აცნობა თავის ძმას, რომელიც შეიარაღებულ რაზმს ხელმძღვანელობდა. ივანე ჩიქოვანმა ბრძოლა გაუმართა გლეხებს, მაგრამ ამაოდ. გაფიცულებმა, როგორც იტყვიან, კუდით ქვა ასროლინეს რაზმეულებს, ზოგიერთი დაჭრეს კიდევ და სამარცხვინოდ უკან გააბრუნეს.

დავითმა ახლა გრიგოლს მიმართა, მაგრამ ამ უკანასკნელმა მისი თხოვნაც უყურადღებოდ დატოვა.

გლეხებმა სასახლე დაიკავეს. მათ თანდათან ემატებოდათ ახლო სოფლებში მცხოვრები გლეხები, იმავე დღეს საომრად მომზადებული ოთხასამდე გლეხი სალხინოს სასახლეში დაბანაკდა. წინამძღოლად მართალია თოდუა აირჩიეს, დამხმარედ გელა ჯგერენაია და დავით გიდელია მიუჩინეს.

მართალიამ იმ ღამესვე გაგზავნა მაცნე სალხინოს ახლოს მდებარე სოფლებში და მოსახლეობას მოუწოდა თავადაზნაურთა საწინააღმდეგოდ მოწყობილ აჯანყებაში მონაწილეობა მიეღოთ. სასწრაფოდ წამოვიდა ხალხი კურზუდან, კიწიიდან, ტალერიდან, გურძემიდან, ნამიკოლოუდან, ნაფინხოლოდან. გელა ჯგერენაიას სოფლიდან — საჩაჩიბაიოდან ქუდზე კაცი გამოვიდა. გლეხობა აღშფოთებული იყო გელას მამის ასე ვერაგულად

ცეცხლში დაწვით. გელას გადაწყვეტილი ჰქონდა ღირსეულად გასწორებოდა მამის ძველს.

შეუსწვეტლივ მოდიოდნენ იმ ღამეს გლეხები, სალაშქრო სიმღერებითა და ყიჟინით. სასახლის კარიბჭე ღია იყო. კარებში გუშაგები იდგნენ. გლეხები მხიარულად ესალმებოდნენ ერთმანეთს:

— ვიხომ გაგვითენდა, ბიჭებო? აელაგმათ ბატონებს?

— სად არის მართალია?

— გასჭრა მისმა სიმართლემ! — აღმოხდა ყველას გულიდან მოხეტყილი სიტყვები.

— თუ უტუ მიქავაც შემოგვიერთდა, მაშინ კი გვექნება ძალა. უტუ მაინც სხვა რკინისგანაა გამოჭედილი.

იმ ღამეს ათასამდე კაცი მოადგა სალხინოს სასახლეს. დილაადრიან კი ვარლამ გაბედავა მოკარდა რჩეული ახალგაზრდებით.

— რაშია საქმე, ძმებო! — კითხულობდა ის გზადაგზა და მოიჩქაროდა, რათა მალე ენახა თავისი ძმის მუძუმტე გელა ჯვერენაია და მართალია თოდუა, რომლის სიმართლესა და პატიოსნებაზე მთელი სოფელი ლაპარაკობდა. ვარლამმა გელა გადაკონა და შეეკითხა:

— საყვარელო ძმაო, ამიხსენი, რაშია საქმე?

— აეჯანყდით, ვარლამ, აეჯანყდით! დედოფალი და მისი თავადები ჭკუაზე უნდა მოვიყვანოთ! სულ თავზე დაგასხდნენ, ადამიანებად არ მივაჩნივართ. ხომ იცი რა უქნეს მამაჩემს! ისე დაამცირეს, რომ ძაღლსაც არ მოკლავენ ასეთი სატანჯველით. ცეცხლში ამომიწვეს. ბეჟა კი დასჯის მაგივრად დედოფალმა შეიფარა.

— დამშვიდდი, ძმაო! მოვეუღებთ ბოლოს მავათ პარპაშს!

მზის გადახრამდე სალხინოს სასახლესთან უკვე ოთხიათამა კაცმა მოიყარა თავი. უზარმაზარი ეზო ხალხს ველარ იტყედა. გლეხები იდგნენ ჯგუფ-ჯგუფად, ზოგი ეზოში გაბნეულ ქვის ლოდებზე ჩამომჯდარიყო, ზოგიც ეზოს გადაღმა თემშარაზე მოგროვილიყო, მსჯელობდნენ, საქმის ვითარებას თანდათან ეცნობოდნენ.

შუალამე იქნებოდა, რომ მოთათბირების შემდეგ მართალია

თოდუა, გელა ჯგერენაია და დავით ვიდელია აივანზე გამო-
ვიდნენ სხვებთან ერთად. მართალიამ ხალხს მოუხმო.

— ძმებო, მეგობრებო! ამდენი ხალხი შეგვეკრიბა ბატონების
უსამართლობამ. მოიგონეთ ყოველმა თქვენგანმა, თუ რამდენ
უსამართლობას, დამცირებას, შიმშილს, სიღარიბეს გადაუვლია
ჩვენს თავზე. რაკი იარაღს ხელი მოვკიდეთ, წავიდეთ ორულე
ეწერიში და იქ თავისუფლად მოვილაპარაკოთ ჩვენს საქმეებზე.

ამ სიტყვების შემდეგ მართალია წარუძღვა ზღვა ხალხს.
გელა, დავით და ვარლამი ურიცხვ ჯარს გამოეყვნენ და წაჩხუ-
რუს ეკლესიისაკენ გასწიეს. ფართო იყო ორულე ეწერი, მწვა-
ნე მოლით დაფენილი, მრავალწლიანი წიფლით გარშემორტყ-
მული და მინდორის ყვავილებით მოქარგული. აქა-იქ თხმელისა
და მაყვლის ბურქებიც გაბარდნილიყო.

შეგროვილი გლეხობა როგორც კი ფართო მინდორზე გაი-
შალა, გელა და დავითიც გამოჩნდნენ. მათ წინ მოუძლოდათ
მღვდელი და დიაკვანი. დიაკვანს წმიდა გიორგის ხატი მოჰ-
ქონდა.

— არ უყურებ ამ ჯოჯოხეთის მოციქულს? — მოუბრუნდა
გელა ვარლამს, — მღვდელი ხატის დანებებას რომ არ გვიპი-
რებდა?

ალბათ მებატონეებს მღვდლებიც იმაში ჰყავთ დარწმუნე-
ბული, რომ ღმერთი და ეკლესია მხოლოდ დედოფლისა და თა-
ვადებისაა, — თქვა დავით ვიდელიამ.

ხატი ერთ დიდ ხესთან დაასვენეს.

— ძმებო, მიმართა კვლავ მართალიამ ხალხს, — მე მარტო
ჩემით არაფერს ვთაოსნობ, ხალხმა ამირჩია. თქვენ, ჩემმა ძმებ-
მა, ამირჩიეთ გიწინამძღვროთ მებატონეებთან გამართულ ბრძო-
ლაში. ჩვენი მიზანია გლეხები მონობიდან გავათავისუფლოთ.
პირველ რიგში გამოვიყვანოთ სასახლიდან ყმები. დავასახლოთ
ისინი. მიწა თავადებს არ ეკუთვნით. მიწას ჩვენ ვამუშავებთ,
ჩვენი ოფლით ვრწყავთ მას. რატომ არ უნდა გვეკუთვნოდეს
მიწა-წყლის ნაწილი მაინც? დედოფალმა სულ ახლახან ის მი-
წებიც კი ჩამოგვართვა, რომელიც ჩვენ თათრის შემოსევის
დროს გავკაფეთ და დავხანით. ვისაც ძალა შეგვეწევდა, მტერს
ვებრძოდით, ტიტლიკანა ბიჭები კი აქ მიწას ამუშავებდნენ.
დედოფალმა ეს მცირე მიწაც წაგვართვა უსამართლოდ. ბეგა-

რაზე გამოსული გლეხი წისკვილში მინდს არასოდეს არ იხდიდა, გუშინ უმინდოდ სიმინდი არ დაგვიფუქვეს. ყველამ იცით, რამდენი ახალგაზრდა გლეხი ქალ-ვაჟი იყიდება ყოველწლიურად ჩვენი სოფლებიდან.

თქვენ ყველამ იცით რა საცოდავად დასწვა ცეცხლში ჯოლორიას ნაშიერმა ბეჟა დგებუაძემ გელას მამა მიხა ჯგერენაია. რით დასაჯეს სისხლისმსმელი ბეჟა? არაფრით. მოუწონეს სიმხეცე და კალთა გადააფარეს.

ადამიანები ღმერთმა ერთნაირად გააჩინა, ერთნაირად იბადება და კვდება, მაშ ჩვენ რისთვის უნდა გვექცეოდნენ პირუტყვზე უარესად? რატომ უნდა გვწვაოდნენ ცოცხლად ცეცხლში? შეეფიცოთ ერთმანეთს, რომ დაწყებული საქმე ბოლომდე მივიყვანოთ!

— შეეფიცოთ, შეეფიცოთ! — იგრილა ხალხმა.

მართალიამ განაგრძო:

— წმიდა გიორგი გაუწყრეს, მზე დაუბნელდეს, ცოლ-შვილი გაუწყდეს, ძმის სისხლი დაეღვაროს თავისი ხელით, სწყუროდეს და წყალი ვერ იშოვოს, შიოდეს და საჭმელი ვერ იშოვოს, ვინც ერთმანეთს უღალატოს, ღმერთმა ასე დააქციოს მისი ოჯახი! — თქვა მართალიამ და ქუდი მიწაზე დაანარცხა.

— ამინ, ამინ! — მოისმა ხალხის ხმა.

— ძმებო, — აიღო სიტყვა დაეით გიდელიამ, — ვინც სიტყვა გატეხოს, ბრძოლის დროს დაიმალოს, თავადაზნაურებში გაგაცვალოს, იმასაც ისე დაექცეს ოჯახი, თავი და ცოლ-შვილი! — იმანაც ქუდი მიწაზე დაანარცხა.

ერთ წუთში აუარებელი ქუდი და ყაბალასი ჰაერში აფრიალდა, შემდეგ მიწას დაცვივდა.

— ასე დაიქცეს! — იმასდნენ გლეხები და მათი გუგუნნი მთელ კუთხეს ედებოდა.

გლეხობას ჯერ კიდევ ქუდების დასურვა ვერ მოესწრო, რომ ახალგაზრდათა რიგებში სიმღერა გაისმა, სიმღერა ახლად შობილი. ვარლამ გაბედავა ამ ახალ სიმღერას თავისი წკრიალა ხმით იწყებდა.

„აბა, ძმებო, წასვლა, წასვლა, გამარჯვება ან სიკვდილი!“ ეს სიმღერა მოკლედ გამოხატავდა გლეხობის ბრძოლისა და გამარჯვების სურვილს.

სალიპარტიანოში აჯანყებულ გლეხთა ყიჟინა ჯერ მთელ სამეგრელოს არ მოსდებოდა, რომ ხობისწყლის მარცხენა ნაპირზე იფეთქა გლეხთა ამბოხებამ, მხოლოდ ეს იქ სხვა საბაბით იყო გამოწვეული: სოფლები ჯვარი და ლია ჯერ კიდევ დავითის სიცოცხლეში ბაღებად უნდა გადაექციათ, რადგან იქ მეფუტკრეობის გავრცელებას ფიქრობდა დადიანი; ახლა კი გრიგოლ დადიანმა ბრძანება გასცა ეს ადგილები გაეთავისუფლებინათ, იქ მცხოვრები გლეხები აეყარათ.

სოფლებში დედოფლის გზირები დაძრწოდნენ და გლეხებს ძალით აყრას უპირებდნენ. არავინ ზრუნავდა იმაზე, თუ სად მიეჩინათ მათთვის ახალი სამოსახლო ადგილი.

— გვასახლებთ, მაგრამ სად წავიდეთ, არ უნდა დავესახლოთ სადმე? მგლები ხომ არა ვართ, ტყე-ტყე ვიაროთ? — გაიძახოდნენ აღშფოთებული გლეხები.

ასე დაიწყო გლეხთა აჯანყება ხობისწყლის მარცხენა ნაპირზე, რომელსაც სათავეში უტუ მიქაევა ჩაუდგა.

უტუმ ბევრი მოხალისე შეაიარაღა ომერ-ფაშას ჯარისკაცებისათვის წართმეული შტუცერის სისტემის თოფითა და დამბაჩებით. ომის დამთავრების შემდეგ კი ეს იარაღი საიმედო გლეხებს ჰქონდათ სოფლად შენახული.

უტუმ სასწრაფოდ შეკრიბა გლეხები. ვისაც იარაღი არ ჰქონდა, წალდით, ცულით და აკაციის გრძელი კეტებით შეიარაღებულიყვნენ.

სოფელში აღმოჩნდა ისეთი ახალგაზრდებიც, რომლებსაც ჯერ ვერ მოეხერხებინათ უტუს ჯარში გაერთიანება.

ჩვიდმეტ-თვრამეტი წლის ტაგუ აკობიას ახალგაზრდული ცეცხლით გაუბრწყინდა გიშრისფერი თვალები, როცა გლეხთა აჯანყების ამბავი გაიგო. მას ბევრი და-ძმა ჰყავდა. დედა და მოხუცი ბებია ვერ აუდიოდნენ საოჯახო საქმეებს. მამა და უფროსი ძმები ლაშქარს შეერთებოდნენ. ტაგუ კი სახლში დარჩენილიყო, რადგან მოკლე, შინნაქსოვი ქვედასაცვლის მეტი არა გააჩნდა რა. ძლიერ მოწყენილი დადიოდა ტაგუ. ჭაბუკობის ასაკში შესული ვაჟი თავბელს იწყევლიდა, ლამაზ ქოჩორზე და საულვაშზე ხშირად გადაისვამდა ხელს, მით უფრო მამინ, როდესაც ახალგაზრდა გოგონებს შეხვდებოდა. მეზობლის ბევრი თანატოლი ბიჭი იყო მის მდგომარეობაში.

ტაგუს მამას ჯარში მყოფმა მეზობელმა ჰკითხა:

— ტაგუ რომ არ წამოგიყვანია, აუად ხომ არ არის?

მან გულახდილად თქვა თუ რა იყო ტაგუს აქ არყოფნის მიზეზი და თან დასძინა:

— ტანზე ჩასაცმელი როგორ არ უნდა ჰქონდეს ადამიანს. ამას ცხოვრება ჰქვია? გულდათუთქული დაუტოვე საწყალი ბიჭი შინ და სულ ამ მუქთახორების მიზეზით ვართ გლეხები ასე წელში გაწყვეტილი.

— იქნებ ჩვენც გავვითენდეს. შენ მაინც გეთქვა უტუსათვის ტაგუს მდგომარეობა, მოუსხერხებდა რამეს.

მართლაც, ტაგუ და მისი ამხანაგები იმ დღესვე შემოსეს და კაჟის თოფებიც მისცეს. აჯანყების ხელმძღვანელებმა კარგად იცოდნენ, თუ რა სიღარიბეს განიცდიდა სოფელი, ამიტომ ლაშქარში მოსულ მოხალისეებს თვითონვე ამარაგებდნენ.

ჯვარი და წალენჯიხა აჯანყების კერად იქცა. მათ ახლო მდებარე სოფლების გლეხობა შეუერთდა. უტუ მიქავას მოადგილეებად უტუ ჭანტურია, ხუსეინა კვირტია და ლევან კვარაცხელია იყვნენ. უტუ მიქავას ჯარში სულ მოკლე ხანში ათასობით აჯანყებულმა გლეხმა მოიყარა თავი.

მართალია თოდუას ჯარი სალიპარტიოში მოქმედებდა. მათ მოჰყავდათ მებატონეების სასახლეებიდან ახალგაზრდა ყმა ქალაქები, გლეხები აღარ იხდიდნენ არავითარ გადასახადს და ბეგარას. აჯანყებულებს თუ ვინმე წინააღმდეგობას გაუწევდა, მას სახლ-კარს გადაუბუგავდნენ.

დამფრთხალი თავადები გარბოდნენ ერთი სოფლიდან მეორეში, დაბებსა და ქალაქებში, სალიპარტიანოს კავშირი ჰქონდა ჯვარსა და წალენჯიხასთან.

უტუ მიქავას და მართალია თოდუას ერთმანეთის ნახვა სწყუროდათ, თავიანთი ჯარების ძმობისა და ერთსულოვნების განმტკიცება და გაერთიანება ეჩქარებოდათ. მართალია თოდუას თავისი ჯარი, რომელიც ბრძოლის ცეცხლით ანთებული ოთხი ათასი კაცისაგან შედგებოდა, წალენჯიხაში მიჰყავდა.

„ურდუმი“ (ასე უწოდებდნენ ამ ლაშქარს) წითელ დროშას მიაფრიალებდა.

სოფელ წალენჯიხაში დაბანაკებულ ლაშქარში ხმა დაირხა:

სალიპარტიანოდან მართალია თოდუა თავისი ურდუმით მოდი-
სო. ყველა აღაფრთოვანა ამ სასიხარულო ცნობამ.

უტუ მიქავამ ასეულების უფროსებს გამოუძახა და დაარიგა,
რივიანი შეხვედრა მოეწყოთ „ურდუმისათვის“. მოუთმენლად
ელოდნენ ძმობილებს აჯანყებულ გლეხთა სარდალი უტუ მი-
ქავა და მისი ჯარი.

მესამე დღეს წალენჯიხის მიდამოები ათასობით ამოძახილ-
მა შეაზანზარა:

— მოდიან, მოდიან! — გუგუნებდა ჯარი, თხმელითა და გვიმ-
რით გადაბურული ხევი აღამიანთა სიხარულს მოეცვა.

მართალია თოდუას ჯარის ავანგარდი ცხენოსნებისაგან შედ-
გებოდა. გუშინ უენო ბიჭები, ახლა მათსავე ბატონის ცხენებ-
ზე ამხედრებულნი, ამაყად გამოიყურებოდნენ. ომახიანი ყიჟი-
ნისაგან ისედაც შეშფოთებულ ცხენებს, მათი ყაბალახების
ფრიალი კიდევ უფრო აფრთხობდა, ჭიხვინებდნენ, ერთმანეთს
აწყდებოდნენ. ერთგული ასისტაეებით მხარდამშვენებული უტუ
მიქავა მალლობზე გადმომდგარიყო და ღიმილით ხვდებოდა
ურდუმის მებრძოლებს.

ახლოვდებოდნენ ისინი, ვინც გაბედულად გადაიარა მთები,
ტყე-ღრე. ჰაერი გააპო ახალმა საბრძოლო სიმღერებმა.

ჯარს წინ მოუძლოდა მართალია თოდუა, რომელიც მოხდე-
ნილად იჯდა ცხენზე. რომელ თავადს არ შეეხარებოდა მისი
ახოვანება ან ცხენოსნობა. ოციოდე ნაბიჯზე უტუ მიქავასაგან
თოდუამ ძალუმად მოსწია ცხენს სადავე, ყალყზე შემდგარმა
ცხენმა მაკრატელივით ათამაშებული წინაფეხები, ერთი წუ-
თით თითქოს ზეკას მიაბჯინაო, შეაყოვნა, შემდეგ დაბლა დაუშ-
ვა და ელვის სისწრაფით გადმომხტარი მართალია ღიმილით
გაემართა უტუ მიქავასაკენ. ცხენი კისერმოდრეკილი იდგა აღ-
გილზე, მიწას ტორავდა, თითქოს მეგობართა შეხვედრას დას-
ტურს აძლევდა. მიქავა და თოდუა ერთმანეთს ძმურად გადაეხ-
ვივნენ და სწორედ ამ დროს ჰაერში მრავალმა თოფმა იჭექა.
თოფისწამლის კვამლში გახვეული უტუ და მართალია ხელი-
ხელგადაჭდობილნი გაემართნენ ჯარისკენ. მოსულებს დამხვდუ-
რები შემოესივნენ. ურდუმის დინება კვლავ გრძელდებოდა, რა-
საც თოფების კანტიკუნტი ხმა მოწმობდა.

— როგორ ხარ, ძმაო? ხომ მშვიდობით გამოიარეთ ეს გრძე-

ლი გზა? — მზრუნველობით შეეკითხა უტუ მიქავა მართალიას.

— კაჟივით, ძმაო, კაჟივით! გზადაგზა სოფლები სიხარულით გვხვდებოდა, ურდუმს სულ ემატებოდა ვაჟკაცები.

— ბევრი მებრძოლი გყავს იარაღიანი?

— მხოლოდ ნაწილია თოფით და დამბაჩით შეიარაღებული, დანარჩენებს წაღლები და ნაჯახები აქვთ. იარაღს ვიშოვიო, — იმედინად თქვა მართალიამ. — ეს მითხარი, უტუ, შენ როგორ გაქვს საქმე, თორემ ჩვენ არც ისე კარგად: ჯერ ბევრი მებატონე დაგვიძვრა ხელიდან ისე, რომ იარაღის ჩამორთმევა ვერ მოვასწარიო! ლაჩრები! სადაც წავეწიეთ, იცოცხლე, უმალ აეყარეთ იარაღი.

— იარაღი ჩვენ გვაქვს, მართალია! იმდენი არა, რამდენიც საჭიროა, მაგრამ, არაფერია, თანდათან ვიშოვიო! მთავარია, ზუგდიდი და სენაკი ავიღოთ, მებატონეთა ბუნაგი მოვსპოთ, მერე ყველაფერი გაჩნდება!

უტუ მიქავამ ისე ძლიერად დააკვესა გამჭრიახი თვალები, რომ მისი შინაგანი ძალა და შეუდრეკლობა მარტო ასეთი გამოხედვითაც იგრძნობოდა. შემდეგ უტუ მოადგილეებს მიუბრუნდა.

— აბა, თავი მოუყარეთ ათისთავეებს და ასისთავეებს. მართალია, შენი ჯარის ხელმძღვანელებს გამოუძახე!

მართალია შეიჭმუნხნა:

— რა კარგი წესები გქონია, უტუ. მე არა მყავს ათისთავეები და ასისთავეები, მხოლოდ მოადგილეები მყავს, გელა ჯგერენაია და დავით გიდელია.

— ოჰო, — გაუხარდა უტუს, — ეს ვეფხვები ჩემთან ერთად იბრძოდნენ ომერ-ფაშას წინააღმდეგ. კარგი მოადგილეები გყოლია, მაგრამ არ კმარა. ჩემი ფიქრით, ჯობია გაანაწილო მეომრები და დაუნიშნო უფროსები.

— მეც ვხედავ, რომ ასე ჯობს. მომავალში ასე მოვიქცევი, ახლა კი, მოადგილეები დავისწროთ, რჩეულ ვაჟკაცებსაც დავუძახებ — ვარლამ გაბედავას, მაქსიმე კოკაიას, პორფილე ოკუჯავას, ბეჩუნა ხვიჩიას. ასლა მე მინდა ჩემი აზრიც გაგიზიარო, უტუ. შენ ისეთი კარგი წესრიგი გაქვს და ისეთი ჭკუა-გონების კაცი ყოფილხარ, რომ ჩემი და შენი ჯარის წინამძღოლი შენ

უნდა გახდეს. ცხენისწყლის მარცხენა მხარეზედაც შენს ბრძანებას უნდა ვასრულებდეთ, მაშინ უფრო ძლიერი გავხდებით.

— მართალია, შენ ცუდად არ გაძლოლიხარ საქმეს. მარტო შენი ურდუმი და მისი რიგების წინ ბაირალის ფრიალი დაუესებს მტერს თვალებს. რაკი შენ ასეთ პატივს მანიჭებ, მაშინ ჩვენს გაერთიანებულ ჯარებსაც ურდუმი დაერქმევა, ეს კი ჩვენი საერთო დროშა იქნება!

* * *

სალამოს მეთაურების კრება შედგა. მათ მთავარ მიზანს შეადგენდა ზუგდიდისა და სენაკის აღება; ბევრი საკითხი შეუთანხმეს ერთმანეთს. იქვე, მწვანეზე, სახელდახელო სუფრა გაიშალა.

ქალებს გულუხვობითა და სტუმართმოყვარეობით მოეტანათ შვილებისა, ძმებისა, ქმრებისა და მამებისათვის აუარებელი სანოვავე. თვითონაც აქ ტრიალებდნენ ეს ახალგაზრდა ქალები, მებატონეებისაგან წამოყვანილი გოგონებიც ემსახურებოდნენ თავისუფლებისათვის მებრძოლ ვაჟკაცებს. ხელიდან ხელში გადადიოდა თიხის პატარა დოქები.

ერთმანეთს ლოცავდნენ უტუ მიქავასა და მართალია თოდუას მოლაშქრენი.

ბოლოს აიშალნენ, თავთავისთვის დაეწყნენ, მართალიას ჯარმა გამოსათხოვარი სალამი მისცა უტუს ჯარს. მეთაურებმა ერთმანეთს მაგრად ჩამოართვეს ხელი, გამარჯვება უსურვეს.

ისევ გაისმა აჯანყებულების საყვარელი სიმღერა: „წასვლა, წასვლა, გამარჯვება ან სიკვდილი“!

მართალიას ჯარი წალენჯიხიდან ოჩხომურისკენ გაემართა, რომ იქ დაესვენათ და შემდეგ ისევ სალიპარტიანოში გამაგრებულიყვნენ.

გლეხთა აჯანყება სამეგრელოს ფეოდალებმა სხვადასხვა პირობებში გაიგეს. ზოგმა მებატონემ აჯანყების ამბავი მხოლოდ მაშინ იგრძნო, როდესაც მისი ოჯახიდან ყმები წაიყვანეს და იარაღი წაიღეს. დაბნეულ მებატონეებს უკვირდათ: როგორ ბედავს გუშინდელი მონა-მორჩილი გლეხი, რომ დღეს მამაპაპეულ თოფ-იარაღს მტაცებს და ჩემს თვალწინ თვითონ იარაღ-

დებო. ზოგი მათგანი წინააღმდეგობის გაწევას ფიქრობდა, მაგრამ ამოდ. შეშინებული მებატონეები გარბოდნენ.

გლებთა აჯანყების ამბავი მაიას სასახლეში გელა ჯგერენაიამ შეუთვალა ლერწამისას.

კარგად გათენებული არ იყო, რომ ლერწამისამ ტანზე ჩაიცვა, მისმა ხმაურმა თუთანა გააღვიძა.

— რა დაგესიზმრა, გოგო, ასე ადრე რომ წამოვარდი და გამაღვიძე?

— არ დამეძინა, სულ გელას ნათქვამზე ვფიქრობდი. ნეტა რა იქნება, რით დამთავრდება ვითომ ეს ამბავი?

— რა ვიცი, ვინახოთ რა იქნება.

ქალიშვილებს ლაპარაკი არ დაემთავრებინათ, რომ მაიას ოთახიდან ვერცხლის ზარის წკრიალი მოისმა. ლერწამისამ სწრაფად შეაღო ქალბატონის ოთახის კარი.

— მოდი, ლერწამისა, ჩაცმაში მომეხმარე. ჩანს, კარგი დილაა, მეჩქარება ჰაერზე გასვლა. — უთხრა მაიამ ლერწამისას.

ლერწამისა გულმოდგინედ ემსახურებოდა მაიას, წინასწარ გრძნობდა, თუ რა სურდა ნებიერ ქალს. მაიასაც ამიტომ უყვარდა ლერწამისას დასაქმება, მისი გარეგნობაც სიამოვნებას გვრიდა მას; იმიტომ იყო, რომ თუთანა უფრო საკერავ-საქარგავს მიუჩინა, ხოლო ლერწამისა მუდამ თავისთან ჰყავდა. ამ დილით მაიამ შეამჩნია, რომ ლერწამისა უხალისოდ ემსახურებოდა, დაბნეული იყო, ვერაფერს აგნებდა — პირსახოცის მაგივრად თეთრ მანდილს მოჰკიდა ხელი, მიხვდა თავის შეცდომას, გაწითლდა.

— აჲად ხომ არა ხარ, ლერწამისა, უფერულად გამოიყურები? — ჰკითხა მაიამ.

ლერწამისა შეკრთა, თითქოს გულში ჩახედეს და საიდუმლო ამოიკითხესო.

— კარგადა ვარ, ქალბატონო, თქვენს მზეს ვფიცავ! ადრე ავედქით მე და თუთანა. ალბათ იმიტომ გეჩვენებით გალახული, — ამბობდა ლერწამისა და თან გული უკვლებოდა, რომ სიმართლეს მაღავედა.

ამ დილით მაიას მოახსენეს ძიძიშვილების მოსვლა, არ ელოდა მათ, სულ რამდენიმე დღის წასული იყვნენ. მაიამ საჩქაროდ იხმო ვარლამი და ჭუტულა.

— ხომ არაფერი გაგიჭირდათ, ძიძა ხომ არ არის ავად? — ჰკითხა მაიამ.

— არა, ბატონო, ყველანი კარგად გახლავართ. — მოახსენა ვარლამმა მაიას. — მე მართალია თოდუას ურდუმში ვარ. ახლა ჭუტულას წასაყვანად ჩამოვედი. საჭიროდ მივიჩინე, მაია ბატონო, შენთვის შეცნობებინა.

— უტუსა და მართალიას ამბავი მე უკვე მაცნობეს, მაგრამ ის კი არ ვიცოდი, თუ შენც იმათთან იყავი.

ლერწამისა, რომელიც თავის ქალბატონს თავზე ადგა, ცნობისმოყვარეობამ შეიპყრო, მაგრამ თან ეშინოდა: ვაითუ ჩემთან არა თქვანო, ვარლამმა კი მოურიდებლად დაიწყო:

— სადაც სხვებია, იქ მეც უნდა ვიყო, ქალბატონო. ჩვენ ერთმანეთის საქმისთვის ვიბრძვი. მე რა გამაჩერებს შინ.

— რა საქმისათვის, ბიჭო?

— ადამიანური ცხოვრებისთვის.

— კიდევ რაო?

— რა ვიცი, ბატონო, რამდენი გასაჭირი გითხრა გლეხის... ძიძამ გადმოგვყარა, ბატონიშვილს არაფერი უჭირდეს, მთავარი კონსტანტინე აქ არ ბრძანდებო.

მაია ჩაფიქრდა, ხოლო ლერწამისას თავისი გულის ბაგაბუგა საათივით ესმოდა, ვერც წასვლას ახერხებდა, გული საგულეში არ ეტეოდა. ის ახლა მხოლოდ გელაზე ფიქრობდა, მებატონეზე გამარჯვებულ გელაზე, რომელსაც მიეცემოდა საშუალება საკუთარი ოჯახი შეექმნა.

მაიამ თავი აიღო და იკითხა:

— ვის ასახელებენ მომავალ მთავრად?

— ამბობენ მთავრის შვილს კონსტანტინესო, რადგან გრიგოლი არ ინდომებს თურმე მთავრობას.

— კონსტანტინე რომ არ არის?

— ჩამოვა, ბატონო!

მაიამ ხელი ჩაიქნია.

— ძიძა აქეთ ჩამომიყვანეთ, საჩქაროდ. ის ახლა შეშინებული იქნება. ჩემთან უფრო დაისვენებს. თქვენც ჩემთან იყავით, რამე არ შეგემთხვეთ!

— ჩვენ რა შეგვემთხვევა, ბატონო! — უპასუხა ვარლამმა, ხო-

ლო ჭკუტულამ ახლაც არ უღალატა ჩვეულებას და მიაა გამოა-
ჯავრა:

— არა, ჩვენ აჯანყებულ გლეხებს ამოვუდგებით გვერდში.
გვეყოფა ამდენი ხანი ბატონობა.

— მე ნუ მოგიკვლები, მითხარი, გელა ურევია თუ არა ამ საქ-
მეში?

— თუ ურევია, ის ურევია, ბატონო. მართალიას მარჯვენა
ხელია.

— რამდენი უბედურება შეიძლება მოუტანოს ხალხს ცუდმა
მმართველმა! განა ქვეყნის მოვლა ასე ადვილია, როგორც ჩემს
რბალს ჰგონია? ალბათ გაამწარა ხალხი, ამ ხვნა-თესვის დროს
ოჯახებიდან რომ გადაცვივნენ.

— ხალხს, ბატონო, სისხლი გაუშრეს დედოფლის მოურა-
ვებმა. ამდენი გადასახადი ჯერ გლეხობას არ მოსწრებია, ან რა
სიმკაცრე შემოიღეს! ახალგაზრდებს ოჯახები ვერ შეუქმნიათ
მაგათი შიშითა და უსინდისობით.

ლერწამისა განაგონს გულში იხვევდა, თან ფიქრობდა: „რო-
დის ვნახავ გელას, რომ ყველაფერი უუამბოო“.

უ ნ ი ა ლ ა გ ო ნ ი

შუალამე იქნებოდა, როდესაც ჯოღორია ღებუაძის შვი-
ლი — ბეჟა მიაას სასახლეში მიიჭრა. ყველას გაუკვირდა ასე
უდროო დროს სტუმრის მოსვლა, მით უფრო, რომ ბეჟა მიაას
სასახლეში არასოდეს არ ენახათ. ის საზოგადოდ გაურბოდა
თავად გრიგოლის შთამომავლობას. როგორც მამამისს, ისე
მასაც მთავრის შტო არ უყვარდა.

ჯოღორია ახალგაზრდობაში წარმოსადეგი ვაჟკაცი იყო.
მის მრისხანე სახეს სიმღერა და მხიარულება ძლიერ უხდებ-
ოდა. კარგ მომღერლად და მოცეკვავედ ითვლებოდა, ჯირით-
ში ბადალი არ ჰყავდა. მთავრის ამაღლაში პირველი კაცი იყო.

ერთ დღეს, ლევან დადიანის მამას, გრიგოლ დადიანს თავი-
სი ძმა მანუჩარი ჰყოლია სტუმრად. მთავარი წინადლით სანა-
დიროდ ყოფილა.

აუარებელი ნანადირევი: ჯიხვი, შველი, კურდღელი სამზა-

რეულოში იწვებოდა. ცხელ-ცხელი მწვადები ზედიზედ მოდიოდა სუფრაზე. ხელიდან ხელში გადადიოდა ყანწები და აზარფეშები. დიდი დარბაზის ერთ-ერთ კუთხეში გლეხის ლამაზი გოგონები დროდადრო ჩინგურს აწკრიალებდნენ და თან ნაღვლიანი ხმით მღეროდნენ. სუფრაზე მრავალჯამიერსა და ხელხეავს ჯოღორია იწყებდა.

მომღერლებში გამოირჩეოდა ბასაია ჯანჯღაეა. ის ჯოღორიას სკამთან იდგა, ხშირად წაართმევდა ჯოღორიას ხელხეავის დაწყებას და შემდეგ მოძახილზე გადავიდოდა. ბასაია სიმღერის გარდა, თავისი მახვილი ენითაც გამოირჩეოდა. კარგი გარეგნობით, ენამჭკვერობითა და სიმღერებით ის სასახლეშა კარგად იყო მიღებული. ჯანჯღაეა ხანდახან ისეთ რამეს ჩაურთავდა ხუმრობაში, რომ სხვა გლეხს ასეთი საქციელისთვის ენას ამოაგლეჯდნენ.

ყოველივე ეს არ ცვლიდა მის მონურ მდგომარეობას. ახალგაზრდა კაცს ვერც ცოლის შერთვის ნება აეღო, ვერც ცალკე დასახლებისა და ეს მშვენიერი ვაჟკაცი ხშირად იტყოდა:

— რა არის ჩემი სიცოცხლე? არ მეძღერება, მაგრამ უნდა ვიმღერო; მეძინება, მაგრამ უნდა ვიფხიზლო, ვიდრე ბატონებს ღზინი არ მოწყინდებათ. არც შვილი, არც ცოლი, არც ოჯახი. ყოველთვის იმის შიშით ვწევები: აი ახლა გამაღვიძებენ, სტუმრები მოვიდნენ, იმათ გასართობად გვეახელიო.

გრიგოლმა პირველი სასმისით მანუჩარის სადღეგრძელო შესვა, მას ისე უყვარდა თავისი უმცროსი ძმა, რომ მისთვის გავარჯარებულ საკირეში გადავარდებოდა.

— საყვარელო ძმაო, ბედნიერი იყავ, სამშობლოს მოყვარული, კარგი ქართველი! ჯერ ახალგაზრდა ხარ, გიყვარს ღზინი, გიყვარს ყოველივე კარგი და ლამაზი. ამისათვის დამილოცნია შენთვის ჩემს ამაღლაში ყოველმხრივ თვალსაჩინო ჯოღორაადღებუაძე, ორივე ახალგაზრდა ხართ, ერთმანეთი დაამშვენეთ.

მანუჩარი გახარებული წამოხტა, მივიდა ძმასთან, მადლობა გადაუხადა და თავზე ეამბორა. ყველანი ფეხზე იდგნენ, სანამ ეს ცერემონიალი ხდებოდა, შემდეგ დასხდნენ, ჯოღორია კი ისევ ფეხზე იდგა. მისი თვალეები მრისხანედ გამოიყურებოდნენ, ხოლო სახეს ნაცრისფერი დადებოდა.

— ჯოღორია, რად არ ჯდები? — შენიშნა გრიგოლმა,

— ამის შემდეგ აქ ჩემი ადგილი აღარ არის, მთავარო მე მთავრის შვილის, მანუჩარის ამაღლაში დაეჯდები, — თქვა უკმაყოფილოდ, თავის სკამიანად წავიდა და მანუჩარის მხლებელთა შორის დაჯდა. სუფრის წვერებმა უხერხულობა იგრძნეს, ჯოლორიას კი ახრჩობდა ყელში მობჯენილი სიტყვები:

— მე მწვევარი ვიყავი, რომ ჩემს დაუკითხავად ეს გამიბედეს? მხლებელი ვიყო და ისიც მანუჩარის? მე თუ ჯოლორია დგებუაქე ვარ, გაჩვენებ შენს სეირს, დაგიჯენ ფასად ამ შეურაცხყოფას!

მან ვერ თქვა ეს სიტყვები, გულში ჩაიკლა და მოწყენილი დაჯდა თავის ახალ ადგილას. ლხინი ისე გათავდა, რომ ჯოლორიას არ უმღერია, სულ იმაზე ფიქრობდა, თუ როგორ გადაეხადა გრიგოლისათვის სამაგიერო.

ჯოლორიამ სულ ორ-სამ წელიწადში მოახერხა საყვარელი ძმების გრიგოლისა და მანუჩარის ერთმანეთზე გადამტერება. მანუჩარმა თავის ძმას მთელი სალიპარტიანო წაართვა ჯოლორიას რჩევითა და შემწეობით. გრიგოლი ჯერ ლენსუბში გაიქცა, შემდეგ იმერეთში ჩავიდა სოლომონ მეორესთან, რომელიც მისი სიძე იყო.

მთავარ გრიგოლის ცოლი ერეკლე მეფის შვილიშვილი იყო.

როდესაც მეფე ერეკლეს სამეგრელოს მდგომარეობა მოახსენეს, მან თავისი შვილიშვილი, გიორგი მეთორმეტის ვაჟი, იოანე გამოგზავნა ამ საქმის მოსაგვარებლად.

იოანემ შეარიგა გრიგოლი და მანუჩარი, დაუდო ზღვარი მათ მამულებს.

მანუჩარმა, ჩანს, დიდი მამული მიიღო მორიგების შემდეგ, რომ ჯოლორიას მისადმი ერთგულებისათვის ნამიკოლოუს ციხე-სიმაგრე აჩუქა რამდენიმე სოფლით. ბუნებით მკაცრი და შურისმაძიებელი ჯოლორია ისე გაბატონდა, რომ მთელი კუთხე შიშის ქვეშ ჰყავდა. გრიგოლის მიერ მიყენებული შეურაცხყოფა ყოველთვის შურისსამიებლად იწვევდა. ეს გრძნობა გრიგოლის შვილებზე და შვილიშვილებზედაც გადაიტანა. კიდევ უფრო გაღრმავდა შურისძიების გრძნობა იმ შეურაცხყოფის შემდეგ, რომელიც მას მთავარმა დავით დადიანმა მიაყენა.

დავით დადიანმა ბაბუა გრიგოლის და მამის ლევანის სიკვდილის შემდეგ ჯოლორია ისევ დაიახლოვა. ეს თვალსაჩინო თა-

ვადი მას მოსწონდა, ამაღლას უმშვენებდა, მაგრამ, ამავე დროს, არ ენდობოდა: კარგად იცოდა თუ რა დღე დააყენა ჯოლორია პაპამისის გრიგოლს. დავითი ცდილობდა, ჯოლორია ახლოს ჰყოლოდა და ამასთან, არ მიეცა მისთვის სალიპარტიანოში პარპამისის საშუალება.

დავით დადიანს ერთ დღეს საჭილაოდან წარჩინებული აზნაური გიორგი კორძაია ესტუმრა თავისი ცოლით, რომელიც იმპერეთში სილამაზით იყო განთქმული.

მთავარმა შეამჩნია, რომ ჯოლორია ზედმეტი ყურადღებით ექცეოდა კორძაიას მეუღლეს და ანიშნა, მეტი თავდაჭერით მოქცეულიყო. ჯოლორია კი, რაც მეტად შედიოდა ლხინში, უფრო გათამამდა. დავითს ეწყინა და სტუმრების წასვლის შემდეგ უბრძანა:

— დღესვე გაიპარსავ წვერს და ისე ივლი სასახლეში.

ჯოლორია იცოდა რისთვის გაიმეტა მთავარმა ასეთი სასტიკი სასჯელისათვის, იმასაც მიხვდა, რომ არ აპატიებდა. ან ბრძანება უნდა შეესრულებინა ან თავი უნდა გაეწირა. დიდი ფიქრის შემდეგ გულისტკივილით გამოეთხოვა თავის წაბლისფერ წვერს და იმავე ღამეს გადაიხვეწა სასახლიდან, მთავარს კი დაუბარა: არც შენი ამაღლა მინდა, არც შენი თავი, აღარ მომიკითხო, ნუ შემავიწროებ, მტრად ნუ გამიხვდი, ამის შემდეგ მაინც დაკმაყოფილდი ჩემი დამცირებითო. შენ მესამე ხარ შენი გვარიდან, რომელიც ასე მამცირებ, სამაგიერო მოგიზღოს ღმერთმაო.

რა თქმა უნდა, იცოდა რა ბეჭამ, თუ რა შეურაცხყოფა ჰქონდა მამას მიყენებული დადიანებისაგან, ის სასახლის მოყვარული არ იქნებოდა. მას სამტრო-სამოყვროდ არ ეძებდა.

ამის მოგონებამ და ეკატერინეს სიძულვილმა მიიყვანა ბეჭა მაიას სასახლეში.

მაიას არ უნდოდა იმ ღამეს ახირებული სტუმრის მიღება, მაგრამ ისიც იცოდა, რომ მამაზე მგლოვიარე ბეჭას დიდი საქმე რომ არ ჰქონოდა, სასახლეს ასე გვიან არ ეწვეოდა.

ქვეყნის ამბავი ეცოდინება ამ კაცსო, იფიქრა საწოლ ოთახში წასასვლელად გამზადებულმა მაიამ.

ერთმანეთის მისალმების შემდეგ მაიამ ბეჭას მოურიდებლად ჰკითხა:

— რამ შეგაწუხა, თავადო, რაზე გარჯილხარ? რითი შემიძლია გემსახურო?

ბეჟამ მდაბლად დაუკრა თავი.

— გაჭირვებამ მომიყვანა შენთან, მაია, შუალამეზე. მამაჩემის საცოდავად დალუპვის ამბავი მოგეხსენებათ. მისი მკვლელი რომ ჩვენი ყმა გელა ჯგერენაიაა, ესეც ალბათ იცით. მკვლელი რომ ვერ ვიგდე ხელთ, შური მამამისზე ვიძიე. მეგონა დედოფალი დამიფარავდა აჯანყებულთაგან, მაგრამ დედოფალმა მეკი არა, მთელი სამთავრო საჯიჯგნად მიუგდო აჯანყებულ გლეხობას და თავისი სახელისა და სიამოვნებისათვის პეტერბურგს წაბრძანდა. როგორც იცი, ჯოღორიას, გრიგოლიდან მოყოლებული არც ლევანისაგან, არც დავითისაგან არ დაჰკლებია სიმწარე და შეურაცხყოფა. პირდაპირ გეტყვი, ბატონიშვილო, თუ უბედურმა მამაჩემმა ვერ შეძლო სამაგიერო მიეზღო აწ განსვენებული მთავრისათვის, ახლა მე მინდა დედოფალს მაინც ვუმუხთლო. მთელი გლეხობა აღუდგა ეკატერინეს. უკეთეს დროს ვერ ინატრებს კაცი მისი ტახტიდან გადაგდებისათვის. აჯანყებულები არც გრიგოლ დადიანს დაინდობენ: შენი მეუღლე კონსტანტინე არავის სძულს, მაგრამ ის აქ არ არის. მის ჩამოსვლამდე სამთავროს შენ ჩაუდექი. ახლა არავის აირჩევს შენს მეტს თავადაზნაურობა. მე მთელი სალიპარტიანო ხელში მყავს და მხარს დაგიჭერ. გლეხებს უყვარხარ, პატივს გცემენ, შენს სიტყვას დაუჯერებენ. თუ მამაშენი გიორგი და ბიძაშენი პეტრეც ამოგიდგებიან მხარში, აჯანყებულები მათი ხათრილი იარაღს დაყრიან. თვით აჯანყებულები ავიყვანენ ტახტზე, ბატონიშვილო.

მაია ფარული აღტაცებით უსმენდა ბეჟას.

— მიმსახურე რითაც გენებოს, მაია... მაგრამ ამ სამსახურისათვის ერთსა გთხოვ... — არ დაუცადა მაიას შეკითხვას, თუ რასა თხოვდა, — ტახტზე ასვლის შემდეგ გელა ჯგერენაიას ხელთ ჩაგდებაში უნდა დამეხმარო და არ დამიშალო მისი სასტიკად დასჯა.

ბეჟას წინადადებას მაია კიდევაც გაახარა და კიდევაც შეაკრთო. მას თავში ბუნდოვნად ეხატებოდა, თუ ვის წინააღმდეგ იყო მიმართული აჯანყება — მარტო დედოფლის თუ საერთოდ თავადაზნაურობის. თუმცა ისიც კარგად იცოდა, რომ ბევ-

რი თავადი და აზნაური არ ჩამორჩებოდა მთავრის ოჯახს გლეხების გაყვლეფასა და დამცირებაში.

— თუ ეს აჯანყება თავადაზნაურობის წინააღმდეგ არის მიმართული, მე რად მინდომებს გლეხოვა, კიდევ რომ დაეთანხმდეთ? ხალხი, ალბათ, თვითონ აირჩევს მთავრობას ისე, როგორც ეს საფრანგეთში მოხდა, — უთხრა მამამ ბეჟას.

— ხალხი ცხვარია, ბატონიშვილო, რისი საფრანგეთი! ყმა უტუიას მაგდენი არ ესმის, მათ ახლა სულ ცოტა რამე შეღავათი დააკმაყოფილებს და გააჩერებს.

— არა მგონია, რომ ადვილ საქმეს მთავაზობდე. ხალხს რასაც დაჰპირდები, ხომ უნდა შეეუსრულო! მე იმის იმედი არა მაქვს, რომ თავადაზნაურობა მომყვება და შევრცხვები, ხალხის წინაშე დანაპირებს ვერ შევასრულე ყოველ შემთხვევაში, ესოდენ დიდი საქმე მამასა და ბიძასთან მოუთათბირებლად არ გადაწყდება, ჩემო ბეჟა.

გვიანობამდე საუბრობდნენ მამა და ბეჟა. ლერწამისა შიშით უსმენდა ბეჟას, რომელზეც ამდენი სიმკაცრე და აკაკოპა ჰქონდა გაგონილი.

ბეჟა ახლა გელას დასჯის სურვილით იყო შეპყრობილი. უკვირდა ლერწამისას, რომ მამა თითქოს იზიარებდა ბეჟას აზრებს, მაგრამ არ სჯეროდა ქალბატონის სიტყვების. არ უნდოდა გაეგონა მათი ლაპარაკი.

ოთახიდან გასვლა ყველაფერს ერჩია; ვინმე მხლებელი ეყოლება ბეჟას, გელას ამბავს გაეიგებდო, მაგრამ აქაური ლაპარაკის მოსმენაც უნდოდა, ყველაფერი ეს ხომ მის მოძმე გლეხებს და გელას შეეხებოდა.

სასადილოში ბეჟას ვახშამი გაუწყვეს, მაგრამ ხელი არაფერს ახლო, ნამგზავრმა და აღელვებულმა ლოგინს მიაშურა.

როცა ბეჟა მამას ესაუბრებოდა, გელა სამზადში მამას მონაღებთან იჯდა და აჯანყებულთა ამბავს უყვებოდა. მონაღებმა გელას ნაამბობით როგორც კი გული იჯერეს, ზოგმა გადაწყვიტა წაყოლოდა თან, შეერთებოდა მართალია თოდუას ურდუმს. მერე გელას უთხრეს სასახლეში ბეჟას ყოფნის ამბავი.

პირველი აზრი, რომელმაც გელას გაუელვა, იყო შევარდნოდა სასახლეში მამას და მის თვალწინ აეკუწა მამის მკვლელი. მაგრამ ეს მამას დიდი შეურაცხყოფა იქნებოდა. გარდა

ამისა, მაიას ერთგული მოინალეები ამის ნებას არ მისცემდნენ.

— გამოიხმეთ როგორმე ლერწამისა, — შესთხოვა გელამ მოინალეებს.

— ძნელია ლერწამისას გამოძახება, — უთხრა გელას ერთმა ხანშიშესულმა ქალმა, — ის ქალბატონის ოთახის გვერდით წევს, მაგრამ მე მაინც ვცდი.

გელა ჭადრის ქვეშ ელოდა ლერწამისას. იგი ყელამდე იარაღში იჯდა. თავზე ყაბალახი ჰქონდა წაკრული. ლერწამისამ იგი ერთბაშად ვერ იცნო. ერთხანს გაშემებული უყურებდა და როცა დარწმუნდა, რომ მართლა გელა იყო, კინაღამ გული შეუღონდა აღელვებისა და გაკვირვებისაგან.

— გელა, შენი ჭირიმე... ნუთუ შენა ხარ ასეთი...

— მე ვარ, ლერწამისა, — უთხრა ჩურჩულით გელამ, ნაბადი მოაფარა და თხილნარისაკენ გაიტაცა.

— რას ჩადიხარ, გელა, — შეშინდა ლერწამისა. — დაგვინახავენ, რას იფიქრებენ.

— რაც უნდათ ის იფიქრონ! — უთხრა ვაჟმა და ხელი მოხვია ქალს, მაგრამ დროზე შეიკავა თავი. — ყველამ იცის, რომ შენ ჩემი ხარ და დღეს თუ ხვალ ჩემი ცოლი იქნები. ცოტაც მოითმინე, ძვირფასო, — ღელაუდა, ადამიანის ფერი არ ელო. — მითხარი ლერწამისა, ბეჟა რომელ ოთახში წევს.

— არ გაბედო, ქალბატონის სახლში, არ გაბედო, გელა, — კინაღამ მიაკივლა ლერწამისამ. — სხვა დროს, სხვა ადგილზე, ახლა არა, ახლა არა...

— კარგი, ახლა არა, — უთხრა გელამ ლერწამისას. — მითხარი, რისთვის მოვიდა ის ძაღლისშვილი ქალბატონთან?

— ტახტი ჩაიგდე ხელში და დედოფლად დაჯექიო.

— რაო?!

— აჯანყებულ გლეხებს ცოტა რამ შეპირდი და თვითონ დაგსვამენ თავის ხელით ტახტზეო. მერე გელას ვაკოცვაში დამეხმარე და მისი დასჯა არ დამიშალოო.

— მერე მაიამ რა უთხრა?

— რავარც ჩემ შვილს არ გავიმეტებ, ისე გელა ჯგერენაიას არ დაგანებებო. — იცრუა ლერწამისამ, რომ გელა დაემშვიდებინა და მაიას წინ არ აეკუსა ბეჟა.

— ვითომ ასე თქვა? — ჰკითხა დაეჭვებით გელამ.

— რა მაქვს დასაფიცარი, ჭირიმე.

— კარგი, დაგიჯერებ. მაიას მოტყუებას აპირებს ის ქაჯის შვილი. უნდა ვიხსნათ ქალბატონი.

— მერე როგორ, გელა. ხვალ ვიორგი და პეტრე ჰყავს დაბარებული. მგონი ჭკუაში დაუჯდა ბეჟას რჩევა და მართლა დედოფლობას აპირებს.

— თუ ვიორგისა და პეტრეს დაეკითხება ჭკუას, ისინი მოიყვანენ გონზე და აალებინებენ ხელს ამ ცდუნებაზე. ჩვენ იმიტომ კი არ ავჯანყდით, ლერწამისა, რომ ერთი დედოფლის ადგილზე მეორე დედოფალი დავსვათ.

— მაიასაც არ დაინდობთ? — შეიცხადა შიშით ლერწამისამ.

— რითი აჯობებს მაია ეკატერინეს?

— უიმე, გელა, ამას რას ამბობ? უმთავროდ და უდედოფლოდ გინდათ იყოს ქვეყანა?

— აბა რისთვის ავისხით იარაღი, ლერწამისა. დავანებოთ ამაზე ლაპარაკს თავი, ჩემო სიცოცხლე. შემომხედე, როგორ გალამაზებულხარ, ლერწამისავ.

— გელა, — ქალს ხმა გაეზარა. მკერდზე მიეკრა ვაჟკაცს. — ამდენი იარაღი რად გინდა, ჭირიმე. — შეერთა ცივი რკინის მიკარებაზე ქალი, მაგრამ გელამ იგი მკლავებში მოიმწყვდია.

ორივეს გულს ისეთი ბაგაბუგი გაჰქონდა, ასე ეგონათ სასახლეში და სამზადისში გაიგონებენო და კიდევ უფრო შემჭიდროვდნენ, გულისცემა რომ ჩაეხშოთ.

— წამიყვანე შენთან, გელა.

— მალე დადგება ეს დრო და წაგიყვან, ლერწამისა.

— რატომ ვუცადოთ დროს? მეც ვიბრძოლებ შენთან ერთად.

— იბრძოლებ? — გაიცინა გელამ.

— რატომ იცინი, გელა? — იწყინა ლერწამისამ. — შენს გვერდით მე ყველაფერს შევძლებ, ცეცხლში და წყალში გავალ.

— შენ რომ არ გინდა დედოფლის გადაგდება, ქვეყნის უმთავროდ დატოვება?

— არ მეგონა, ქვეყანა თუ უმთავროდ და უდედოფლოდ ივარგებდა. ეს შენ და უტუმ უკეთ იცით. წამიყვანეთ ურდუმში, გელა, — შევედრა ლერწამისა და სახე ახლო მიუტანა.

ორი ათრთოლებული ბაგე ერთმანეთს მიუახლოვდა. ერთხანს

ლერწამისა და გელა გაქვავებულივით იდგნენ, მერე მათი ბაგე-
ები შეერთდნენ და დიდხანს არ მოშორებიან ერთმანეთს. ქალს
ტანი დაუმძიმდა, მოეშვა.

— ლერწამისა, ჩემო სიცოცხლე, — ჩურჩულებდა გელა. —
მალე დადგება ჩვენი დღე.

— ახლა წამიყვანე, გელა.

— ვერა, შენ აქ ხარ ახლა საჭირო. გამიგე რას იტყვიან გი-
ორგი და პეტრე.

ლერწამისამ კისერზე შემოსვია მკლავები გელას.

— მეშინია, გელა, თავს გაუფრთხილდი.

— ჯავრი ნუ გაქვს. მე არაფერი გამიჭირდება.

— ბეჟას გაუფრთხილდი, ხომ იცი ჯოღორია ღებუაძის
შვილია.

— ბეჟას ხალხში გაეუსწორდები, საქვეყნოდ. ბნელაში არ
მოვეკლავ, ტყვიას არ ვესვრი. ხმალში გამოვიწვევ. აბა, წავე-
დი, სიხარულო! მაშ ასე, — გულში ჩაიკრა ლერწამისა გელამ,
მერე სწრაფად მოშორდა, ლობეზე გადახტა და სიბნელეში გაუ-
ჩინარდა.

* * *

გათენებამდე გაგზავნა მაიამ მოამბე ჭკადუაშსა და ოჩხო-
მურში. ბეჟა მოუთმენლად ელოდებოდა პასუხს. მეორე დღეს
სადილობამდე მოვიდა პეტრე, საღამოს — გიორგი. ბეჟა მკვირ-
ცხლად მიეგება გიორგის, ცხენიდან ჩამოსვლის დროს, პა-
ტივისცემის ნიშნად, უზანგიც კი ჩამოსწია.

გიორგი წარბშეკრული მიესალმა, რადგან არ ესიამოვნა ბე-
ჟას ნახვა. როგორც მამამისი, ისე არც იგი უყვარდა.

ღამით ყველანი ერთად დასხდნენ მისაღებ ოთახში. ბეჟამ
მათ იგივე აზრი გაუმეორა, რაც მაიას მოახსენა. გიორგი და
პეტრე ყურადღებით უსმენდნენ. მაია ჩაფიქრებული იჯდა, ძმე-
ბის სახეზე კითხულობდა, რომ ისინი უკმაყოფილონი იყვნენ.

— თავადო, ვისი სახელით აყენებ ამ წინადადებას? — იკი-
თხა პეტრემ დინჯად.

— ეს აზრი, ბატონიშვილო, დაებადა თავადაზნაურთა ჯგუფის,
რომელიც დედოფლის წინააღმდეგ არის მიმართული.

— მერე რა ძალა აქვს ამ წუთში თავადაზნაურთა ჯგუფს, რომლის წინააღმდეგ მრავალი სოფელი, მთელი გლეხობა ამხედრებულა?

— ჩვენ ორ საქმეს ერთად ვაკეთებთ: დედოფალსაც გადავადებთ და გლეხობასაც დავაკმაყოფილებთ, დავაწყნარებთ!

გიორგის დამცინავად გაელიმა. ეს სიმკაცრითა და შეუბრალებლობით ცნობილი მებატონის შვილი, გლეხების ინტერესების დაცვას უნდა ამოფარებოდა, ამით ხელი მოეთბო და მთავრის ოჯახისადმი მტრული დამოკიდებულება ბოლომდე მიეყვანა. გიორგიმ და ჰეტრემ დანამდვილებით იცოდნენ: სულ მცირე მიზეზი საკმარისი იყო, რომ ბეჟას და მის მომსრე, თავზე ხელაღებულ თავადაზნაურთა ჯგუფს დედოფლისათვის დამიზნებული იარაღი მაიასაკენ შემოებრუნებინათ, უკეთუ, ეს უკანასკნელი მათ სურვილს წინ აღუდგებოდა.

— განა ეს ჯგუფი ასე ძლიერია სალიპარტიანოში, რომ ამ დიდ საქმეს მოერევა? — შეეკითხა გიორგი.

— სალიპარტიანოს ჯგუფი ძლიერია, მთის ხალხიც ჩვენი მომხრეა, მოგეხსენებათ, თქვენი ძმა ბესარიონი რა გავლენით სარგებლობს მთაში. ის კუთხე ცნობილია დევივით უძლეველი ვაჟაკებით. ზუგდიდის მაზრა ჯვარამდე და სვანეთამდე ხომ თქვენს ხელშია, თუ ინებებთ, აფხაზეთიც.

— მაშ, თქვენ ჩვენი იმედით გინდათ დედოფლობა უბოძოთ ჩემს ასულს? — მწარედ გაიღიმა გიორგიმ. — ნუთუ ჩემი შვილი შენ ისეთ ადამიანად მიიჩნიე, რომ ის სამთავროს უღალატებს? — ჰკითხა მკაცრად გიორგიმ. მაიას სახე გაუფითრდა.

— თუკი ამას ხალხის ინტერესი მოითხოვს? — სცადა თავის გამართლება ბეჟამ.

— როდის აქეთ გახდი ხალხის ქომავი?

— მე ხალხში უტუს ჯარსა და მართალია თოდუას ურდუმს როდი ვგულისხმობ, ბატონიშვილო. სამთავროს ინტერესები მაღაპარაკებს.

— ეს კარგია, თუ ასეა. მაგრამ სამთავროს ჩემი ქალიშვილი ვერ გაუძღვება. ჩვენ ალბათ იმიტომ დავვიბარა მაიამ, რომ გავეგებინებინა ჩვენთვის, თუ რას უმზადებთ შენ და შენი ჯგუფი სამთავროს, — გიორგის სახე მკაცრი და შეუპოვარი გახდა, —

გულიდან ამოირეცხეთ ეგ აზრი შენ და შენმა ჯგუფმა. გადაეცი მათ, თუ დაუყოვნებლივ არ სთხოვენ პატიებას მაიას ასეთი შეურაცხმყოფელი წინადადებისათვის, ჩემზე დიდი მტერი არ ეყოლებათ!

ბეჟა შეშინდა. ფეხზე წამოიჭრა და გაოცებით მიბრუნდა მაიასაკენ.

მაიას ადამიანის ფერი არ ედო. ალტაცებით და სიამაყის გრძნობით შეჰყურებდა მამას. ეს მაშინვე შენიშნა ბეჟამ. გაოცდა თავადი, ჯერ კიდევ წუხელ მაია ალტაცებული იყო მისი წინადადებით, თუმცა გარეგნულად არ ამჟღავნებდა ამას, მაგრამ ბეჟას თვალს რას გამოაპარებდა. განა იმიტომ არ აფრინა მაიამ გათენებამდე კაცი ბიძასთან და მამასთან, რომ ეშურებოდა მალე გაეგო მათი აზრი. იგი წუხელვე სამეგრელოს დედოფლად გრძნობდა თავს და ახლა რამ გამოცვალა ასე უცებ! ნუთუ თამაშობს? მზაკერობს, თვალთმაქცობს! „რას გაუგებს ამ ეშმაკის ცხენზე შემჯდარ ქალს ადამიანი!“ დრო არ ითმენდა, უნდა ეთქვა რამე. პეტრე და გიორგი მოლოდინით შეჰყურებდნენ.

— მაპატიეთ, ბატონიშვილო, — თავი დაუხარა ბეჟამ მაიას. — მე... მე შემაცდინეს... გამაბრიყვეს... მაგრამ რაღაც ხომ უნდა ვიღონოთ, სამთავროს ასე უპატრონოდ მიტოვება არ ივარგებს. უტუ ან მართალია მთავრად რომ დაგვისვან, ასე გულხელდაკრეფილი ვუყუროთ?! ხომ ხედავთ, ჩვენს სახლ-კარს წვავენ, საქონელს გვტაცებენ, ყმებს გვიმხედრებენ...

— ჩვენს სახლ-კარს! — შეაწყვეტინა გიორგიმ. — ჩემთვის არ დაუწვავთ სახლი, არ წაუსხამთ ჩემი საქონელი, არც პეტრესი და მაიასი, არც ბევრი სხვა თავადის. იმათ არ ინდობენ გლეხები, ვინც მათ სისხლს სვამდა, ცოცხალს ცეცხლში წვავდა.

— მე მათ მამა მომიკლეს, — ვერ მოითმინა ბეჟამ.

— ჯოღორიამ მე ბრძოლის ველზე მიმატოვა და თავს უშველა განა არ ჯობდა მტრის ტყვიას მოეკლა. დავანებოთ ამას თავი. შენა თქვი სამთავროს პატრონი არა ჰყავსო. დედოფალმა სამთავროს პატრონად გრიგოლი დატოვა.

— სანამ გრიგოლი ზომებს მიიღებდეს, ჩვენ ჩვენი დაგვემართება.

— მართალია, მაგრამ შენ ამ საქმეზე გრიგოლს უნდა ხლე-

ბოდი და არა მაიას, — გიორგი მაიას მიუბრუნდა, — მე მგონია მე და ჩემ ქალს ამ საკითხში სხვადასხვა აზრი არა გვაქვს...

— რასაკვირველია, მამა...

ბეჟა ვახშმადაც არ დარჩა, იმ ღამესვე დატოვა მაიას სახლი.

ბეჟას წასვლის შემდეგ დიდი ხანი ისხდნენ სუფრასთან მაია, გიორგი და პეტრე. გიორგის ძალიან უყვარდა თავისი ყმა გლეხი, მოხუცი დიმიტრი გაბედავა. იგი მისი ხნის იყო, ბევრ-ვობიდანვე ერთად გაზრდილი, მაიას მორღუ. გიორგიმ დიმიტრი მაიას გამოატანა, როგორც მისი მორღუ, ახლობელი და მოსიყვარულე. მაიასაც ძალიან უყვარდა გამზრდელი და თავიდან არ იშორებდა. გიორგი მაიას რომ ესტუმრებოდა, სუფრაზე ისე არ დასხდებოდნენ, დიმიტრისათვის არ დაეძახათ. გიორგიმ ახლაც ბეჟას წასვლისთანავე იხმო გაბედავა.

— კიდევ რას თხოულობს უტუ და მართალია? — ეკითხებოდა გიორგი მოხუცს. — კიდევ რა უქნიათ?

— კიდევ, ბატონო, თავადებისათვის წაურთმევიათ ხაჯალურები, ქანჩები, ჯაჭვები, ხუნდები და თუ რომელიმე თავადსაც წინააღმდეგობა გაუწევია, აუწიოკებიათ. მათთვის ყველაფერი წაურთმევიათ, სახლ-კარი გადაუწვათ, მხოლოდ ჯერ ადამიანთა მსხვერპლი არ არისო, მოგახსენებენ.

— ვაი, სირცხვილო! — თქვა გიორგიმ და პეტრეს გადახედა. — სამთავრომ ადამიანის წვალების სამარცხვინო იარაღები ვერ მოსპო და ახლა უტუ მიქავა აკეთებს ამას.

— უტუს უთქვამს, — განაგრძობდა დიმიტრი, — კაცი ყველა ერთნაირად იბადება და ერთნაირად კვდებაო, მაშასადამე, კაცის კაცი არ უნდა არსებობდესო, ბატონი არ უნდა იყოსო.

— ხედავ, მამა — უთხრა მაიამ გიორგის, — ეს დიდი ჰუმანური იდეები, რომელიც რუსეთიდან ანკარა წყალივით მოჩუხჩუხებს, სად შემოსულა, პირდაპირ უტუ მიქავას და მართალია თოდუას სახლში შემოჭრილა.

— კიდევ რა, დიმიტრი, თქვი, მე ნუ მოგიკვდები! — არ ეშვებოდა გიორგი, რომელსაც ყველაფერი ეს კიდევ ახარებდა და კიდევ აღონებდა.

— რა ვიცი, ბატონო, რამდენ რას ამბობენ, ვილაცას უთქვამს: „ბატონ კონსტანტინეს რომ ერთგული მწვევარი ჰყავს, ორ კომლ გლეხებზე გადაუცვლიაო“.

მაიას ხელსაქმე ეჭირა ხელში, თავი აიღო, გამზრდელს უთხრა:

— შეიძლება ჩემი მეუღლე ბევრში არ იყოს მართალი, მაგრამ ყოველ შემთხვევაში ის აშკარა ბოროტებას არ ჩაიდენს, რბილი ხასიათი ხელს უშლის თავისი წარჩინებული მღვდობა გამოიყენოს.

— არა, საკვირველი ეს არის, ჩემო ბატონო, — თქვა პეტრემ და ძმას შეხედა, — არ გიკვირთ ამ უტუ მიქავას ამბავი, რომ საფრანგეთის დიდი რევოლუციის იდეები პირდაპირ მეჭურჭლე თოდუებისა და სვიჩიების ჭურჭლის გამოსაწევე ღუმელში ჩავარდნილა? ბატონო ჩემო, ახლა ცეცხლმა იფეთქა და ზოგს ათბობს ეს ცეცხლი, ზოგს კი დაწვის ეშინია.

— ეჰ, ჩემო პეტრე, — მიუგო გიორგიმ ძმას, — საფრანგეთის რევოლუციისაგან ჩვენ ისე შორსა ვართ, როგორც მიწა ცისაგან. საფრანგეთის რევოლუცია წლების მანძილზე მზადდებოდა და მწიფდებოდა. მის სათავეში ნასწავლი ხალხი იდგა. ის აჯანყება მუშებმა მოახდინეს. აბა რა უნდა ქნას უტუ მჭედლისა და მეჭურჭლე მართალია თოდუას გლეხთა ხროვამ. მათ გარკვევით არ იციან რა უნდა გააკეთონ, რა უნდა მოითხოვონ. მათ მალე გაუსწორდებიან, მოვა მეფის ჯარი და კუდით ქვას ასროლინებენ. ქვეყნის საქმეს უტუსა და მართალიას ერთი მუჭა გლეხობა ვერ გადაწყვეტს. ჩვენი გლეხის საქმე რუსის გლეხმა უნდა გააკეთოს. თუ იმან არ დაამსხვრია მეფის ტახტი, უტუსა და მართალიას ხელი პეტერბურგს ვერ მისწვდება. — გიორგი წამოდგა, გაიარ-გამოიარა ოთახში. — ახლა ჩვენ იმას უნდა ვეცადოთ, რომ გლეხი და თავადი ერთმანეთს არ შეაკედეს. ზოგი ჩვენც დაეთმოთ, ზოგსაც ისინი დათმობენ. ხვალვე გავსწიოთ უტუსთან და მართალიასთან და რჩევა ვუთხრათ. შენ ოჩხომურში წადი, შენი სასახლე აჯანყებულთა ხელშია. მართალია ნახე. მე თავადებთან წავალ შუამავლად.

პეტრე დილით შინისაკენ გაუდგა გზას. როდესაც ეზოში ჩადიოდა, დღე-ღამე იყრებოდა, ჳიშკართან მღვდომმა გუშაგმა ახედ-დახედა, ეტყობოდა ვერ იცნო, მაგრამ მაინც ზრდილობიანად ჰკითხა:

— ვინ ბრძანდებით?

პეტრემ გაიღიმა:

— მე ამ ოჯახის პატრონი ვარ, პეტრე დადიანი, უტუ მი-
ქავა აქ არის?

გუშაგი შეკრთა.

— არა, ბატონო, უტუ არ გახლავს. ამ ბინის უფროსად მარ-
თალია თოდუა დანიშნული, წავალ, მოვახსენებ, თვითონ გვახ-
ლება.

ამასობაში პეტრე ცხენიდან ჩამოხტა, თამბაქო შეახვია და
გაბოლება ვერ მოასწრო, რომ მართალია მასთან გაჩნდა, მდამ-
ლად თავი დაუკრა და დამცინავი ღიმილით ჰკითხა:

— ხომ არ გვემდური, ბატონიშვილო, რომ დაუკითხავად
სასახლეში შემოვიჭერით? ჩვენ მხოლოდ სასტუმრო სახლში
მოვთავსდით, ოდაში არ ავსულვართ, არც მოხუცი ყმები და
გადიები წაგვიყვანია სასახლიდან. ახალგაზრდები კი ჩვენია,
ბატონიშვილო, ისინი გვჭირდება.

მართალიამ პეტრე წინ გაუშვა და ისეე განაგრძო:

— ბატონიშვილო, შენ განათლებული კაცი ხარ, ხალხის
გულშემატკივარს გეძახიან დიდ ნიკოს შვილებს. შენ მაინც
გვითხარი სიმართლე — როდემდე უნდა ყოფილიყო ეს უსამართ-
ლობა? განა ჩვენ ადამიანები არა ვართ? პირუტყვეები ვართ? ამ-
დენ კაცს ოჯახები მივეითოვებია, ტყე-ტყე დავხუტივალობთ.
ნუთუ ანგარიშს არ გაგვიწვევენ და არაფერს დაგვითმობენ? ხომ
ხედავ, ჯერჯერობით ერთი წვეთი სისხლი არ დაგვიღვრია,
მაგრამ თუ საჭიროებამ მოითხოვა, ამ გზასაც მივმართავთ.
ნებით, უსისხლოდ, თუ არა, ძალით, ბრძოლით და სისხლით
მოვიპოვებთ უფლებას.

ამ ლაპარაკით დიდ აივანზე ავიდნენ. მათ ყმები გამოეგებნენ.
პეტრე ყველას მიესალმა.

— ვახშმის ამბავი როგორ გაქვს, ჩემო კოტატი? — შეეკითხა
მოხუც მოურავს, შემდეგ მართალიას მიუბრუნდა:

— მობრძანდი, ჩემო მართალია! თუ მენდობი, გულახდი-
ლად ვილაპარაკოთ.

პეტრე განიერ, გრძელ სკამზე ჩამოჯდა და მართალიაც
გვერდზე მოისვა.

— აბა, მითხარი, რას აპირებთ?

— რას ვაპირებთ, ბატონო? რაღაც არ უნდა დაგვიჯდეს,
ადამიანური ცხოვრების უფლება უნდა მოვიპოვოთ. ყველაფერ-

ზე უფრო მწარე შეიქმნა ჩვენთვის ბეგარის, გადასახადების გა-
დიდება და ყმების გაყიდვა. თათართან ომის მერე ზოგიერთმა
თავადმა და აზნაურმა ყმების გაყიდვა ხელობად გაიხადა. გვარ-
თმევენ ცოლს, შვილს. ჩვენი ქალები ვითომ თავადაზნაურთა ცო-
ლების მოახლეებად და პირისფარეშებად ითვლებიან, ნამდვი-
ლად კი ისინი თავადების ხასები არიან, რომელთაც ახალგაზრ-
დობისა და სილამაზის გათელვის შემდეგ მეძებარ ძაღლებში
ცვლიან ან ჩუმად თავიანთ დამქაშებს სათათრეში აყიდვინებენ.
ერთნაირად დავბადებულვართ. ჯერ მკაცრი სიკვდილი რა არის
და ისიც არ არჩევს ადამიანებს ერთმანეთისაგან, ყველას ერთ-
ნაირად ხოცავს. აბა, რა დავაშავეთ, რომ მებატონეები ძაღლებ-
სა და მიმინოებს უფრო აფასებენ, ვიდრე ჩვენ? არა, ბატონო,
ან სიკვდილი, ან გამარჯვება! მეტის მოთმენა აღარ შეიძლება.
მაინც, რაც დედოფალი რუსეთში წავიდა ეს თავადები მთლად
დაგვერივნენ, აღარაფრით არ გვზოგავენ, მეწველი ძროხა და
თხა აღარ ჭაჭანებს გლეხის ეზოში, აღარაფერი შეგვარჩინეს.
ოსმალები მოვიშორეთ, ახლა ესენი ოსმალებზე უარესი აღ-
მოჩნდნენ, ბეგარა ბეგარას მოსდევს, სული ვერ მოგვითქვამს.
გლეხო, ეს გადაიხადე, გლეხო, ის გადაიხადე! რამე თუ არ შე-
იცვალა, ერთ დღეს ვშობილვართ, ერთ დღეს გაწყვდებით, იქ-
ნებ ჩვენს შვილებს მაინც მოესწროთ კარგი დრო!

პეტრე თავდაზრილი უსმენდა მართალია თოდუას მართალ
სიტყვებს, სინდისი ქეჯნიდა, რომ თვითონ გადამწყვეტ ნა-
ბიჯს ვერ დგამდა თავის შეხედულებათა პრაქტიკულად გან-
ხორციელებისათვის. საფრანგეთის რევოლუციით აღტაცებულს,
ახლა სამეგრელოში გაჩენილი ცეცხლის ალი აშინებდა.

ფიქრებიდან გამორკვეული პეტრე მართალიას დაბალი
ხმით შეეკითხა:

— ეს ყველაფერი ასე, მაგრამ რა ძალით, რა საშუალებით
შეძლებთ თქვენი მიზნის მიღწევას? თუ ჯერ თქვენს საწინა-
აღმდეგოდ მეფისნაცვალს არავითარი ძალა არ აუმოქმედებია,
ეს იმით უნდა ახსნათ, რომ გრიგოლი თავს არ იწუხებს ამ ამ-
ბებით... არ უცნობებია მეფისნაცვლისათვის. მაგრამ დღეს თუ
ხვალ, გაიგებენ თქვენს ამბავს თბილისში. მკაცრ ზომებს მი-
მართავს მეფისნაცვალი. სისხლი დაიდვრება. თქვენ მთავრო-

ბისა და ხელმწიფის ძალას ვერ მოერევიტ, სულ ადვილად მოსალოდნელია, ამ მსხვერპლმა ვერაფერი ნაყოფი ვერ გამოიღოს.

— ბატონიშვილო, ჩვენ უძლური არა ვართ! ათი ათასი კაცისაგან შემდგარი ლაშქარი გვყავს. ალბათ, თქვენც გაიგონებდით, ჩემი და უტუს ჯარი გაერთიანდა. ჩვენს ჯარს „ურდუმი“ ჰქვია. მას უტუ მიქავა უდგას სათავეში. ახლა ეს ჯარი წალენჯიხაშია დაბანაკებული, მეც მასთან გახლავარ, აქ ჩვენებს ამოვაკითხე რამდენიმე დღით, ჭაქვინჯისა და ქვაშიხორის ციხეებსაც ვამაგრებთ, მემამბოხეთა რიცხვი თანდათან მატულობს. ჩვენ ვერავითარი ძალა ვერ დაგვახევიენებს უკან, ჩვენი დრომა ფრიალებს სამეგრელოს ციხეებზე.

პეტრემ ასე დაწერილებით არ იცოდა აჯანყებულთა მდგომარეობა და გაკვირებული უსმენდა.

— ხალხს კი უყვარს, შენი ჭირიმე, მაგრამ მებატონეებს სძულთ, სიმართლის გაგონების ეშინიათ. ჩვენ ვიცით, ვინ არის მტერი და ვინ მოყვარე. მოთმინებიდან გამოგვიყვანეს, თორემ ამ გახურებული ხენა-თესვის დროს ოჯახს მივატოვებდით? უკან ველარ დავიხვეთ, ჩვენ შევფიცეთ ერთმანეთს, რომ ბრძოლას არ გავუქცეთ, პირი არ გავტეხოთ, ერთმანეთს არ ვუღალატოთ.

— კარგი იყო მოქმედება დედოფალთან დაახლოებულ პირებთან მოლაპარაკებით დაგეწყით.

— დედოფალთან დაახლოებულ პირებს რა შეუძლიათ? გრიგოლი გვიტოვლის, დაბრუნდება დედოფალი, იქნებ მშვიდობიანი გზით მივალწიოთ თქვენი მოთხოვნის დაკმაყოფილებათ.

— თქვენ რა უპასუხეთ გრიგოლს?

— ჩვენ ის უპასუხეთ, რომ დედოფალი საჩქაროდ ჩამოვიდეს, მასთან დიდი საქმე გვაქვს, უპატრონოდ დაგვყარა. თვითონ რა უჭირს, დალოცვილს, ქმრის დანატოვარი მამული დიდი აქვს. სამეგრელოს მესამედი და ლეჩხუმი მისია, რუსთა ხელმწიფე კიდევ მისი მწყალობელი. დედოფალს პასუხი უნდა მოვთხოვოთ, რა დაუუშავეთ, სულ გადასახადებს რომ გვიმატებს?

ჩაფიქრებული პეტრე მართალია თოდუას ვაჟკაცურ სახეს აკვირდებოდა, თან ფიქრობდა:

„მეკოთნე მართალია თოდუა რამ გაათვითცნობიერა ასე?

ეს უბრალო მეჭურჭლე, რომელიც სოფელ ნამიკოლოუს არ გასცილებია და რომელმაც წერა-კითხვაც არ იცის, რა სიმართლეს ლაპარაკობს და რა დიდებულად მსჯელობს! ტყუილად არ მითქვამს ოდესღაც: „ჭკუა მასპინძელია და სწავლა სტუმარია-მეთქი“.

პეტრე დარწმუნდა, რომ მართალიას და უტუს დაჯერება იმაში, რომ მოეცადათ, სანამ რუსეთის გლეხობა მეფის ტახტს არ დაამსხვრევდა, გულუბრყვილობა იქნებოდა. მან მხოლოდ იმაზე ელაპარაკა მართალიას, რომ სისხლის ღვრას მორიდებოდნენ, მეფისნაცვლისათვის არ მიეცათ საბაბი აჯანყებულთა სახლ-კარი დაერბია, თვით აჯანყებულები დაეჭირათ და გაეციმბირებინათ. ურჩია ზომიერება დაეცვათ, ხოლო თავის მოთხოვნაზე მტკიცედ მდგარიყვნენ. მოეთხოვათ გადასახადების შემცირება, ყმების გაყიდვის აკრძალვა და ყმათა გამყიდველების დასჯა, საწამებელი იარაღების მოსპობა.

პეტრეს მოურავმა გააწყვეტინა სიტყვა. მან ვახშამზე მიიწვია მასპინძელი და მართალია.

ის ღამე თეთრად გაათენა პეტრემ. მას მოსვენებას არ აძლევდა მართალია თოდუას ნათქვამი. რამდენი სიმართლე, რამდენი სიმწარე იყო ამ გლეხის სიტყვაში და გამოსავალი კი არ ჩანდა. გული ეწოდა. ბუნებით კეთილ კაცს უყვარდა თავისი ხალხი, გაჭირვებული, უპატრონო, ალალი და მართალი ხალხი.

დილით ჯერ კიდევ ღოგინში იწვა პეტრე, რომ მოურავი ეახლა.

— დღეს აჯანყებულებთან მოსალაპარაკებლად თეოფილე ჭყონდიდელი და ნიკო წყემელი მობრძანდება თურმე, ბატონო, — მოახსენა ადვლებით პეტრეს.

— ეხ, მერე რა გამოვა ამ მოლაპარაკებით? — თქვა უიშელოდ და ნაღვლიანად პეტრემ, თან ჩაცმა დაიწყო. იცვამდა პეტრე და გულში ფიქრობდა: დაერწმუნებინა ჭყონდიდელი და ნიკო წყემელი, რომ არავითარი აზრი არ ჰქონდა მათ მოლაპარაკებას აჯანყების მესვეურებთან. „რას უნდა შეპირდეს აჯანყებულებს ჭყონდიდელი? ვერაფერს. ან თუ შეპირდა, ვისი სახელით, ვისი დავალებით? ვინ დაუჯერებს? თავს გაიმასხარავენ. ეს იქნება და ეს. აჯანყებულები დედოფალს უცდიან და კარგადაც იქცევიან. მათ არც გრიგოლ დადიანის სჯერათ რა. გრიგოლს

კიდევაც ახარებს, რომ დედოფალს ხალხი აღუდგა. ის კი არ იცის, რომ დედოფლის გადაადების შემდეგ, ვერც თვითონ დარჩება მთავრად. არა, ისეთმა ქარმა დაუბერა ქვეყანას, რომ ამიერიდან მეორე მთავარი აღარ გვეყოლება. სხვა დრო, სხვა ხანა იწყება“.

ჭყონდიდელს და წყემელს პეტრემ დაწვრილებით გააცნო თავისი მოსაზრება. მათ ჭკუაში დაუჯდათ პეტრეს ნათქვამი. ისინი თავისი მღვდელ-დიაკვნებითა და მხლებლებით იმავე საღამოს უკან გაბრუნდნენ.

ყმა ძალის სამხედროება

საზოგადო საქმეებით გულდამძიმებულ მაიას არც საკუთარი ოჯახური მდგომარეობა ჰქონდა სახარბიელო. მას ვერ ეპატიებინა კონსტანტინესათვის, რომ დედოფალს გაჰყვა პეტერბურგში. ეკატერინეს უნდოდა მაზლი სასახლის უმაღლესი წრისათვის დაეახლოებინა. ამ სურვილს თავმოყვარეობაც ერთვოდა: იცოდა, რომ კონსტანტინე დიდ შთაბეჭდილებას მოახდენდა მაღალ საზოგადოებაზე თავისი ლამაზი გარეგნობით, კარგი საუბრით, რუსული ენის ზედმიწევნით ცოდნით, ცეკვა-სიმღერითა და ბანოვანთა გართობით.

ეკატერინე და კონსტანტინე მთელი შემოდგომა და ზამთარი იქ დარჩნენ, განცხრომით ცხოვრობდნენ. დედოფალი ისე გამოაცოცხლა ამ უღარდელმა ცხოვრებამ, რომ განვლილი მწუხარება თითქმის გადაავიწყდა.

მაია კრიტიკულად უყურებდა რძლისა და თავისი მეუღლის ამდენხანს პეტერბურგში დარჩენას. მთავარ დანაშაულად ის მიაჩნდა, რომ სამთავრო უპატრონოდ დატოვეს, თვითონ კი განცხრომას მისცეს თავი.

მაიას აწუხებდა ის, რომ სამშობლოდან შორს, რუსეთში, თვითმპყრობელი მეფის კარზე, ეს ხანგრძლივი სტუმრობა რატომ ჰკვრიდა სიამოვნებას ან რძალს, ან ქმარს.

„სად არის ახლა კონსტანტინე? განა ოდესმე იზიარებდა ჩემს აზრსა და მიზნებს?“

მაიამ თავის საწოლს მიაშურა, თუთანას უბრძანა, ძიძა მოეყვანა მასთან. დარეჯანი ჯერ კიდევ ყოჩაღად გამოიყურებოდა.

დინჯად შემოვიდა, თუმცა ღელავდა, კიდევ რამე უბედურება არ იყოს ჩვენს თავზეო. მაიამ შემოსულ ძიძას მორიდებულად და მუდართით უთხრა:

— ძიძა, თუ შენი მაია გიყვარს და გებრალება, უარი არ მითხრა, არც მიზეზი მკითხო, ისე დამიბრუნე ჩემი მიზარებული!

ძიძა შეკრთა, უცებ არ მოაგონდა, რას სთხოვდა მაია.

— მართლა არ გახსოვს? მე ხომ გთხოვე, ბეჭედი მუღამ თან გქონოდა!

— როგორ არ მახსოვს, ძიძა შემოგველოს! — გაზრდილს თვალბრუნებით ჩახედდა დარეჯანმა, უარი ვერ შეებდა; კაბის შიგნით ჩატანებული დიდი ჯიბიდან ბეჭედი ამოიღო და იქვე მაგიდაზე დადო; ერთი სიტყვა არ უთქვამს გაზრდილისათვის, ისე უსიტყვიად გავიდა.

მარტო დარჩენილ მაიას ბოღმა შემოაწვა.

კონსტანტინე იგვიანებს, ვერ შორდება პეტერბურგს, დროს ატარებს. ან რა სიყვარულია კონსტანტინეს სიყვარული? შეიძლება თუ არა რაც ცოლი არ უნახავს. განა ის ასეთ სიყვარულს მპირდებოდა? მას შემდეგ ხომ რვა წელიწადი გავიდა, — ფიქრობდა მაია. ახლა ეჭვებიც აღეძრა გულში: შეიძლება იქ მას ცისფერთვალეა ახალგაზრდა ასული შეუყვარდა?

მაია პირველად ეჭვიანობას არ კადრულობდა, ახლა კი ესეც მიიმედ დააწვა მის გულს. პირად ცხოვრების მსხვერპლით გამოწვეული ცუდი განწყობილება კიდევ უფრო გამძაფრდა, ყოველი მხრიდან შელახული პატივმოყვარეობა ერთბაშად მოზღვადა, ცრემლმორეული ბალიშზე დაემხო. დიდხანს, ვერც იქ მოიხეხა, წამოდგა, მაგიდაზე დადებული ბეჭედი აიღო და თითზე მოირგო, მერე კონსტანტინესეული ბეჭედი წაიძრო და გულმოსულმა განძეულობის სკივრში ჩააგდო.

„როგორც შენ დამაფასე, მეც ისე დაგაფასებ! ექვსი თვე არ მოგენატრა შენი მამუ? აჯანყების ამბავი გაიგე, არ მოიჩქარი, რამ დაგავიწყა ცოლ-შვილი, იჯახი, სამშობლო? ვაი ჩემს ღღეს, რა სიყვარული, რა მეგობარი დაკვარე ჩემი ალექსის სახით!“

ბოლოს ალექსისეული ბეჭედი იმ თითზე წამოიცივა, საიდანაც კონსტანტინესეული ბეჭედი წაიძრო. ცრემლები გადმოუც-

ვივდა თვალთაგან. მსახურსაც არ დაუძახა, თვითონ გაიხადა და ლოგინში ჩაწვა. ლერწამისა გაკვირვებული იყო, რატომ არ შეძახისო, დიდხანს ელოდა, შემდეგ მორიდებულად შეალო კარი.

— მწყალობელო, რატომ არაფერი მიბრძანეთ?

— უქეიფოდ ვარ, ჩემო ლერწამისა, ცეცხლს შეშა შეუკეთე, მარტო დამტოვე. თავი მტკივა. შენ წადი, არ მჭირდება.

მეორე დილით დამფრთხალი თუთანა მაიასთან შესვლას ვერ ბედავდა. შიშით მოელოდა, როდის დაიწკარუნებდა ვერცხლის ზარი. მისი ხმაც გაისმა, თუთანა ხან აქეთ ეცა, ხან იქით.

— მითხარით, ქრისტიანებო, რა ვქნა, რა ვუთხრა, მე იქ შესვლა არ შემძლია, შენ შედი, მზისახარ, ან ჯერ ძიძას ვუთხრათ! — მიმართა მან მოხუც მოახლეს.

— წადი ახლა, ნუ აგვიანებ, შედი და მერე რამეს მოვიფიქრებთ.

მეორეჯერ გაისმა ზარის ხმა და თუთანა სწრაფად შევიდა მაიასთან.

— სად გადაიკარგეთ, სად არის ლერწამისა? გამომივზავნე, ცუდად ვგრძნობ თავს, ვიბანავებ, იქნებ მოვცოცხლდე.

— მე გემსახურებით, ბატონო!

— ლერწამისა სად არის?

თუთანას ცუდი ფერი დაედო. მაია დაეჭვდა, თუთანას ფერმა შეაშინა და ქალს გამხნევება დაუწყო:

— შენ რას ლელავ, გელა ჯგერენაიამ წაიყვანა, ხომ?

თუთანა მუხლებზე მოეხვია მაიას.

— მეც, ბატონო, მეც არ ვიცოდი, შენ თავს ვფიცავ! ჩუმაღ გაპარულა, ეს ქალადი დაუტოვებია, — წერილი გაუწოდა.

— ადექი, ქალო, შენ რამ შეგაშინა? ჩემი გაზრდილი ლერწამისა აბა რას ისწავლიდა თუ არა სიყვარულს? ჯობს მომეხმარო ჩაცმასა და თმების დავარცხნაზე.

როდესაც ჩვეულებრივად გამოეწყო, მაიამ წერილი წაიკითხა. ვაკვირვა ლამაზად და შინაარსიანად დაწერილმა წერილმა.

— ჩანს, ჩემს შრომას უნაყოფოდ არ ჩაუვლია, — ჩაილაპარაკა თავისთვის.

ლერწამისას წერა-კითხვა და სიტყვა-პასუხი ბევრ კნინასაც

შეშურდებოდა. თუ ყმა გოგოსადმი გული თანაგრძნობით აეცხო, ტოცა არ იყოს, ეწყინა მისი სითამამე — რატომ არ გამოტყდა და არა მთხოვაო.

ლერწამისას გაპარვამ, ყმა ქალისა და ვაჟის ხანგრძლივმა სიყვარულმა, რომლის შესახებაც მაიამ იმთავითვე იცოდა ყოველივე, ერთხელ კიდევ აუხილა თვალები იმ უსამართლობაზე, რომელიც ასე მძვინვარებდა მის ირგვლივ. როგორაც არ ამართლებდა შეყვარებულებს, მაინც ვერ ეპატიებინა ლერწამისასათვის დაუკითხავად, თვითნებურად ასეთი ნაბიჯის გადადგმა.

დარეჯანი კი მართლა გულმოსული იყო და იმეორებდა:

— როგორ ვაბედა მაგ თავზე ხელადებულმა ასეთ არეულ დროს მაიას სასახლიდან ქალის გატაცება? სად წაიყვანს ქალს? აჯანყებულებთან?

აბა რა იცოდა დარეჯანმა, რომ ლერწამისა გელამ კი არ გაიტაცა, თვითონ გაიქცა ურდუმში გელასთან.

მაია ცდილობდა მხიარული ყოფილიყო, მაგრამ გული წყდებოდა ლერწამისას გაქცევაზე. ხშირად ფიქრობდა თუ რისთვის ვერ დაიმსახურა მან ყმების ნდობა, ის ხომ სამართლიანი იყო მათ მიმართ. ხან ის აზრიც გაუელეებდა, როგორც კი ქვეყანა დაწყენარდება, გელასა და ლერწამისას ხიბულაში დავასახლებო.

ლერწამისას მისვლამ ურდუმში გელა კიდევაც გაახარა და კიდევაც შეაშინა. ლერწამისას ბიჭურად ეცვა. თავზე ყაბალასი წაეკრა და ტანზე ნაბადი მოეხურა. კონსტანტინეს პატარა, სანადირო სატევარი და დამბაჩა ამშვენებდა მის ლამაზ წელს.

— ერთ თავადს მეც გავუსწორდები, — უთხრა მან ღიმილით გელას. — ბანაკში ქალის საქმე ბევრი გექნებათ, კერძის დამზადება, დაკერება... — შეხედა გელას თვალებში.

— ნუ გეშინია, გელა, არ შეგარცხვენ.

— სად იცხოვრებ, სად დაგაწვინო, ჩემო სიხარულო?!

— აი, ხის ძირი და აი ნაბადი, სადაც შენ, იქაც მე.

— ჩემო მიმინო, ჩემო ლერწამისა. მაშ ქალებმაც აისხა იარაღი.

— სწორედ ჩვენ, ქალებს, გემართებს იარაღის ასხმა. ჩვენს თავზე წისქვილის ქვა არ დატრიალებულა, თორემ სხვა არა დაგვკლებია რა თავადებისაგან. ჩვენ მეტი გვაქვს მათი ვალი, ვინემ კაცებს.

აჯანყებულმა გლეხებმა ზუგდიდი აიღეს. ეკატერინე ჰეტერბურგიდან უკვე ჩამოსულიყო. ის პირველად თბილასში ჩავიდა, მაგრამ იქ დიდხანს არ დაუყოვნებია. შეშინებული იყო, თან ფრიად განრისხებულიც დავით ჩიქოვანზე და გრიგოლზე. მათი უმოქმედობით აღშფოთებულმა, თავის სამფლობელოში ჩამოსვლისთანავე ყოველივე ზომა მიაღო, რომ გლეხთა აჯანყება ჩაექრო. ამ მიზნით ეკატერინემ მთელ სამეგრელოში პროკლამაციები გაავრცელებინა. დედოფალი მოითხოვდა გლეხებისაგან, დაბრუნებოდნენ თავიანთ ოჯახებს, სამაგიეროდ ყოველგვარ დახმარებას პირდებოდა მათ.

წაიკითხა თუ არა უტუ მიქავამ პროკლამაცია, შეკრიბა რაზმების უფროსები, ასისტავები, ათისტავები და გადასცა მათ პროკლამაციის შინაარსი, თვითონ კი შეკრებილთ შემდეგი სიტყვებით მიმართა:

— ძმებო, არ წამოვეგოთ ანკესზე, დედოფლისა და მისი თავადებისაგან ჩვენ კარგს და სასიკეთოს ნურას მოველით. ჩვენ გავძვალტყავდით შრომითა და შიმშილით, ისინი კი სუქდებიან, დედოფალს რა უჭირს; დღეს ზუგდიდშია, ხვალ თბილისში, ერთი კვირის შემდეგ — ხელმწიფის სასახლეში. ტკბილი ენით უნდა მოგვატყუოს? ისევ დაგვადგას კისერზე უღელი? არასოდეს!

— არასოდეს! — დაიგუგუნა ხალხმა ერთხმად.

ეკატერინე თანდათან რწმუნდებოდა, რომ გლეხების დაშოშმინება არც ისე ადვილი იყო, როგორც მას ეგონა. რაკი მათ მოსალაპარაკებლად ჭყონდიდელი არ მიიღეს, არც პროკლამაციებს მიაქციეს ყორადღება, იძულებული გახდა ქუთაისიდან გუბერნიის მმართველი კოლუბიაკინი გამოეწვია.

კოლუბიაკინი სასწრაფოდ ჩამოვიდა სამეგრელოში, ინახულა ეკატერინე, რომლისგანაც გაიგო, რომ მთელი საღიპარტიანოს, ნოქალაქევისა და სამთავროს სხვადასხვა კუთხის მუამბოხეები თავმოყრილი არიან შხეფში.

ეკატერინესთან მოლაპარაკების შემდეგ ის თავისი ჯარით პირდაპირ გლეხებთან მივიდა. ზღვა ხალხი გამსჭვალული

იყო ბრძოლისა და გამარჯვების სურვილით. ხალხის უკან ჭილოფგადაფარებული ურმები იდგა. გარეშე თვალს ურმები სურსათ-სანოვაგით საესე ეგონებოდა.

კოლუბიაკინი გლეხებს მიუახლოვდა.

ხალხში ქარის შხუილივით გაირბინა ხმებმა.

ერთ წუთს თითქოს ხალხი შეტორტმანდა, მაგრამ ისევ მაგრად დადგა ფეხზე. ქუდმოხდილებმა გაბედული ხმით შესძახეს:

— ღმერთმა გუბერნატორს გაუმარჯოს სიმართლის დაცვაში!

კოლუბიაკინი ხეირიანად არც კი მიესალმა ხალხს, კაზაკების ალყა შემოარტყა მათ და მკაცრად მიმართა:

— ამ წუთშივე დაუბრუნდით ბატონებს, თორემ აქედან ცოცხალი ვერ წახვალთ.

წინა რიგებში იდგნენ მებრძოლი გლეხები: თოდუები, კვირაცხელიები, მაგრამ ყველაზე გაბედულად იდგა გლეხების მეთაური უტუ მიქაეა. ის ფართობეჭებიანი, საშუალო ტანის კაცი იყო, მრავალმეტყველი სახე და ცეცხლისმფრქვეველი თვალები ძალასა და რისხვას გამოხატავდნენ. ვერცხლით მოჭედილი, სპილოს ძვლით დამშვენებული ორღესული ეკიდა ვერცხლითვე გაწყობილ ქამარზე, რუსული თოფი მხარზე კოხტად ჰქონდა გადაკიდებული. იარაღის მოყვარული კაცი იყო უტუ მიქაეა, საკუთარ მარჯვენასავით სწამდა მისი ერთგულება. ზღაპრულ გმირად ქცეული უტუ მიქაეა, აჯანყებული გლეხების წინამძღოლი, რომელიც თითქმის მთელი ერთი წელი შიშის ზარსა სცემდა სამეგრელოს მებატონეებს, ახლა ერთი შეხედვით მშვიდად იდგა. მიუხედავად მრისხანე გამომეტყველებისა, მის სახეზე დროდადრო სევდა აღიბეჭდებოდა.

სევდის მიზეზი აშკარა იყო, ბობოქარ მებრძოლს ამ წუთში ყველაფერს ერჩივნა ვეფხის ნახტომით მივარდნოდა გუბერნიის მმართველის გვერდით მდგომ თავადებს, გაეულიტა ისინი, ერთიმეორეზე მიეწვინა ყველა, ხოლო რუსის ჯარი მის ჯარს შემოერთებოდა.

„ლარებო! — ფიქრობდა ის, — რად დასჭირდათ გუბერნატორი და კაზაკ რუსები? თუ ვაჟკაცები არიან, რატომ თვი-

თონ ვერ შეძლეს სხვის დაუხმარებლად გაესწორებინათ ან-
გარიში?“

უტუმ ორი ნაბიჯი წადგა წინ, უფრო თვალსაჩინო გახდა.

უტუს გამოჩენისთანავე უჩვეულო სიჩუმე ჩამოვარდა, ზღვა ხალხი დუმილმა მოიცვა, თითქოს მთელმა მიდამომ პირი შეკ-
რაო, ნიავეც აღარ ქროდა, ფოთლებმაც შრიალი შეწყვიტეს,
რომ უტუსათვის ხელი არ შეეშალათ, მისი სამართლიანი ხმა
ძლიერი და მკვეთრი ყოფილიყო, თითქოს ბუნებაც ცდილობ-
და გმირისათვის ხელი შეეწყო.

გაისმა უტუს ხმა, რომელიც თანდათან ძლიერდებოდა.
მისი სიმპათიური სახე სიმტკიცესა და შეუპოვრობას გამო-
ხატავდა. მან მოელვარე თვალები ჯერ კოლუბიაკინის გვერ-
დით მდგარ ქართველ მოხელეს მიაპყრო, რომლის სახის გა-
მომეტყველება მას სანდოდ ეჩვენა.

ეს იყო პოეტი რაფიელ ერისთავი, რომელიც თარჯიმნად
მოჰყვებოდა გუბერნიის მმართველს. მისმა ლმობიერმა სა-
ხემ, მართლაცდა, ნდობითა და პატივისცემით განაწყო უტუ
და მისი ლაშქარი. უტუმ რაფიელს მორიდებულად მიმართა:

— გთხოვთ, ბატონო, გუბერნატორს კარგად გადასცეთ
ჩვენი მდგომარეობა. ყველაფერს მოგახსენებთ: გლეხების
რწმენით კაცის კაცი არ უნდა არსებობდეს. ადამიანი, თავა-
დია ის თუ გლეხი, ღმერთს ერთნაირად გაუჩენია, ჩვენ რა ღე-
ვაშავეთ, გუბერნატორო, რომ მებატონეები პირუტყვზე დაბლა
გვაყენებენ? ისინი ჩვენ ხან მიმინოში გვცვლიან, ხან მონა-
დირე ძაღლში. დედოფლის ხელქვეითები ნადირივით გვღვე-
ნიან. განა ჩვენ დაწესებულ ბეგარას არ ვიხდით, რომ ახალი
ბეგარა დაგვიმატეს? ამ წუთშიც ჩვენ არავითარი დანაშაული
არ მიგვიძღვის. თვითონ განსაჯეთ, რა ღლე გვადგას. ერთი
წლის წინ, როგორც მოგეხსენებათ, თურქის შემოსევამ გაგ-
ვანადგურა: პირუტყვისა და ავლაღიდების წართმევას არ
დაგვჯერდნენ, გვტაცებდნენ ქალ-ვაჟს და მიერეკებოდნენ სა-
თურქოში. არავინ არ იყო ჩვენი მფარველი. მას შემდეგ მება-
ტონეები დაგვერივნენ ისედაც განადგურებულ გლეხებს. ყვე-
ლაფერს ხელიდან გვგლეჯენ. ბატონების აზრით, გლეხებს
არაფერი სჭირდებათ. მათ არაფერი არ უნდა ჰქონდეთ. ყო-
ველგვარი ადამიანური უფლება მისთვის ზედმეტად მიაჩნიათ.

ჩვენ მოვითხოვთ ადამიანურ უფლებებს. ნუ ვგონივართ თავადებს პირუტყვი. წამოვიყვანეთ სასახლეებიდან ჩვენი ცოლები, დები, ქალიშვილები, რომელნიც თავადებს ხასებად ჰყავდათ. ჩვენ დედოფალს დახმარება ვთხოვეთ, მაგრამ ყურადღება არ მოგვაქცია, დევნა დაგვიწყო. ახლა თქვენ განსაჯეთ, რაში ვართ დამნაშავე? ჩვენ ავაზაკები არა ვართ, რომ თოფით გვდიონ. განა სამართალია, ბატონო გუბერნატორო, ჩვენი ჯაჭვებით დაბმა, ან ხუნდებზე დასმა დაჭერილი თავივით, ან ყელზე საქაჩავის მოჭერა? ასე ჩვენ საქონელს არ გავიმეტებთ. ჩვენ მხოლოდ ასეთი უსამართლობის წინააღმდეგ ვიბრძვით. აი, ნახეთ, რა იარაღით გვაწამებდნენ სულ უბრალო დანაშაულისთვისაც კი! — აუწია უტუმ ხმას. უკან მოიხედა, თითქოს ნიშანს აძლევს ხალხსო, ახალგაზრდები ურმების დაცლას შეუდგნენ.

ურმებიდან ცვიოდა ხუნდები, ქანჩები, ხაჯალურები, ჯაჭვები და სხვა დასასჯელი იარაღი. კოლუბიაკინის წინ რამდენიმე წუთის განმავლობაში ამ იარაღების გორაკი აღიმართა. ყველაზე მარდად მუშაობდა თეთრყაბალახიანი ლერწამისა, რომელსაც ახლა ყაბალახი გადასწეოდა და თვალები უციმციმებდა. ანთებულ ლოყებზე ქალისთვის უჩვეულო სითამამე უციალებდა.

ერთმანეთში ირეოდა ხალხის გულიდან ამოხეთქილი ხმები, რომელიც უერთდებოდა რკინის ჯაჭვებისა და სხვა იარაღის ჟღარუნს.

ამ სანახაობამ გუბერნატორის ირგვლივ შემოჯარული თავადები დააბნია. უკვირდათ: სად შეაგროვეს ამდენი საშინელი იარაღიო. სხვა თავადებთან ერთად პეტრეც აქ იყო. მან უმაღლ შეიცნო ერთი თეთრჩაბალახიანი და თავის ძმას გიორგის თვალით ანიშნა, შეხედეო. გიორგიმ დაინახა, რომ ეს ახალგაზრდა ვაჟი გადაცმული ლერწამისა იყო.

გორაკი სწრაფად იზრდებოდა, გუბერნიის მმართველს რომ ადგილი არ გამოეცვალა, ეს რკინის მთა მას ხალხისგან დაფარავდა. ადგილგადანაცვლებულ გუბერნიის მმართველს უტუ მიუახლოვდა, დინჯად და გარკვევით უთხრა:

— რატომ სწორედ ჩვენში ხდება ყოველივე ეს, როდესაც

რამდენიმე ვერსის იქით, ცხენისწყლის გაღმა, გლეხებს მეტი შეღავათი აქვთ?

ხალხის ჭირ-ვარამით აკვნესებულმა პოეტმა რაფიელ ერისთავმა აჯანყებული გლეხების სამართლიანი მოთხოვნა ისე გულში ჩამწვდომად გადასცა კოლუბიაკინს, რომ მისი გაკერპებული გულიც კი მოაღბო.

რაფიელი ყოველმხრივ ცდილობდა გლეხთა აღშოთება სისხლისღვრად არ გადაქცეულიყო.

გუბერნიის მმართველის ახლო მდგომმა თავადებმა იმ წუთსავე ეჭვი აიღეს: „ასე კარგად გამოთქმული მოთხოვნა აუცილებლად ვიორგისა და პეტრე დადიანის ნაკარნახევი იქნებაო, თორემ უბრალო მჭედელს ამის თქმა საიდან შეეძლო“.

— ვითომ გაუწყრათ ღმერთი ვიორგისა და პეტრეს? — ჩასჩურჩულა ერთმა თავადმა მეორეს.

— აბა როგორ, — უპასუხა მეორემ, — სწორედ დიდი ნიკოს შვილები გაეროდნენ ამ საქმეში. მათ ზომ მთავრის ოჯახი არ უყვართ, მერე კიდევ გლეხების შემბრალებელ მოაქვთ თავი.

— თუ ასე ებრალებათ, რაღას ელოდებიან, შეუსრულონ გლეხებს ყველაფერი, რასაც თხოულობენ. თვითონ გვიჩვენონ მაგალითი თუ ასეთი კეთილმოსურნე არიან. მინდორი და ტყე მათ რომ აქვთ, ვის გააჩნია იმდენი?

გუბერნიის მმართველმა მოისმინა გლეხების აჯანყების მიზეზები, ესაუბრა თარჯიმან რაფიელ ერისთავს, მხრება შეიშმუშნა და გადაწყვიტა მომრიგებლის როლში გამოსულიყო. თვითონაც დაფრთხა გუბერნიის მმართველი, ჯარიც ეცოტავა. მოზღვავებული გლეხოება, მართლაც, ზღვასავით დელავდა. კოლუბიაკინი იქვე მდგომთ მოეთათბირა და შემდეგ გლეხებს გამოუცხადა:

— ყოველ ზომებს მივიღებ, რომ დაგიცვათ უსამართლობისაგან. დამშვიდდით, დაწყნარდით, მენდეთ მე; შევისწავლი თქვენს მდგომარეობას და ყოველგვარ დახმარებას გაგიწევთ, მხოლოდ იმ შემთხვევაში თუ იარაღს დაჰყრით და ახლავე დაიშლებით, თქვენ სახლებში დაბრუნდებით!

— იარაღს არ დაყრით! — იგრილა ხალხმა, — ჯობს დავიხოცოთ, ვიდრე დაუბრუნდეთ ტანჯვასა და უბედურებას.

მართალი იყვნენ ის თავადები, რომლებიც ეჭვობდნენ გიორგი და პეტრე დადიანები აჯანყებულებს თანაუგრძნობენ, ეხმარებიან რჩევა-დარიგებითო.

გიორგი დადიანმა მართლა ურჩია უტუს თუ რა უნდა მოეთხოვა გუბერნატორისაგან აჯანყებულების სახელით. ამიტომ იყო უტუს სიტყვა ასე თავშეკავებული, ამიტომ არ გაუმართა უტუმ გარსემორტყმულ კაზაკებს ბრძოლა და კუდით ქვა არ ასროლინა კოლუბიაკინს. უტუს მაშინ რომ სცოდნოდა, გუბერნატორი თავის დანაპირებიდან არაფერს არ შეუსრულებდა და აჯანყებულთა დასარბევად უფრო დიდი ჯარით გაგარინს გამოგზავნიდა, უსისხლოდ არ დათმობდა ბრძოლის ველს.

კოლუბიაკინი, სანამ ქუთაისში ჩავიდოდა, დარწმუნდა, რომ დღეს თუ არა ხვალ აჯანყების ტალღა ცხენისწყლის გაღმაც გაიჭრებოდა, მოედებოდა იმერეთს, და ვინ იცის, იქნებ მთელ საქართველოს. „მე თუ ურდუმს მოთხოვნილება დაეუკმაყოფილე, — ფიქრობდა კოლუბიაკინი, — ხვალ ასეთ მოთხოვნას კახეთის, ქართლის, რაჭის, გურია-იმერეთის გლეხობაც წამომიყენებსო. გაეხდები გლეხთა საყოველთაო აჯანყების ინიციატორი და ამისათვის ციმბირს უკან დამატოვებანებენო“.

შეშინებულმა გუბერნატორმა გენერალ გაგარინს ურჩია დაუყოვნებლივ გაელაშქრა აჯანყებულთა წინააღმდეგ და ცეცხლითა და მახვილით გასწორებოდა ურდუმს.

კოლუბიაკინის დაპირებით დაიმედებული გლეხები დაიშალნენ, თუმცა იარაღი კი არ დაუყრიათ. მათ პირობა მისცეს ერთმანეთს დანაპირების შესრულებამდე არც ბეგარა და არც გადასახადი არ მიეცათ ბატონებისათვის.

ამ ნიადაგზე სამეგრელოს სხვადასხვა კუთხეში თითქმის ყოველდღე ხდებოდა შეტაკება, რამაც სულ მალე საყოველთაო ხასიათი მიიღო.

უტუ თავისი ასისტავებით და ათისტავებით ყოველნაირად ცდილობდა არაფერი დაეთმო გლეხებს ბატონებისათვის. იქ, სადაც თვითონ ხელი არ მიუწვდებოდა, აგზავნიდა გელას, ვარლამს, ჭუტულას და სხვებს და უთვლიდა, განაგრძეთ ბრძო-

ლა, გუბერნატორმა ჩვენ მოგვატყუა, მალე ის შეღავათის მაგვირად ტყვიითა და მახვილით გაგვისწორდება და ემზადეთ დასახვედრად.

მაგრამ გაგარინის მრავალრიცხოვან ჯარს ვერ გაუმკლავდა უტუსა და მართალია თოდუას ურდუში. რუსი ჯარისკაცები გულისტკივილით უსწორდებოდნენ გლეხებს. თავისი თანაგრძნობის გამოსახატავად რუსმა ჯარისკაცებმა ჩუმად იარაღი და ტანსაცმელიც კი გამოუგზავნეს უტუს და მის ასისტაეებს. ჯარისკაცები უთვლიდნენ, რომ რუსეთშიც ასევე იბრძვიან მათი ძმები ადამიანური უფლებებისათვის. „ჩვენ გვაიძულებენ, როგორც ჯარისკაცებს, ვებრძოლოთ თქვენს მართალ საქმეს, გესროლოთ თქვენ. მაგრამ ჩვენ, როგორც გლეხები, ყმები, თქვენს ბედქვეშ მყოფნი, სულითა და გულით თქვენთანა ვართ. თქვენ ჩვენი დები, ძმები, მამები და დედები ხართ... დადგება დრო და ჩვენ, ერთმანეთის მხარდამხარ მდგომნი, ერთ კავშირად შეკრულნი, ყველა ამ უბედურებისათვის ერთად გაუუსწორდებით თვითმპყრობელობას“.

გაზარებული უტუ რუსი ჯარისკაცების ამ შემონათვალს სიტყვა-სიტყვით უყვებოდა აჯანყებულებს. უჩვენებდა მათ მიერ გამოგზავნილ იარაღს, ტანსაცმელს.

უტუმ მალე დაინახა, რომ ბრძოლის გაგრძელებას არავითარი აზრი აღარ ჰქონდა. ჯობია დავშალო ურდუში, სანამ ყველა აჯანყებულს არ ამოწყვეტენ, — იფიქრა მან და ნელ-ნელა დაუწყო ურდუმს დაშლა. ბევრი გლეხი იხსნა უმიზნოდ დაღუპვისაგან. თვითონ მართალია თოდუასთან ერთად უკანასკნელ წუთამდე არ შეუწყვეტია ბრძოლა. ბოლოს ის და მართალია თოდუა ხელთ იგდო გაგარინმა. ალყაშემორტყმულმა ამ ორმა გმირმა ტყვედ ჩავარდნის წინ თავის უახლოეს თანამებრძოლებს ასე მიმართა:

— ჩვენ ახლა გზას გაგიხსნით, ძმებო, და თავს უშველეთ. ალბათ, დაგვიჭერენ. თუ არ ჩამოგვახრჩეს, ციმბირი მანისც არ აგვცდება. გულს ნუ გაიტეხთ. ჩვენ მიერ დაწყებულ ბრძოლას, დღეს თუ ხვალ, სხვა გააგრძელებს. ჩვენ იქ, რუსეთში, ჩვენს ძმებს, ჩვენს ბედში მყოფთ ვეტყვიით თუ რა დღეში ვართ აქ. იცოდეთ, არ ვიქნებით გულზე ხელდაკრეფილი და თქვენც არ შეწყვიტოთ ეს დიდი საქმე.

— ჩემო გელა, — მიმართა უტუმ გელა ჯგერენაიას, — შე-
მოიკრიბე შენს გარშემო ახალგაზრდები, გიორგი და პეტრე
დადიანებთან კავშირი იქონიე. მართალია, ისინი თავადები
არიან, მაგრამ სხვა თავადებთან შედარებით ჩვენი ენა კიდე
მათ ესმით. ისინი რაღაც საფრანგეთის აჯანყებაზე თუ რევო-
ლუციაზე გველაპარაკენ მე და მართალია, მაგრამ ჩვენ კარ-
გად ვერ გავიგეთ... ვერ გავიგეთ იმიტომ, რომ წიგნი არ ვი-
ციოთ, ცოდნა არა გვაქვს. შენს შვილს მაინც ასწავლე, უწიგ-
ნური კაცი საქვეყნო საქმეს ვერ გაუძღვება... ახლა კი თავს
უშველეთ, ძმებო. — მიმართა გელას ჯგუფს უტუმ. — მე და
მართალია გაგიხსნით გზას და თქვენ გაიყვანთ სამშვიდობოს
აღყაშემორტყმულებს.

უტუმ და მართალიამ სათითაოდ გადაჰკოცნეს ანისთავება
და ათისთავეები, მერე ეკვეთნენ ალყას, გაარღვიეს იგი და გზა
მისცეს თავისიანებს. თვითონ კი მრავალგან დაჭრილები მალე
გაბაწრეს და რამდენიმე თვის შემდეგ ციმბირის გზას გაუ-
ყენეს.

შ უ რ ი ს ბ ე ბ ა

გელა ჯგერენაია და მისი ამხანაგები მოსვენებას არ ამ-
ლევდნენ ბატონებს. უტუსა და მართალიას გადასახლებით
გაბოროტებული გელა რისხვად ატყდებოდა თავისი გუნდიო
იმ თავადს, რომელიც ოდნავაც კი ცუდად ექცეოდა ყმებს.

კვირა ისე გავიდა, რომ შინ არ შეიხედავდა. ლერწამი-
სა დარეჯანის სახლში ჰყავდა დატოვებული. საბრალო ქალს
შიშით სული არ ედგა. იცოდა, რომ გელა ბეჭას დაეძებლა,
რათა მამის სისხლი აეღო.

გაგარინის კაზაკები დღეღამე დაძრწოდნენ სოფლებში.
ნაბრძანები ჰქონდათ, მიწა გაეხეთქათ და ეპოვათ გელა ჯგე-
რენაია. მაგრამ მას თითქოს უჩინმაჩინის ქუდი ეხურა. ვერაინ
გებულობდა გელას გზა-კვალს. დღეს აქ რომ ააწიოკებდა
რომელიმე თავადს და ალყას შემოარტყამდნენ ამ სოფელს,
აჰა, ახლა კი ნამდვილად ჩავიგდეთ ხელშიო, ხვალ მეორე
სოფელში ავარდებოდა მის მიერ დანთებული ცეცხლი.

მართალია, გელა ლერწამისას ხშირად ვერ ნახულობდა, მაგრამ ამბავს ხშირ-ხშირად აგებინებდა: მე არაფერი მიჭირს, კარგად ვარ, შენ გაუფრთხილდი თავსო.

ერთ ღამეს, როცა ლერწამისა და ვარლამის ცოლი ვახშამს ამზადებდნენ, სამზადში ფერწასული ვარლამი და ჭუტულა შემოვიდნენ. მათ დანა პირს არ უხსნიდათ. მოკლე ნაბლები კუთხეში მიაგდეს და ისე ჩამოსხდნენ კერასთან, იარაღი არ მოუხსნიათ.

ლერწამისა მაშინვე მიხვდა, რომ რაღაც უბედურება იყო მის თავზე.

— რა მოხდა, ვარლამ, რავა მუნჯეებივით ზიხართ. გელა ხომ არ მომიკლეს? — ჰკითხა ვარლამს შემფოთებულმა ლერწამისამ.

— გელა არ მოუკლავთ, მაგრამ გელამ კი გაისტუმრა იმ ქვეყანას ბეჟას სული, — უპასუხა ვარლამის მაგივრად ჭუტულამ და ისე თავმომწონედ გაიღიმა, თითქოს მას ჩაედინოს ეს გმირობა.

— მოკლა?! — შეიცხადა ლერწამისამ.

— ჩააძაღლა! — გაუსწორა ვარლამმა.

— გელა სადაა ახლა?

ვარლამი და ჭუტულა თავჩალუნულები დუმდნენ. ცეცხლის ალი ანათებდა მათ გატანჯულ, განაწამებ სახეებს.

— რას გაჩუმებულხართ, თქვე კაი კაცებო! — მოთმინება დაკარგა ვარლამის ცოლმა.

— რა გინდა, ქალო? — შეუტია ვარლამმა მეუღლეს, — გელა მე კი არა, ეშმაკმა არ იცის სადაა, — დაუმატა ლერწამისას დასამშვიდებლად ვარლამმა.

— ნუ მიმაღავ, ვარლამ! — შეევედრა ლერწამისა, — წამიყვანეთ მასთან, თუ ცოცხალია.

— ხომ არ გაგიჟდი?! — შეუტია ვარლამმა, — შენ კი არა, ჩვენ არ გაგვაჩერა თავისთან.

— რაო?

— რაოდა, მე აქ აღარ დამედგომებაო. ან აფხაზეთში უნდა გადავიდე ან იმერეთშიო.

— მერე, მე აქ რას დავურჩე?

— ლერწამისა სადმე გახიზნეთო, ამიტომ გამოგვეზავნა

ჩვენ, თორემ რავა მოვშორდებოდით. დედაჩემთან ნუ წავა, ჩვენ სახლს, ალბათ, აიკლებენ და არც ლერწამისას დაინდობენო.

— მე თავს ვუშველო, არც დედამისს მივაკითხო?! ეს რა უკადრებია გელას?

— დედამისს შენ რაში გამოადგები. მის სახლ-კარს ახლა, ალბათ, ხანძარი ედება. დაყოვნების დრო არ არის, ჩაიცვა და გამომყევი!

— თქვე ცოდვის შვილებო, მითხარით, გელა სად არის! — შეუწყრა მოთმინებადაკარგული ლერწამისა ვარლანსა და ჭუტულას.

— გელა ლულარობუში მოიმწყვდიეს კაზაკებმა.

ამის გაგონებაზე ლერწამისა მოთიბულივით ჩაიკეცა.

ამ დროს გზაზე ცხენების თქარათქური გაისმა.

— კაზაკებია! — წამოხტნენ ვარლამი და ჭუტულა, გულწასული ლერწამისა ნაბადში გაახვიეს, ერთმა მხარზე გაიდო, მეორე წინ გაუძღვა, უკანა კარიდან გავიდნენ და სიბნელეს მისცეს თავი.

იმავე წამს ჭიშკრის მტვრევის ხმა, ცხენების ფრუტუნო, გინება და მათრახების ტყლაშუნი გაისმა ეზოში.

* * *

სამი დღის თავგანწირული ბრძოლის შემდეგ გელა დაიჭირეს.

ჯარისკაცები აღტაცებული იყვნენ მისი ვაჟკაცობით. სასამართლომ ვერ დაუმტკიცა ბეჟა დგებუაძის მკვლელობა და როგორც მუამბოხე, ისიც უტუ მიქაეას და მართალია თოდუას გზას გაუყენეს ციმბირისაკენ.

ციხეში გელას ყოფნის დროს ლერწამისას ვაჟი შეეძინა. იგი მაიასთან ცხოვრობდა. ქალბატონმა ლერწამისა ბავშვიანად ქუთაისში გაგზავნა ქმარი რომ ენახა ციმბირში გადასახლებაზე. ლერწამისამ ერთი ფეხით მიუსწრო გელას. სწორედ ამ დღეს უნდა გასულიყო ქუთაისიდან კატორღელთა ეტაპი.

ლერწამისა ბავშვით ხელში უშიშრად იდგა ციხის კარებ-

თან და შეჰყურებდა, როგორ გამოდიოდნენ ეზოდან ჯარისკაცებით გარშემორტყმული, ბორკილგაყრილი ტუსალები. გამხდრები, ფერდაკარგულები ისინი თითო-თითოდ გამოჰყავდათ კარებიდან. ჯარისკაცები მათ განზე გახედვის საშუალებას არ აძლევდნენ. სულ პატარა მიზეზი და მათთვის მზად ჰქონდათ მუჯღუგუნნი, თოფის კონდახი თუ ორლებნიანი მათრახა.

აი გამოჩნდა გელაც. მალა თავაწეული, არწივივით აბრიალებდა თვალს. იგი კარებთან შეეჯგუფებულ ხალხში არავის არ ეძებდა და ამიტომ არც მიუხედავს მათკენ. მაგრამ აი, გაისმა ნაცნობი ხმა,

— გელა!

გელამ იფიქრა, სმენამ თუ მიღალატაო, თავი გაიქნია. მახილი განმეორდა. მობრუნებისთანავე გელამ ლერწამისა დაინახა. მას ხელში ბაეშვი ეჭირა. გელას სახე გაუნათდა. მან თითქოს თავის მომავალს გაუღიმა.

ძარიშხალი დროებით ჩადგა

სამეგრელოს სამთავრო გაუქმდა, მთავრის ოჯახის წევრებს საუფლისწულო მამულები დაურიგდათ.

არც გრიგოლი და კონსტანტინე დარჩენილან უყურადღებოდ, მათაც ბლომად შეხვდათ მამულები.

ეკატერინე შვილებითურთ რუსეთში წავიდა. მხოლოდ მაია და კონსტანტინე დარჩნენ სამეგრელოში. ყველა თავისებურად ცხოვრობდა. კონსტანტინე ძველებურად ნადირობდა და ლამაზ ქალებს ეტრფოდა, გრიგოლი სამსახურსა და ლიტერატურას ეწაფებოდა, ხოლო მათ მამულებს მოურავები განაგებდნენ.

თავისი ბედის უმადური მაია დაუკმაყოფილებელი გრძნობებითა და სურვილებით თანდათან ყველაფრისადმი გულგრილი ხდებოდა. მის უფერულ ცხოვრებაში ხალისი მხოლოდ მწიგნობარ მამა-ბიძებს შეჰქონდათ. გიორგი, პეტრე და ბესარიონი ხშირად მოინახულებდნენ მაიას.

ვის სახელს არ გაიგონებდით ხიბულას სასახლის დიდ სადარბაზო ოთახში, ვის არ ახსენებდნენ აქ, ვის არ მოიგონებდნენ ხოლმე! ხშირად ახალ წიგნებს კითხულობდნენ ან საკუ-

თარ ლექსებს, ხან კი რუსულ ენაზე წაკითხულს უყვებოდნენ მაიას, რომელმაც რუსული არ იცოდა. სამოციანი წლები, საზოგადოდ, დიდ ინტერესს იწვევდა მთელ რუსეთსა და საქართველოში.

რუსეთში ეკატერინეს გაწვევამ, გამგზავრების დროს მისმა ცრემლებმა და მღელვარებამ გული აუჩუყა მაიას, ნაღვლობდა, რომ მისი საყვარელი მაზლის ცოლ-შვილი იძულებით მიდიოდა სამშობლოდან.

ეკატერინეს წასვლას მოულოდნელი ამბავიც დაემთხვა: სვანეთის მთავარმა კონსტანტინე დადეშქელიანმა, ქუთაისის გუბერნატორი გაგარინი მოჰკლა. დადეშქელიანი დახვრიტეს. მას ვერ მოუსწრო ხელმწიფის განკარგულებამ, რომლითაც დახვრეტა სამუდამო კატორღით შეეცვალა. დადეშქელიანი მაიას ბიძაშვილი იყო. მაიამ ორნაირად განიცადა ეს მწუხარება.

ახლა მაიას თვალწინ ორი სამთავრო გაუქმდა და ამ სამთავროების მართვა-გამგეობა მეფის რუსეთს დაექვემდებარა, ერთხელ და სამუდამოდ ბოლო მოეღო მაიას პატივმოყვარე ზრახვებს. დარწმუნდა: მამისა და ბიძის ბრძნული რჩევა რომ არა, ცუდ მდგომარეობაში ჩავარდებოდა, კარგ დროს აღკვეცეს მისი სურვილები. გულში ფიქრობდა:

„რა სასაცილო იქნებოდა, ჩემი რძლისათვის სამთავრო წამერთმია. ვიდრე ჩვენ ჩხუბსა და კინკლაობაში ვიქნებოდით, რუსთა ხელმწიფე სამთავროებს გააუქმებდა თურმე“.

მაიასათვის მხოლოდ ახლა გახდა ცხადი, რომ რუსეთის იმპერიაში მრავალი ცვლილება უნდა მომხდარიყო.

მაიას ებრალებოდა სამშობლოს მოშორებული რძალი, თანაგრძნობით იგონებდა ეკატერინეს და ხშირად თავის გულისტკივილს ასე გამოთქვამდა:

— „ჩემი მაზლიშვილები გადაგვარდებიან, მშობლიური ენა დაავიწყდებათ, ვეცდები არ გავწყვიტო მათთან კავშირი“.

ეკატერინე ხშირად სწერდა რძალს ბარათს, უგზავნიდა საჩუქრებს. მაიას დამოკიდებულებაც შეიცვალა რძლისადმი. ის ახლა თვითონ სთხოვდა ქმარს პეტერბურგში წასულყო, რძალი და ძმისწულები მოენახულებინა, სანამ საზღვარგარეთ წავიდოდნენ.

— წაბრძანდი, ბავშვებს თავი გაახსენე, მოინახულე, მშობ-
ლიური გრძნობა გაუღვიძე. სამშობლო არ დააეციყო.

— სამშობლოს რა დააეციყებს, ძვირფასო მამუ, ქართვე-
ლი კაცის შვილს, — ეტყოდა მეუღლის წინადადებით გაზა-
რებული კონსტანტინე. — წავალ, აბა რას ვიზამ, ხომ არ მი-
ვატოვებ უცხო ქვეყანაში ჩემი დაკითხის შვილებს! მაგრამ შენ...
შენ რომ ვერ გელევი, ჩემო ღვთაებავ. რომ იცოდე, ძვირფა-
სო, როგორ მეძნელება შენი დატოვება. თან რამდენი საქმეე-
ბია აქ. ნუთუ სულ შენ უნდა უძლოდე ჩვენს მეურნეობას და
მე ფეხი ფეხზე გადადებული ვიჯდე მზამზარეულზე.

როგორ ელოლიაებოდა კონსტანტინე ცოლს, რომ დაე-
ჩქარებინა თავისი გამგზავრება. მაია ძმებსაც შეუჩინა. წადით,
უპატრონოდ რომ დაყარეთ იქ რძალი და ძმისწულები, მიხე-
დვა ხომ უნდაო. ქვეყანას ნახავთ, ხალხს გაეცნობით, ცოდნას
შეიძენთ. ხომ ხედავთ, ჩოხისა და ქამარ-ხანჯლის ხანა მიდის,
ახლა ადამიანი სწავლით და განათლებით ფასდება.

მაიას ჩიჩინმა დააჩქარა ძმების გამგზავრება. ერთ მშვე-
ნიერ დღეს გრიგოლი, კონსტანტინე და პეტრე პეტერბურგის
გზას გაუდგნენ მცირე, მაგრამ რჩეული ამალით და უამრავი
საჩუქრებით.

მაიამ მაზლისწულებს უხვად გაუგზავნა საგანგებოდ გაკე-
თებული ტკბილისკვერები, ჩურჩხელები, ლოყაწითელი ვაშ-
ლები, მრავალი გამხმარი სურნელოვანი ვარდი და ყვავილი,
ლამაზ ყუთებში ჩაწყობილი ფრინველების ფიტულები. თან
სწერდა: აბა, დააკვირდით, ასეთი ლამაზი და სურნელოვანი
ნაყოფი, ასეთი ლამაზი ჩიტები თუ სადმე ნახოთ! ხომ ხედავთ,
თქვენი სამშობლოსავეთ შემკული ქვეყანა არსად არ არისო.
თქვენც ყველა ქვეყანაზე უფრო საქართველო უნდა გიყვარ-
დეთ, მაშინ იქნებით ღირსეული მამულიშვილებიო.

ეკატერინეს შვილებმა დიდად გაიხარეს მაიას საჩუქრე-
ბით. მაზლების ნახვით ნასიამოვნები ეკატერინე სიხარულის
ცრემლს ღვრიდა, ყველას ამბავს ეკითხებოდა: მათი მამულე-
ბისას, მეზობლებისას.

— ყველაფერს მირჩენია ახლა ჩემს საყვარელ სამეგ-
რელოში ცხოვრება. რომ არ დამაცალეს? ძალით გამაძევეს,
გეთაყვათ, ჰა? ბავშვებს მაინც მივცემ შესაფერ განათლებას,

რაკი სამშობლოს მომწყვიტეს, ეს მაინც უნდა გამოვიყენო შეილებისათვის, განათლდნენ, სხვა სიმდიდრე მაინც არაფერი აქვთ.

— არა, ჩემო დაო, — უთხრა ეკატერინეს პეტრემ, — პირაქით, დიმიტრი ყიფიანი, თქვენი მცირეწლოვანი შეილების მზრუნველი, იმედოვნებს, რომ მამულების საქმეს კარგად მოაგვარებს. ხელმწიფე იმპერატორის გამოსარჩლებით მეფისნაცვალი საქართველოში დიდი თანაგრძნობით და პატივისცემით არის თქვენდამი გამსჭვალული.

— კარგი დაგემართოთ, ბატონიშვილო, ოღონდაც ობლები დამაზრდევინონ, ჩემთვის კი სხვა ყველაფერი გათავდა.

ეკატერინეს შიში და უიმედობა ეუფლებოდა. მასთან ხშირად მოდიოდნენ მეგობრები, დიდი მთაერები, მათი ოჯახის წევრები. იმათი ნუგეშით გულს იოხებდა, დარდს და მწუხარებას იქარებდა.

ჯერ კიდევ ლამაზი და კეკლუცი ეკატერინე ყველას ხიბლავდა. მისი საღამოები უფრო საინტერესო გახდა, როდესაც მას სამეგრელოდან გრიგოლი, კონსტანტინე და პეტრე ესტუმრა. მეტად აინტერესებდა პეტერბურგის დიდკაცობას, მეტადრე ქალებს, „აზიატებად“ ცნობილი თავადების გაცნობა. დაახლოების შემდეგ აკვირვებდათ მათი რუსული ენისა და ლიტერატურის, საზოგადო საკითხების ცოდნა, საერთო განათლება. დადიანების გარეგნობას ხომ აღტაცებაში მოჰყავდა ყველანი. ქალებს ხიბლავდა მათი ქცევა და ჯენტლმენური თავაზიანობა.

პეტრეს პატარა კურიოზიც კი შეხვდა ეკატერინეს სალონში. ამ შემთხვევას შემდეგ სამეგრელოში ხშირად ყვებოდნენ.

პეტრე წვერ-ულვაშს იღებავდა, თავზე კი თმა ძლიერ ჭაღარა ჰქონდა. ერთ საღამოს, ულამაზესი თავადის ქალი გვერდით მიუჯდა პეტრეს. დარდიმანდობის გუნებაზე იყო ბანოვანი.

— თავადო, რით აიხსნება, რომ თავზე თმა გაგთეთრებიანთ, ხოლო წვერ-ულვაში შავი გაქვთ?

პეტრე არ დაიბნა, უცებ მოაგონდა ერთ ხალხურ ზღაპარ-

ში როგორ უპასუხა ასეთ კითხვაზე პეტრე დიდს გლეხმა. თავადის ასულს სერიოზული სახით მიუგო:

— მშვენიერო თავადის ასულო, როგორც მოგეხსენებაო, თავზე თმა დაბადებიდანვე აქვს კაცს, წვერ-ულვაში კი მხოლოდ ოც წელს რომ მიუახლოვდება, მაშინ ამოუვა. მაშასადამე, თმა ოცი წლით უფროსია წვერ-ულვაშზე.

ამ სიტყვებზე პეტრემ ლამაზ და ხშირ ულვაშზე ხელი გადაისვა.

ქალს ძლიერ მოეწონა მოსწრებული პასუხი, ოდნავ შერცხვა კიდევ, კეკლუცად გაიცინა და უადგილო ხუმრობა რომ გამოესწორებინა, ღიმილით თქვა: — Ах, вы настоящий дипломат!

პეტრემ ჩვეული დარბაისლობით გამოიყვანა ქალი უხერხულ მდგომარეობიდან; მრავალი სასიამოვნო ქათინაურიც კი გაურია საუბარში, რითაც ბანოვანი მოხიბლული დარჩა.

ეკატერინესთან ხშირად დადიოდა აფხაზეთის მთავარი მიხეილ შერვაშიძე. ახლა როგორც სამეგრელო, ისე აფხაზეთის სამთავროც გაუქმებული იყო და ისიც ეკატერინესავეთ პეტერბურგში ცხოვრობდა, ანუ, როგორც თვითონ ამბობდა, „თავისუფალ ტყვეობაში იყო“. თუმცა მიხეილი ასეთ ტყვეობას არჩევდა თურქების მიერ შემოთავაზებულ თავისუფლებას და უკმაყოფილო არ იყო არც თავისი ბედით, არც სამთავროს ხვედრით.

ეკატერინე და მიხეილი ურჩევდნენ ძმებს დადიანებს, რომ გავლენა მოეხდინათ ყველა ცოტა თუ ბევრად შეძლებულ თავადაზნაურზე და თავიანთი შვილები სასწავლებლად რუსეთში გამოეგზავნათ.

ძმებმა ყურად იღეს ეკატერინესა და მიხეილ შერვაშიძის დარიგებანი და სამეგრელოში დაბრუნების შემდეგ მათი უშუალო ჩარევით ბევრი ახალგაზრდა გაემგზავრა პეტერბურგს, სადაც სახელგანთქმული ილია ჭავჭავაძე და აკაკი წერეთელი იმედოდ ეგულებოდნათ.

ილია და აკაკი დიდ პატივს სცემდნენ ეკატერინეს. როგორც კი დროს იხელთებდნენ ხოლმე, უსათუოდ ესტუმრებოდნენ. გრიგოლ დადიანის ჩამოსვლამ ძლიერ გაახარა ისინი. და ეკატერინემაც, თითქოს გრიგოლის ჩამოსვლას უცდიდაო,

დიდი საჩუქარი მიართვა ილია ჭავჭავაძეს. ეს გახლდათ ის ლექსთა კრებული, რომელიც ნიკოლოზ ბარათაშვილმა უძღვნა მას. ეკატერინე ამ წიგნს თვალისჩინივით უფრთხილდებოდა. ის ხშირად კითხულობდა ნიკოლოზ ბარათაშვილის (ეკატერინე მას ტატოს ეძახდა ბავშვობიდანვე) ლექსებს. ტატო ელიზავეტოპოლის ცივ მიწაში იწვა სამშობლოდან გადაკარგული, მან იქ, იმ მიწაში ჩაიტანა საქართველოს სევდა და ეკატერინეს სიყვარული.

ეკატერინემ ბარათაშვილის პატარა წიგნი უბით ჩაიტანა რუსეთში, იგი იყო იქ მისთვის სამშობლოცა და სიყვარულიც, იმედიცა და სიხარულიც, სევდაცა და მწუხარებაც.

დიდი ხანი ფიქრობდა ეკატერინე გადაეცა თუ არა ილიასათვის წიგნი. ვერ იმეტებდა, ვერ ელეოდა. მაგრამ დიდი პოეტის ამ პატარა მოცულობის წიგნს დღის სინათლე ხომ უნდა ენახა. იგი მართო ეკატერინესი კი არა, მთელი ქართველი ხალხის კუთვნილება იყო. და აი ეკატერინემ გულიდან მოიგლიჯა ძვირფასი წიგნი და ილიას სახით მთელ ქართველ ხალხს მისცა იგი.

ეს ამბავი გრიგოლმა გიორგი დადიანს უამბო. 1

გიორგი დიდი ხანი იჯდა ჩაფიქრებული და გახარებული. მას წაკითხული ჰქონდა ეს წიგნი. იგი შეყვარებული იყო ბარათაშვილის ლექსებზე და განუმეორებელ პოეტად თვლიდა ტატოს.

— დიახ, შეილო ჩემო, ის შენი რძლის დიდი მეგობარი იყო. — დაარღვია ბოლოს დუმილი გიორგიმ. — მართალი მოგახსენო, ქალები საიმედონი არ არიან. უანგარო სიყვარული მათ არ ჩვევიათ. განა დასაშვებია, რომ ნიკოლოზი, ისეთი დიდი ნიჭისა და გრძნობის პატრონი, ქალს არ შეჰყვარებოდა? მაგრამ შენმა რძალმა, ჩემო გოგონი, სამეგრელოს დედოფლობა არჩია ღარიბი ტატოს ცოლობას. ვინ იცის, ტატო რამდენი ლექსის სტრიქონში აქსოვდა კატოზე ფიქრსა და სევდას! გრძნობები საფლავეში თან ჩაიყოლა. რა ნიჭი დაიკარგა, რა შეუბრალებლად გაწყდა სიმი დიდებული საკრავისა!

მაია დაფიქრებით უსმენდა მამისა და გრიგოლის საუბარს. მამის საყვედური ეკატერინეზე და საერთოდ ქალების ანგარებზე მან თავის თავზედაც მიიღო. გულში თავს იმართ-

ლებდა, რომ ცოცხალ ალექსის არასოდეს არ უღალატებდა. მაიამ მრავალი ტანჯვითა და გვემით გამოისყიდა თავისი პირველი გრძნობის ღალატი.

მაიას ფიქრები გრიგოლის სიტყვებმა დაარღვია:

— უნდა ითქვას, ამ რვეულის შენახვით, ბატონო, მთავრის მეუღლემ საშვილიშვილო საქმე გააკეთა. მან გამოამყვანა ზედმიწევნით ფაქიზი და ღრმა გრძნობა პოეტიკადმი, როგორც ეს ქართველ ქალს სჩვევია; უეჭველია, ოდესმე დაფასდება ბრათაშვილი, როგორც დიდი პოეტი-პატრიოტი. ყოველი მისი ლექსი, დღეს ხელნაწერად გაბნეული, თაობიდან თაობას გადაეცემა და „ხელიხელ საგომანებ“ მარგალიტად იქცევა.

— კარგი საქმეა ნიკოლოზის ლექსების აღმოჩენა, ბატონებო! დიახ, ასე მოიქცეოდა ალექსანდრე ჭავჭავაძის ქალიშვილი, რომელსაც კი უნდა სცოდნოდა ლექსის ფასი, — დასძინა მაიამ.

იმ ღამეს მაიას თვალი არ მოუხუჭავს. თავის წარსულზე ფიქრობდა. ეგებ კონსტანტინეზე გათხოვებაც ანგარება იყო, — ფიქრობდა იგი.

სად არის ახლა მისი ტკბილი, დარბაისელი და სათნო ძიძა, რომ გულში ჩაიკრას, დარდი შეუმსუბუქოს. მხოლოდ კეთილი ძიძა გაიგებდა მის ტანჯვა-სიხარულს. მაგრამ თავისი გულის მესაიდუმლე ძიძა უკვე აღარ ჰყავდა მაიას. იგი ამ ცოტა ხნის წინათ გარდაიცვალა. დარეჯანი იყო მოწმე იმისა, თუ როგორ გადადგა ნაბიჯი მაიამ, როგორ გადაწყვიტა კონსტანტინეს ცოლობა.

„რა არის ჩემი ცხოვრება, ჩემი ერთადერთი ნუგეში და გულთამხილავი ძიძაც სიკვდილმა წამართვა, — ცრემლები ახრობდა მაიას, — როგორ თანდათან მშორდებიან ერთგული და საყვარელი ადამიანები! მარტო თუთანაღა დამრჩა, ჩემი ცქრილა ლერწამისა მე თვითონ დავივიწყე... ვინ იცის, რა უჭირს მას. ქმარი გადაუსახლეს. უნდა დავიბარო და მოვაყვანინო, როგორც კი მოვა ჭუტულა, ვეტყვი ეს საქმე მომიგვაროს“,

იმის შეგნებამ, რომ კიდევ შეუძლია კეთილ საქმეზე ფიქრი, მაიას გული მოუფონა.

იმპერიის ყოველ კუთხეში გლახთა აჯანყებებმა დააფრთხო იმპერატორი ალექსანდრე მეორე, რომელსაც მონარქისტმა ისტორიკოსებმა „განმათავისუფლებელი მეფე“ უწოდეს. სასახლესთან დაახლოებულმა პირებმა მეფე დაარწმუნეს იმაში, რომ უმჯობესია გავათავისუფლოთ გლახები ზევიდან, ვიდრე ისინი თვითონ გაითავისუფლებდნენ თავს ქვევიდან.

ასე რომ, ბატონყმობის გაუქმება არ ყოფილა შედეგი „კეთილი მეფის“ წყალობისა. თუ რამდენად კეთილი და განმათავისუფლებლად მიაჩნდა მეფე ხალხს, იქიდან ჩანს, რომ ის 1881 წელს ხალხის შვილებმა მოკლეს. მეფის სიკვდილმა საქართველოშიც დიდი გამოხმაურება კპოვა.

საიდუმლოებით იყო მოცული ბატონყმობის გაუქმების მანიფესტი. მის შინაარსს მალაუდნენ, დიდხანს საჯაროდ არ აცხადებდნენ.

საგლახო რეფორმამ, რომელიც საქართველოში 1864-1865 წელს, ქუთაისის გუბერნიაში კი 1865 წელს. როგორც იყო, ბატონყმობის გამაუქმებელი მთავრობის კომისია ზუგდიდშიც შეიქმნა.

საგლახო რეფორმამ, რომელიც საქართველოში 1864-1865 წლებში გატარდა, გლახობას თითქმის არაფერი მისცა.

მიწები მემამულეების ხელში დაგროვდა, მათ მიემატათ ის მიწებიც, რომლითაც „განთავისუფლებამდე“ გლახები სარგებლობდნენ. ალბათ ამისი შედეგი იყო; რომ საქართველოს თავადაზნაურობა მეფე ალექსანდრე მეორეს მადლობის ქალღს უგზავნიდა.

გლახების უმრავლესობა რჩებოდა უნადელოდ, ე. ი. უმწაწყლოდ. გლახები სრულიად გაპარტული დარჩნენ. მათ ჰქონდათ უფლება ნადელის გამოსყიდვის, რასაც ჩვენში „თავის დახსნას“ უწოდებდნენ. თავის დახსნას უნდოდა ფული. ეს მდგომარეობა აიძულებდა გლახს მიეშურებინა ქალაქისათვის, სადაც ის-ის იყო კაპიტალიზმი ფეხს იკიდებდა. იხსნებოდა ფაბრიკა-ქარხნები, გაჰყავდათ რკინიგზა, ვითარდებოდა მრეწველობა. სამეგრელოს გლახობა ძალიან ხშირად მიდიოდა აფხაზეთში მიწის სამუშაოზე. მსხვილი მიწათმფლობელნი

მათ მიწას იჯარით აძლევდნენ. ბევრი მათგანი საცხოვრებლად იქ რჩებოდა, ნოყიერი მიწა, ბუნებით მდიდარი და ლამაზი აფხაზეთი გლეხებს იზიდავდა.

გლეხების უმრავლესობა თავის კერას დასტრიალებდა, ვერ ელეოდა მას დასატოვებლად, ცდილობდა საკუთარი ძაღლით თავი დაეხსნა. განა მარტო თავის დახსნა უჭირდა გლეხს! ის ამავე დროს მრავალ გადასახადს იხდიდა.

თავდაუხსნელი გლეხი ბატონს თითქმის წინანდებურად ემსახურებოდა.

გლეხების ასეთმა მდგომარეობამ ოთხმოციან წლებში ერთხელ კიდევ ააჯანყა სამეგრელოს სოფლები.

აჯანყება გრიგოლ დადიანის კუთვნილ სოფლებში ღიასა და ფახულანში დროებით ვალდებულმა გლეხებმა დაიწყეს. ისინი აცხადებდნენ, რომ არც გადასახადების გადახდა შეუძლიათ და არც სამოსახლო ადგილების დატოვება.

გლეხთა მოძრაობა სწრაფად ვრცელდებოდა სამეგრელოში, ლეჩხუმსაც გადასწვდა ამბოხების ცეცხლი. სამეგრელოს ოთხი ათასი გლეხი, შეიარაღებული უტუ მიქავას ნაანდერძევი ბრძოლის წყურვილით და ვაჟაკური ალტკინებით, მებატონეებს შიშის ზარს სცემდა.

საქართველოში უკვე მაგრად ფეხმოდგმული თვითმპყრობელური რეჟიმი თავადაზნაურობას წელს უმაგრებდა, საშუალებას აძლევდა მათ გლეხები თვითნებურად ეყვლიფათ და შეევიწროებინათ.

ამ კუთხის მფლობელი პოეტი გრიგოლ დადიანი, თავის მიმართულებით ღიბერალი, თითქოს ხალხისადმი კეთილად განწყობილი, ვერ ჩაწვდა თუ კლასობრივმა აღლომ ვერ ჩააწვდინა გლეხების გაჭირვებულ მდგომარეობას, დახმარებისა და გლეხების ცხოვრებაში რაიმე შეღავათიანი ცვლილების შეტანის ნაცვლად, გახდა მიზეზი მრავალი მათგანი მოეწყვიტა სიცოცხლესა და ოჯახს. გრიგოლის გადაწყვეტილებამ — ღია და ფახულანი გადაექცია ციტრუსებისა და სურნელოვანი ყვავილების პლანტაციებად — გლეხები კი გადაესახლებიათ საკუთარი ოფლით მორწყული მიწებიდან, ცეცხლი წაუკიდა ხალხის გულს.

გლენტა აღშფოთებას საზღვარი არ ჰქონდა. ისინი თავ-
განწირვით შეებრძოლნენ მეფის ხელისუფლების წარმომად-
გენლებს, მაგრამ ამ შემთხვევაში გლეხები კიდევ უფრო მკაც-
რად დამარცხდნენ, ვიდრე უტუ მიქაეას და მართალია თოდუას
ურდუმის დროს. რუსთა ხელმწიფის მთაერობა გლეხებს სას-
ტიკად და შეუბრალებლად გაუსწორდა. მრავალი მემბოხე
გლეხი მოკლეს ჯალათებმა, ხოლო მრავალი გადაასახლეს.

თუ გრიგოლის მოქმედებამ ამდენი მსხვერპლი შეიწირა,
კონსტანტინე დიდიდან მანიფესტის გამოცხადებისა, დარწმუ-
ნებული იყო ხელმწიფე ამას მაღალი წოდების საკეთილდღე-
ოდ აკეთებდა. მან იცოდა, რომ მისი პირადი ინტერესები, რო-
გორც დიდი მემამულისა, არ შეილახებოდა. თავადაზნაურთა
ის ნაწილი, რომელსაც არც სახელმწიფოს ბედ-იღბალი აწუ-
ხებდა, არც ჰუმანური გრძნობებით იყო აღჭურვილი და მხო-
ლოდ პირადი თავმოყვარეობისა თუ ნივთიერი მდგომარეობის
საკითხებით იყო გატაცებული, ბატონყმობის გაუქმების მანი-
ფესტს სასოწარკვეთილი შეხვდა. ჯერ კიდევ გლენტა განთა-
ვისუფლების ოფიციალურად გამოცხადებამდე თავადაზნაუ-
რობა უფლების შეკვეცის მოლოდინში გლეხებს კრიჭაში ჩა-
უდგა და უფრო სასტიკი გახდა.

მაია ხშირად თავშეკავებულად ღუძდა. მის არსებაში ორი
გრძნობა იბრძოდა, ერთი სიხარულის გრძნობით ავსებდა:
ღმერთმა ადამიანი ერთნაირად გააჩინა და სიკვდილიც ერთ-
ნაირი მისცა. ცხოვრებაც, რა თქმა უნდა, საჭიროა ერთნაირი
ჰქონდეს. ეს კარგია, მაგრამ... აქ უკვე გაახსენდებოდა თავა-
დები, რომელნიც უსაქმურობაში აღიზარდნენ, უყმოდ ისინი
შეიძლება დაგლახაკდნენო, ფიქრობდა. აგონდებოდა უტუ მი-
ქაეას აჯანყება, მისი დამარცხება, აგონდებოდა გელა ჯგერე-
ნაია. ამ საგანზე ის ვარლამს უზიარებდა თავის აზრს. ვარ-
ლამი მასთან ხშირად დადიოდა ხიბულაში. სწორედ ვარლამი
უყვებოდა მაიას, თუ რა გასაჭირში იყვნენ სალიპარტიანოს
გლეხები.

ერთხელ მაიამ ვარლამი თავის ოთახში შეიყვანა და და-
წერილებით გამოჰკითხა ლერწამისას ამბავი.

— ლერწამისა მშრომელი ქალი გამოდგა. ჩვენც შემწეო-

ბას ვაძლევთ, რაც შეგვიძლია. ცხოვრობს ღარიბად, მაგრამ წესიერად.

— შეხედე, შეხედე ჩემს ლერწამისას, რა ქალობას იჩენს! ამფერ, ამფერ, ქალო! ვარლამ, ლერწამისა მინდა აქ დავასახლო, მუდამ შიშში არ იქნება. შემდეგ ის ბიჭიც მოუსწრებს. მგონი, მალე უნდა გაუთავდეს სასჯელის ვადა.

— ეჰ, ცოცხალი რომ იყოს, აწი ქე უნდა დაბრუნებულიყო. დარდით აღარაა საწყალი ლერწამისა. ისე ენატრება შენი ნახვა, ერთი მისი ნუგეში ქვეყნად მიღირსო, იტყვის ხოლმე.

— უნდა დავეხმარო ჩემს ლერწამისას. ცარიელი ნუგეში რას გაუკეთებს. დაბრუნდება გელა, გული მიგრძნობს, უნდა დაბრუნდეს. გამართულ ოჯახს დავახვედრებ.

ამ საუბრის შემდეგ დიდხანს არ გაუვლია, რომ ლერწამისა მაიასთან მოვიდა მოკრძალებულად. მაიამ ის გულთბილად მიიღო და ასეთი წინადადება მისცა:

— ყველაფერს აჯობებს აქეთ წამოხვიდე, აქვე ახლოს დაგასახლებ. შენ პირადად, თუ ინდომებ, ისევ ჩემთან გამყოფებ.

— ბატონო, ამაზე მეტი ბედნიერება რა იქნება! შენი შეწუხების მერიდება, თავიდან ბოლომდე შენი საზრუნავი შევიქნე. როგორც მიბრძანებ, ისე ვიმოქმედებ.

ბელა, შენა ხარ?

უტუ მიქავა და მართალია თოდუა გადასახლებიდან დაბრუნდნენ. მათ ეგონათ გლეხები წელში გამართული დახვებოდათ. ახლა მათ საბატონო ბეგარასთან ერთად სახელმწიფო ბეგარა და მრავალი გადასახადი დასწოლიათ კისერზე. უტუმ და მართალიამ გელა ჯგერენაია და სხვა თანამებძოლები მოიკითხეს, ეწყინათ გელას გადასახლების ამბავი. რატომ ვერ შეეხვდით სადმე, გაიკვირვეს, მაგრამ უმაღვე გაეცინათ. იმოდენა ქვეყანაში ნაცნობი ნაცნობს ვერ შეხვდება, რა გასაკვირიაო.

— არა, დიდი გულუბრყვილოები კი ვიყავით! იმდენ ხანს ჩვენ ხელში იყო სამეგრელო და რა გავაკეთეთ? მკაცრი მებატონეებისაგან მაინც გაგვეწმინდა ქვეყანა, რომ შემდეგში ჩვენი თანამებძოლები, ჩვენი ამხანაგები ამ საქმეს არ ემსხვერპ-

ლა! ძალიან მაწუხებს გელას საქმე, ფიცხი იყო, ის ცემასა და დამცირებას ვერ აიტანდა... — აღშფოთებით ამბობდა მართალია.

— ცუდად წავიყვანეთ საქმე. ეს იმიტომ დაგვემართა, რომ კიდევ გვეგონა ადამიანებთან გვექონდა საქმე. არ დაგვზოგა დედოფალმა. ნუთუ არ დაბრუნდება გელა? — წუხდა უტუ.

— დაბრუნდება, ჯანმრთელი კაცია, ყინვასა და შიმშილს კი გაუძლებს, თუ იმ ჯალათებს გადაურჩა. — ამშვიდებდა უტუს მართალია თოდუა. ისინიც სადაცაა ჩამოვლენ უთუოდ.

— ნეტავ მალე ჩამოვიდოდნენ, გელა წასახდენი ბიჭი არაა, — თქვა უტუმ.

გელა მართლა დაბრუნდა, ეშინოდა საკუთარ ოჯახში მისვლა; არ იცოდა რა დახვდებოდა, რას არ ფიქრობდა:

„იქნებ ლერწამისა მაიამ წაიყვანა, ისევ გაათხოვა, ან იქნებ ვინმემ გამიბახა, მოხუცები დაიხოცნენ. ოჯახი შეგვერყვნა? რამდენი რამ შეიცვალა ამდენი წლის მანძილზე! როგორია ახლა ლერწამისა, ვახსოვარ თუ არა, ნეტავი? მე უკვე გავჭალარავდი, იქნებ ზედაც არ შემხედოს! როგორ მიმიღებენ ვარლამი და ჭუტულა? კაცი მათხოვარს ვგავარ“.

ასეთი მწარე ფიქრებით და ნაწამები გულით მიუახლოვდა გაბედავების სახლს გელა. გული ახალგაზრდულად აუძგერდა: რა სიხარულით მოირბენდა ხოლმე თავისი სიჭაბუკის წლებში, რომ ლერწამისასათვის შორიდან მაინც მოევლო თვალი.

მამლები ყივილათ გათენების მოახლოებას აუწყებდნენ სოფელს, როცა გელამ ფრთხილად მოუარა ოდას და უკანა კიბეზე ჩამოჯდა. ძალლი არ ასვენებდა, ბევრი უძახა: ყურშა, ყურშაო, მაგრამ ძალღმა არ შეისმინა. ბოლოს დარწმუნდა, ყურშა დიდი ხანია აღარ იყო ამ ოჯახში, ამაზედაც გულა დაწყდა. რამდენჯერ გაუჩუმებია ძალლი, როდესაც უნდოდა თავისი ლერწამისა ისე მოენახულებინა, რომ არავის გაეგო.

იჯდა კიბეზე ფიქრებში გართული.

ზევიდან მთვარე დაჰნათოდა. გაზაფხულის სიგრილემ დაჰკრა. ველარ მოითმინა, ადგა და სარკმელზე ფრთხილად დააკაკუნა.

— ვინა ხარ? — გაიგონა უმაღლესი ჭუტულას ხმა.

— მე ვარ, ჭუტულა, ვერ მიცანი?

— გელა, შენ ხარ? — სიხარულით შესძახა ჭუტულამ, ლოგინიდან წამოვარდა საცვლების ამარა, მივარდა კარებს, გააღო და გადაეხვია გელას, რომელიც ოთახში შესვლას ერიდებოდა; ხელი სტაცა, თავისკენ მიიზიდა, ოთახში შეიყვანა კიდეც გულდაგულ გადაკონა.

— ბუჟღუ, სანთელი ანთე, რომ იცოდე, ვინ მოგვივიდა! უცნობი მაზლი მოგივიდა, ბუჟღუ! ერთი ძუძუთი ვართ გაზრდილი.

ქალმა საჩქაროდ კაბა გადაიცვა, სანთელს მოუკიდა, მოსულს მიუახლოვდა გადასახვევად, მაგრამ გელამ არ მიიკარა.

— ჭუჭყიანი ვარ, ბატონო! მერე კიდეც, ჩემი ჭუტულას ცოლი ასე უნდა მენახა?

ქალი გაკვირებული უცქეროდა ხან ქმარს, ხან მოსულს, ძინძებში გახვეულს, წვერებმოშვებულს. უცებ ვერ მიხვდა, რომ ეს გელა იყო. გელაზე და მის ვაჟკაცობაზე ხომ ბევრი კარგი სმენია! ისიც ვერ წარმოიდგინა, ისეთი ლამაზი და აღზრდილი ქალი, როგორც ლერწამისაა, ასეთ მათხოვარს როგორ წაყვებოდა. მალე ვარლამის ოთახშიც გაიღვიძეს.

— ჭუტულა, რა ამბავია, ვინ მოვიდა? რამე ცუდი ამბავი ხომ არ არის?

— პირიქით, კარგი ამბავია. ჩემი გელა ჩამოვიდა.

წამოცვიდნენ ვარლამი და მისი ცოლი. თვალს არ უჯერებდნენ. ხელს ჰკიდებდნენ, ელაპარაკებოდნენ და მაინც ეჭვით უყურებდნენ, ნუთუ მართლა გელა არისო.

მაშინვე დადგეს ქვაბი ცეცხლზე, გააცხელეს წყალი, აბანავეს გელა, მერე საცვლები და ტანისამოსი გამოუცვალეს. დილით კი გაპარსეს და გელამ ადამიანის სახე მიიღო. მხოლოდ ახლა დაიჯერეს, რომ ის ნამდვილად გელა იყო და არა მოჩვენება. გელა გონს ვერ მოსულიყო. შიშით აცეცებდა თვალებს. არავის ამბავს არ კითხულობდა: არც მშობლებისას, არც ცოლისას, გარინდებული იჯდა.

— ბიჭო, ენა ხომ არ ჩაგივარდა, რამ გაგაჩუმა? იქნებ არ იცი ბატონყმობა რომ გადავარდა? აზნაურებს ვუპირებთ გა-

ტოლებას. — გაეხუმრა ჭუტულა. გელამ მხოლოდ ახლა გაიღიმა.

— ყველაფერი ვიცი, ჩემო ჭუტულა. როგორ გუნებაზე არიან ბატონები ბატონყმობის მოსპობის შემდეგ?

— არ არიან კარგ გუნებაზე, წვრილფეხა აზნაურებიც კი წყრებიან, სულ მიწების; შენარჩუნებაზე ფიქრობენ. — თქვა ჭუტულამ დაცინვით.

— ეჰ, რა უბედურად წავიდა ჩემი საქმე, — ამოოხვრით თქვა გელამ.

ძმებმა გელას დაწვრილებით უამბეს, როგორ დაასახლა მაიამ ლერწამისა და მისი დედამთილი. რომ მათ კარგი ოჯახი გამართეს.

— ოჯახი, ოჯახია, მაგრამ ყველაფერზე კარგი ისაა, ბიჭი რომ დაგზვდება, სამაგალითო კარგი ბავშვი, და გულს გაგიხარებს. დუტუ დავარქვით სახელად.

— ჭუტულა, გენაცვალე, მე რა ბედნიერი ვარ, ჩემი შვილი რომ იქნეს ბედნიერი?

— ყოველთვის ასე არ იქნება გლეხების საქმე, შე კაი კაცო! შენი ბიჭი მე მომანათლინა დედამისმა, მშვენიერი ბიჭია, სულ შენ გგავს. რომ იცოდე, როგორ უყვარს მაიას! დედაშენი თავზე ევლება, სულ ის უვლის, ლერწამისა კი ვაჟკაცივით მუშაობს.

— აბა, რაღას ვუყუროთ. შევკაზმით ცხენები და გაუდგეთ გზას ხიბულისკენ, — უთხრა ვარლამმა გელას.

— არა, შენი ჭირიმე, ერთი მამაჩემის საფლავეზე თუ ტირილით გული არ ვიჯერე, ისე ვერსად წავალ.

— ესეც შეიძლება. მხოლოდ იქ ნასადილევს წავიდეთ, ახლა კი გამოიძინე, — უთხრა ვარლამმა.

ნასადილევს ჯერ მამის საფლავი მოინახულა გელამ, ბევრი ცრემლი დაღვარა, ბევრი გულსაკლავი და გრძნობიერი სიტყვები უთხრა დაუვიწყარ მამას და შემდეგ ხიბულისკენ გასწია. თან არავინ წაიყვანა, მარტო წასვლა ირჩია.

ბედნიერი დღე გაუთენდათ გელას მისვლით მის დედასა და ცოლ-შვილს. სულ ერთ თვეში დააჩნდა ვაჟკაცის გამრჯე ხელი ქალების ძალ-ღონით შექმნილ ოჯახს.

განულო დრომ. ერთ დღეს კონსტანტინე ზუგდიდიდან ძლიერ მხიარულ გუნებაზე დაბრუნდა და მათს უაპბო: ეკატერინე შვილებით საზღვარგარეთ ყოფილა, პარიზში რამდენიმე თვე გაუტარებია, იქიდან ზუგდიდში ჩამოსვლის ნება მიუციათო.

ეკატერინემ უცხოეთშიც მიიპყრო საზოგადოების ყურადღება. ყველა ცდილობდა მასთან დაახლოებას და მეგობრობას. მას ქალიშვილი გაეთხოვებინა აშილ მიურატზე*.

აშილი წარჩინებულ ოჯახიშვილად ითვლებოდა ნაპოლეონის მეფობის დროს, მაგრამ ნაპოლეონის დაცემის შედეგად ოჯახიც დაქვეითდა. აშილ მიურატსა და სალომე დადიანს ერთმანეთი გაეცნოთ პარიზში. გაცნობას მათი დამეგობრება მოჰყვა. ურთიერთისადმი თანაგრძნობით განიმსჭვალნენ პატივმოყვარე ახალგაზრდები, საფრანგეთში ჯვარი დაიწერეს, საცხოვრებლად სამეგრელოში ჩამოვიდნენ. მაშინ გამოიჩნა ეკატერინემ სამეგრელოს მამული მემკვიდრეთა შორის. სალხინო ახლომდებარე ადგილებით, ჭკადუაშის მამულების ნაწილი და ზუგდიდში ერთ-ერთი დიდი სახლი, სალომეს უთავაზა.

მაია და კონსტანტინე დიდი ასაბიითა და მისალმობებით წავიდნენ სალხინოში ახალგაზრდების სანახავად. მაიას განსაკუთრებით უყვარდა სალომე. სალომეც ტკბილად შეხვდა ბიძა-ბიცოლას, მოიხიბლა მათი ყურადღებით. მან იცოდა ბიცოლას ზვიადი ხასიათი, იშვიათად თუ ვინმეს აჩვენებდა ამდენ გრძნობასა და ყურადღებას. ეკატერინე და მაია ძველებურზე ტკბილად შეხვდნენ ერთმანეთს.

მაია დიდი პატივით ექცეოდა აშილს. მის თავმოყვარეობას ძლიერ აკმაყოფილებდა ნაპოლეონის შვილიშვილის სიძობა. აშილ მიურატსაც ძალიან მოეწონა მაია.

— ეს ნამდვილი ძველი დიდების ნაშთია თქვენი ოჯახის ცხოვრებიდან. — ეუბნებოდა ის ცოლს.

მაია ჯერ კიდევ მშვენიერი იყო, მისი გრძელი ნაწნავები

* ა შ ი ლ მიურატი — ნაპოლეონ ბონაპარტეს დის, კაროლინას, შვილიშვილი კაროლინა ნეაპოლიტანიის მეფის — იოაჰიმის მეუღლე იყო.

თითქმის არ შეცვლილიყო. ტანზე სადა, თეთრი ტანისამოსა სისპეტაკის ელფერს აძლევდა.

ახალგაზრდა მიურატმა ცოლის საშუალებით გადასცა მაიას — ძლიერ წუხს, მხატვარი რომ არ არის და მისი მშვენიერების ტილოზე გადატანა არ შეუძლია. მაიას ესიამოვნა აშილის სიტყვები.

— არასოდეს სურათს არ გადავიღებ. ერთხელ გადავიღე ჩემს სიცოცხლეში და ისე ცუდი გამოვედი, რომ თავი შემძაგდაო, — უთხრა აშილს მაიამ.

მაიამ და კონსტანტინემ აშილი და სალომე დაპატიჟეს ხიულაში, მდიდრული მიღება მოუწყვეს. ნათესაური კავშირი თითქოს კვლავ აღდგენილ იქნა ოჯახებს შორის, სითბო მაინც აკლდა ამ კავშირს. ხალისი და კეთილი განწყობილება ისევ კონსტანტინეს შეჰქონდა მათს ოჯახში. ის ხშირად ნახულობდა თავის რძალს, რომელმაც თავის მუდმივ საცხოვრებლად ზუგდიდის სასახლე განაახლა.

ზუგდიდის სასახლის პარკი ქებული იყო მთელს საქართველოსა და რუსეთში. კვლავ გაჩნდნენ პარკის პატარა ტბაში გედები, სასეირნო ნაეები. ისინი პაწია კუნძულის გარშემო დაცურავდნენ. გირლიანდებით და თაიგულებით შემკულ კუნძულზე მაგადა იდგა. ეკატერინე ხშირად თავისი სტუმრებით აქ საუზმობდა. მას მთელ სიცოცხლეში ხელმოკლეობა არ უგრძენია, ზაფხულის თვეებს კი ისევ გორდში ატარებდა. ხან ქალიშვილს ესტუმრებოდა, ხანაც აქეთ ეწვეოდნენ შვილები:

ერთხელ კონსტანტინემ აშილი და თავისი ვაჟები ჭრებალოში წაიყვანა, ქვიშარში, სადაც შესანიშნავი ზვარი ჰქონდა. ხვანჭკარული ღვინოს გამოსახდელი ორასკოკიანი საწნახელი და ასკოკიანი ქვევრები უჩვენა. მთებს შუა მდებარეობდა ქვიშარი. ერთობ ძნელი მისასვლელი იყო, მაგრამ მაინც ხალისით იმგზავრეს.

მაია ბოლო ხანებში ავადმყოფობას უჩიოდა. კონსტანტინემ ახალგაზრდა, სახელგანთქმული ექიმი სამსონ თოფურია მოაყვანინა, რომელმაც მისი ავადმყოფობა ბრმა ნაწლავის დავადებით ახსნა, ოპერაციის გაკეთება ურჩია, სთხოვა ქუთაისში ჩასულიყო სამკურნალოდ.

ექიმის წასვლის შემდეგ მაიამ ქმარს განუცხადა:

— თუ ოპერაციის გაკეთება გადაწყვიტე, საზღვარგარეთ წავალ, მხოლოდ იქაურ ექიმებს ვენდობი.

— კი, გენაცვალე, მამუი მე თვითონ გეახლება, წაგიყვან, მოგარჩენ. შენს თავს სიკვდილს დავანებებ განა? — ეალერსებოდა კონსტანტინე ცოლს.

მაია ამსტერიაში

ამიერკავკასიაში რკინიგზა სულ რამდენიმე წლის გაყვანილი იყო, როცა მაიამ ვენაში წასვლა გადაწყვიტა. მიუხედავად კონსტანტინეს გულწრფელი თხოვნისა, წაჰყოლოდა ცოლს, მაიამ არ ისურვა ქმართან ერთად წასვლა და თავისი აზრი ასე დაასაბუთა:

— შენ რომ წამოხვიდე, მრავალი მხლებელი და ხარჯება დაგვჭირდება. აქაც გამოჩნდებიან მსურველები ჩვენი გაცნობისა. ფართო ბინა, მიღებები, სადარბაზოდ სიარული, მოუსვენარი ცხოვრება ექიმობის საშუალებას არ მომცემს. ჯობს სისოიას წავიყვან, ჩემს ნათლულს, ცოცხალი და მოხერხებული ვაჟია, რუსული კარგად იცის. იქ კი, ვენაში, ბაბო შერვაშიძე, ჩემი ცუცუს ქალიშვილი დამხვდება. ამბობენ ხელმწიფის ცოლს ახლავს ვენაშიო. თუ იქ არ არის, პეტერბურგში მივწერ და ჩამოვა ჩემთან.

დიდხანს არ იზიარებდა კონსტანტინე ცოლის აზრს. ბოლოს მაინც დაუთმო.

შუცნაური ამ მოგზაურობაში ის იყო, რომ მაიას არაფერი არ აკვირვებდა. მისთვის მატარებლით მგზავრობაც ახალი იყო. რუსეთის დიდი ველები და ქალაქები თითქოს ნანახი ჰქონოდა. მოსკოვში ორი დღე გაატარა, დაათვალიერა საყდრები; კრემლის ნახვა მოისურვა — რუს ხელმწიფეთა ძველი სადგომისა. მაიამ დაიარა კრემლი, ნახა მეფეთა სიმდიდრე, გულში შეადარა სამეგრელოს სამთავროს სამფლობელოებს, საქართველოში ნაქებ ზუგდიდსა და გორდს. გული დაწყდა: რა ღარიბნი და პატარანი ვყოფილვართ ამათთან შედარებითო. ყველაზე ყურადღებით ეკატერინე მეორის სურათს აკვირ-

დებოდა. ალტაცებული იყო მისი გარეგნობის სიმშვენიერთა და აღნაგობით.

ერთ წუთს ის თავის რძალს — ეკატერინეს შეადარა და ასე გაიფიქრა: „ეს მეფე ქალი რუსეთს აფართოებდა, ჩემმა რძალმა კი პატარა სამეგრელოს ვერ მოუარა, თავისი წილხლომილიც დაკარგა“.

ვენაში მათი სასტუმროში მოთავსდა. სწრაფად გავრცელდა ხმა საქართველოს უგანათლებულეს კნენას ვენაში ჩამოსვლაზე. ბაბო შერვაშიძემ, რომელიც იმ დროს მართლა ყოფილიყო ვენაში, გაზეთის საშუალებით გაიგო დეიდამისის იქ ყოფნა, მაშინვე ინახულა და კიდევაც უსაყვედურა.

— გაზეთების საშუალებით რომ არ გამეგო, თქვენი ნახვის საშუალებას არ მომცემდით, ისე წაბრძანდებოდით ვენიდან?

— მერჩია ჯერ განეკურნილიყავი, არავენ შემეწუხებინა, მერე მოგძებნიდი და ვისიამოვნებდი შენთან ყოფნით. აბა რა გემო აქვს ახლა ჩემს ნახვას, ცოცხალი დავრჩები თუ არა, არ ვიცი, — უპასუხა მათამ.

მათი საუკეთესო საავადმყოფოში მოათავსეს, ოპერაცია გაუკეთეს. ის მალე საესებით განიკურნა. მიუხადავად წლოვანებისა, კიდევ უფრო გამშვენიერდა, მისი აღნაგობა, სილამაზე და ჩაცმულობა გამვლელთა ყურადღებას იპყრობდა.

მათას ეუხერხულებოდა ხალხის ყურადღება და მაშინვე ეტლს შეაფარებდა თავს. მისი დისწული იცინოდა და ეფერებოდა დეიდას, რომელიც თავისი ორიგინალურობით დიდ შთაბეჭდილებას ახდენდა ევროპელებზე.

გამოჯანსაღებული მათი ეცნობოდა ვენასა და მის მიდამოებს. გულმოდგინედ აკვირდებოდა ცისფერთვალემა, მაღალტანიან ავსტრიულ ქალებს, იქაურ მამაკაცებს, ძლიერ მოსწონდა მათი სისუფთავე და კარგი ჩაცმულობა.

— ალბათ, ხალხი მდიდარია, როდესაც ასე კარგად და სუფთად აცვიათ, — ეტყოდა ზოლმე დისწულს.

— ბატონო დეიდა, აქ რაც ღარიბი არ უნდა იყოს ადამიანი, სისუფთავე და ტანისამოსი მათი სულიერი მოთხოვნის ისეთი ნაწილია, როგორც საჭმელ-სასმელი — ეუბნებოდა დისწული.

მაიამ ბაბოს თანხლებით ღირსშესანიშნავი ადგილები დაათვალიერა: ინახულა მრავალი თვალსაჩინო ძეგლი, სამკითხველოები და თეატრები. ერთ რამეზე დიდად წყდებოდა გული მაიას: ის უთარჯიმნოდ ვერაფერს აგებიანებდა სხვას. ხშირად გაუელვებდა გულში მამისადმი საყვედური, რომ შეილებს სათანადო განათლება არ მისცა. მაიამ მაღაზიებშიც ბევრობარა, ბევრი რამ იყიდა. ძლიერ მოეწონა როკოკოს სტილის დგამები, შეძენა კი გადაიფიქრა, ეძვირა კიდევ: დისწულს უთხრა: აბა რად მინდა, ბიძაშენის მთვრალი სტუმრები ერთ წელიწადში დალენავენო.

როდესაც ქალაქის ღირსშესანიშნავი ადგილების დათვალიერება მოათავა, ბაბოს სთხოვა, ქალაქკარეთ წაეყვანა, სოფელიც ეჩვენებინა მისთვის.

— ჩემთვის სოფლების დათვალიერება უფრო საინტერესოა, ბატონო. მე თვითონ სოფლის ქალი ვარ, ხვალ სადმე სოფელში წამიყვანე.

სოსიამ დილით ადრე სამგზავრო ეტლი მოჰგვარა. თვითონ ეტლის კოფოზე მოეწყო, ერთ-ერთ სოფელში მივიდნენ, რომელიც ვენიდან თორმეტი კილომეტრით იყო დაშორებული. ეს სოფელი განთქმული იყო მერძეობით.

დიდი გულისყურით დაათვალიერა მაიამ ფერმის ძროხეხები და მათი ბინები.

— ყველაფერს ცოდნა უნდა, ჩემო კარგო!.. ჩემი უბედურება ის არის, რომ მე ნასწავლი არა ვარ, ენები არ ვიცი, სამეგრელოს კარებს პირველად გავცილდი. მაკვირვებს ჩემი რძლის ეკატერინეს ამბავი. ნასწავლია, ქვეყანა შემოვლილი აქვს მრავალჯერ, მაგრამ ვერ შექმნა დიდი მეურნეობა, დიდი დოვლათი. განა გლებეუი რომ გაატყავო და იმათგან წანაგლეჯი შემოსავლით მხოლოდ გარეგნული სილამაზე დაამყარო, ეს არის თავიანობა? მე მშვენიერებასა და სილამაზეს არ უარყოფ. ახლაც ზუგდიდის სასახლის აღდგენა და გამშვენიერება ძალიან მსიამოვნებს, ამასთან ერთად ხომ შეიძლებოდა სასარგებლო რამ შემოეტანა ხალხში და გაეცვრებინა, თუნდაც ეს ფერმები.

— ძვირფასო დეიდა, დედოფალი კეკლუცია, სალონის ქა-

ლია. მას არ შეეძლო ასეთი პრაქტიკული საქმეების გაკეთება. ეს მისთვის ძლიერ მოსაწყენი იქნებოდა.

— ასე იყო თუ ისე, ვერაფერი გავაკეთეთ, ცხადია. მაგრამ სულ სხვა არის მისი ქალიშვილი სალომე, აწილ მიურატის ცოლი. ქმრის გავლენაა, შეიძლება. დიდი მშრომელი ქალი დადგა, სანიმუშო მეურნეობას ხელმძღვანელობს. სალხინო და ჭკადუაშის ზეგნები ოჯალეშის ვაზებით არის გადამწვანებული. სამეგრელოსათვის მრავალი უცნობი ხეხილი და დეკორაციული ხეების ჯიში გააშენა, არც ერთ ღირსშესანიშნავ ადგილს არ ტოვებს თავის კუთვნილ მამულში, გზებზე რომ არ გაიყვანოს და შემოსავლის წყაროდ არ გახადოს. რა წყალვარდნილები და საარაკო ადგილები არ გამონახეს მთებში, ბარში. ყველაზე ღირსშესანიშნავი ის არის, რომ სოფელში ავრცელებს ვაზის, ხეხილისა და სხვა მცენარეების ჯიშებს, ამით ხელს უწყობს ხალხში მეურნეობის განვითარებას.

— ეს საინტერესოა, დეიდა ბატონო.

— მან და მისმა მეუღლემ სამეგრელოში პირველებმა დაარღვიეს ის სულელური აზრი, რომ დიდკაცობისათვის შრომა თითქოს სამარცხვინოა.

— შრომა და სამარცხვინო საქმე? მხოლოდ გააჩნია, ვინ რა შრომისთვის არის მოწოდებული.

— ჩვენთან კი, შენმა გაზრდამ, ახლაც ვინმემ გაჭირვებულ თავადს, ან აზნაურს ხელში თოხი რომ დაუნახოს, ის სიკვდილს გაათავებს, შერცხვება, იუკადრისებს, თოხს ხელიდან გააგდებს და იტყვის — იმ მამაძაღლ მოჯამაგირეს ეს თოხი სად დაუტოვეიაო. ჰო, რამდენი ყალბი თავმოყვარეობაა ჯერ კიდევ დარჩენილი?

ისამ ხიბულაში

ევროპიდან წამოსვლის წინა დღეებში მაიამ ყოველგვარი მცენარეულობის თესლეული შეიძინა წამოსაღებად, მცენარეების ფოთლებიც კი გაახმო და წამოიღო, შემდეგისათვის რომ გამოეწერა ისინი.

მდიდარი შთაბეჭდილებებით დაბრუნდა ხიბულაში, მრ-

ვალი გეგმა მოჰქონდა თან ოჯახისა და მეურნეობის გარდასაქმნელად. გული წყდებოდა, რომ თავისი ახალგაზრდობა უქმად გაატარა, არ ისწავლა. მაგრამ აბა სად ესწავლა? მხოლოდ ახლა გაიგო თუ რას ნიშნავს ცოდნა და განათლება.

— ამდენი რამ ადრე რომ მქონოდა ნანახი, ბევრ კარგ და სასარგებლო საქმეს გავაკეთებდი. ახლა აღარც დანე და მხნეობა მაქვს წინანდელი და ჯალა დროს!.. — ეუბნებოდა მათ სანახავად მოსულ მამასა და ძმებს. — ადამიანმა რამე კარგი რომ შექმნას, საჭიროა ჯანმრთელობა და ცოდნა, — დასძენდა მათ, რომელსაც ყოველივე ამის გარეშეც ძლიერ უყვარდა სიცოცხლე.

ხიბულის წესრიგის შეცვლა იმით დაიწყო, რომ ეზო ერთი ვერსის მანძილზე გააწმენდინა ყოველგვარი ხისაგან, მხოლოდ წინა ეზოში დაატოვებინა დიდი ცაცხვი და სახლას საფარად მუხნარის ტყე ვეებერთელა ხეებით; ეზოს გარეთ ორი ქცევა მიწა შემოაღობინა; შიგ მთლიანად მათიტელა დაათესვინა; ბრძანა: უნიშნო შავი ძროხა ამოერჩიათ, ამ ძროხისათვის სხვა არაფერი საჭმელი არ ეჭმიათ, გარდა მათიტელასი, ეს ძროხა საკუთრად მისთვის მიეჩინათ. ვენაში ექიმს ეთქვა: ერთი ძროხის რძე და ყველი მიიღეო. ასეთი კვება ადამიანს სიცოცხლეს უხანგრძლივესო.

საწოლი ოთახიც კმრისგან ცალკე მოაწყო.

არ ეამა კონსტანტინეს ასეთი წესრიგის შემოღება; ხან უსაყვედურა ცოლს, ხან დაუყვავა. მათა ყოველთვის ერთსა და იმავე პასუხს აძლევდა:

— თუ ჩემი სიცოცხლე გინდა, უნდა შეურიგდე ამ წესს. მე ავადმყოფი ქალი ვარ. შენ ჩემზე კარგად მოგეხსენება, რომ ცალკე საწოლები განათლებულ ხალხში მიღებულია. ჩემი ფიქრით, ძლიერ ჰიგიენურიც არის და წესიერიც.

მათა იმხანად ქმარზე ნაწყენიც იყო; ძლივს იკავებდა თავს, ქმართან უსიამოვნება რომ არ მოსვლოდა. სასახლის მოენეებმა მათას დაწვრილებით მოახსენეს კანსტანტინეზე ბევრი არასასიამოვნო ამბავი.

სამი თვე, რაც მათამ ოჯახის გარეთ გაატარა ვენაში წასვლის გამო, კონსტანტინეს და მის მეგობრებს ძალიან ფუქსა-

ვატურად გამოეყენებინათ. მუდმივი ქეიფები და ნადირობა, საეჭვო ყოფაქცევის მანდილოსნების ქმრიანად დაპატიჟება, ქმრების დათრობა და ცოლებთან სითამამე ჩვეულებრივი ამბავი გამხდარიყო მაიას სასახლეში. მაიას ძმა კოწიაც განუყრელად სიძესთან ატარებდა დღეებსა და ღამეებს. ამას დაერთო კოწიას გამიჯნურება თავისივე ბიძაშვილის — ალექსანდრეს ცოლთან.

მაიას ჩამოსვლისთანავე მოახსენეს ყოველივე ეს. ოჯახიც განადგურებული მოეჩვენა.

— თუ სამი თვე განუწყვეტლივ ქეიფობდით, კიდევ ძალიან გაუძლია ამ ოჯახს, — საყვედურით ეუბნებოდა მაია ქმარსა და მოურავს.

კონსტანტინე დარწმუნდა, რომ მაიას გულის შემობრუნება ადვილად არ მოხდებოდა და აქაურობისაგან განშორება ამჯობინა, მით უმეტეს რთველი ახლოვდებოდა. ახლა ლეჩხუმი და სალხინო სჯობდა ხიბულას. თავისი ამალითა და მხლებლებით სასახლიდან წავიდა. მთელი შემოდგომა ჩიქოვანებთან, ლეჩხუმსა და სალხინოში გაატარა. ზამთრის პირად რამდენიმე დღე ხიბულაში დარჩა, ზამთარი კი ზუგდიდში და ქუთაისში დაჰყო თავის ძმა გრიგოლთან, რომელიც ახლა მუდმივად ქუთაისში ცხოვრობდა. გრიგოლს გენერლის ჩინი ჰქონდა და დიდ პენსიას ღებულობდა, აგრეთვე სამეგრელო-ლეჩხუმის მამულების შემოსავლითაც სარგებლობდა. ქუთაისში გრიგოლს კარგად მოწყობილი სახლი ჰქონდა. იმ ქუჩას, სადაც მისი სახლი იდგა, მის პატივსაცემად დადიანის ქუჩა უწოდეს. კონსტანტინე ძმასთან ხშირად ჩამოდიოდა, მასთან ყოფნითა და ბაასით ყოველ დარღს ივიწყებდა.

ყველა ამჩნევდა, რომ კონსტანტინეს სხვაგან ყოფნა ერჩია თავის სახლში ყოფნას. მისი მომხრეები, რა თქმა უნდა, ამ მოვლენას მაიას აბრალებდნენ: ვის გაუგონია, უკვე ხანში შესულ ქმარს გაემიჯნა, ცალკე ოთახში ცხოვრობს, დაუკითხავად სამეფო კაცი მის ოთახში ვერ შედისო. ზოგი კიდევ მაიას ამართლებდა: თუ ავად გახდა და მისი ჯანმრთელობისათვის ასეა საჭირო, რა ქნასო. ბევრ მითქმა-მოთქმას იწვევდა მაიას ასეთი განცალკევება. თვითონ მაიაც უბედურად

გრძნობდა თავს. საზღვარგარეთიდან დაბრუნების შემდეგ ოჯახშიც ვერ გააკეთა ის, რისი გაკეთებაც უნდოდა. ვერც ძროხების ფერმა მოაწყო, ვერც მცენარეების ჯიში ახეირა, ვერაფერში ვერ პოვა ქმრისა და მსახურების თანაგრძნობა.

ყოველგვარ წვრილმანში აზრთა სხვადასხვაობის ნიადაგზე მას ქმართან უსიამოვნება მოსდიოდა. ხშირად შვილების აღზრდის საკითხი იყო მათი დავისა და უკამყოფილების მიზეზი. ქალაქიდან დასასვენებლად ჩამოსულ ვაჟებს კონსტანტინე თავისებურად წერთნიდა: ცხენზე ჯდომას, ნადირობასა და დროსტარებას აჩვევდა. მაია ამის წინააღმდეგი იყო. ახალგაზრდობასთან ერთად მაიას და კონსტანტინეს საერთო აზრები და გრძნობაც შორდებოდა ერთმანეთს. ახლა მხოლოდ საერთო ნათესავეების ჭირი თუ ლხინი, საზოგადო მოვალეობანი აკავშირებდა ამ წყვილს.

მაიას და კონსტანტინეს ბევრი ძვირფასი ადამიანი ჩამოაშორა სიკვდილმა.

ჯერ პეტრე გარდაიცვალა, მაიას სულიერი მეგობარი, საყვარელი და კეთილი კაცი, რომელიც გონიერებასთან ერთად სიცოცხლით, მზიარულებითა და ენამახვილობით ყველგან სიხარულს თესავდა. მალე ეკატერინე დედოფალი გამოესალმა წუთისოფელს. ჯერ ამ დამგლოვიარებულ ოჯახში ხალისი არ შესულიყო, რომ მაიას მამა გიორგი გარდაიცვალა. ეს მწუხარება კი მაიას ძალას აღემატებოდა. თითქო დაიკეტა ხიბულის სასახლე. თვით კონსტანტინესაც აღარ უწევდა გული სანადიროდ და საქეიფოდ, ხოლო მაია ოთახიდან იშვიათად გამოდიოდა.

მაიას ძმებმა კოწიამ და დავითმა იცოდნენ, რომ მამას სიკვდილი მაიასათვის ძნელი გადასატანი იყო. გიორგი ხომ მაიასათვის მამაც იყო და სულიერი მეგობარიც. ახლა სულ მარტო დარჩენილ მაიას ძმები ართობდნენ. ისინი ხშირად ჩამოდიოდნენ მაიასთან ხიბულაში.

ორივე ძმას დაჰყვა მამის ნიჭი. ორივე დიდად გატაცებული იყო პოეზიით, თავისი ლექსებით იმდროინდელ სამეგრელოს მოწინავე ადამიანთა ყურადღებას იქცევდნენ და დაღა დაფასება ჰქონდათ ხალხში.

მაია ამაყობდა ძმების ლექსებით. მან თითქმის ზეპირად იცოდა მათი ყოველი სტრიქონი.

„ამათ რომ ევროპული განათლება მიეღოთ, აბა, რომელ პოეტს ჩამოუვარდებოდნენო“, — გაიფიქრებდა ხოლმე გულახტკივილით. მაია გაფაციცებით აღეწებდა თვალს ძმებს და გაიგებდა თუ რა ახალი ნაწარმოები შექმნესო, მაშინვე დააბტყებდა და თავის სასახლეში კითხვას მოაწყობდა. მას გაგონილი ჰქონდა ალექსანდრე ჭავჭავაძის სალონის ამბავი. სამეგრელოს მთავრის დავითისაგან და ეკატერინე დედოფლისაგან იცოდა, რომ იმ სალონში ქართველი და რუსი პოეტები უკითხავდნენ მოწინავე საზოგადოებას თავიანთ ნაწარმოებებს, რომ იქ იმართებოდა მათი განხილვა, აძლეოდნენ რჩევებს, გამოთქვამდნენ აზრს ნაწარმოებზე. სალონი არა მარტო ეხმარებოდა მწერალს თავისი ნაწარმოების უკეთ დამუშავებაში, მწერლის პოპულარიზაციასაც ეწეოდა.

მამის სიკვდილის წლისთავზე მაიამ გაიგო, რომ კოწიას ახალი პოემა დაეწერა, სთხოვა ძმებს, გაელოდნენ ხიბულაში და წაეკითხათ ახალი ნაწარმოები. კოწია და დავითი სიამოვნებით დაეთანხმნენ. მათ მაინც ხომ უნდა გაეციალებინათ და და სიძე.

პოემამ დიდი შთაბეჭდილება მოახდინა მაიას მიერ საგანგებოდ მოწვეულ სტუმრებზე. სტუმრად იყვნენ არა მარტო თავადები და აზნაურები, გლეხებიც, მოინალეებიც.

პოემაში ასახული იყო აფხაზი ხალხის ზნე-ჩვეულება, მისი ხასიათის სიმტკიცე, ადამიანების პატივისცემა, იშვიათი მეგობრობა, ძლიერი სიყვარულის ძალა. პოემის მოკლე შინაარსი ასეთი იყო: მურმან ჰამბა შეუყვარდება მისი მეგობრის სოზარ გულბანის ცოლს, ეშას. ქალის გატაცება იმ ზომამდე მიდის, რომ ის მურმანს სიყვარულს უცხადებს. მიუხედავად ეშას მშვენიერებისა და ახალგაზრდული თავდავიწყებისა, მურმანი უარყოფს ქალის სიყვარულს. ეშა შელახულ თავისიყვარობას შურისძიებით იკმაყოფილებს: როდესაც მურმანი და ეშას ქმარი სოზარი ერთმანეთს მეგობრობას ეფიცებიან, ქალი ძვირფასი თასით მურმანს შარბათს მიართმევს. სასმელი მოწამლულია ისეთი საწამლავით, რომელიც ადამიანს

ერთბაშად არ კლავს, ავად ხდის, ტანჯავს, დიდი წვალების შემდეგ მოკლავს. მურმანს თავისი ერთგული ცოლი დესპინე უვლის, დღედაღამ უძინარი და დაუსვენებელი ადგას თავზე. ეშა და მისი ქმარი ხშირად ნახულობენ ავადმყოფ მეგობარს. ერთხელ ეშა სთხოვს დესპინეს: ნება მომეცი, ამაღამ შეგცვალო, დაღლილი ხარ, ერთი ღამე მაინც დაისვენეო. ღონეგამოღებული დესპინე დათანხმდა, დაწვა, მაგრამ ძილი არ ეკარება. მას საშინელება ესმის: ავადმყოფის ლოგინთან დამჯდარი ეშა ეუბნება მურმანს, თუ როგორ გააგიჟა ის მისმა სიყვარულმა, როგორ შეურაცხყო მისმა უყურადღებობამ და ამის გამო მან მოწამელით შური იძია.

— შენ ვერ გაიგე, თუ რამდენ ბედნიერებას მოგვცემდა ჩემი სიყვარული, — უთხრა ეშამ.

მურმანი დინჯად ისმენს საშინელებას, მაგრამ გულში სინანული არ გაუვლის, პირიქით, მეგობრობის სიმტკიცის დაცვა უკანასკნელ წუთებს უტკბოვს.

დესპინემ ქმრის სიცოცხლეში ეს შემზარავი ამბავი დამალა, შემდეგ ხალხის წინ აღიარა საიდუმლო და თავი მოიკლა.

მაია ჩაფიქრებული ჭერეტდა პოემაში დახატულ სახეებს, მოულოდნელად გაიცინა, ქმარსა და ძმას თვალი გადაავლო, შემდეგ ღავითს შეეკითხა:

— ბატონო ჩემო, როდესაც ჩვენი ძმა წერდა ხასიათის სიმტკიცესა და მეგობრის ერთგულებაზე, ცთუნებიდან თავის შეკავებაზე გვიამბობდა, სახეში ან ბატონი სიძე უყოლებოდა ან თავისი თავი.

კონსტანტინემ გულდაგულ გადაიხარხარა, მისი კეთილი სახე სიცილმა კიდევ უფრო სანდომიანად აქცია, ხოლო კოწიამ დაირცხვინა, რომ მისი პოემის გმირს, ზნეობრივად სპეტაკსა და მტკიცე ხასიათის მქონეს, თვითონ ვერ ბაძავდა თავისი ცხოვრების გზაზე; პირიქით, ყოველთვის ცოდავდა ამ მხრივ. თუ რომელიმე მეგობრის ან ნათესავის ცოლი თვალში მოუვიდოდა, თავს ვერ შეიკავებდა, გრძნობები სწრაფად მოერეოდა.

ის მუდამ ვინმეზე შეყვარებული დაბორილობდა, ხენეშოდა და სატრფიალო ლექსებს წერდა: თუ მიზანს ვერ მიაღ-

წევდა, თავი მოსაკლავად არ ენანებოდა. ერთდერთი მხსნელი ასეთ შემთხვევაში ის იყო, რომ სატრფიალო საგნის დაშორება გულს მალე უცივებდა, ახლა ვინმე ახალი განსდებოდა გულის მფლობელი, შემდეგ კიდევ ახალი.

კოწიას ვერც დაცოლშვილებამ უშველა. ბოლომდე ენებათა ღელვის მონა-მორჩილი დარჩა. მშვენიერი სქესსადმი ასეთი სისუსტე ყოველთვის სალაპარაკო მასალა იყო მის ნათესავ-მეგობრებში. მაია და დავითიც ხშირად ტუქსავდნენ კოწიას, ყოველნაირად ცდილობდნენ მის გამოსწორებას.

დამგლოვიარებული ოჯახი ახლა ასეთი კითხვა-საუბრით ირთობდა თავს. კონსტანტინეც რაზდენიძე თვეს შეწირავდა გარდაცვლილი ნათესაების ხსოვნა-პატივს, შემდეგ მოწყინდებოდა ეს ერთფეროვნება და სადმე სტუმრად წავიდოდა. სადაც არ უნდა მისულიყო, ყველგან უკეთესად, უფრო თავისუფლად გრძნობდა თავს, ვიდრე საკუთარ ოჯახში. ჩადირობით, გამუდმებული ქეიფებითა და ქალებთან ტრფილით ერთობოდა სახლის გარეთ.

გ ა თ ი შ ვ ა

მაიასა და კონსტანტინეს ჩუმი გათიშვა ახლა არა მარტო ნათესაებმა, მთელმა სამეგრელომ იცოდა. ეს ორი ადამიანი ერთ ჭერ-ქვეშ იმყოფებოდა, პატივითა და მორიდებით ეპყრობოდა ერთმანეთს, მაგრამ ორთავენი თავიანთი საკუთარი გემოვნებით ცხოვრობდნენ, ერთმანეთის საქმეში თითქმის არ ერეოდნენ.

სასახლეშიც დაჯგუფდა ხალხი. ერთნი მაიას უკმევენენ გუნდრუკს, მას ამართლებდნენ, ყველაფერში კონსტანტინეს ამტყუნებდნენ, ხოლო მეორენი, პირიქით, ცოლ-ქმრის უსიამოვნებას მაიას გულცივობითა და მედიდურობით ხსნიდნენ. ორი ჯგუფი ერთმანეთისადმი მტრულად იყო განწყობილი.

კონსტანტინეს მომხრეები მაიას და მის მომხრეებს აბეზლებდნენ კონსტანტინესთან, ხოლო მაიას მომხრეები, მის ქმარზე და მის ერთგულებაზე თუ რაიმე ცუდს გაიგონებდნენ, მაიას მოახსენებდნენ.

ამ ბრძოლაში მაინც მაია რჩებოდა გამარჯვებული. მისი გავლენა ოჯახზე შეურყეველი რჩებოდა.

ან რა გავლენა უნდა ჰქონოდა ოჯახზე კონსტანტინეს, როდესაც ის მთელი წლის მანძილზე ოჯახში ორ-სამ თვეს არ იმყოფებოდა? მისთვის ყოველთვის ღია იყო კარები საძა-სპინძლოდ ლეჩხუმსა და სალხინოში, ზუგდიდსა და ჭკადუაშ-ში, აფხაზეთსა და სვანეთში, თბილისში თუ ქუთაისში. კონს-ტანტინეც სიამოვნებით დადიოდა მხლებლებით, მწვეარ-მე-ძებრებით. არცთუ ისე იაფად უჯდებოდა მისი მასპინძლობა სოფელს. იყო შემთხვევა, როდესაც კონსტანტინეს მიერ ერთი კურდღლის დაჭერა სოფელს სამ პროზად უჯდებოდა, პური და ღვინო რომ არ ვიანგარიშოთ. თუ კურდღელი გაჯიუტ-დებოდა და მწვეარ-მეძებრეს ხელიდან გაუსხლტებოდა, კონ-სტანტინე დაედევნებოდა, თუნდაც საამისოდ სამი დღეც დას-ჭირვებოდა, არ მოეშვებოდა, სანამ კურდღელს თავის საყვა-რელ მწვეარს არ დააჭერიდებდა. დაღლილ-დაქანცული მონა-ღირეები საღამოს საღმე მოსასვენებლად შევიდოდნენ. პრო-ზის მეტი აბა რა ეყოფოდათ კონსტანტინესა და მის მხლებ-ლებს?

ოჯახში კონსტანტინეს დაბრუნებასთან ერთად იწყებოდა აურზაური, ქეიფი, სიმღერა, ღამეების თევა, ყაბახზე სრო-ლა; აუარებელი სტუმრის მიღება-გაცილება, ცხენების ჯი-რითი, სტუმრებითურთ სანადიროდ წასვლა, მიმინოების გა-წაფვა და ვინ მოთვლის კიდევ რა.

კაპუეტი და მიმინოები ყოველთვის ცალ-ცალკე ძარებში ჰყავდათ მწერთნელებს.

მწყერზე ნადირობა მაიასაც უყვარდა, მშვენივრად უტევე-და მიმინოს, რომელიც მის ხელზე კონხტად იჯდა და მწყრის გამოჩენას ელოდებოდა. მაიას ყაბახიც იზიდავდა, ცხენით ჯირითიც. ახალგაზრდობაში მას ბევრჯერ მიუღია მონაწი-ლეობა ასეთ გართობაში, შეჯიბრებია ქმარსა და ძმებს, ახლა ცქერითღა ერთობოდა.

მაია ორი-სამი დღე ხალისით ხვდებოდა ქმარსა და მის სტუმრებს, სიამოვნებდა ოჯახის გამოცოცხლება. როდესაც სტუმრიანობა გაუთავებელი ხდებოდა, მას მოთმინება ეკარ-

გებოდა, ოთახში ჩაიკეტებოდა და თავს უქეიფოდ გამოაცხადებდა, ერთგულებს კი ეტყოდა:

— არ უნდა მიეცეს დასასრული დროის ტარებას? ოჯახი გაჩანაგდა, მთელი წლის საზრდო ერთ კვირაში გავათავეთ, შემდეგ რით ვიარსებოთ? ამ დალოცვილს სულ მთავარი ჰგონია თავისი თავი. ჩვენ თავს ჩვენ უნდა მოვუაროთ. თუ ოჯახში დასაკლავ ქათამს არ დავტოვებთ, რაღა ოჯახი იქნება? კაცი ბერდება, ჭკუას ვერ მოეგო, რამდენ კაცს აცდენს, შინაურს თუ გარეშეს! ღმერთო, ამ უბედურებისაგან დამიფარე! — დაუმატებდა მაია გულნატკენად.

კონსტანტინე მაშინვე იგრძნობდა ცოლის შეწყრომას, ხანდახან შეეიდოდა მასთან, ალერსითა და ტკბილი ენათ მშვიდობიანობა რომ დაემყარებინა, ხანდახან თვითონაც გაბრაზდებოდა, სვანურ ქულს თავზე ჩამოიფხატავდა, ცხენს მოიკითხავდა, გამოემშვიდობებოდა ცოლს და თავისი ამალით ოჯახს საჩქაროდ გაცილდებოდა.

ერთხელ, შუალამისას, როცა კონსტანტინე თავისი სტუდენტობითა და გამართობებით ქეიფობდა, მას მოახსენეს: მაია, ბატონო, უქეიფოდ არის, ხმაურისაგან ვერ მოისვენო. კონსტანტინე უკვე მთვრალი იყო. მოულოდნელად დაიძახა: ცხენები ჩქარაო. ნახევრად მძინარე, დაღლილი მსახურები წამოჰყარეს. რამდენიმე წუთში თხუთმეტი ცხენი გავიდა ხობულის სასახლიდან. კონსტანტინეს საყვარელი ცოლისძმა კოწიაც მასთან იყო. ვერც კოწიამ გაბედა დასთან შესვლა და მისი დაშოშმინება.

როდესაც ჭიშკრიდან გავიდნენ, კონსტანტინემ ხმამაღლა გადასძახა მეწინავე მეგზურს:

— ჰირდაპირ ალექსანდრე ბატონიშვილის სასახლისკენ იარე, იქ უნდა გავათავოთ დაწყებული ღვინი, — თქვა და თან კოწიას ხელი დაუჭირა, შემდეგ დასძინა: — გაკეთდა შენი საქმე, ამაღამ обмалует тебя красавица Кето, ქალი ასეთი უნდა. აბა ჩემმა მამუმ რომ ყინულით აავსო ჩემი ცხოვრება, ეს არის კარგი?

კოწიამ არაფერი უპასუხა, აღარ ჰქონდა მსჯელობის თავი, ღვინომორეულს ქეთოს ნახვის იმედი რომ დაემატა, ეს ბუ?

ბერაზი გაუკაცი უღოზო გახდა. მას თავისივე გულის ძგერა აშინებდა. გულის ძგერა ძლიერი იყო, თვითონ კი — მთლად უძლური ამ წუთს.

კოწიას უეცრად საშინელმა აზრმა გაუელვა თავში: იქნებ მოახერხოს, ქეთო დაითანხმოს, ამ ღამითვე გაიტაცოს და დაეცუთროს საყვარელი არსება? ასეთი ფიქრი მისთვის პირველი როდი იყო.

კოწიას მრავალი ღამე გაუთენებია ამგვარ აზრთა ბრძოლაში, ხშირად გაუღვენია ეს აკვიატებული აზრი.

„ვის უნდა მოეტაცო ცოლი, ღვიძლ ბიძაშვილს, თანშეზრდილ ალექსანდრეს, ძმაზე უტკბესს, სპეტაკს, პატიოსანს? მერე სად გადავიკარგო? ყაბარდოს გზები ჩემთვის დაკეტილია, მე ხომ მათი სიძე ვარ. ძმად შეფიცული მეგობრები გამომიღებებიან, შურს იძიებენ. ერთადერთი გზა საზღვარგარეთ წასვლაა, ამ ნაბიჯს კი დიდი თანხა და საშუალება უნდა. საქართველოში მე ვერ გავიხარებ. ყველაფერი რომ გადავლახო, ცოლიც შევწირო, შვილიც, თვით სინდისს სად გავექცე, საკუთარ სინდისს? ის ხომ მუდამ ჩემთან იქნება და გასაქანს არ მომცემს?“

შემდეგ თავისი მრისხანე და, მაია, წარმოუდგა თვალწინ. „არ დამზოგავს, მტრად გამიხდება, ათას თავზე ხელაღებულს მფარველობს, სასიკვდილოდ არ დაგვზოგავს ოჯახისა და გვარის შემბლაღავ ძმასა და რძალს. ალექსანდრეს ამოუდგება გვერდით, მას საყვარელი ბიძია პეტრეს ვაჟი ძმებზე მეტად უყვარს. არც კეთილი და მზიარული კონსტანტინე თანამიგრძნობს და დამეხმარება, რომ ჩვენი ოჯახი ასე დაეამცირა და საამკარაოზე გამოვიტანო ოჯახის თავმოყვარეობის შელახვა“.

ასეთ ფიქრებში ჩაძირული კოწია ხშირად პასუხს ვერ აძლევდა სიძეს ხუმრობასა და შეკითხვებზე.

გათენებამდე ბევრი დრო არ იყო დარჩენილი, რომ წაჩხურუს მიაღწენ, პეტრეს დიდი ეზოს ჭიშკარი შეაღეს.

პეტრეს ცნობილ ოჯახს მისი დარბაისლური ჭკუა და წესრიგი აღარ ეტყობოდა. პეტრეს სიკვდილის შემდეგ მამულის მეურნეობა თითქმის მოიშალა. პეტრეს შვილები ალექ-

სანდრე და ლევანი სხვადასხვა ხასიათისანი იყვნენ. ალექსანდრე მამას ჰკავდა, ლევანი კი უფრო ჩქარი იყო.

რამდენად დინჯი, ზრდილი და პატიოსანი იყო ალექსანდრე, რომელიც დიდსა და პატარას ყველას ერთნაირად უყვარდა, იმდენად არასასიამოვნო იყო თავისი ხასიათით მისი მეუღლე ქეთო წერეთელი.

ამ ქალმა იცოდა, რომ მას თავისი ქმრის ბიძაშვილი კოწია დადიანი ეტრფოდა. იმის მაგივრად, რომ მაშინვე ჩაეკლა ამ კაცისთვის ეს უსინდისო ტრფიალი, ქეთო თვითონ აქეზებდა, იწვევდა კოწიას თანაგრძნობით. ისედაც თავგზააზნეულს ცეცხლს უკიდებდა.

ქეთოს ოჯახი განთქმული იყო იმერეთში პატიოსნებით, სტუმართმოყვარეობით, განათლებით. ქალის მშობლებმა იცოდნენ, რომ ის შეყვარებული იყო კოწია დადიანზე და ყოველნაირად ცდილობდნენ გულიდან ამოერეცხათ მისთვის ეს სიყვარული. ქეთო ხან საჩხერეში, ხან თბილისში მიჰყავდათ გასართობად.

კოწია კი ქეთოს ახლოს მოულოდნელად გაჩნდებოდა, ქორივით თავს დასტრიალებდა. იგი გასაქანს არ აძლევდა სუსტი ნებისყოფის ქალს, რომ თავს მორეოდა და უღირსი გრძნობა გულიდან ამოეგლო.

კოწია გულისგამგვირავ წერილებს სწერდა ქეთოს, როცა მას თბილისში გადამალავდნენ.

„შენ ხარ ვისი და მე კი რამინი. არ შეიძლება ეს გრძნობა გავაქროთ, პირიქით, ის უნდა გავაღვივოთ, დაეიცვათ მტრებისაგან. ასეთი ძლიერი, ასეთი უხილავი და უჩვეულო სიამე, ასეთი ბედნიერება მხოლოდ ერთხელ ეწვევა ადამიანს. არავის არა აქვს უფლება სიყვარული შეაჩვენოს, გულში ჩაიკლას, გააქროს. გემგდრები, დაბრუნდი სამეგერელოში; ოღონდაც ვიცოდე, რომ ერთი პაერით ვსუნთქავთ და მე ამ ცოტა რამესაც ვიკმარებ იმედად“.

ასეთი წერილების შემდეგ ქეთო კიდევ დიდხანს ებრძოდა გულისთქმას. სიყვარულს მაინც თავისი გაჰქონდა, გული ძლევდა გონებას და ქალი იქ მიემურებოდა, სადაც მისი სატრფოს გული ძგერდა.

კონსტანტინესა და კოწიას შუალამის დარბაზობა სწორედ იმ დროს დაემთხვა, როდესაც კოწიას და ქეთოს ერთმანეთი რამდენიმე თვის უნახავი ჰყავდათ. ქმრისადმი მორიდება და კოწიას სიახლოვით გამოწვეული სიხარული ქეთოს ერთმანეთში ერეოდა, გარინდებუდიყო. მუდამ ცქრიალა და მოკიკიკე, ახლა საცოდავად გამოიყურებოდა.

ალექსანდრემ ეჭვად იცოდა, რომ კოწია მის ცოლს ეტროფოდა, მაგრამ ბიძაშვილის გამიჯნურებას დაცივით უყურებდა, რადგან არ სჯეროდა, წარმოუგენლად მიაჩნდა. მას ცოლი ძლიერ უყვარდა, მისი ნდობაც დიდი ჰქონდა. ქეთო ხომ ცნობილი ნინო ჩოლოყაშვილის და იყო. ნინოს სილამაზე, სიმტკიცე და პატიოსნება არა მარტო საქართველოში, რუსეთშიც ცნობილი იყო. ალექსანდრეს აზრადაც არ მოსვლია, რომ კოწიამ ასე ღრმად შესცურა სიყვარულის მორევში და ახალგაზრდა ქეთოც ჩაითრია. ალექსანდრე უბრალო ეჭვიანობასაც არ აშკარაუებდა, არც იკადრებდა ამაზე ფიქრს. კოწიას ჩვეულებრივად ექცეოდა და კიდევ ანებივრებდა საჩუქრებითა და ყურადღებით.

სტუმრები სიხარულით მიიღეს ძმებმა და რძლებმა.

სულ მალე ვახშამი გაეწყო. ვახშამს ჯერ ჩამავალი მთვარე გამოეთხოვა, შემდეგ ამომავალი მზის სხივები ესტუმრა ჩიტების ჭიკჭიკითა და მდინარე წაჩხურას შხუილით.

პეტრე დადიანის ფართო აივანზე, რომელიც ორას კაცს იტევდა, მალე გაისმა საამური სიმღერები. კოწია ქეთომ, კონსტანტინეს მიერ საცეკვაოდ გაწვეულმა, ნარნარი დაეღურით მოხიბლა სტუმრები და მასპინძლები.

ყველანი მხიარულობდნენ, მხოლოდ კოწია გამოიყურებოდა მოწყენილი და შეწუხებული. არც ერთი მისი გეგმა ქეთოს დასასაკუთრებლად არ გამოდგა, დაბნეულად იცქირებოდა აქეთ-იქით, ბევრს სვამდა. სალამოს კონსტანტინეს უთხრა, თავს ცუდად ვგრძნობ, შინ უნდა წავიდეო. კონსტანტინე მაშინვე მიუხვდა კოწიას „ცუდად გახდომის“ მიზეზს.

მის გვერდით მყოფ ქეთოს რუსულად გადაუჩურჩულა: სულ თქვენი ბრალია ჩემი ცოლისძმის ტანჯვაო.

ქეთოს შეეშინდა ამ ლაპარაკს ყური არავინ მოჰკრასო. კოწია რძლებს ხელზე ეამბორა, სიძესა და ბიძაშვილებს

გამოეთხოვა და თავისი მხლებლებით ხიბულისაკენ წამოვიდა და დაწყვიტა პირდაპირ მაიასთან მისულიყო.

„უნდა გამოვუტყდე ყველაფერში, როგორც უნდა, ისე მომეხმაროს, მეტი ღონე აღარა მაქვს, თავს მოვიკლავ მის წინაშე“. — ფიქრობდა უგუნებოდ მყოფი კოწია.

კოწიას მალე ალექსანდრეს ერთ-ერთი მსახური წამოეწია ცხენით და ჩუმად წერილი გადასცა. წერილში ეწერა: „მე არ შემძლია შენს დაღვრემილ თვალებს ვუყურო, ჩემო გოლიათო. რამე მოვიფიქროთ, რომ ჩვენი სიყვარული ნებადართული გახდეს, შენი პატარა ქეთო შენსავით იტანჯება“.

კოწიას თვალები გაუბრწყინდა სიხარულისაგან. — მაიასთან უნდა გადაწყდეს ჩემი ბედ-იღბალი, — ჩაილაპარაკა მან და ლაფშას მათრახი გადაჰკრა. იუკადრისა მთაში ლაღად გაზრდილმა ცხენმა მათრახი და მხედარს თავი წაართვა. კოწიამ მაგრად მოზიდა აღვირი, ცხენი ალაგმა, რაც გულში ჯაერი ჰქონდა, ცხენზე იყარა.

კოწია სასახლეში მივიდა, მაგრამ მაიას არ ეახლა. იცოდა, რომ დას მთვრალი კაცის დანახვა ჭირივით ეზარებოდა, მოინალის პირით შეუთვალა დაღლილი ვარ და დილას გნახავო.

მაიას სასახლეში სტუმრებისთვის რამდენიმე ოთახი ჰქონდა განცალკევებული და კოწია იქ განმარტოვდა თავისი ამალით.

კოწიას სამი კაცისაგან შემდგარი ამალა მუდამ ახლდა. ამ სამთა შორის იყო თავისი სიყრმის მეგობარი და მესაიდუმლე გიგიშა ბარძიმაშვილი. გიგიშას დაუკითხავად, მისი რჩევა-დარიგების უმიხოდ, კოწია არც ერთ სამიჯნურო საკითხს არ გადაწყვეტდა. გიგიშას რამდენი ქალის მონაღარებაში გაუმართავს ხელი კოწიასთვის, რამდენი ქალიშვილის ცოდვაში ჩაყარდნილა კოწიას ხათრითა და სიყვარულით, ყოველთვის მართლდებოდა გიგიშას წინათგომობანი, მისი აზრი, გეგმები. მაგრამ ქეთოსთან ვერაფერს გახდა. იმიტომ კი არა, ქალს არ უნდოდა, პირიქით, კარგად ხედავდა გამოცდილი ჭაბუკი, რომ ქეთოს ტრფიალებისა და სიყვარულის უფრო მეტი ცეცხლი ეკიდა, ვინემ კოწიას. ის უფრო ილტ-

ვოდა ამ კაცისკენ. აქ სხვა გასაჭირსა და ფათერაკს ხედავდა გიგიშა. დიდ დანაშაულად მიაჩნდა ბიძაშვილის ცოლიან კოწიას დაახლოება.

მთელი ღამე თვალი არ მოუხუჭავს კოწიას. სულ იმაზე ფიქრობდა, თუ როგორ ეთქვა მათასათვის თავისი გულის ჯავრი. გიგიშა სასთუმალთან ეჯდა და თუთუნს უხვევდა. სანუგეშოს კი ვერაფერს ეუბნებოდა მეგობარს. ჩუმად იჯდა, გულისტკივილით შეჰყურებდა. აბა, რა უნდა ეთქვა სანუგეშო?

კოწიას თვალწინ წარმოუდგა მამის სპეტაკი სახე. გიორგი, ალბათ, საფლავში გადაბრუნდებოდა შვილის ასეთი უმსგავსი საქციელით. მაია რაღას იტყოდა? დინჯი დავითი? თვით ალექსანდრე, თავმოყვარე ვაჟკაცი? ყველაზე მეტად მაინც ბაძია პეტრეს საყვედურით სავსე თვალეები, თითქოს საფლავიდან ტუქსავდნენ. ასე იშფოთა მთელი ღამე, მხოლოდ გათენებისას ჩაეძინა.

მაია ახლა თვითონ ჩქარობდა ძმის ნახვას, რადგან სასახლე სავსე იყო ჭირებით, მას წუხელისვე მოახსენეს, რომ ბატონიშვილს ქეთოს შოინალე დაეწია და წერილი გადასცა, რომ მისი ძმა კოწია ძლიერ უგუნებოდ ბრძანდებოდა იქაც, ალექსანდრე ბატონიშვილის სახლში და აქაც მთელი ღამე არ დაუძინიაო... ისიც უამბებს მაიას, რაც მსახურებს ალექსანდრეს სამზარეულოსა და სასტუმროს სახლში გაეგონათ.

დიდი მითქმა-მოთქმა იყო: პეტრეს ოდესღაც სასიქადულო ოჯახს არ შეხვდა მისი შესაფერი ერთგული ქალები. ოჯახი გაჩანაგებულია, ლხინი და ქეიფები ერთმანეთზეა გადაბმულიო.

მაიას გულს უკლავდა საყვარელი ბიძის ოჯახის ამბავი, ბოლმა ძლივს ეტეოდა გულში. მოსალოდნელი იყო, რომ მთელი გულისწყრომა ამ დილით კოწიას და შემდეგ გიგიშას დატყდომოდა თავზე.

კოწიამ გვიან გაიღვიძა და მაშინვე ეახლა დას, რომლისგანაც ის მფარველობასა და დახმარებას მოელოდა. მაია ტკბილად შეხვდა, მიუაღერსა კიდევ.

— რად დაბრუნდი ასე მალე, სად იყავი, ან კონსტანტინე სად დატოვე?

— ჩემს ბიძაშვილთან გახლდით, ალექსანდრესთან, ბატონიც იქ დავტოვე. მე უქეიფოდ გავხდი, შეხ კეახელი, საყვარელი დაო.

— რამ გაწყინა, ვიიომ, ბევრმა ღვინომ?

კოწია ღუმდა, გაკვირვებული შესცქეროდა დას. მაიას მხატვ კილოთი ლაპარაკი არ უყვარდა.

— რას დადუმებულხარ, ძმამო? მითხარი, რა გაწუხებს კოწია თავჩადუნული იჯდა.

— ნუთუ მე არ მენდობი და არ მეტყვი, რა გაწუხებს? მე ისედაც ყველაფერი ვიცი, გულთამხილაევი გავხდი, მხოლოდ შენი პირით მინდა სიმართლე გავიგონო, რას ფიქრობ, რამ შეგიპყრო?

— თუკი იცი, ბატონო ჩემო, მე რაღას მტანჯავ? ნულარ მალაპარაკებ ჩემთვის სამარცხვინო საქმეზე... მიყვარს, უიმოსოდ სიცოცხლე არ შემიძლია. მე ხომ ბავშვი აღარა ვარ... დასწყევლოს ღმერთმა ეს საშინელი გრძნობა...

მაიამ შეამჩნია, რომ კოწია ცრემლს ძლივს იკავებდა, წუთით თანაგრძნობითაც კი განიმსჭვალა, მაგრამ მალე გაიცივა გული და მკაცრად შეხედა ძმას, რომელმაც ოქრომკედით ნაქარგი ქისა ამოიღო, მაგრამ ისევ შეიანახა, რადგან არ უნდოდა ეს ქისა მაიას ეცნო.

მაიამ ოქრომკედით ქარგვა დიდი ხანი არაა, რაც ასწავლა თავის რძალს ქეთოს. ქეთო მაშინ აღტაცებით ფლურტულებდა, რომ პირველსავე ნაქარგს ქმარს მიუძღვნიდა. ახლა აი ეს ქისა კოწიასთვის უჩუქებია.

— კოწია, — უთხრა მაიამ ცივად, — მაჩვენე ეგ ქისა, რაღაც მეცნაურა. ეს ჩემი რძლის ქეთოს ნახელავია, ქმრისთვის უნდოდა, შენთვის კი უჩუქნია.

მაია მკაცრი თვალებით დაჰყურებდა ქისას. ერთხანს ღუმდა. მერე თავი ასწია, ძმას თვალი თვალში გაუყარა:

— შენ სცოდავ ღვთისა და კაცის წინაშე, შენ არღვევ ადამიანთა საუკეთესო მოვალეობას, შენ არღვევ ადამიანის იმ უპირატესობას, რომელიც მას ღმერთმა მიანიჭა სხვა ცხოველებისაგან განსხვავებით. არა გრცხვენია, კოწია, ბიძაშვილს დალატობ? ბიძაშვილის, შენი ალექსანდრეს ცოლთან აპირებ

გამიჯნურებას! ნუთუ შენ, სპეტაკი და მართალი დედის შვილს, ეგ შეგშენის? რა თვალით შეხედავ იქ, იმ ქვეყნად ჩვენს საყვარელ მამას, უწმინდეს კაცს. ვაჟკაცი დედაკაცს დაუპყრიხარ. მე გთხოვ, ამოიგდო გულიდან ეგ ბინძური გრძნობა, ჯერ გთხოვ, მერე გიბრძანებ. როდესაც არც ერთი არ გამოვა, ადვალად მოვაკვლევინებ ჩვენი ოჯახის შემარცხვენელ და ჩირქის მომცხებ ქალს, არც შენ დაგზოგავ, ამას გეუბნები სრულიად გადაწყვეტილად. ხომ იცი, ნათქვამის გადათქმა არა მჩვევია. ჩემი საამაყო ბიძის ოჯახს არ შეგარცხვენინებ. არ დაგინდოვ, კოწია, აღარ შეგიბრალებ და შენს სიცოცხლეს ტყვიით მოვათავებ. ახლა წადი, შენს ცოლ-შვილს მიხედე, ჩემი რძალი და ბავშვები აქეთ გამომიგზავნე, თვითონ ყაბარდოში, ფშავ-ხევსურეთში ან თბილისში, სადაც გენებოს, იქ წაბრძანდი, გაერთე, თუ ფული არ გყოფნის, მე გისაგძლებ, რაც საჭირო იქნება.

კოწიას ყოველ წუთს ფერი ეცვლებოდა, უძრავად იჯდა მის პირდაპირ, თითქოს დამუნჯდყო, ხმას არ იღებდა.

— შენ ჩვარი ყოფილხარ და არა ვაჟკაცი. შენს დიდ ტანში რა პატარა სული ჩაუდგამს განგებას. ასე როგორ მოგერიან გრძნობა მაცდური დედაკაცისადმი? იქნებ ფიქრობ თქვენა სიყვარული ისეთი მტკიცე და მუდმივი იქნება, რომ ვერავინ შეგცვლის შენ მის გულში და მას შენს გულში. წუთიერი ვნებისათვის ასეთი სულმდაბლობა?! მითქვამს და გეუბნები: ამ საქმეზე უბრალო ჭორი თუ კიდევ გავიგონე, საქმე ჩემთან გექნება და არა ალექსანდრესთან. იმ საძაგელ გიგიშასაც ყურებს ავახვე. უთხარ, თვალთ არ დამენახოს.

კოწია ადგა, უნდოდა თამბაქო გაებოლებინა, მაგრამ გაახსენდა, რომ მაიას ოთახში თამბაქოს მოწვევა აკრძალული იყო და ისევ უღონოდ ჩაეშვა სავარძელში. მაია ისევ განაგრძობდა:

— გიბრძანებ, გასცილდე სამეგრელოს, მანძილი და დრო გულს აცივებს, იარებს აშუშებს. დღეს დაღლილი ხარ, მოისვენე, დილით წადი! ერთ წელიწადს თვალთ არ დამენახო წერე, იკითხე. კაენივით ძმის მოლაღატე გამხდარხარ, ცოდვა არ გასვენებს, გაშმაგებული დადიხარ აქეთ-იქით. ძმის მოლაღატე ხარ, ცოლის, შვილების, ოჯახის დიდების. იქნებ გგო-

ნია, ცოლის ნათესავეები შეგარჩენენ ქალის დამცირებას და მიტოვებას. კარგად მოიგონე, რა აურზაურით შეირთე ცოლა, ჩერქეზეთში გადახვეწილი დადეშქელიანი ვაგვიძალიანდა, არაფრით ქალის მონათვლის თანხმობას არ იძლეოდა, ჩვენს რჯული კი ნებას არ გვაძლევდა, უნათლავეზე ჯვარი დაგეწერა. შენ მაშინაც შეყვარებული დადიოდი, ყველას თავი შეგეცაცოდე. მამამ და ბიძამ ყოველი ღონე იხმარეს, რომ საქმე მშვიდობიანად დამთავრებულიყო. ხან დადეშქელიანი თელიდა თავს გალანძვულად, ხან ჩვენი ოჯახები, კინალამ საშველიშეალო შური და მტრობა ჩამოვარდა. როგორც იყო, დავითანსჰეთ დადეშქელიანი ქალიშვილისათვის მონათვლის ნება მიეცა. სამეგრელოს დიდებულთა თანადასწრებით, შენი მეუღლე მდინარე ენგურში მონათლა ჭყონდიდელმა და დედოფალმა. ხალხით გადაფენილი იყო ენგურის ნაპირი გაღმა-გამოღმა. გეგონებოდა მთელი მილეთი აქ არისო. ქალი გაღმა მონათლეს, თეთრ პერანგში, ფეხშიშველი იდგა ენგურში, შვლის სუკრით თრთოდა, უმანკო, კდემამოსილი; ნარნარი, შენს მეუღლეობას მონატრული. როცა წყლიდან ამოიყვანეს, მე და პეტრეს ჩაგვაბარეს. სახელდახელოდ გაკეთებულ კარავში შევიყვანეთ. შემდეგ შენს საცოლეს სეფექალებმა იქ ჩააცვეს მანათვის გამზადებული ტანისამოსი, ცხენზე შესვეს და მაყრიონით გამოღმა გამოიყვანეს... პეტრე მოკვდა, ახლა მელა დავრჩი მისი პატრონი. ის შორიდან მოსულია, დღეს მე მაწევს ვალად მისი გამოქომაგება. ესეც რომ არ იყოს, რა თვალათ გავიხედოთ ქვეყნად? ასეთი დიდი ამბით ნათხოვი ქალი, რომლის მოყვანას მთელი დასავლეთ საქართველოს წარჩინებული საზოგადოება ესწრებოდა, დღეს გინდა შეურაცხყო!..

კოწია მდაბლად თავი დახარა, შემდეგ ძლივს ამოიღულულა:

— რაკი არავის გებრალებით, დაე მოვკვდე. მაგრამ ქეთოც მოკვდება. ის ნაზია, პატარა, ჩემს უნახობას ვერ გაუძლებს... — კოწიას სახეზე მიწის ფერი დაედო.

— პატიოსან სიტყვას გაძლევ, ძმაო ჩემო, საყვარელო! ქეთოს მე მოუველი და ვუპატრონებ. — უპასუხა ტკბილად მაიამ. — ახლა კი წადი!

კოწია ისევ სასტუმროში განმარტოვდა. ახლა არც გიგიშა

გაიკარა და არც სხვა ვინმე. ოთახში ჩაიკეტა, ცდილობდა არ ეფიქრა ქეთოზე. მისდა გასაოცრად უცებ საშინლად მოუნდა დაეხატა ქეთოს საწინააღმდეგო ხასიათის ქალის სახე. ამას ლექსით ვერ მოახერხებდა. გადაწყვიტა დაეწერა ბოემა.

„რამდენი ხანია არაფერი დამიწერია, — ფიქრობდა იგი, — განა მართო სატრფიალო ლექსების წერას ჰქვია პოეტობა?“ მას თვალწინ დაუდგა მაიას ძლიერი, მტკიცე სახის გამომეტყველება.

— იშვიათი ქალია ეს მაია, როგორ დამიმორჩილა თავისი აზრებით. მართლაც, უნდა მოვერიდო ქეთოს და ამ სამარცხვინო საქმეს, უნდა ამოვიგდო გულიდან ეს გრძნობა.

კოწიას გულმა მწარედ დაიკვნესა ამ გონების განჩინების მოსმენით. შემდეგ თავისი მომავალი პოემის გმირი ქალის სახის შექმნაზე დაიწყო ფიქრი.

— ქალი უნდა გამოეხატო ძლიერი ნებისყოფის, შეურყეველი, ოღნავ გულგრილი, რომლის პიროვნებაშიც გონება და ზნეობრივი სიმართლე ჯაბნის. გულისთქმასა და ვნებებს ძლიერი ნებისყოფის მქონე ქალები მამაკაცებს ყოველთვის იხსნიან განსაცდელისაგან, უღირსი, შეუფერებელი საქციელისაგან, შეუქმნიან მათ პირობებს ღირსეული დარჩენენ, სამშობლოსათვის სასარგებლო და სასახელო.

მოაგონდა გმირი ქართველი ქალების ამბები, განსაკუთრებით ქეთევან დედოფლის ქება, ხალხში საარაკოდ გასული.

— მე დარწმუნებული ვარ, რომ ჩემს დასაც შეეძლო ქეთევანისებური სიმტკიცის გამოჩენა.

გადაწყვიტა თავისი გმირი ქალისათვის მაიას გარეგნობა და სულიერი სიმტკიცე მიეცა. რამდენჯერმე გაიმეორა გულში, თუ როგორი შინაარსის უნდა ყოფილიყო მისი პოემა, სათაურიც კი შეარჩია. უკვე თვალებს ლულავდა, გრძელ წამწამებში კი გმირ ქალთა სახეები ლანდებად ეფინებოდა; ბაგეზე ხანდახან ქეთოს სახელიც აწყდებოდა, რომელსაც მაიას გოროზი სახის ძლიერება ჩრდილავდა. ძილის ბურანში წასულ კოწიას ცნობიერებაში ერთხელ კიდევ გაიელვა მაიას მკაცრმა თვალებმა.

დიდხანს არ გაუვლია კოწიასთან საუბრის შემდეგ, რომ მაიამ ქეთო მოიწვია ბაეშეებით. ორ თვემდე ჰყავდა თავისთან, ახწაელსა და ხელსაქმეს, ხმამაღლა წიგნების კითხვას სთხოვდა.

— მე უკვე თვალები მეღლება კითხვით, შენ წამიკითხე, რძალო! — ეტყოდა ქეთოს და წიგნს გადაუშლიდა. წიგნება უფრო ხშირად სასულიერო ხასიათისა იყო, რომელშიც მოცემული იყო ცოდვისგან თავის დაღწევის ამბები, ხორციელ ვნებათა დათრგუნვა, სულიერი სიძლიერის მოპოვება.

არ იზიდავდა ქეთოს ამგვარი წიგნების კითხვა, რომელიმე სატრფიალო რომანი ერჩია, მაგრამ მაია შეუბრალებელი იყო. ყოველ წაკითხულ წიგნს ახსნა-განმარტებას დაურთავდა, ყოველ წუთს, უბრალო ლაპარაკშიც კი, ზნეობრივ საკითხებს ეხებოდა, ახალგაზრდა რძალს ჩააგონებდა სულიერსა და ხორციელ სისპეტაკეს.

ცქრიალა და სიცოცხლით სავსე ქეთო სულ რაღაც ორსამ კვირაში მაიამ თავის გაუღენის ქვეშ მოიქცია. პირველად თუ ქეთოს მაია მხოლოდ იმით იზიდავდა, რომ ის კოწიას და იყო და მათი სახის წყობაში ერთგვარ მსგავსებას ხედავდა, ახლა ეს ქალი ხიბლავდა ძლიერი ნებისყოფით, აზრთა სიმდიდრით. მაიას ახლოს მყოფ ქეთოს იმედით გული ევსებოდა, სწამდა, რომ ეს სანდო გული მას გაჭირვების დროს დაეხმარებოდა, დარდსა და ფიქრს შეუმსუბუქებდა.

ორი თვის შემდეგ უხვად დასაჩუქრებული ქეთო მაიამ ქმრის ოჯახში გაისტუმრა, თან სთხოვა: როგორც კი მოწყენა იგრძნო, მაშინვე მე მომაშურეო.

მაიასთან გამოთხოვებისას ქეთო ტიროდა, გულწრფელად ღვრიდა ცრემლებს.

— ძვირფასო ბატონო, ახლა უთქვენოდ მე მეტად გამიჭირდება ცხოვრება, ძალიან შეგეჩვიეთ. ახლოს კი ვართ, მაგრამ ნეტავ ისე ახლოს ვიყო, ყოველდღე თქვენი ნახვის ბედნიერება მქონდეს! — ეუბნებოდა ის მაიას.

განკურნებულივით მიდიოდა ქეთო, რომელმაც კარგად იცოდა, რომ კოწია სადღაც შორს, ძალიან შორსაა მაიასაგან

განდევნილი. ალბათ კვლავ ილხენს, კვლავ ლამაზებს ეტრფის.

ბშირად ჩაწყდებოდა გული, შავ, გრძელ წამწამებს ცრემლი დაუნამავდა, მაგრამ იმავე წუთს აიმართებოდა მის წინაშე მშვიდი სახე ახალი მეგობრის — მაიასი, რომელმაც ერთი სიტყვაც არ უთხრა კოწიასა და მის რომანზე, არც საყვედურო, არც პირფერობა; სულ გადაკვრითა და შთაგონებით ესაუბრებოდა დიდ სიყვარულზე, წმინდა და მართალ სიყვარულზე. თავისი და ალექსის გამიჯნურების ამბებზე.

ქეთომ კარგად დაიმახსოვრა მაიას შეგონება: ხორციელი სიამოვნება ადამიანისათვის არ არის მუდმივი და მყარი, მეტადრე, თუ ის მიმართულია სპეტაკი, მაღალი ზნეობის წინააღმდეგ. როდესაც ვნება გაივლის, ვნება უხამსი, წუთიერი, ადამიანები რჩებიან ცარიელნი, გამოფიტულნი.

მათ ცხოვრებას შინაარსი ეკარგება. შემდეგ ერთ გრძნობას მეორე, ახალი გრძნობით იოკებენ...

ქალის დანიშნულებაა სასახლო შეილები აღუზარდოს სამშობლოს, შეილები ჯანმრთელი, გონიერი. აჰა, აფორიაქებული ქალი რა შეილებს გამოუზრდის ქვეყანას? ქალი ზნეობადაცული უნდა იყოს.

შემოდგომის მიწურულს კოწიას ცოლ-შვილი ესტუმრა მაიას. მაიამ გაზაფხულამდე არ გაუშვა ისინი ჭკალუაშში. კოწია შინ არ ეგულებოდა, მაია დანაპირებს ასრულებდა: ძმასა და მის ცოლ-შვილს პატრონობდა, ხოლო ქეთო რომ დაამშვიდა, სწორ გზაზე დააყენა და ბევრი კარგი რამ ჩააგონა, მაია ამაში დარწმუნებული იყო და ეს ძლიერ უხაროდა.

ძმის მიმართ თავისი მოვალეობის შესრულების შემდეგ მაიას თითქოს მოქმედების ასპარეზი გამოეღია.

მღორედ და ერთფეროვნად მიმდინარეობდა ხიბულის სასახლეში ცხოვრება, თითქოს საქვეყნო ამბებს სრულებით ჩამოშორდა მაია.

რაც უფრო ხანში შედიოდა მაია, მით უფრო გულცივი ხდებოდა ოჯახში. მაიას მუდამ მოძრაობის, მოქმედების წყურვილი აწუხებდა, ცხოვრება კი მოდუნდა მის გარშემო, მასა და მის ოჯახს აღარავინ არაფერს ეკითხებოდა.

ცხოვრებიდან გარიყულად გრძნობდა თავს. ეს გრძნობა ძლიერ აწუხებდა და უფრო აცივებდა მის ისედაც მიუკარებელ ბუნებას.

კონსტანტინეს კეთილი ხასიათიც შეცვალა დროთა ბრუნვამ. ისიც ვეღარ იტანდა გულცივობას და განდევილობას.

ხშირად თვითონ დაასწრებდა ცოლს გულისმოსვლას, მაშინვე წასვლას ბრძანებდა, ხიბულას გაეცლებოდა.

მაიას გულისწყრომა გაუვლიდა, წუხდა, რატომ აწყენინა ქმარს, რატომ არ დაუთმო, მაგრამ მაინც ვერა, ვერ მიეჩვია დათმობას ნებიერი ქალი.

საბედისწერიო წასვლა

შემოდგომის თბილი საღამო იყო. კონსტანტინე და მისი მზღებლები ცაცხვის ძირას ისხდნენ და საუბრობდნენ, მაია აივანზე სეირნობდა. ფართო აივანს, რომელიც სასახლეს გარშემო ერტყა, მთელი დღე მზე არ შორდებოდა, და მაიაც ყოველთვის იქ სეირნობდა, სადაც ჩამავალი მზის სხივები ეფინებოდა.

თოვლივით თეთრი კაბით შემოსილ მაიას ოდნავ შეკერცხლილი დიდი ნაწნავეები შილიფად გადაეშვა ბეჭებზე.

ოჯახში თითქოს კარგი განწყობილება დამყარდა მას შემდეგ, რაც კონსტანტინეს მწვეარმა — რალიამ მაია გულში ჩაახედა.

მაიას და კონსტანტინეს ერთი თვის წინათ უსიამოვნება მოუვიდათ. კონსტანტინე ცოლის ოთახიდან გულმოსული გამოვიდა, ძალღი თან გამოჰყვა და მთელ დღეს მაიას ოთახს არ გაჰკარებია ეს მწვეარი. ბოლოს კონსტანტინე მოეფერა, მაამაც ხან ხაჭაპურები, ხან შაქარი შეაძლია, სხვებმაც დაუძახეს, მაგრამ ამოდ, ძალღი ახლოს არ მიდიოდა. ბოლოს ძალით შეიყვანეს ოთახში, ის იმ წუთსვე გამოიქცა. ყველა გააკვირვა რალიას საქციელმა. როდესაც კონსტანტინე ცოლის ოთახში შევიდა და მწვეარი კი პატრონს ტალანში ელოდა, ცოლ-ქმარი გულიანად იცინოდა ძალღის გონიერებაზე, ბოლოს კონსტანტინემ ცოლს გულდაგულ უსაყვედურა:

— არა გრცხვენია, მამუ? შენზე უფრო რაღიას ვუყვარ-
ვარ. ამანაც კი შეგამჩნია, რომ გული გაგიცივდა ჩემზე.

მაიამ გულში ჩაიხედა, შერცხვა და თავი დამნაშავედ აგრ-
ძნო ქმრის წინაშე.

„მარტო ეს ბეჭედი კმარა ჩემს დანაშაულად ქმრის წინა-
შეო“, — გაიფიქრა მან. შეეცადა ქმართან უფრო გულთბილი
ყოფილიყო. თუ რამე არ მოეწონებოდა, გვერდს აუვლიდა და
წყენას არ გამოააშკარაებდა.

მამუს ხასიათის გამოცვლით გახარებული კონსტანტინე
მეტ დროს შინ ატარებდა, ოჯახსა და მეურნეობაზე ზრუ-
ნავდა.

უფროსი ვაჟი, გრიშა, ქუთაისში სწავლობდა გრიგოლის
მეთვალყურეობით, უმცროსი უჩა კი — პეტერბურგის პაეის
კორპუსში.

გარეშე თვალი ბედნიერების მეტს ვერაფერს დაინახავდა
მაიას ოჯახში.

მაიამ ჩამავალ მზეს თვალი გაუსწორა, ბუნების სიღიადათ
ტკებოდა სილამაზის თაყვანისმცემელი ქალი, ახარებდა
ღრუბლებისა და მზის სხივების ერთმანეთთან ბრძოლის
ცქერა; ბავშვივით ელოდა, რომ ოდნავ დაფარული მზე ღრუბ-
ლებს გადაიყრიდა, კიდეც უფრო შეწითლებული გამოჩნდებო-
და და ცის კაბადონსაც ფერს შეუცვლიდა.

ამ დროს მაიამ შეამჩნია, რომ ჭიშკართან ვიღაც ჩამოხტა
ცხენიდან, ცაცხვის ქვეშ მყოფებს ანიშნა. რამდენიმე წუთის
შემდეგ კონსტანტინე ხელში წერილით ამოვიდა კიბეზე. ის
საუვისი კაბინეტისაკენ გაემართა.

— მამუ, გენაცვალე, გრიგოლის წერილია, წამოდი ჩემს
კაბინეტში, წაიკითხოთ! — უთხრა ცოლს; მაია გაჰყვა. წერი-
ლი არ აღმოჩნდა სასიამოვნო.

გრიგოლი რძალს სწერდა, რომ გრიშას საშემოდგომო გა-
მოცდა ჰქონია მათემატიკაში. ზაფხულში საგანი არ დაუმზა-
ლებია, გამოცდაზე არ გამოცხადებულა და უთქვამს: გიმნაზი-
აში იმავე კლასში ვეღარ დავჯდები, თუ ნებას მომცემთ, საზღ-
ვარგარეთ წავალ, ქვეყნებს ვნახავ და ვისწავლი კიდეცო.

ტყვიანაკრავივით წამოხტა მაია.

— არ არას ჩვენი სწველი, ბატონო! არაფერი კარგი და წასახელო არ გამოდის ჩვენი ოჯახიდან. არასგზით არ მივცემ ნებას, რომ სწავლას თავი დაანებოს!

— თუ გამოცდაზე არ გამოცხადდა, ახლა უკვე მწიფობის თვეა, სწავლა კი ენკენისთვეში იწყება, დაგვიანებულია, რას ვიზამთ, უნდა შევესრულოთ სურვილი, — უთხრა ქმარმა.

— იმავე კლასში დაჯდომა რცხვენიაო! — მწარედ გაიცინა მაიამ. — თუ რცხვენოდა, რატომ არ ისწავლა?

— სირცხვილის გარდა გრიშა ერთობ დიდია მეშვიდე კლასისათვის. წვერულვაშიანს ოცდახუთი წლის კაცის შეხედულება აქვს.

— არაფერი არ უჭირს ამას, თუ კაცს სწავლა სწყურია. საზღვარგარეთ წასვლა განა ასე ადვილია? ქალი სამკურნალოდ წავედი, ერთი ქალაქის მეტი არ მინახავს, კაპიკობით მომჭირნეობას ვეწეოდი. ხომ გახსოვს, რა დამეხარჯა? გრიშას რა ტანი, ფეხი, მხლებელი, სასტუმროები, ხელგაშლილი ცხოვრება ეყოფა. ვინ იცის, ეგებ რამე ავადმყოფობა, ან ცუდა რამ შეხვდეს ქალაქიდან ქალაქში ხეტიალით. ის იქ არაფერს არ ისწავლის.

— რატომ ასე უნუგეშოდ ხედავ ყველაფერს, ძვირფასო მამუ! ჩვენ დახმარებას გავუწევთ, ზოგჯერ გრიგოლიც შეეწევა. რატომ ვერ ისწავლის? ყოველ შემთხვევაში, ენებს ხომ შეისწავლის.

— ვიცი, ბატონო, მე ჩემი გაჭვდილი ხატის ამბავი, ის არაფერს არ შეისწავლის გარყვნილებისა და უმაქნისობის მეტს, თუ ისწავლის, მაინც ვერ გამოიყენებს. როგორც სახით გგავს, ისე საქმიანობითაც დაგემსგავსება. განა ცოტა ისწავლე? რაში გამოიყენე? მთელი ძალ-ღონე, ნიჭი, ნადირობას, ღვინოს და ქალებს შეაღიე. ამ გზით წავა გრიშაც... ვაი, განწირულ ოჯახს!

— მაია, შენ ისე არ შეგიძლია, თუ ყოველი მსჯელობა, საუბარი ჩემზე არ გადმოიტანო, გულზე არ გამხეთქო. კონსტანტინე შეარცხვინოს ღმერთმა, თუ ამიერიდან მოგეკაროს. მე დღეიდან აქ ფეხის შემომდგმელი არა ვარ, იცოდე: რაც გინდა, ის შეუთვალე შეილს, ოჯახი მაინც შენს ნებაზეა.

ღამდებოდა, კონსტანტინემ ზიბულა რომ დატოვა, მაია თავის ოთახში იჯდა წარბშეკრული. იცოდა, ერთი მისი ადგომა, ქმართან მისვლა და ტკბილი სიტყვა მოაღბობდა კონსტანტინეს და მის სათნო გულს, მაგრამ ამ ტკბილ სიტყვასაც ვერ შეეღია.

კონსტანტინე რომ ეზოდან გადიოდა, მაიამ თვალი მოჰკრა ქმარს და გული უჩვეულოდ დაწყდა. ახალგაზრდა ხომ არ არის დალოცვილი, რომ დაღამებისას ყაჩაღივით ოჯახიდან მიდის. სად დაუღამდება, სად გაუთენდება, არასოდეს არ იცოდა და ახლაც არ უნდა იცოდეს?

კონსტანტინემ იმ ღამეს მოყვრებში დაისვენა, დილით ლეჩხუმისკენ გაემართა. გზა-გზა ისვენებდა ის და მისი მხლებლები. ქეიფისა და მოლხენის გუნებაზე არ იყო, არც ნადირობას ეტანებოდა, თუმცა მწევარ-მეძებრები თან ახლდა.

სამ კვირასაც არ გაუვლია კონსტანტინეს წასვლის შემდეგ, რომ მისმა მწევარმა რალიამ მოიბრძინა ზიბულის სასახლეში, პირდაპირ შეეარდა მაიას ოთახში და გულის გამწყვლელებელი ყმუილი გააბა. ძალღი დატუქსეს და გარეთ გააგდეს. ის სწრაფად გასცილდა ეზოს და გაქრა.

მაია გაფითრებული იდგა და იძახოდა:

— დამერწმუნეთ, კონსტანტინეს რაღაც უჭირს, იქნებ ცხენმა დაამარცხა ან ნადირობაში დაშავდა, მიშველეთ, ძაღლის ნაკვალევს გასდიეთ ცხენით.

ბრძანების შესრულება ვერ მოასწრეს, რომ ეზოში უცხო კაცი შემოვიდა. მოსულმა მაიას მოახსენა: ბატონი კონსტანტინე მძიმე ავადაა, სალხინოში, თავისი ძმისწულის — სალომეს სასახლეში წევსო. სამი დღეა, რაც ლეჩხუმიდან ავადმყოფი ჩამობრძანდა. პრინცესამ მაშინვე ექიმებს გამოუძახა, უკეთობა არ ემჩნევა. ზშირად თქვენს სახელს ახსენებს, ძლიერ ენატრება თქვენი ნახვაო.

მაიამ იმწამსვე წასვლა ბრძანა.

მაია ასეთი აღელვებული და სასოწარკვეთილი არასოდეს ენახათ სასახლეში.

მალე გულშემზარავი ამბავი მოვიდა. კონსტანტინე მაშინვე გარდაცვლილიყო, როგორც კი მისი ავადმყოფობის ამბის მომტანი გამოეგზავნათ ზიბულაში, სიკვდილის წუთებ-

ში გამოქცეულიყო მწევარი და გამოგზავნილი კაცისათვის დაესწრო, ახლა კონსტანტინეს გარდაცვალების ამბავი უფრო წინდახედულად შემოეთვალა მაზლისწულს.

თავადი ჩიქოვანი და მისი მხლებლები დინჯად შემოვიდნენ ეზოში და მოშორებით ჩამოხტნენ ცხენებიდან. მათ ძალიან ეძნელებოდათ ამ საზარელი ამბის მიტანა მაიასათვის.

მაიას არ ეამა მათი მოსელა. გააჟრჟოლა, ფერი ეცვალა.

— მიიღეთ სტუმრები, — ბრძანა მაიამ და თან ფანჯრიდან თვალს არ ამორებდა მოსულებს, თითქოს მათ სახეზე ცდილობდა სასიხარულო თუ სამწუხარო ამბავს ამოკითხვას.

მაიამ შეამჩნია, რომ გარეჭიშკარს მრავლად აწყდებოდნენ მეზობლები — ქალი თუ კაცი, ცხენოსნებიც გამოჩნდნენ აქიქ. აიძვრა მაია, აივანზე გამოვიდა, სტუმრებს შეეგება და მთრთოლვარე ხმით შეეკითხა:

— მართალი მითხარით, რა მჭირს!

სასახლის ქალი და კაცი, ახლო მეზობლები ესეოდნენ მაიას. კალთას უკოცნიდნენ, სიმართლის თქმას ვერ უბედავდნენ. ისევ მოხუცი ქანთარიები, კიტიები, ქარცხიები და სხვა გამზრდელ-გაზრდილები მიუახლოვდნენ მაიას პირის ზოკით, თავში ხელის ცემით და ერთხმად მიატირეს:

— აღარა გვეყვს ბატონი კონსტანტინე. მზე დაგვიბნელდა, ვაი შენი ცოდვა, ვაი ჩვენი ცოდვაო.

ქალები ეზოს გარს უვლიდნენ, ჰკიოდნენ, ყველაფერს აყრუებდნენ თავიანთი ტირილითა და მოთქმით...

მაია დიდხანს იდგა ქანდაკებასავე, სახეზე მიწისფერი ელო, შევერცხლილი ნაწნავები გველებივით იკლაკნებოდნენ მის აძიგძიგებულ ბეჭებზე.

— ვაი შენს მამუს! უჩემოდ მოკვდი, ვერ დაგიხუჭე ჩემი ხელით თვალები, ესეც ვერ შეგისრულე! — წაბარბაცდა და ხელმოკიდებული შეიყვანეს კონსტანტინეს ოთახში.

აქ კი ცრემლები წვიმასავით წამოვიდა. დიდხანს ვერ იჯერა გული, მთელი ღამე ცრემლს აფრქვევდა.

ეზოში კი ისმოდა კივილი, მოთქმა. სოფლები ერთიმეო-

რეზე აწყდებოდნენ სასახლეს. მოდიოდა ქალი და კაცი ცხენით თუ ფეხით. ხალხის დენა მთელი დამე არ შეწყვეტილა.

მაიამ საშინელი მწუხარება იგრძნო, როდესაც განთიადი მოახლოვდა და პირველმა სინათლემ მის დაბნელებულ გულში ჩაიხედა, მწუხარედ დაიკვნესა:

— შენ ველარ დახვდი განთიადს თვალგახელილი, ჩემო ლომივით ვაჟკაცი! როგორ გიყვარდა სიცოცხლე, ხალისა, ვინ წაგართვა ეს, ჩემო ბატონო, რა მოგერია?

მალე თავკაცები შევიდნენ მაიას ოთახში.

მაია მიხვდა, რომ მწუხარება მორეოდა და მიცვალებულზე ზრუნვა დაგვიანებოდა. შემოსულებს დაუძახა:

— როგორც საჭირო იყოს, ისე მოასვენეთ აქეთ ჩემი ბატონი მეუღლე! როგორც წესი და რიგი იყოს, ისე დამისაფლავეთ ცაიშის საგვარეულოს სასაფლაოზე! ახლავე კაცი გაგზავნეთ ქუთაისში, ჩემს მამულს, ბატონ გრიგოლს და ჩემს უბედურ გრიშას აცნობეთ.

თ ე ჯ ი რ ი

კონსტანტინეს სიკვდილისა და დაკრძალვის შემდეგ მაია ძლიერ დამწუხრებული გამოიყურებოდა. მიუხედავად ბოლო ზანებში ქმართან განწყობილების გაუარესებისა რომელიც იქამდე მივიდა, რომ ისინი თითქმის უცხო ადამიანები გახდნენ ერთმანეთისათვის, მაია მაინც საოცარ მარტოობასა და სევდას მოეცვა.

— არ ისწავლა ჩემმა იმედმა, ჩემმა უფროსმა შვილმა, მამის კვალს დაადგა, დაღის აქეთ-იქით, აიკიდა გუდამშიერი თავდაზნაურები, უსაქმობაში ათენებს და აღამებს. ამას ველოდი მე შენგან. გრიშა?

მაია ხშირად იჯდა ქმრის კაბინეტში, საათობით ათვალეფრებდა მის ქაღალდებს, სურათებს. განსაკუთრებით უყვარდა ის სურათი, სადაც კონსტანტინე თავის გრიშასთან და უჩასთან იყო გადაღებული.

მაია ახლა სულის სიმშვიდეს ამ ოთახში ყოფნით ინარჩუნ-

ნება, თითქოს ამ განწყობილებით ანაზღაურებდა ქმრის მიმართ იმ უყურადღებობას, რომელსაც ასე ხშირად იჩენდა ნებით თუ უნებლიეთ.

„თუ გრიშამ არ გამიმართლა, უჩა მაინც არ მიღალატებს. ის ნიჭიერია, მეცადინე, ისეთ სასწავლებელში სწავლობს, რომ იქიდან უსწავლელ კაცს არ გამოუშვებენ. ახლა მხოლოდ უჩაა ჩემი იმედი“.

კიდევ ერთი სულიერი იტანჯებოდა ამ ოჯახში მაიასთან ერთად. ეს გახლდათ კონსტანტინეს მწევარი რალია. პირუტყვი თითქმის მთელი დღე კენესოდა. არ ჭამდა, არც სვამდა. გახდა, ჩამოდნა. იწვა კონსტანტინეს ოთახის კარებთან და იქ მაიას მეტს არავის უშვებდა. მაია რომ მივიდოდა, ცრემლით სავსე თვალებით შეხედავდა და გზას დაუთმობდა. მაია მისი საცოდაობით იწვოდა, მის დარდსა და ვარამს კიდევ უფრო აძლიერებდა პირუტყვის წუხილი კონსტანტინეზე. ერთ მშვენიერ დღეს რალია გაქრა, ბევრი ეძებეს, მაგრამ მიწამ ჩაყლაპა თუ ცამ, ვერსად ნახეს. ბოლოს მაიამ მოისაზრა: სასაფლაოზე არ იყოს წასულიო.

მეორე დღესვე გაგზავნეს კაცი ცაიშში.

მწევარი სწორედ იმ მხარეს გაწოლილიყო ეკლესიის კედელთან, სადაც კონსტანტინეს საფლავი ეგულებოდა და თავი კედელზე მიედო. საშინლად დაღვრემილი გამოიყურებოდა, ადამიანივით თვალებზე ცრემლი ჰქონდა მომდგარი. ვერ მოაშორეს იმ ადგილს რალია, ვერც აჭამეს, ვერც ასვეს. გახელებული ეგონათ, ისე იღრინებოდა პატრონის ერთგული ძაღლი...

მაიას ეს დაწვრილებით მოახსენეს. შეწუხდა, შეებრაღა რალია.

— რა უყავით, საცოდავს, — იკითხა ფერმიხდილმა მაიამ.

მეორე დღეს გარდაიცვალა და ეკლესიის გალავნის გარეშე მიწას მივაბარეთო, უთხრეს ქალბატონს.

მაიამ არაფერი უპასუხა, ყველანი დაითხოვა, მარტო დარჩენილმა კრიალოსანი აიღო, რამდენჯერმე გადამარცვლა, შემდეგ ფანჯარას შუბლით მიეყრდნო, დიდ ეზოს გახედა და მრავალჯერ ნაფიქრს დაუბრუნდა:

— მე ორი დიდი გრძნობა მოვიწიე, ვერც ერთს ვერ

დავაკედი; პირიქით, ახლა კიდევ უფრო მინდა სიცოცხლე. განა თავის გასამართლებელი საბუთი, რომ სიცოცხლე გეწყურია, ადამიანებს დაგველევა? ადამიანი ყოველთვის მონახავს საბაბს, რომ მისი სიცოცხლე საჭიროა ვინმესათვის, შვილასათვის, ოჯახისათვის, საზოგადოებისათვის. თავს ვიტყუებთ. ჩემი უბედურება ის არის, რომ ეს არ შემძლია, მე ვიცი, ჩემს არსებაში ზის ჩემთვის უხილავი და შეუცნობი რაღაც ძალა, რომელიც აქეთ, სიცოცხლისაკენ მეზიდება, მეც მიყვარს სიცოცხლე. ვერავეითარი მწუხარება და სასოწარკვეთილება ვერ აღმოფხვრის ადამიანის არსებიდან სიცოცხლის ძალას. როგორ მძულს პატარა ადამიანები, რომლებიც გვარწმუნებენ, რომ სიცოცხლე არ უნდათ ვინმე ძვირფასი ადამიანის სიკვდილის შემდეგ, სახეს იკაწრავენ, ყვირიან, კივიან, ხოლო როგორც კი რამდენიმე თვე გაივლის, მზიარულად განაგრძობენ სიცოცხლეს. ჩემი ფიქრით, ისინი ჩემს რაღიასაც ვერ შეედრებიან.

ამ ფიქრებში კრიალოსანი დამარცვლა, — ვინ არ დაეკარგე ძვირფასი მშობლები, საყვარელი ადამიანი, ქმარი, ბიძა. პირველი ჩემი მწუხარება ალექსის მოულოდნელი სიკვდილი იყო. მას ხომ ჩემი გულის მეტი არავენ დარჩა მომგონებელი. ჩემი სიცოცხლით სავსე კონსტანტინე, მასზე მწუხარებამ ლემის ყველა და ყველაფერი დამავიწყოს, რა საშინელი შეიქმნა ეს მწუხარება ჩემთვის? არ მეგონა, რომ ასე დამიპყრობდა მასზე ფიქრი, მაგრამ სიცოცხლე მაინც მინდა. ვხედავ, ეს ცრუ წუთისოფელი არარაობაა, მაინც არ მიყვარს სიკვდილზე ფიქრი. მე ასე მწამს, ადამიანმა იმდენ ხანს უნდა იცოცხლოს, რომ სიკვდილი მოსვენებად და ძილად მიიჩნიოს.

მაია ადგა, მივიდა მაგიდასთან, რომელსაც ორ ნაწილადა ყოფდა თეჯირი. ძვირფასი შავი ყანაოზი მარგალიტის მძივებით აქარგული, სპილოს ძვლით მოოჭვილი, ღია ფერის ხის ჩარჩოში იყო ჩასმული.

ამ მაგიდის თეჯირს რომ შეხედავდით, ერთ წუთს გეგონებოდათ: მიწაზე თოვლის ფანტელები ცვივა და ჯერ მიწის დაფარვა ვერ მოუსწრიათო. ეს ნივთი კედელზე აკრული გე-

გონებოდათ. თეჯირის წინ ეწყო შვილების, ძმების, დისწულებისა და მაზლისწულების სურათები.

მაიამ უცებ აიღო თეჯირი, მის მიღმა მიცვალებულთა მთელი გაღერეა აღმოჩნდა. თურმე ეს წარმტაცი ნივთი მაიას გულის ბოლმასა და სევდას მაღავდა მიცვალებულთა სახით. ვის სურათს არ ნახავდით აქ: ლევანის, მართა დედოფლის, დავითის, ახლო ნათესავების, ბიძების, ცუცუხი და ბევრი ახლობლისა და ძვირფასის. ყველაზე წინ კონსტანტინეს დიდი სურათი იყო. ყველანი ცოცხლებივით გამოიყურებოდნენ ჩარჩოებიდან.

მაიამ დიდხანს უცქირა გარდაცელილთა სახეებს, — „ამოება ამოებაზე და სოფელი ცრუ“, — თქვა მან და პირჯვარი გადაისახა.

მაია თითქმის ყოველდღე დახედავდა მისთვის ძვირფას და დაუვიწყარ ადამიანთა სურათებს, ლოცულობდა მათი სულის მოსახსენებლად, მეტ დროსა და ყურადღებას კი საოჯახო მეურნეობის განმტკიცებას ანდომებდა.

კონსტანტინე არ იყო შრომისმოყვარე ადამიანი, მაგრამ მისი სახით მაინც დიდი იმედი გამოეცალა ხელიდან მაიას და მის შვილებს. რიხიანი და გულმოწყალე კონსტანტინე ჯერ კიდევ დიდი გავლენით სარგებლობდა სამეგრელოში. ტოლს არავის დაუდებდა ფეოდალებს შორის. მის მამულს თუ თვათონ არ უვლიდა, ავი თვალით მაინც არავის შეახედებდა. ახლა კი ამ მამულზე ბევრს ეჭირა თვალი, მაგრამ მაიას შიში ქქონდათ, მისი მტრად გახდომის ერიდებოდათ. ვაი მას, ვისაც მაია შეიძულებდა, ვინც მის რისხვას დაიმსახურებდა.

მაიამ სიბერეში ერთი ობოლი გოგო გამოზარდა. ისე უყვარდა იგი, როგორც თავის დროზე ლერწამისა და თუთანა. შეიღივით ექცეოდა ამ გოგოს. მას თამარი ერქვა. მაია სასიყვარულოდ თამარიას ეძახდა. ცელქი, მხიარული და თან ღამაზი იყო თამარია. ბევრ ბიჭს ეჭირა სოფელში მასზე თვალი. ბევრთა შორის ერთზე თამარიასაც აუძგერდა გული. ეს იყო მაიას ნაყმევი გლეხის კოხიას ვაჟი, ჩონთი კოხია. მაიამ იცოდა ჩონთისა და თამარიას გამიჯნურების ამბავი. არაფერს უწუნებდა ბიჭს, მაგრამ თამარს ვერ ელეოდა და ამიტომ მის გათხოვებასაც აყოვნებდა. თან ფიქრობდა, ჯერ სულ ბავშვია

თამარიძე, რა ეჩქარებაო. ცოდვას, დაინაგრება ღარიბ ოჯახში, იყოს ჯერ ჩემთანო.

შეცდა მათა. მალე თამარიძის ფეხმძიმობა შენიშნა. თავზარი დაეცა. შემირცხვინა ოჯახი ტყირპიანი კოხიას ღლაპმაო. მის რისხვას საზღვარი არა ქჷონდა. თამარიძე არ დაუსჯია, მაგრამ გადაწყვიტა კოხიები მთლიანად გადაესახლებინა სოფლიდან. სამოსახლოდ ხობის მონასტერთან უბოძა მიწები და უბრძანა ორ დღეში დაეტოვებინათ სოფელი.

რამდენი საპატიო კაცი მიუგზავნეს, რამდენი ბოდიში არ მოუხადეს დამნაშავის მშობლებმა და ახლობლებმა, მაგრამ მაინც ვერ შეარყიეს მათას გადაწყვეტილება.

წყევლიდნენ მათას კოხიები, თან უკვირდით გულის ერთი მოსვლით ასე როგორ გაგვიმეტა მაგ შეუბრალებელმა ქალმა, მის სამსახურში ვებერდებით, ახალგაზრდებმა რაღაცა დააშავეს და ამის გამო ჩვენი აყრა როგორ გადაწყვიტაო.

— ვინ ჰკითხავს თქვენს გადასახლებას მათა დადიანს? ახლა ის დრო აღარ არის, რომ როგორც მებატონეს მოესურვება, ისე გადაგასახლ-გადმოგასახლოთ, ძველებურად გაჰყიდოს გლეხი ან ქორ-მიმინოში გასცვალოს. არ დაიძრეთ! აბა რას იზამს, ვნახავთ, მაგ კერპი — უთხრა კოხიებს გელა ჯგერენაიამ, რომელიც მათას უსამართლო მოქმედებამ მოთმინებლად გამოიყვანა.

— ეხ, ჩემო გელა, მათა ბატონიშვილთან ბრძოლა ჩვენ სად შეგვიძლია? ვითომ ბატონყმობა მოსპეს? გვატყუებენ, ის კი არ მოსპობილა, ჩვენ ვისპობით. ისევ კისერზე გვაწევს ბატონყმობის უღელი, ისევ სიტყბოთი და მორჩილებით თუ დაცითანხმებთ, თორემ მათა რას არ შეძლებს, გუბერნატორს რომ ერთი მისწეროს, გაგვაციმპირებენ დიდსა და პატარას. ჩვენ, კოხიები, ხომ თავდაუხსნელი გლეხები ვართ. — ეუბნებოდნენ გაცეცხლებულ გელას კოხიები.

— აბა, ასე მთელი საცხოვრებელ-საბადებლით აიყრებით და წახვალთ?

— მაშ რა ვქნათ? ვის მივმართოთ, ვინ გამოგვესარჩლება? გელა ჩაფიქრდა.

— მოგვარდება რამე. შეეუჩნენ ლერწამისას, გიგიშას, რა ღმერთი გაუწყრება?

— არაფერი არ გაუვიდა, თორემ გიგიშა დიდი პატიოსანი კაცია, გლეხებს ყოველთვის ეხმარება.

მართლაც არაფერი გაუვიდათ მაიასთან. აი, გელას და ლერწამისას, არც გაგიშას.

თამარიას ცოდვით ქვა ატირდებოდა. ხა' ლო გოგომ არ იცოდა, რა მოელოდა. კოხიების ასეთი დასაშვანად შეასრულებდა ჩონთი კოხია თავის სიტყვას და ცოცხალად შეირთავდა თუ არა.

იმ დღეს, როდესაც კოხიები სოფელს უნდა გასცლოდნენ, მაია თავის ფართო აივანზე დასეირნობდა, ხომარებით გიგაშა იდგა. კოხიები რომ ესახლნენ, იმ მხრიდან მოისმა საშინელი წივილ-კივილი და მამაკაცების ხმამაღალი ლაპარაკი.

გიგიშამ ყურზე ხელი მოიფარა, რომ უკეთ გაეგონა.

— კივილი კოხიებიდან მოდის, — თქვა მან.

— რაშია საქმე, გიგიშა, რა მოუვიდათ მაგ შეჩვენებულებს? ჯერ ოჯახი ამირიეს, თავს ლაფი დამასხეს, ასლა კიდევ სოფელს წივილ-კივილით იკლებენ.

მაიას უკანასკნელი სიტყვები გიგიშას არ გაუგონია, მან სწრაფად ჩაირბინა კიბე და ღობეს გადაეწოდა, კოხიების ეზოში კივილი შეწყდა. ცოტა ხნის შემდეგ გიგიშამ თან მოიყვანა ჩონთის თავგადათვრებული, ძონძებში გახვეული მამა გახუ.

გახუ კიდეს ამოეფარა, რომ მაიასათვის თავი არ ეჩვენებინა, მაია კი გიგიშას მკაცრად შეეკითხა:

— რა მოხდა, რა, კივილით გული გაგვიხეთქეს?

— ნეტა რა მოხდებოდა, ბატონიშვილო, გახუ კინალამ გადარეულა, ნაჯახით კინალამ მოუკლავს ჩონთი, ქალები აკივლებულან, კოხიების ნახევრად ტიტველი ბავშვები ჭირვეულობდნენ. რა საცოდაობა ვნახე.

— დღეს გაიგო გახუმ თავისი შეილის კაი კაცობა?

— შეძრწუნდა, ბატონო, გახუ, როდესაც მისი ძმები და ბიძაშვილები სახლების დარღვევას შეუდგნენ. ვერავენ დააკვა თურმე. ისე გაცოფებულა ის უბელური კაცი.

— მერე შენ როგორღა წამოგყვა?

— ვუთხარი, ბატონიშვილი გიბრძანებს მოსვლას-მეთქი, და წამომყვა.

— დიდ პატივს მცემენ, კარგი მაგათ მოუვიდეთ! — შეურბილდა ხმა მაიას, შემდეგ აივნიდან გადაიხედა.

— გახუ, ამოდი აქეთ, — დაუძახა გახუს.

— აქ გახლდეთ, ბატონიშვილო!

— ახლა მემალეები, ისე კი ცოდვას ცოდვაზე იღებთ კისერზე კოხიები. ჯერ აბურად ამიგდო შენმა უზრდელმა ბიჭმა, ახლა შენ შეილს კლავ.

— სწორედ რომ მოვკლავ, მასაც, ცოლსაც, მეც ალბათ გამაციმბირებენ, სადმე ჩაკვვდები და ის იქნება, ქვეყანაზე გასახელი თვალი მაინც არა მაქვს.

მაია დააკვირდა გახუს ჩამოძონძილ ტანსაცმელს, ფეხშიშველობით დახეთქილ ტალახიან ფეხებს და ერთ წუთს ასეთი ფიქრი დაეუფლა:

— სირცხვილი შენ, მაია ბატონიშვილო, ვის მოერიე? რალა ეს ეჭირება ამ საცოდავ გლეხს? — გიგიშას მიუბრუნდა უცებ და ცივად უთხრა: — წადი და უთხარი კოხიებს, რომ მიპატიებია მათთვის ეს დანაშაული. მხოლოდ ჩონთი არ ვნახო ჩემს სიახლოვეს გაველილი. უნდა დავსაჯო იმით მაინც, რომ არ გავიკარებ კოხიებს. ნახონ, თუ არ დააკლდებათ ჩემი წყალობა.

რამდენიმე კვირის შემდეგ ჩონთიმ თამარი სასახლიდან გააპარა მოშორებულ სოფელში, თავის დედის ნათესავეებში.

სასახლეში ყველამ იცოდა თამარიას გაპარვა, ხელს უწყობდნენ კიდევ. ახლა მაიასაც ერჩია, რომ მისი გაზრდილი გოგო ნამუსშერცხვენილი არ შეეტოვებინათ ხელში მისთვის კოხიებს, არაფერს ამბობდა, დუმდა, არც თამარიას კითხულობდა.

ერთ დღეს ისევ გიგიშამ იკისრა თამარიას წაყვანის გამჟღავნება.

— არ გამაგონოთ მათი სახელი! ჯანდაბამდე გზა ჰქონიათ როგორ ამხადეს პატივი, ეს რა გამიბედეს?! — მაია ისევ გაბ-

რაზდა, გიგიშამ ხან ხუმრობით, ხან დინჯი საუბრით გართო გაანჩხლებული მანია.

— ბატონო, ერთი რომ, თქვენ რა შუაში ხართ? რაც ქნეს, თავის თავს გაუბედეს. მერედა, ჩემო მწყალობელო, ვერ გაუძლო თამარიას სულმოკლეობამ თქვენს სულგრძელობას. უნდა მიუტევეოთ, გრიშას და უჩას გაფიცებთ! კარგი ახალგაზრდები არიან. კოხიებზე ერთგული თქვენს დიდებას არავინ ჰყავდა.

— კარგი ერთგულება კი გამოიჩინეს, თექვსმეტი წლის გოგო გამიბახეს.

— არც ჩონთია, ბატონო, ბერიკაცი, ისიც თერამეტი-ოცი წლის იქნება მსოლოდ. ახალგაზრდები შეცდნენ, დღეს კანონიერი ცოლ-ქმარი არიან. გახუს კიდევ თქვენი კეთილი გულის იმედი აქვს, აპატეებთ დანაშაულს და ნებას მისცემთ დაბრუნდეს თავის ოჯახში. სხვის კარზე არიან, თქვენი მორიდებით ვერ ბედავენ სახლში დაბრუნებას. ასეთ გაჭირვებულებს თქვენ ყოველთვის იქით დახმარებიხართ, გვედრებით, შეიბრალებთ!

— შენ, გიგიშა, დიდი ქველმოქმედი კაცი ხარ მაშინ, როცა საქმე სხვას ეხება. შენ და გელამ კოხიები მოიპაღლიერეთ, მანია ბატონიშვილმა კი ოჯახის შეურაცხყოფელი თამარია უნდა გაამზითოს და კოხიებს დახმარება გაუწიოს.

მიუხედევად მრისხანებისა, მაიას გული მალე ძოულბა, კოხიები შემოირიგა და თამარისათვის დახმარების აღწონენა გიგიშას მინადო.

მ ო ც ი ქ უ ლ ე ბ ი

კონსტანტინეს სიკვდილის შემდეგ დიდხანს არ გაუვლიო, რომ მაიას კვლავ ცუდი ამბავი მოუტანეს მისმა ძმებმა — დავითმა და კოწიამ.

მაია ქარვის კრიალოსანს მარცვლავდა და თავისი ოთახის გაღებული ფანჯრიდან ბაღს გაჰყურებდა.

მსახური შემოვიდა და ძმების მოსვლა შეატყობინა. მანია

არ ელოდა მათ მოსვლას ამ დროებით, რადგან ისინი ახლახან იყვნენ მასთან.

— გრიშას ხომ არაფერი მოუვიდა? — გაკკენწლა ავმა ფიქრმა. — სულ გარე-გარე დადის, არ ვიცი, როგორ ცხოვრობს, რას აკეთებს. უკვე გვიანაა ამაზე ფიქრი, მაგრამ მაინც ვამბობ, რომ შვილი დედამ უნდა გაზარდოს, თვალიდან არ უნდა მოიშოროს. მე კი სხვას მივეცე გასაზრდელად. და აი ნაყოფი. ვის დაუბრალო, თუ არა ჩემს თავს, რომ გრიშა გზაზე ვერ დავაყენე. გეზი ვერ მივეცი. უნა ჩემი გაზრდილია, ენაცვალოს დედა. ძუძუდან არ მომიშორებია, თვალებში შეეციციენებდი. ნუთუ უნა უფრო მიყვარდა და მიყვარს. არა, ის სულ რომ ჩემთან იყო და არა მორდუსთან და ძიძასთან, იმიტომ შევეჩვიე ასე, იმიტომ ვეაღერებოდი და ვეთაყვანებოდი ეგრერივად. უნა უმცროსია, უმცროსზე რატომღაც უფრო შეტკივა მშობელს გული, თორემ აბა ჩემს გრიშაზე უფრო მეტად, რომ არ მიყვარს უნა, ღმერთია ამის მოწამე.

მაია ასეთი ფიქრებით იყო გართული, რომ ჯავითი და სამშობლოში ახლად დაბრუნებული კოწია შემოვიდნენ. ისინი თავის მღელვარებას ძლივს ფარავდნენ. ფარული აღელვება მაიასაც შეატყვევს და გადაწყვიტეს დღეს არაფერი ეთქვათ დისათვის, არ გაემხილათ ის, რისთვისაც იყვნენ მოსულნი. მაგრამ მაიამ მაშინვე შეატყო ძმებს, რომ მათ ცუდი ამბავი მოჰქონდათ:

— თქვენ ამაღამ უმიზნობდ არ იქნებით მოსული. მე მიწვეული ვარ მხნედ და დამშვიდებით შეეხვდე ყოველ გასაჭირს. მითხარით, რა იცით? გრიშას უჭირს თუ უნას რამე? არ დამიმალოთ, გულახდილად მითხარით! — მშვიდად მიმართა მაიამ კოწიასა და დავითს.

ძმებმა ერთმანეთს გადახედეს. კოწია ადგა, უხერხულობა იგრძნო და აქეთ-იქით დაიწყო სიარული. დავითი დინჯად გადაიხარა მაიასაკენ, შემდეგ ხელი დაუჭირა და უთხრა:

— დიახ, ბატონო! ჩვენ შენთან მოციქულად გამოგვგზავნა ჩვენმა ძვირფასმა დისწულმა გრიშამ. თვითონ გაღმა ხიბულაში დარჩა, ვერ გაბედა შენთან მოსვლა. მისი ბედ-იღბალი შენს ხელშია.

— ჩემთან მოსვლა თუ ვერ გაბედა, ალბათ, კარგი არ მოუ-

მოქმედებია. ეშინია მხოლოდ იმას, ვინც უღირსს საქმეს სჩადის.

კოწიამ სავარძელს შემოუარა, დას ხელი მოჰხვია და უთხრა:

— არაფერი არ დაუშავებია იმის მეტი, რომ მთელი ახალგაზრდული ძალითა და გზნებით ერთი ქალი შეუყვარდა.

მაიამ მკაცრად ახედა კოწიას.

— ვიცი მე, რაა თქვენი ახალგაზრდული ძალითა და გზნებით შეყვარება. ჩემი გრიშა უბედურ მამამისსაც ჰგავს და შენც. ამიტომაც გამოლიხარ მის დამცველად. — უთხრა მაიამ კოწიას და შემდეგ ისევ დავითს მიუბრუნდა:

— განაგრძე, განაგრძე, ბატონო ჩემო!

— ძვირფასო დაო, შენი ვაჟი ისეთი სიყვარულის ქართვენილითაა შეპყრობილი, რომ თუ შენი ლოცვა-კურთხევა არ მიიღო და ის ქალი ცოლად არ შეიერთო, დარდს ვერ გადაიტანს.

— გამხადე ღირსი, მიბრძანე, ვინ არის ის ქალი? რომელ კუთხისა და რა გვარისაა?

— გვარი ჩვენივე აქვს, ბატონო! ნოქლაქვეელი ელიზბარ დადიანის, თქვენი მამულების ვეჟიდის ძმისწული. ყველანი ვიცნობთ. მისი უმცროსი ძმის, აწ ვარდაცვლილი მისეილის ქალიშვილია. წარმტაცი ციცუ, ნარნარი, ყოველგვარი სათნოებით სახსე.

მაიამ წარბები შეიკრა.

— სიკარგეზე ეჭვი არ მეპარება, მაგრამ მას არ ექნება ღირსება, რომ განაგრძოს გვარი სამთავროს ოჯახისა, რაიმე უკეთესი შემოიტანოს ჩვენი ოჯახის ცხოვრებასა და წარმატებაში. გზიდან ამცდარ ჩემს ვაჟს ისეთი ცოლი ეჭირვება, რომელიც წინ წასწევს მის ცხოვრებას. თქვენი მოგეხსენებათ, თუ ვის შერთვას თავაზობდნენ თქვენს დისწულს ჩვენი ნათესავეები და ერთგულები, ქალს განათლებულს დიდ მემამულეს.

— მოგახსენებენ, ჩემს დისწულს იმ ქალის გარეგნობა სრულებით არ მოსწონებია, არც მე დამიშალა, გულახდილად მითხრა: ჩემი ციცუს კენარ ტანსა და თმის არ გავცვლი მის განათლება-სიმდიდრეშიო, — თქვა კოწიამ და დაჯდა.

— ახლა ხომ დაიჯერებ და გაიგებ, დავით, თუ რატომ ვერ ვეკუებით მე და გრიშა ერთმანეთს? ჩემს ვაჟს მამის თვისებები სჭარბობს, წუთიერი გატაცება, მომავლის გაუთვალისწინებლობა, ჭკუა თვალებში აქვს დაგროვილი. არ ისწავლა, მამულსა და ოჯახზე არ ზრუნავს. მე არ ვიცი, რა უნდა იქნეს სოფლის გოგო, ღარიბი ოჯახისშვილი! ელიზბარის ქალიშვილი მაინც ყოფილიყო, თორემ მიხეილი ღარიბი, მრავალშვილიანი იყო. რა აღზრდას მისცემდა იგი თავის ქალს? როგორ უნდა მოიხმაროს მან ჩვენი ოჯახის რძლობა, არ მესმის. არ ვიცი, რა ვქნა, რა ვთქვა, თუ ჩემს ნებას თხოულობთ, მე წინააღმდეგი ვარ. თუ არ დამიჯერებთ, არც დავლოცე და არც დავწყევლი.

— როგორ გეკადრება, დო ბატონო! ეს პასუხი არ გაიტანება ამ ოთახიდან. განა ასე უნდა უპასუხოს შეყვარებულ ჭაბუკს დედამ და ისიც შენისთანა დედამ, რომელმაც ყველაზე უკეთ იცის სიყვარულის ძალა? — უპასუხა დავითმა, მისი მშვიდი სახე, რომლის გამომეტყველებას იშვიათად თუ რაიმე შეცვლიდა, მეტად აღელვებული მოეჩვენა მაიას და უხერხულობა იგრძნო.

— მოისვენეთ, ბატონებო! სხვა რამეზე ვისაუბროთ, ამ ძნელად გადასაწყვეტ საქმეზე დილით ვიმსჯელოთ, — თქვა მაიამ და ზარი დარეკა, შემოსულ ქალს ყურში რაღაც ჩასჩურჩულა, შემდეგ გიგიშა იხმო. გიგიშა სახლთუხუცესად ჰყავდა მაიას კონსტანტინეს გარდაცვალების შემდეგ.

— კარგად გამირთე და მომისვენე ბატონიშვილები! — უთხრა მაიამ გიგიშას.

— მოსვენებით კი მოვისვენებთ, მხოლოდ ჩვენი დროისტარებისა და გართობის სურვილი კონსტანტინეს წაჰყვა თან, — ნაღვლიანად ჩაილაპარაკა კოწიამ და კარი გაიხურა.

ოთახში მარტო მაია და დავითი დარჩნენ. ისინი დუმდნენ, თავიანთი აზრის გამოთქმას ერიდებოდნენ, რადგან იცოდნენ, რომ არ ეთანხმებოდნენ ერთმანეთს. შემოსულმა მსახურებმა უხერხულობიდან გამოიყვანა და-ძმა: დავითი ვახშმად მიიპატიჟეს.

როდესაც მაიას სასახლეში გრიშას ცოლის შერთვით გამოწვეული მღელვარება იყო, გრიშა თავისი მორღუს შეილის ონისიმე ქარცხიას სახლში ქეიფობდა. ერთი მხლებელი თამბაქოს უხვევდა და მოართმევდა, მეორე ნახევრად დაჩოქილა, „ხელხვავსა“ და „კუჩხიბედნიერას“ უწყებდა. სული მისდიოდა როდის გათენდებოდა. რა ამბავს მოუტანდნენ დავითი და კოწია. რას შემოუთელიდა დედა. ზედიზედ სცლიდა ჭიქას, ღვინით ინელებდა მღელვარებას.

დადიანის ქალის ალვის ტანი თითქოს მის გულში ჩაერთვო, მისი ფეხები მთელ ტანში გართხმულიყო და გასაქანს არ აძლევდა, ვერც სიმღერამ, ვერც ღვინომ ვერ განდევნა ეს ხატება გულიდან. ახალგაზრდა თავადი ხშირად მოიწყენდა, ხელებზე თავდაყრდნობილი ჩაფიქრდებოდა და მაშინ თვალწინ დაუდგებოდა დედის მკაცრი სახე.

— მართალია, ჩემს გადაწყვეტილებას წუთით არ შევცვლი, — ფიქრობდა ის, — მაგრამ დედის გული ხომ საუკუნოდ დამეკარგა?

სასოწარკვეთილებას მიღწეული ახალგაზრდა ჭაბუკი ასეთ წუთებში ციცუს უმანკო და სათნო სახეს მოიშველიებდა, დედის სიმკაცრის დასაფარავად იგონებდა მის ნარნარ ტანს და შეშინებული ნუკრის თვალების გამომეტყველებას. ქალაქში მისი ხელის თხოვნამ არათუ თვით ციცუ, ნათესავეები და მთელი სოფელი ააფორიაქა. წუთიერ გატაცებად მიიღეს ეს წინადადება, ეშინოდათ: ქალს გალანძღავსო.

ამ ფიქრებთან ჭიდილი არ ასვენებდა გრიშას, ვათენებამდე სტუმარ-მასპინძელი შეწუხდა, ვერ დაიძინა, არც სხვები დაიძინა. დალით ადრე ონისიმე აფრინა კოწიასთან და დავითთან. შეუთვალა, რას მიშვრებით, მოლოდინით სული აღარ მიდგია, მაცნობეთ, რა გითხრათ დედამო.

უკვე სადილობის დრო იყო, როცა ონისიმე დაბრუნდა. გრიშას გულისძგერამ უმატა, მაგრამ შეძლებისდაგვარად თავს იკავებდა.

ონისიმეს შემოსვლისთანავე მხლებლები და მასპინძლები შეუმჩნევლად აქეთ-იქით გაიფანტნენ, საშუალება მისცეს ზა-

ტონს ამბავი მარტოდ მოესმინა. გრიშა ისე იყო გართული თავასი ფიქრებით და მღელვარებით, რომ ეს ვერ შეამჩნია. ხოლო, როდესაც ონისიმესაგან საიმედო სიტყვები მოისმინა, თან ბრძანება მაიასი: გრიშა ჩემთან მოვიდესო, კარგ გუნებაზე დადგა. მხოლოდ ახლა შენიშნა გრიშამ, რომ ოთახში მისი და ონისიმეს მეტი არავინ იყო; ისევ იხმო ყველა და გულახდისლად, ყმაწვილურად გაუზიარა მათ ონისიმეს მიერ მოტანილი ამბავი.

ონისიმე ქარცხიამ დიდი ელჩობა გასწია ამ დილით მაიას სასახლეში.

მაიას მეტისმეტად უყვარდა ონისიმე ენამჭევრობის, ვაჟკაცობისა და ერთგულებისათვის.

მაიამ ონისიმეს მოსვლა ჯერ კიდევ მაშინ გაიგო, როდესაც მისი ძმები ამღვარი არ იყვნენ. სანამ ისინი ადგნენ, ისაუზმეს და მაიას ოთახში მოგროვდნენ, მაია ხან ლოცულობდა, ხან კრიალოსანს მარცვლავდა, ხან კი სურათების მაგიდასთან მიდიოდა, თეჯირს იღებდა, თითქოს ცოცხლებსა და მკვდრებს — ყველას რჩევას სთხოვდა, თუ როგორ მოქცეოდა უნაშვილო შვილს.

მსახური მორიდებულად ეახლა მაიას და მოახსენა:

— ბატონო, ონისიმე გთხოვთ ნება მისცეთ გეახლოთ. ძალიან მეჩქარებაო, მოგახსენათ.

— ველარ მოითმინა? დაუძახებდი. ალბათ, ისიც შეყვარებულია. მობრძანდეს! — ოდნავი ღიმილით უპასუხა მაიამ.

მსახურმა კარის მიხურვაც ვერ მოასწრო, რომ ონისიმე ოთახში შემოვიდა. მდაბალი სალამით ჯერ მაიას მიმართა, შემდეგ ბატონიშვილებს.

— აბა, გვიამბე, ონისიმე, შენი გრიშა რას შვრება, შეურყვევლია თავის გადაწყვეტილებაში? შენც შერმადინო, ალბათ! ან იქნება უფალმა ინება და ხიზულის ნიაჟმა ან ქარცხიებას კრიმანჭულმა სატრფოზე გული აუცრუა?

— მწყალობელო ბატონო! ნოქალაქევი ცნობილია თავისი კლდეებით და ჯიხვებით, სამკურნალო სასმელი წყლით. თუ გულს სიმხურვალე იქ მოსდებია, იმ გულს ხიზულის ჭანის წყალი და მისი ნიაჟი რაღას უშველის? პირიქით, რაც მიკოტახილი იქით დავტოვეთ, მერე მას არ გაუღიმიან, ღრუბელი დააწვა მის ფართო შუბლსა და ლამაზ სახეს.

ძმებმა ღიმილით გადახედეს ერთმანეთს.

მაიას გაელიმა და ონისიმეს უთხრა:

— აბა, ჩემო ონისიმე დაგვატკბე ამ ღილით შენი ენამჭკვერობითა და გონებამახვილობით. იქნებ ელჩობა გამოგივიდეს. მხოლოდ ჯერ ყველაფერი დაწვრილებით მომიყევი, რა როგორ მოხდა, ტყუილი არ გაურიო, თორემ გაფუჭდება საქმე.

ყველა ატყობდა, რომ მაია კარგ ფეხზე იყო ამდგარი, მხირული გამომეტყველება ჰქონდა მის სახეს.

— ტყუილი როდის გამიბედავს შენთვის, ბატონო, ანდა რა ენა მოჰყვება იმას, რასაც გრიშას გული განიცდის ახლა.

— კარგი, ახლა მოყევი ის, რასაც გეკითხები, — უთხრა ოდნავ ცივად მაიამ.

— დიდო ქალბატონო, ვეცდები ყველაფერი წერილად მოგიყვე, — დაიწყო ონისიმემ. — ბატონი ნოქალაქევს გაემგზავრა, ელიზბარ დადიანისას არ ეყოფილვარ დიდი ხანიო. შემდეგ ჩიქოვანებში ვაპირებდით წასვლას, იქიდან ლეჩხუმს: აღდგომის დღეებს იქ გავატარებო, მამულების საქმეც ჰქონდა. ის იყო ელიზბარისკენ გავემართეთ, მიკოტასილზე გავდიოდით ფროხილად, ზამთარში ზვავს მთლად ჩამოეხეთქა კლდეები, ისედაც ვიწრო გზა უფრო დავეწროებინა. მთავრის შვილს ათ ცხენოსნამდე კაცი ვახლდით. დამღებოდა, მთვარის შუქი კლდიდან კელაპტარივით ეშვებოდა, ჩხრიალა ტეხურის ტალღებში ნახად ბანაობდა დალოცვილი.

მთავრის შვილი ნელა მიდიოდა, ბუნების სიმშვენიერით გატაცებული, ერთი წუთი და კინაღამ დავიღუპეთ: ახალგაზრდა ბატონის ქებულმა ლაფშამ, ბეწვიამ, წაიფორხილა. ახლაც არ ვიცი, რამ გვიხსნა, რომ ბატონი კლდიდან არ გადაეშვა. ნუ გეშინიათ, დაიძახა და კლდეს მიაწვა. საწყალი ბეწვია! სასწრაფოდ შეიკავა თავი უბედურმა.

გაფითრებული მაია ხმას არ იღებდა.

— ყველანი ცუდ გუნებაზე დაედქით, მწყალობელო! — განაგრძობდა ონისიმე. — შიშმა გამაქვავა. ისევ ბატონმა გამოგვაფხიზლა, საშიში გზა რომ განველეთ, ხუმრობა დაიწყო: აბა დათვალეთ, ხომ არაეინ გვაკლიაო, შემდეგ მე მომიბ-

რუნდა, ამას ენაცვალოს ჩემი თავი: ალბათ ვიღაც კარგი ფეხით შეგვხვედრია, რომ ასე გადავრჩით ამ გზაზე. კიდეც რამე არ შეგვხვდეს ან კარგი ან ღიდად საწყენიო. ამ ლაპარაკით ელიზბარის სასახლეს მივუახლოვდით. რაღა თავი შეგაწყინოთ, შესანიშნავად მიგვიღეს, გაიხარეს. ბატონის მისვლით. იმ წუთს მომღერლები და მეჩონგურეები გაჩნდნენ. თუ სადმე იყო იმ ახლომახლო ლამაზი და მშვენიერი, ყველანი თავზე დაგვაღვნენ და ემსახურებოდნენ ბატონის სუფრას. ქალიშვილები სულ პეპლებივით და ციციანათელებივით დაფრინავდნენ და დაგვციმციმებდნენ.

ქალებში ერთი ქალიშვილი განსაკუთრებით გამოირჩეოდა. ძალიან უბრალოდ ჩაცმული, არცთუ განსხვავებული ლამაზი, მაგრამ თავიდან ფეხებამდე მშვენიერი, შესანიშნავი ნაწნავეები ეყარა მაღალ ტანზე და წერილ წელზე. მის ზღვისფერ თვალებს ხშირი და გრძელი წამწამები უფრო წარმტაცად ხდიდა. როდესაც თავს აწევდა, მისი ცისფერი თვალები, თითქოს დამფრთხალი ნუკრისააო, ისე გამოიციქებოდნენ კრთომითა და მორიდებით. მაღლითა და ღიღებით მოსილა. ამისი სახე.

ონისიმემ მაიას ფეხებთან მოიკალათა და განაგრძო:

— მე ხომ შენი გაზრდილი და შეიღობილი ვარ, გრიშას არჩევ ძუძუს ვწოდდი; მას რომ ძიძა აწოვებდა, ეშინოდათ რამე არ შეგხურებოდა. მე მაშინ კარგა მოზრდილი ბიჭი ვიყავი და მიხაროდა, როცა გამდელები მეტყოდნენ, ბიჭო რა გეღირსა, ვის ძუძუს წოვო. მეც ამიტომ გეთამამები, ყველაფერს გიბედავ. ვფიცავ შენს თავს, რომ იტყვიან ნახევარი ოქროსო და ნახევარი ვერცხლიო, სწორედ იმ ქალზეა ნათქვამი. მაშინვე შევამჩნიე, რომ გრიშა მიაჩერდა იმ ქალს. შემდეგ ყველასათვის შესამჩნევი გახდა, როდესაც ბატონმა გამოაცხადა:

უნდა ვთხოვო ჩემს მოგვარე ქალს, ჩემს გვერდით დაჯდეს. მე დღეს მაგის ხელით დასხმული ღვინის მეტს არ დაველეო.

ქალიშვილი აიღეწა, არ იცოდა რა ექნა და უმწეოდ შეხედა ბიძამისს. ელიზბარმა გაიცინა და ძმისწულს უბრძანა: ემ-

სახურე მთავრიშვილს, ჩემო ძმისწულო! ღირსია ემსახუროს მას ლამაზი ქალის ხელიო.

ბატონმა იმ ღამეს ნაკლებად სვა, სულ ციცუს შესცქეროდა, ელაპარაკებოდა, შეჰხაროდა. დაწოლისას მე მიბრძანა, დილით ადრე ნოქალაქევის დუქნებიდან ან სენაკიდან საჩოხე-საახალუხე და საწულე-სამესტე მომეტანა. გათენებული არ იყო, ბატონო ჩემო, მე რომ სენაკს ვუახლოვდებოდი. ჯერ სადილი გამოტანილი არ იყო, რომ ელიზბარის ოჯახში დაუბრუნდი და მივიტანე, რაც მთავრისშვილმა ღამაბარა. ბატონმაც მომიწონა ნავაჭრი. შემდეგ ელიზბარისაგან ნებართვა ითხოვა, რომ მისთვის სააღდგომოდ ციცუს შეეკერა ჩოხა-ახალუხი.

გამიგონია, ბრძანა გრიშამ, რომ ციცუმ იშვიათი ჭრაკერვა იცისო. გთხოვთ მყოთ ბედნიერი, მეც შემიკეროს ჩოხაო, — უთხრა ელიზბარს.

ელიზბარი გააკვირვა ამ ახირებულმა თხოვნამ, მაგრამ მაინც თანხმობის ნიშნად თავი დაუკრა.

ბატონი მერე ქალიშვილს მიუბრუნდა:

— მშვენიერო ციცუ! ბოდიშს ვიხდი შეწუხებისათვის. მოგეხსენებათ, ჩემთვის თერძები და მეწაღეები არ დაილევა, არც ისე თავხედი ვარ, რომ თქვენი შეწუხება არაფრად მიმაჩნდეს, რა ვქნა, დაუძლეველი სურვილი გამიჩნდა, მაგ ნარნარი თითებით შეკერილი ჩოხა ჩემს ტანს მოსაედეს. ჩემი ტანისამოსი შენი ლაჟვარდი თვალებით იყოს გაშუქებულიო.

მეც ავიღე და ჩემი ნავაჭრი ქალის წინ გავშალე მაგიდაზე. ციცუმ შემკრთალი თვალები გრიშას მიაპყრო და მოახსენა: დიდი სიამოვნებით გემსახურებით, თუ შეეძელი თქვენი საკადრის-მოსაწონის გაკეთებაო.

ეტყობოდა ძლიერ ღელავდა დადიანის ქალი. ოთახში სხვა ქალიშვილებიც შემოსულიყვნენ ელიზბარის ძმისწულთან ერთად, ყველანი გახარებული ილიმებოდნენ, რომელიღაც მათგანმა კიდევ უჩქმიტა ციცუს. ის საბრალო მაინც არ დაიბნა და გრიშას მოახსენა: როდის ინებებთ, ბატონო, ზომა ავიღოთ ტანისა და ფეხისაო?

აქ კი გრიშა უხერხულ მდგომარეობაში ჩავარდა.

მართლა ძალიან შეგაწუხებთ, — უთხრა ქალს და თავისი ფართო მკერდი გადაუშალა ზომის ასადებად. ამაღამ ჩიქვანებში მინდა წასვლა, სამ-ოთხ დღეში დავბრუნდები. — ამ სიტყვებზე ისეთი ალტაცებით ჩახელა ქალიშვილს თვალებში, რომ ყველას გულში შიშმა გაჰკრა.

ვერხვის ფოთოლივით თრთოდა ახალგაზრდა ქალი, ვიდრე ჩიხა-ახალუხის ზომას აიღებდა.

ნასადილევს წამოვედით ელიზბარის სასახლიდან. უკან მეხუთე დღეს დავბრუნდით. ყველაფერი შეკერილი დაგვახვედრა იმ დიდებულმა ქალმა, შეკერილები მშვენივრად მოერგო ტანზე ბატონს. გრიშამ მადლობის ნიშნად ხელზე აკოცა ციკუს.

ელიზბარს არ მოეწონა გრიშას სითამამე და შეესიტყვა: რატომ იკადრებთ, ბატონო და მწყალობელო ჩვენო. ან ამ გოგოს რას ერჩით? ობოლია, უპატრონო. გრიშა იმწამსვე მიხვდა, თუ რამ შეაწუხა და შეაშინა ელიზბარი, წარბები შეიკრა და უთხრა: თუ შეიძლებოდეს, რამდენიმე წუთს ყველანი დაითხოვეთ, მე თქვენთან ძალიან დიდი საქმე მაქვსო.

ქალები უმაღლესად გავიდნენ. ოთახში მხოლოდ მე დავრჩი. სხვა ქალიშვილებთან ერთად ციკუც გასვლას აპირებდა, რომ მას გრიშამ ხელი მოხვია — შენ აქ დარჩი, უშენობა არ იქნებაო. გრიშამ დაჯდომა სთხოვა ელიზბარს და თვითონაც დაჯდა.

— ბიძა ბატონო, შენ ფიქრობ, რომ მე შენი ოჯახის ასეთ უმანკო და მშვენიერ არსებას რაიმეს ვერჩი, ან რითიმე დავამცირებ და შევურაცხვეო ან გადაუდგები სინდისსა და ადამიანობას, — მიმართა გრიშამ ელიზბარს. — ეს არასოდეს არ მოხდება. მე შენი ძმისწული ციკუ უზომოდ შემეყვარდა, მაგის მეტი ცოლი სხვა ვინმე უფალმა ნურც მომცეს. ჩემი შეუცვლელი გადაწყვეტილებაა, რომ სულ მოკლე ხანში მე ჩემი ძვირფასი ციკუს ქმარი გავხდე. ამ საქმეზე საუბარი რამდენიმე დღით მინდოდა გადამედო, დედაბატონისათვის მომეხსენებინა, ბიძებისათვის. რაკი ჩემი მოქმედება შენს თვალში საეჭვო გახდა, შეიძლება ჩემმა საქციელმა აქ მითქმა-მოთქმაც გამოიწვიოს, ამან კი ჩემი უმანკო ციკუ დამიჯავრიანოს, ამი-

ტომ ავჩქარდი და გადავწყვიტე ციკუ ამალამვე დავნიშნო, მთელ ქვეყანას ვამცნო, რომ ციკუ ჩემი საცოლეა.

ქალს ხელი შემოხვია გრიშამ, ისიც მკერდზე მიეკრა. ხმა-მალალი პასუხი არ იყო საჭირო. მათი გულელები ისე ახლოს ძგერდნენ, რომ უსიტყვოდ გაუგეს ერთმანეთს ბედნიერება და სიყვარული.

გრიშას სხვიანი სახე კიდევ უფრო გაიშალა და გახალისდა. ნათელი გადაეფინა. ციკუს თავი აუწია, თვალებში ჩახედა, შემდეგ შუბლზე ეამბორა: შენ ხომ გჯერა, ჩემო ძვირფასო, ჩემი სიტყვების სიმართლე. მეტი მეც არაფერი მინდა. ახლა წადი, მოისვენე მშვიდად. ეს ნემსის ხმარებით დაღლილი თითები ჩემი ამბორით დაიაბეო, — და ხელის თითები დაუკოცა.

ციკუს ოთახიდან გასვლა და ელიზბარის ადგომა ერთი იყო.

— რა დაგიშავეთ, ბატონო, რატომ გეხდი ღირსებასა და პატივს? დამიჯერე, მთავრის შვილო! სანამ ეს ამბავი არ გახმაურებულა, მიატოვე ამაზე ფიქრი. სულ ერთია, ბატონიშვილი მათა ამ საქმის ნებას არ დაგერთავს არას გზით. ამას მოჰყვება დიდი ამბავი და უსიამოვნება. მათა ჩვენც გაგვირისხდება. ჩემი საწყალი ძმისწული ვინმე თავის ტოლს გაჰყვება. შენ კიდევ შენი შესაფერი და შენი ღირსი მოგეძებნება. ხმა გავარდება, ქალი გაგველანძღება, მიტოვებული და გაბახებული ხელში დაგერჩება. განა ამას ველოდით შენგან? პირიქით, ქვეშევრდომთა, ღარიბთა და ობოლთა პატრონად მიმაჩნდი. ნუ გვიზამ ამას, გემუდარები, დაიშალე ამაზე ფიქრი! — ემუდარებოდა აღელვებული ელიზბარი.

გრიშას იმ ღამით იქ უნდოდა დარჩენა და მოსვენება, მაგრამ ეწყინა ელიზბარის სიტყვები და წასვლა ბრძანა. ელიზბარს უთხრა ერთ კვირაში დავბრუნდები და ციკუსე ჯვარს დავიწერო. ქალს გადაეცი არ იჯავროსო.

იმ ღამესვე ელიზბარის სასახლიდან პირდაპირ ჭკადუაშში წავედით. იქიდან შენს დიდებას ვეახელით. აწი შენ იცი, ჩემო მწყალობელო, ბატონო, ნუ ჩასწყვეტ გულს ახალგაზრდებს. ღმერთმანი, მოსაწონი ქალია. მუდამ შენი ფებთამცკერი იქნება, მორჩილი და მოყვარული.

— მე განა ფეხთამტვერი და ჩვარი მინდა ჩემი გრიშას ცოლად? ოღონდ კარგი იყოს და სასახელო, მე მისი სამსახური არ მჭირდება. იქით ვემსახურები ჩემს რძალს, თუ ის ღირსეული იქნება.

ორ ცეცხლს შუა იწვოდა მაია. შვილის გატაცება და ძლიერი სიყვარული ოდესღაც განცდილ გრძნობებს აგონებდა და შორეული წარსულის მოგონებებში ჩაიძირა ისევ... მეორე მხრივ, ძალიან არ მოსწონდა სარძლოდ მიხეილ დადიანის ქალიშვილი. გულში ძლიერ შეუფერებლად მიაჩნდა ეს ქორწინება, ყველანი ღუმდნენ, სიჩუმე ღვეთმა დაარღვია.

— ძვირფასო დაო ჩემო, რამე ერთი პასუხი უნდა შეუთვალო, ცოდვას გრიშა, ის ჯერ ყმაწვილია, გამოუცდელი, თან გულჩვილი და პატიოსანი. მამით ობოლია, დღეს შენა ხარ მისი მამაც და დედაც.

— იყოს ნება თქვენი, დამიბარეთ გრიშა აქეთ.

ონისიმე ისევ მუხლებს უკოცნიდა მაიას, თან ცრემლებს ცვიოდა, სიხარულის ცრემლები.

— კარგი ახლა, გეყოფა ქალაჩუნობა; წადი და მოახსენე შენს ბატონს აქეთ მობრძანდეს, ბიძებიც აქ დახვდებიან. — მოიშორა ონისიმე მაიამ.

ონისიმე თვალის დახამხამების სისწრაფით წამოხტა, კიდევ ხელსა და მუხლებზე აკოცა მაიას, ოთახიდან გავიდა, ცხენს მოახტა და გრიშასკენ მოუსვა.

გრიშა მხოლოდ შეღამებისას მოვიდა დედასთან. დარცხვენილი იყო.

მაიამ შვილი ცივად მიიღო და პირდაპირ საქმეზე გადავიდა:

— შვილო ჩემო, შენ არც ერთი ჩემი იმედი არ გაამართლე. დაცოლშვილება ასე ადრე მოგიწოდებია. ღმერთმა და ყოველმა ძალამ ხელი შეგიწყოს. ღარიბი კაცი ხარ და ღარიბთან შეუღლება გადაგიწყვეტია. შენ ხომ იცი, ხიბულა მთლიანად ჩემი პირადი საკუთრებაა. ჯერ კიდევ ჩემმა მაზლებმა მთავარმა დავითმა და გრიგოლმა ქორწინების დღეს, შემდეგ მამაშენმა, მეუღლემ ჩემმა, ნოტარიუსით დამიმტკიცა თავის სიცოცხლეში. დანარჩენი მამულები: ხეთა თავისი მთით, ლე-

ჩხუმის მამული, ზენი, საჯიჯაო რჩება შენი და შენი ძმის უნას მფლობელობაში. მე სანამ ცოცხალი ვარ, სიბუღას შემოსავალს ვიკმარებ, მაგრამ თქვენ, თქვენი მამულებით ცხოვრება გავიჭირდებით. სწავლა არ ისურვე, სამსახური არ გინდა. ბედნიერი იყავი, შვილო, ისე არ დაგემართოს: ბრიყვი საქმესა წაახდენს, ფათერაკს დააბრალებსო.

სანამ მათა ნელა და დინჯად ლაპარაკობდა, ყველანი ფეხზე იდგნენ. შემდეგ შვილმა დაიჩოქა და თავი კალათში ჩაუღო. მათამ თავზე ხელი გადაუსვა, ეამბორა კიდევ თავზე, მაგრამ ცივად მოეჩვენა ვაჟს დედის ხელებიც და ამბორიც. ყველანი გასასვლელად ემზადებოდნენ, რომ მათა ადგა.

— შვილო ჩემო, ქალის დასანიშნად დილით მოგერთმევა ყველაფერი.

მათას მადლობის ნიშნად მდაბლად თავი დაუკრეს.

დილით გრიშას გადასცეს ძვირფას ფარჩაში გამოკრული, ყუთებში ჩაწყობილი ნივთები ბრილიანტით, ალმასითა და ლალით შემკული, ბაჯაღლო ოქროში ჩასმულ-ჩაქარვული, აგრეთვე ვერცხლის სურები, ტაშტები, ვერცხლის ჭიქები და თეფშები, ამასთან ერთად სამი ათასი მანეთი ფული ხარჯებისათვის.

საუზმის შემდეგ გრიშა ბიძებითურთ სასახლიდან წაიდა. გულდაწყვეტილი დარჩა ახალგაზრდა გიგიშა, რადგან ჯერ მიზეზი ვერ იშოვა, რომ თვითონაც მათ გაჰყოლიდა.

გიგიშა რამდენჯერმე შევიდა მათას ოთახში.

— ხომ არაფერი გნებავს, ხომ არაფერს მიბრძანებ, — ეკითხებოდა.

მათამ შეამჩნია, რომ რაღაც უჭირდა მის გაზრდილს.

— სად არის ონისიმე? — ჰკითხა მან.

— აქ გახლავთ, ბატონო!

— ისევე მიჰყვება გრიშას თუ იცი?

— ალბათ მიჰყვება, ბატონო, — უპასუხა გიგიშამ გულდაწყვეტილად და ამოიხუნეშა.

— შენ არ მიჰყვები?

— შენ არ გიბრძანებია...

— აბა ახლა გიბრძანებ, ონისიმე აქ დარჩეს, ის ისედაც

ბევრს დადის უსაქმოდ, გრიშას ქორწილამდე აქ იყოს, ოჯახს მიხედოს. შენ კი ჩემს შვილს გააყევი.

გიგიშას სახე გაუბრწყინდა.

— გმადლობთ, ბატონო, შენი წყალობა არ დამკლებოდეს! — თქვა და სწრაფად გავიდა, რომ ონისიმეს არ გაესწრო.

მარტოდ დარჩენილ მაიას გულიანად გაეცინა.

— რისი მადლობა ჰითხრა, რომ არაფერი უთხოვია ჩემთვის? ხალხის ნაოქვამი მართალია: ქურდი დღეში სამჯერ გატყდებაო, სწორედ ასე მოუვიდა ჩემს გიგიშას. წასვლაზე სული მისდიოდა, ვერც თხოვნა გაბედა. ჩემი თანხმობა რომ გაიგო, უცებ გამოტყდა.

ო, სიყმაწვილეე, რა ძვირფასი სამკაული ხარ! როცა ადამიანის კუთვნილებას შეადგენ, შენი ფასი მან არ იცის, შენს ფასს გებულობს მხოლოდ მაშინ, როდესაც ეკარგები. რა ცოტა რამ ახარებს ახალგაზრდას, ჩვენ იმ ცოტასაც ვერ ველევით მისთვის...

მაიას მოაგონდა თავისი ახალგაზრდობის წლები, რომლებიც ძაძებით შემოსილმა ფაცხაში გაატარა, შემდეგ ერთი ყმაწვილური გამონათება — კონსტანტინეს ცოლობა, მერე ისევ სულიერი მარტოობა, განუხორციელებელი სურვილები, დაუკმაყოფილებელი თავმოყვარეობა... ახლა კი ნელ-ნელა სიბერე შემოეპარა, საპირადო ყველაფერი გათავდა, დაეწყო მხოლოდ და მხოლოდ შეილებზე ზრუნვა-ფიქრი. ესეც დიდებულად მთავრდება! ობოლი, უმზითვო, ღარიბი ოჯახიშვილი, უსწავლელი ჩემი გრიშას საცოლელ! როდესაც მას შეეძლო ვინმე დიდებულის მეუღლე გამხდარიყო, ოჯახი წინ წაეწია, დიდკაცობა მოეხმარა.

ეჰ, ჩემო უჩა, უჩა! შენი ჯერი დადგა. ყველა ჩემი იმედი შენზეა დამყარებული, შენ მაინც არ მიღალატო.

მაიამ ისევ კრიალოსანი აახმაურა და ოთახში ბოლთას ცემას მოჰყვა.

ბერი მწუხარებისა და უსიამოვნების შემდეგ მათა ჩვეულებრივ ცხოვრებას შეუდგა, მეურნეობას თვალყურს ადევნებდა, ოჯახის განმტკიცებასა და ქონების შექნაზე ზრუნავდა. შვილები შორს ჰყავდა. დაცოლშვილებული გრიშა ხორშში დამკვიდრდა, უჩა მალე დაამთავრებდა პეტერბურგის პათის კორპუსს. კორპუსდამთავრებულებს დიდ ადგილებს თავაზობდნენ.

ამ სასწავლებელში მხოლოდ დიდგვაროვანთა შვილებს ღებულობდნენ აღსაზრდელად, ამზადებდნენ ხელმწიფის სასახლეში სამსახურისა და მათი პირადი დავალებების შემსრულებლად.

— ერთი მხრივ მიხარია, რომ უჩა მაინც დაამთავრებს სწავლას, იქნებ მისგან მაინც გამოვიდეს სასახელო და თავისი ქვეყნისათვის სასარგებლო კაცი. — ეტყოდა ხოლმე მათა გიგიშას და თავის მოურავს, პლატონ აფაქიძეს.

— რა დაუშლის, ბატონო, უჩას, რომ კარგი კაცი გამოვიდეს? ნიჭი არ აკლია და საშუალება! — ეტყოდნენ ისინი.

— არ მაქვს ჩემი შვილების იმედი, არ მოდგამთ ლევანის შთამომავალთ სიღინჯე და სწავლის სურვილი. აიღეთ ტარაელის შვილი ნიკო, კაცი მეექვსე კლასიდან გამოვიდა, დაჯდა ბერთემში და ხალხისთვის იმდენი სარგებლობა მოაქვს, რომ მთელი სოფელი აყვავა, გაამდიდრა, გააჯანსაღა, თან დიდად განათლებულია, ბერს წერს, კითხულობს. ამბობენ ნამდვილი ფილოსოფოსიაო.

— რაც მთავარია, ბატონო, და რითაც სახელი გაითქვა ნიკო დადიანმა, ეს არის მეურნეობა. ის უსასყიდლოდ, თავისი წამლებით ეხმარება ხალხს, — თქვა აფაქიძემ.

— დიახ, დიახ, ეს მთავარი საქმეა. მე გეტყვი და რუს ხელმწიფეს ისემც ღმერთი უშველის, სოფლებში ექიმები ჰყავს. ჯერ მაზრებსა და ქალაქებში არ არიან ექიმები. ნიკო უფასოდ მეურნეობს ხალხს. აუცილებლად უნდა ვინახულო იმისი ოჯახი ამ ზაფხულზე მაინც. სამი წლის წინათ ვაპი-

რებდი წასვლას და გრიშას ცოლის შერთვამ შემიშალა ხელი. წავალ კი ვითომ? ჩემი სურვილის შესრულებას ყოველთვის წინ გადაელობება რაღაც მიზეზი. რამე შემიშლის ხელს. ახლა ხომ მიწას მზომავებს მოველით. ჩემი იქ ყოფნის დროს რომ მოვიდნენ?

— მოვიდნენ, ბატონო! პლატონი ხომ უბრალო მოურავი არ არის, ვეჭილია თქვენი მამულეების, აღჭურვილია თქვენი ნდობით, — უთხრა მაიას გიგიშამ.

— ესეც მართალია. მალე გრიშა მომინახულებს, ვეცდები, წავიდე იმ იმედით, პლატონ, რომ შენ წესიერად მოაგვარებ ყოველივეს. ჩვენი სადავო მამულები ზენში, ზანაში, საჯიჯაოში — ყველა უნდა შემოვიფარგლოთ. რატომ უნდა დაეპატრონონ ჩიჩუები და აფაქიძეები საუფლისწულო მამულებს?

მაია იმ დროს ძალიან გატაცებული იყო მიწის საკითხით, მამინ წყდებოდა, თუ ვის რა მამული მიეკუთვნებოდა. მთავრობაც ძლიერ იყო დაინტერესებული, რომ ყოველი ოჯახისათვის მიეჩინა საკუთრება, რათა დაბეგვრა უფრო ადვილი გამხდარიყო.

ხშირად გაისმოდა დავა სოფელში: ჩიჩუამ დადიანს „სპორი“ გამოუცხადაო, გვათუამ — ლოლუსაო, და ასე გვარი გვარს, ოჯახი ოჯახს, ძმა ძმას უცხადებდა „დავას“. გამოიწვევდნენ მედიატორებს, უხუცეს გლეხებს დაჰკითხავდნენ, თუ ვის ეკუთვნოდა სადავო ადგილი, თავიდანვე ვინ სარგებლობდა ამ მიწებით, ტყეებითა და საძოვრებით.

ამრიგად, ყოველ გვარსა და ოჯახს მიუჩენდნენ მის საკუთრებას, მოსაზღვრე მამულებს შორის მიწის მიზომვასა და გვარის საკუთრების აღდგენას ნახშირის ჩაყრა მოჰყვებოდა. ჩანახშირებულ ადგილებზე მიწას დაჰყრიდნენ, პატარა გორაკი გაჩნდებოდა, რომ სასაზღვრო მიჯნა მოსაძებნი არ გამხდარიყო.

მაიას მამულის შემენა ძალიან უყვარდა, მეტადრე მას შემდეგ, რაც ავსტრია და რუსეთი მოიარა. მას აკვირვებდა იქაური უბრალო თავადების ვრცელი მიწა-წყალი. თავი დამცირებულად მიაჩნდა, რომ მთავრის ოჯახის შვილები დაკნინებული იყვნენ, მამულ-დედული შემცირებოდათ. ამასთან მაია დიდ ცნობისმოყვარეობას იჩენდა თბილისში და ქუთაისში

დაარსებული საადგილმამულო ბანკებისადმი, სადეპუტატო ყრილობებისადმი. ძალიან მონდომებული იყო კენჭისყრის დროს, არათუ მას პირადად, ერთგულ თავადაზნაურებსაც ესარგებლათ ხმის უფლებით და მონაწილეობა მიეღოთ ქვეყნის საქმეში.

მაია აგვისტოს დამლევს ნოქალაქევის ახანოში მიდიოდა სამკურნალოდ. გრიშა მივიდა დედასთან თავისი მხლებლებით. თვითონ უნდოდა წაჰყოლოდა დედას ნოქალაქევიში.

— შენი ჭირიმე, გრიშა, ჰერ ხალხს ნუ ვიახლებთ. რად გიყვართ აურზაური? ჯერ ახანოს ახლოს დაებინავედები, შემდეგ ნიკოს ოჯახს გავეცნობი, ვფიქრობ, არ ვიქნები არასასურველი სტუმარი.

— კი, დედა, ყველაფერი შენი სურვილისამებრ ვაკეთებ. ბა. ციცუც იქ დაგხვდება, თუ ინებებ, ამსახურე.

ზაიამ მხოლოდ გაუღიმა შვილს.

— მგონია, შენი პირმშოც იქით არის გაძიძავებული, ალბათ, იქ მაინც მინახულებს ვაჟკაცი. რაკი უბედური კონსტანტინე ვერ მოესწრო შენს შვილს, რატომ ვერ მიხვდით, ბავშვი ჩემთვის მაინც გეჩვენებინათ ხიბულაში, არ მოისვლებოდა, თუ რა იყო, შვილო?

— მოგერიდეთ, დედა ბატონო! რაკი შენი ბრძანება არ იყო, გვეგონა არ გსურდა.

— უბედურო მაია, როდის გაიგებენ შენს კეთილ გულის ამბავს შენი ახლობლები. ვთქვათ, შენ გემდუროდი, შენს ცოლს რას ვერჩი, მით უფრო შვილს, უმანკოს, ანგელოზს? მეუბნებიან, ძალიან ლამაზი ბავშვიყო.

— თუ ასე გსურს, ხვალვე გეახლებიან ყველანი!

გზას აღტაცებაში მოჰყავდა მაია. მთაში შეჭრილი გზის ქვევით, სადღაც, უფსკრულში, დიდ ლოდებზე ჩხრიალით მიედინებოდა მდინარე ტეხური, რომლის თვალთ დანახვა ქვეითად მიმავალ მგზავრსაც კი გაუჭირდებოდა. მაიამ ისურვა ეს სახიფათო გზა ქვეითად გაეელოთ.

— აქ არ იყო, შვილო გრიშა, კინაღამ რომ თვალები დამივსე შენი წინდაუხედაობით?

— ცხენმა მიხსნა, დედა ბატონო, თორემ ცუდად იყო ჩემი საქმე.

— ალბათ მთვარიან ღამეში ოცნებას გადაჰყვევი, ან სხვაგვარად როგორ გაივლის აქ კაცი. მხატვარი რომ ვიყო, აქურობას სულ ტილოზე გადავიტანდი. დიდება უფალო, შენს ძალას! ამდენი სილამაზის საყურებლად რატომ მეტი დრო არ მოგვეცი სიცოცხლისათვის?

მაიას ნოქალაქევეში ჩასვლა იმ კუთხემ იმავე დღეს გაიგო. ბერთემელ დადიანებს არცთუ ისე უყვარდათ მაია; ახსოვდაო, რომ მათი თვალსაჩინო ქალი ციცუ გრიშასთვის ცოლად არ უნდოდა; ისიც იცოდნენ, როგორ ზვიადად უყურებდა მათ და იმ კუთხის დადიანები, როგორ საუკადრისოდ მიაჩნდა, რაკ მთავართა მემკვიდრენი და დიდი ნიკოს შთამომავალნი არ იყვნენ. რამდენჯერ აუხსნია პეტრეს მისთვის, რომ ბერთემელი დადიანები იგივენი არიან, რაც მთავრის ოჯახის დადიანები, რომ ისინი წარმოადგენენ მთავრის ოჯახის განშტოებას: მაია მაინც მათ თავის ტოლად არ თვლიდა, მით უმეტეს მას შემდეგ, რაც მისი ვაჟი ამ კუთხის სიძე გახდა.

მიუხედავად ამისა, ბერთემელი დადიანები მაიას მოსვლას დიდი ყურადღებით შეხვდნენ. ერთი მიზეზი ის იყო, რომ ამით გრიშასადმი სიყვარულსა და პატივისცემას გამოხატავდნენ, მეორეც — საკუთარი თავმოყვარეობა აიძულებდათ ეჩვენებინათ მაიასათვის, რომ ისინი არავისგან დასაწუნი არ იყვნენ, არავის არაფერში არ ჩამოუვარდებოდნენ.

პატივისცემის გამოსახატავად ჯერ მთელმა საგვარეულომ ინახულა მაია. ნიკო, ტარიელ დადიანის შვილი, ესოდენ დატვირთული საზოგადო და საოჯახო საქმეებით, ამ შემთხვევისათვის უსაქმოდ დროს დაკარგვას არ მოერიდა. მან სხეებზე ადრე ინახულა საპატიო სტუმარი. გულთბილი იყო მათი შეხვედრა, საუბრის შემდეგ მაიამ მორიდებულად განუცხადა:

— მინდა გეწვიოთ ოჯახში, გავიცნო თქვენი წესწყობილება და განლაგება ქველმოქმედების საქმეებისა. ხომ არ შეგაწუხებთ და ზედმეტად არ დაგტვირთავთ ესოდენ დიდი საქმის მქონეს?

— ბატონო ჩემო, რასა ბრძანებთ, თქვენთვის ცუდად გაუ-

ცნიათ ჩემი თავი. მე გონიერი სტუმარი ისე მიყვარს, როგორც კარგი წიგნი.

— მხოლოდ გთხოვთ, დედაშვილობას, მარტონი ვიყო. მე მინდა თქვენთან საუბრით დაუტკბე.

— როგორც გენებოთ! მოგეხსენებათ, დიდი ქეიფისა და დროს ტარების კაცი არც მე გახლავართ.

რამდენიმე დღის შემდეგ მაია ნიკოს ოჯახში დარბაზობდა.

ნიკოს სახლი მალლობზე იდგა. ვაკეზე გაშლილი ფართი ეზო მწვანედ ბიბინებდა. მესერშემოვლებულ დიდ ეზოს ალვის ხეები ჩრდილავდა. დიდი ოლა-სახლის წინ იდგა უზარმაზარი ცაცხვი, რომელსაც ქოლგასავით გადაშლოდა ტოტება. საცხოვრებელი ოდის ოდნაე მოშორებით რამდენიმე პატარა, აივნიანი ოლა ჩამწკრივებულიყო. აივნების წინ იდგა გრძელი სკამ-ლოგინები, რომელთაც ხეების ჩრდილი ეცემოდა. ქვევით გრძელ სკამებსა და ჰამაკებში ფერმკრთალი ავადმყოფები ისვენებდნენ. ერთ სახლში ქალები იყვნენ, მეორეში — მამაკაცები. ავადმყოფთაგან ზოგი ჯოხზე იყო დაყრდნობილი, ზოგს ხელი უკანკალებდა, ზოგს ფეხი სტკიოდა.

ავადმყოფებს თავიანთი მომვლელი ჰყავდა მიჩენილი.

თვით ნიკო, მიუხედავად იმისა, რომ ასეთი მოსარიდებელი და იშვიათი სტუმარი ჰყავდა, თვალყური სულ თავისი ავადმყოფებისაკენ ჰქონდა, ხშირად მიდიოდა მათთან, რათა შეწუხებული ავადმყოფებისათვის ტკივილი დაეამებინა.

აკვირდებოდა რა ყოველივე ამას, მაიამ თავი ვეღარ შეაკავა და ნიკოს ჰკითხა:

— შეილო, როგორ მიაგენით ამ სამადლო საქმეს?

— სულ ადვილად, ბატონო ჩემო! აწ განსვენებულ ბებიასა და დედაჩემს ცოდნიათ ხალხური წამლები, რომლებითაც ისინი ავადმყოფებს მკურნალობდნენ. ჯერაც არ არიან ჩვენს კუთხეში ექიმები და აბა, მაშინ სად იქნებოდნენ? სოფლებები დაჩვეული იყვნენ ჩვენი ოჯახებისაგან ასეთ დახმარებას. მეც გადავწყვიტე განმეგრძო ეს საქმე, რათა ხალხს ნუგეში არ წართმეოდა. რა თქმა უნდა, ყოველი სნეულეთისაგან ჩვენ ადამიანს ვერ განვკურნავთ, ზოგს ტკივილებს შეიღობებუქებთ,

ზოგს მთლიანად მოვარჩენთ, ზოგსაც სულიერად გავაშხნევებთ. მოგეხსენებათ, დიდს ნიშნავს ადამიანისათვის სულიერი სიმარე. შეძლების მიხედვით ვცდილობ ეს მაინც გავაკეთო, რადგან საზოგადოებრივ საქმეებს, როგორც ხელაკს, თანდათან ჩაშოვშორდი.

— დიდი საქმეა, რასაც აკეთებ, შვილო, მაგრამ საზოგადოებრივ საქმეებს შენისთანა გონიერი და კეთილშობილი კაცი უნდა ედგას სათავეში და მაშინ წაიწევა ქვეყანა წინ.

— მე რა ქვეყნის წამწევი გახლავართ, ბატონო! ჩემს კუთხეს თუ რამე პატარა სარგებლობას მოუუტან და შეილებს სამშობლოს ერთგულს გაეზრდი, თავს ვალმოხდილად ვიგულებდი.

— შენი შეილები, უეჭველია, სახელოვანი იქნებიან კარგი მშობლების ზეგავლენით აღზრდილნი, არ გადაგვარდებოდნენ ჩემი მაზლისწულებივით და ნაწილობრივ ჩემი ვაჟივით.

— რასა ბრძანებთ, ბატონო! ჩემი და ჩემი შეილების პირობები რა შესადარია თქვენი და თქვენი მაზლისწულების მდგომარეობასთან? ისინი თავიდანვე მიჩვეული იყვნენ ნებივრობას, ლალ, დიდკაცურ ცხოვრებას.

— ვერაფერი სარგებლობა მოუტანა ასეთმა აღზრდამ ჩვენს შეილებს, ნიკო. მე, დიახ, მომხრე ვარ ასეთი ცხოვრებისა და მოღვაწეობისა, რომელსაც შენ მისდევ. ჩემი დიდი ხნის სურვილი იყო მენახა შენი ქებული ბიბლიოთეკა, შენი სამუშაო ოთახი, სადაც შენ ამდენ სასარგებლო რამეს ქმნი.

— დიდი სიამოვნებით, ბატონო! — თქვა და წამოდგა ნიკო, მკლავი გაუწოდა, რათა ხელით დაყრდნობოდა მათ, და თავის სამუშაო ოთახში შეიყვანა.

გრიშა და გიგიშა მთელი ამ საუბრის დროს მათთან იყვნენ. გრიშა დედის ახლო იჯდა.

მაიას განცვიფრებას საზღვარი არ ჰქონდა, როცა ოთახს თვალი მოავლო. უზარმაზარ ოთახში მრავალი კარადა და თარო წიგნებით იყო სავსე, ხოლო შუა ოთახში დიდი საწერი მაგიდა იდგა. მაგიდაზე ქართულ-რუსული ჟურნალ-გაზეთები ეწყო. სახალხო ბიბლიოთეკაზე მაიას შორეული წარმოდგე-

ნა ჰქონდა. მამისა და ბიძის ოჯახებშიც ბევრი წიგნი იყო, ახლა დაეითის და გრიგოლის ბიბლიოთეკაც მოაგონდა, მაგრამ ამის მსგავსი მას არაფერი ენახა არასოდეს. კონსტანტინეს სამუშაო ოთახი ხომ მთლად უბადრუკად მოეჩვენა ამ ოთახთან შედარებით. გულში უსიამოვნო ფიქრმა გაუელვა.

„სულ არაფერი არ ყოფილხარ, მაია! ამის გაკეთებას მაინც ვინ გიშლიდა. ამას მაინც რად ვერ მოაბი თავი?“ — ფიქრობდა ის.

ნიკო გულდაღებით უხსნიდა მაიას და გრიშას, თუ რომელ კარადაში რა წიგნები ეწყო: სასულიერო, საერო, ქართული და რუსული, ფრანგული და ლათინური, ქართული ძველი სამკურნალო კარაბადინები. ერთ დიდ კარადაში მრავალი პატარა ყუთი ელაგა. ყოველ ყუთს თავისი წარწერა ჰქონდა: ტუხტის ყვაილი, ხარისძირა, მრავალძარღვა, დაფნის ფოთოლი, ბროწეულის კანი და სხვა... იყო კიდევ პატარა ყუთები შემდეგი წარწერებით: ნაღველი მგლის, დათვის, ტურის და სხვა...

— ეს სამკურნალო აფთიაქი გახლავთ! — ღიმილით და ოდნავი ირონიით აუხსნა ნიკომ მაიას.

მაია ალტაცებით უტკეპროდა ამ მშვენიერ ვაჟაკს, რომლის შინაასიანი, ლამაზი და მეტყველი სახე მიწიერს არ ჰგავდა. სათვალეებით დაფარულმა მისმა თვალებმა მაიას გული ნდობითა და სითბოთი განმსჭვალეს. ნიკოს დიდკაცური უბრალოება, საქციელისა და სიტყვა-პასუხის სისადავე მის დიდ განათლებას მოწმობდა. მაია მზად იყო, ამ ოთახში მთელი დღე გაეტარებინა, მაგრამ ნიკომ ზრდილობიანად უთხრა:

— ბატონო ჩემო, დაგლლით ამდენი საუბარი, ხომ სამკურნალოდ ჩამობრძანდით? ახლა მოისვენეთ თქვენთვის გამზადებულ ოთახში, შემდეგ ვისადილებთ, ხვალ კიდევ განვაგრძოთ დათვალეერება. თუ ინებებთ, ავადმყოფებსაც გიჩვენებთ.

— მე კი ვფიქრობდი, შეილო ჩემო, ამ სადამოს ისევ აბანოსკენ გამგზავრებას.

— არა, ბატონო, მე მაგის ნებას, როგორც „ექიმი“, ვერ მოგცემთ, — თქვა ნიკომ და გაიცინა.

— არა მიშავს რა. მე ძალიან ამტანი გახლავართ, მრავალი ჭირი გადამხდომია.

— ბატონო ჩემო, ნუ დაგავიწყდებათ, რომ მე უფლება მაქვს, როგორც მასპინძელს, არ გაგიშვათ, გთხოვოთ დარჩენა.

ნიკო პატივისცემით განეწყო მაიასადმი და უკვირდა, თუ რატომ ეძახდნენ ამ ქალს მკაცრსა და მიუკარებელ ადამიანს.

* * *

მაია ნიკოს სასახლიდან მდიდარი შთაბეჭდილებით დაბრუნდა. ხიბულაში ჩასული აღტაცებით უყვებოდა თავისიანებს ნიკო დადიანის ცხოვრებასა და მოღვაწეობაზე. გულის სიღრმეში ნანობდა, რომ ვერც ერთი მისი შვილი ვერ განათლდა, ვერც ამაღლდა, უმაღლეს ზნეობრივ საფეხურს ვერ მიაღწია, ვერ დათესა ხალხში სასარგებლო აზრი და საქმე.

— უჩა, უჩა, შენლა დამრჩი ერთადერთი იმედი, შენ მაინც გაამართლე მოლოდინი! — ჩაილაპარაკა მაიამ.

მაია ხშირად უკითხავდა თავისიანებს ნიკო დადიანის ლექსებს, რომელიც მას მაიასათვის ეთავაზებინა ნოქალაქევეში ყოფნის დროს. მაიას ხომ ყველა ჟურნალ-გაზეთი გამოწერილი ჰქონდა. ის განსაკუთრებული სიამოვნებით კითხულობდა ნიკოს წერილებს, რომელიც მაშინ ხშირად იბეჭდებოდა. ნიკოს ლექსებში მაიას ყველაზე მეტად უყვარდა მისი სიტყბუკის ლექსი, რომელიც ბერთემში სტუმრობის დროს ნიკომ მაიას თავისი ხელით გადაუწერა:

„მიყვარს წარსული, აწმყოს ვემღური
და მომავალსა ნუგეშით ველი“.

მაია ამ სიტყვებს ხშირად იმეორებდა, როგორც თავისი გულისნადების გამოძახილს, შემდეგ ისევ თავის გაკიცხვას შეუდგებოდა.

„მე სახარბიელო აწმყო არა მაქვს, სიღღო მომავალი? რა მომავალი უნდა მქონდეს?“

— ნიკოსთანა ადამიანები იშვიათად იბადებიან, მაია ბატონო, — ეტყოდა ხოლმე გულდაწყვეტილ მაიას ონისიმე. — ის ბუნებითაც სხვანაირი კაცია, ცხენოსნობა არ უყვარს, დროსტარება-ქეიფს გაურბის, ბავშვობიდან დღემდე ყოველ თავისუფალ დროს წიგნებს ჩასჩერებია, შეისვენებს თუ არა, ნაწერეებზე ადის, ღამეებს კი ხშირად ვარსკვლავისა და მთვარის ცქერა-დაკვირებაში ატარებს. აკი მოგახსენეთ, თქვენს გვარში ასეთი კაცი არ გამოსულა-მეთქი.

მაიამ გაიცინა.

— რამდენი შეცდომა დაუშვი მე თვითონ, აი თუნდაც ის, რომ შენ არ გასწავლე, ონისიმე, აუცილებლად ნიჭიერი ხარ, მაგრამ ბედოვლათობას გადაყევი. შენი ნიჭი და ენამჭკვერობა ბატონიშვილების გასართობადღა დაიკარგა. გიგიშამ გაჯობა. მან წერა-კითხვა მაინც იცის, წიგნი უყვარს. „ვეფხისტყაოსანი“ თითქმის ზეპირად ისწავლა. შენ კი, ონისიმე, ხელი ვერ შეგიწყვე, თვითონაც ვერ ივარგე. რომ გესწავლა, იქნებ ახლა წარჩინებული კაცი ყოფილიყავი.

— რა წარჩინება მომელოდა. მე რკინიგზების რევიზორად არავინ დამნიშნავდა, შე დალოცვილო! რაც შეეხება წიგნის სიყვარულს, გიგიშაზე ნაკლებად არც ეწერ და არც ვკითხულობ. რატომ არ ვვარგავარ, მე ძალიან მომწონს ჩემი თავი, გიგიშაზე ნაკლებად არც „ვეფხისტყაოსანი“ ვიცი, — თქვა ონისიმემ და გადაიხარხარა.

— ახლა, ონისიმე, ერთი კარგი საქმე გააკეთე: ერთი კარგი მოზვერი, ერთი კარგი უშობელი, ხუთი ცხვარი, ერთი ფუთი თაფლი, ერთი ფუთი დოში, ბრინჯი, სასმელები გამოაწყვე. ნიკო დადიანს, ღარიბთა და სნეულთა მწყალობელს — უნდა გავუგზავნო. თუ თვითონ წლიდან წლამდე ამდენ ხალხს არჩენს, ჩვენც ვალდებული ვართ, მცირე რაზმით მაინც მოვიკითხოთ, — თქვა მაიამ და შემდეგ მსახურს მიმართა:

— შენ კი, ვერა, გადმოალაგე თეთრეული: ზეწრები, მითელები, ბალიშისპირები, პირსახოცები, გადაარჩიეთ თორმეტთორმეტი ცალი. გავუგზავნი იმ დიდებულ კაცს ავადმყოფი-

ბის საწოლისათვის. ვფიქრობ, არ ეწყინება, მით უფრო, ერთი სისხლი და ხორციდან მოვდივართ, გარეშენი ხომ არა ვართ.

ონისიმემ და გიგიშამ ერთმანეთს გადახედეს. ორთავეს გულში ეცილებოდა, მორიდების გამო თავი შეიკავეს. არ თქვეს პირზე მომდგარი სიტყვები: რის შემდეგ გახდნენ ბერთემელი დადიანები მაიას სისხლი და ხორციო. მას კი ერთხმად უპასუხეს:

— ძალიან კარგი და რიგიანი საქმე გინებებია, ბატონო, ნიკოს, როგორც შეგნებულ კაცს, ძალიან გაუხარდება ასეთი ყურადღება.

— გიგიშა, მე ნუ მოგიკვდები, პეტრე ლაშხია მიხმეთ ერთი. ხომ ისიც ეწევა მკურნალობას? ეურჩევედი ნიკო ბერთემელს ეახლოს, ბევრ კარგ რამეს შეიძენს მისგან. ნიკოს ბევრი საექიმო წიგნი აქვს, როგორც ნამდვილ ექიმს. მართალი მოგახსენოთ, ეს ლაშხია ძალიან მიხვედრილი კაცია, რომელ ავადმყოფობას არ იცნობს. ჩინებულად მკურნალობს ანთებას, ტიფს, ქარებს, სისხლის გაღება ეხერხება, დამწვრისა და ჭიის წამლის გაკეთება, საყმაწვილოსა და რა გნებაეთ რომ არ იცოდეს. მეტი რა ქნას კაცმა, საავადმყოფოსა და აფთიაქს ხომ ვერ გახსნის ნიკოსავით. უნდა ვურჩიოთ, აუცილებლად წავიდეს, იქ ბევრ რამეს ისწავლის. ახლა თქვენ რომ წახვალთ, ისიც წამოგყვებათ.

შალასული თავმოყვარეობა

მაიას ქველმოქმედებამ უფრო ფართო ხასიათი მიიღო ცხრაასიანი წლებიდან, როდესაც სამეგრელოში რევოლუციური მოძრაობა ჩაისახა.

მაია გულდასმით კითხულობდა ქართულ ჟურნალ-გაზეთებს, ზეპირად გეტყოდათ ილიასა და აკაკის რჩეულ ლექსებს.

საფრანგეთის რევოლუციაზეც ხშირად იყო მსჯელობა მაიას ოთახში. ის ბევრ რამეში ეთანხმებოდა რევოლუციის მესვეურთ, მაგრამ საკუთრების ჩამორთმევის სასტიკი წინა-

აღმდეგი იყო. არც ის სწამდა მაიას, რომ მშობლების ცოდვა შეილეს ეზიდა.

ძლიერ ებრალებოდა სამშობლოდან ლტოლვილი აშილ მიურატი. ეს კაცი სხვის ქვეყანას აფარებდა თავს.

— ალბათ, არ ედგომებოდა იქ, თორემ რაღა აქეთ წამოყვებოდა ცოლს და ჩაგვესიძებოდა? მე ძალიან მიყვარს ჩემი მაზლისწული სალომე. ის დიდებული ქალია, მაგრამ ცოლის ხელსა და თვალში შემყურე ვაჟკაცი მაინც ცოდვია. — უთხრა ერთხელ მაიამ გიგიშას.

— დიდი უსიამოვნება აქეთ თურმე ოჯახში, — უპასუხა გიგიშამ.

— რაო, რაო, რას ამბობენ? — დაინტერესდა მაია

— სამშობლოს მოწყვეტილი კაცი აბა რა ხასიათზე იქნება. როცა კაცი უხასიათოდაა, იქ უსიამოვნება გვერდითა ყოველთვის.

— მართალია, დაიტანჯება, შენ ნუ მომიკვდები! პარიზში ნაცხოვრები პრინცი, ნაპოლეონის დის შეილიშვილი. ასეთი დიდი კაცი ზის ახლა სალხინოში, ხან ჭკადუაშში, ირგვლავ ახვევია გონებაჩლუნგი თავადაზნაურების საზოგადოება. რამ უნდა გაამხიარულოს?

— დიდო ქალბატონო, კაცი ყველაფერს აიტანს, თუ შეეგუა თავის მეუღლეს. მეეჭვება, რომ აშილი ამ მხრივაც თავისი ბედის კმაყოფილი იყოს. სალომე ძლიერ მშრომელი და განათლებული ქალია, მაგრამ გადაჭარბებულად ჯიუტი, ყველგან და ყველაფერში თავისი ნება-სურვილი უნდა გაიტანოს. ალბათ ეს აწუხებს თავმოყვარე ფრანგს.

მაიას გაუკვირდა გიგიშას ასეთ წინდახედული სიტყვება. ის კიდევაც ეთანხმებოდა მას გულში.

— დიდებული კაცია აშილ მიურატი, გადაიცვამს სამუშაო ხალათს, უბრალო გლეხივით მუშაობს ბაღ-ბოსტანში. ვენახს თავისი ხელით სხლავს, ჩემი თვალით მინახავს. მაგისტანა ხასიათის კაცს ქალი კი არა, ეშმაკი შეეწყობა, — თქვა მაიამ, — თუ არ მუშაობს აშილი, კითხულობს, საფრანგეთიდან იწერს ჟურნალ-გაზეთებს. ხშირად განმარტოვდება თურმე და დიდხანს ზის ჩაფიქრებული. ყველა გრძნობს, რომ ასეთ

წუთებში აშილი თავის საყვარელ სამშობლოზე, თავის წარსულ დიდებაზე ფიქრობს. ერიდებიან მის ახლოს გავლასაც კი, მისი მყუდროების დარღვევას.

— ასეა, — ჩამოართვა სიტყვა მაიას გიგიშამ, — თუ ადამიანი ოდნავ კეთილშობილი და მგრძნობიარეა, სამშობლოს მოშირება, რასაკვირველია, შეაწუხებს, არავითარი კარგი ცხოვრებით არ შეიძლება სამშობლოს სიყვარულის დავიწყება. ბედნიერებას ვერ იხილავს მშობლიურ მიწას მოწყვეტილი ადამიანი. ხის ფესვი ვერ ხარობს თავისი ნიადაგიდან ამოღლეჯილი. პატარა, უსუსური მერცხალიც კი ეძებს თავის ბუდეს. გაზაფხულზე რომ მოჭიკჭიკდება, თუ ბუდე დანგრეული დაუხვდა, გული ეტკინება, უმაღვე ახალი ბუდის კეთებას იწყებს იმავე ადგილას ან იქვე ახლოს.

— მართალია, ჩემო გიგიშა, მამულის სიყვარული ღრმად ზის ადამიანის ბუნებაში. ვისაც ეს დიდი გრძნობა არ გააჩნია, მისგან არაფერი გამოვა.

ამ საუბრის შემდეგ მაიას ჭკადუაშიდან დიდად საწყენი ამბავი მოუტანეს აშილ მიურატის გარდაცვალების შესახებ.

მაია უზომოდ შეაწუხა ამ ამბავმა. მის აღელვებას საზღვარი არ ჰქონდა, როდესაც გაიგო, რომ აშილი თვითმკვლელობის მსხვერპლი გამხდარიყო.

მაიას უნდოდა გაეგო, რამ აიძულა პრინცი ცხოვრებას ასე ტრაგიკულად განშორებოდა, მაგრამ მაინც არ იკადრა კითხვა, ხოლო ამბის მომტანმა თავი შეიკავა მოჰყოლოდა ოჯახის საიდუმლოებას, დარხეულ ჭორსა თუ მართალს.

მაია აშილის დაკრძალვაზე ვერ წავიდა, აღარც ღონე შესწევდა საამისოდ და არც უყვარდა ტირილში სიარული. გასვენების წინადღით რამდენიმე უღელი ხარი და ორმოცამდე ცხვარი გაგზავნა განსვენებულის ოჯახში. გრიშა დაიბარა ტირილის წინ, წარჩინებულების თანხლებით გაისტუმრა შვილი.

აშილის სურათი თეჯირის უკან გადადგა.

პრინცს ორი წერილი დაეტოვებინა: ერთი ცოლისთვის, რომელშიც ეწერა:

„დღეს თქვენ ყოვლად გაუსწორებელი შეურაცხყოფა მო-

მაყენეთ. არ მიიღეთ მხედველობაში, რომ მე სხვისი ხელქვეითობა არ შემძლია. მე ქალს, არათუ თქვენისთანა საპატიოს, გარეშესაც და უბრალოსაც პატივს ვცემ. დღეს თქვენ ყველას ფერს გადააჭარბეთ ჩემს მიმართ. ამის შემდეგ არ ღირს ჩემი სიცოცხლე. გმადლობთ ყველა კარგი გრძნობისათვის ჩემდამი. ბოდიშს ვიხდი, რომ ჩემი მოქმედებით შეგაწუხეთ. შვილებს გაუფრთხილდით, იმათ ტანში ჩემი სისხლი ჩქეფს“.

მეორე წერილში აშილი აღნიშნავდა, რომ თავს იკლავს სიცოცხლის მობეზრების გამო. მთავრობას თხოვდა — მის სიკვდილში ბრალი არავისთვის დაედოთ.

თუმცა ცოლის სახელზე დაწერილი წერილი საიდუმლოდ იყო შენახული, მას არავის უკითხავდნენ, მაგრამ პრინცი სიკვდილის მიზეზი და წერილის შინაარსი მაშინვე გავრცელდა სასახლეში.

ყველამ იცოდა ის უსიამოვნება, რომელიც აშილს თავის მოკვლის წინა დღეებში შეხვდა. აშილის სიკვდილის დროს მთელი ჯალაბით სალხინოში იყვნენ მიურატები. სალომეს ხომ აქ დედის მიერ გამართული დიდი სასახლე და მეურნეობა ჰქონდა. დიდშემოსავლიანი მამული ოჯახის იქ ყოფნას თხოულობდა. მათ ზუგდიდშიც ჰქონდათ სახლი, მაგრამ ეს სახლი არცთუ ისე დიდი გემოვნებით იყო აგებული.

სალომეს არ უყვარდა ზუგდიდის სახლი, განსაკუთრებით მას შემდეგ, რაც მისმა ძმამ, ნიკომ, მამისეული სასახლე განაახლა დიდებული პარკითა და ბალებით, სალომეს სახლი მასთან შედარებით საცოდავად გამოიყურებოდა.

თავმოშწონე და პატივმოყვარე იყო სალომე, უნდოდა მისი კუთვნილი სახლ-კარი და მამული მდიდრული, ლამაზი ყოფილიყო. მისი სახლი კი სრულებით არ აკმაყოფილებდა ამ მოთხოვნილებას. თუ სახლს დაარღვევდა, ძველი სახლის მასალა არაფრად გამოადგებოდა. ქმარმაც ბევრჯერ ურჩია სახლის დარღვევა და მის ადგილას ახლის აგება. არც აშილს უყვარდა ეს სახლი, მაგრამ სალომე არ დათანხმდა, რადგან ახალი სახლის აშენებას დიდი ხარჯები უნდოდა.

სალომემ სხვა გამოსავალი მოძებნა. სახლი დააზღვევა, რა თქმა უნდა, ბევრად მეტ ფასში, ვიდრე იგი ღირდა. სალო-

შესჯერ კიდევ დიდი გავლენა ჰქონდა მმართველ წრე-ებში.

მიურატმა არაფერი იცოდა სახლის დაზღვევის შესახებ. ცოლმა განგებ არ უთხრა მას, რადგან კარგად იცოდა ქმრის ხასიათი. ბოლო ხანებში ზუგდიდში სახლის შესახებ ლაპარაკი შეწყდა. როგორც კი აშილი ამ სახლს მოიგონებდა, ცოლს ეტყოდა: სახლი მეტისმეტად მიგდებულია, ან შევაკეთოთ. ან გავყიდოთ. სალომე მუდამ სხვა საგანზე გადაიტანდა ლაპარაკს. შემდეგ პრინციმაც მიატოვა ამაზე ლაპარაკი.

ერთ დღეს ზუგდიდიდან მოსულმა, პრინცესას მამულების ვეჟილმა, არასასიამოვნო ამბავი მოიტანა: ზუგდიდის სახლი დამწვარიყო. აშილი შეწუხდა, სალომეს კი წყენაც არ დაეტყო.

სადილად დასხდნენ. სალომე კარგ გუნებაზე იყო. აშილს ბავშვივით უხაროდა მეუღლეს კარგ ხასიათზე რომ დაინახავდა. ახლა ისიც გაუხარდა, რომ მისი ანგარიშის მოყვარული მეუღლე ზუგდიდის სახლის დაწვის ამბავს ასე ადვილად შეურიგდა.

რამდენიმე თვის შემდეგ მდგომარეობა შეიცვალა. სალომე მიურატი ქართულ გაზეთებს იწერდა. აშილი კი — რუსულსა და ფრანგულს. ახალმოსული გაზეთები სალომემ იმ დროს გადაათვალიერა, როდესაც მისი მეუღლე ბაღში ვაზს სხლავდა და ფრიად არასასიამოვნო ამბავი წაიკითხა: გაზეთის კორესპონდენტი ამტკიცებდა: სახლი სალომე მიურატისას მაღალ ფასებში ჰქონდა დაზღვეული და ამიტომ დააწვევინაო.

ამ ამბავმა ძლიერ ააღელვა პრინცესა, მაგრამ კიდევ უფრო ააღელვა იმის წარმოდგენამ თუ რა დაემართებოდა აშილს, როცა ამ ამბავს გაიგებდა.

გაზეთი საჩქაროდ დამალა. ეს ამბავი მხოლოდ თავის ერთგულ ვეჟილს გაანდო და თან შეეკითხა:

— რა პირობებში დაიწვა სახლი, ასეთი სამარცხვინო ჭორი რომ გავრცელებულა?

— აკი მოგახსენეთ, დიდი ქარი იყო იმ დამეს. სახლის მცველს უკანა ოთახში ჭრაქი დარჩენოდა. იმ ხეპრე დარაჯს

მხოლოდ მაშინ გაღვიძებოდა, როდესაც სახლი უკვე ცეცხლის ალში იყო გახვეული, მაშინ კი წამოვარდნილა ნახევრად ჩაუცმელი, ჯერ ეკლესიაში შესულა ზარის დასარეკად, შემდეგ ჩემსას მოერბინა. ხალხი შეგროვილიყო. რაღას უშეუღინენ, ძველი სახლი ერთ საათში ფერფლად იქცა.

— შენ სად იყავი იმ დროს?

— ჭკადუაშში გახლდით. მამულებს მივაკითხე. თავდაუხსნელი გლეხებიდან ფულის ალება ერთობ გაჭირდა, ბატონო! არ იძლევა, თუ ვერ იძლევა, უნდა დააკედე. სანამ ორ კაპიკს გამოართმევ, ისიც მუქარით, მამასახლისისა და იასაულის დახმარებით.

— საინტერესოა, ვინ მყავს ასეთი მტერი, ვიცოდე მაინც! ვინ დაწერა ეს წერილი?

— ეშმაკმა იცის, ბატონო, მტერი თქვენისთანას ეყოლება, აბა გაჭირვებულსა და ოხერს ვინ შეამჩნევს?

თითქოს ყველაფერმა უმტკივნეულოდ ჩაიარა.

რამდენიმე თვის შემდეგ, სრულიად შემთხვევით, აშილი იმ გაზეთს წააწყდა, გადაათვალიერა და საბედისწერო კორესპონდენტია წაიკითხა.

საღამო იყო. აღელვებული აშილი მთელი საათი ბოლთასა სცემდა თავის კაბინეტში, არც ჩაიხე გამოვიდა.

სალომემ ქმარიან შესულა მოინდომა, კაბინეტის კარებამდე მივიდა, რაკი ოთახში სრული სიჩუმე სუფევდა, ალბათ კითხვით არის გატაცებულიო, — გაიფიქრა და გაბრუნდა. აშილი საწოლ ოთახში მხოლოდ მაშინ შევიდა, როდესაც დარწმუნდა, რომ მთელ ოჯახს ეძინა.

მეორე დღით, საუჩმის დროს, სალომეს აშილის სახე ეუცხოვა. თვალეზში დროდადრო უჩვეულო გამოქცევებზე უკრთოდა.

სალომემ შიშნარევი ყურადღებით მიმართა მეუღლეს:

— ავად ხომ არ ბრძანდებით, აშილ? მე რაღაც თქვენი სახე არ მომწონს ამ დღით.

აშილმა თვალი თვალში გაუყარა და არაფერი უთხრა.

სალომემ ვერ გაუძლო საყვედურით სავსე თვალეზის ცქი-

რას. პრინციის აქამდე ლმობიერ თვალეში თანდათან ცეცხლის ნაკვესები ძლიერდებოდა.

— ნუთუ თქვენ გაკვირვებთ, პრინცესა, ჩემი სახის ასეთი გამომეტყველება მას შემდეგ, რაც ჩვენი ოჯახი ესოდენ სამარცხვინო საქმეში გაეხვია? მე გაზეთი ვნახე. აბა, იფიქრეთ, ღირდა ეს ქოხი თუნდაც იმის მეთასედად, რაც ჩვენ იმის გამო სირცხვილში ჩავვარდით? ამიერიდან ხომ ქვეყნის ყბადასაღები გავზღვით?

სიტყვა „ქოხის“ ხსენება ელდასავით ეცა სალომეს.

— თქვენო ბრწყინვალეებაე, ქოხები არც მქონია და არც მაქვს. ჩემი წინაპარი ქოხიდან არ გამოსულა.

— რა გნებავთ ამითი თქვათ? ხომ არ გსურთ მითხრათ, რომ ჩემი წინაპარი გამოვიდა ქოხიდან? — თქვა აშილმა და მწარედ გაიღიმა.

— მე არაფერიც არ მინდა ვთქვა. საზოგადოდ, ზედმეტად მიმაჩნია ამ საგანზე თქვენთან ლაპარაკი. თქვენ სრულებით არ გეზებათ ეს საქმე, მე ჩემი ქონების პატრონად ვვარგვივარ, ეს ყოველივე ჩემი საქმეა, სხვას არავის ეხება.

ეს ამბავი დაწვრილებით მოუყვა დედას, ტირილიდან დაბრუნებულმა გრიშამ.

— მიურატს ერთი სიტყვაც აღარ უთქვამს თურმე, — განაგრძო გრიშამ, — ამდგარა, ბოდიში მოუხდია ცოლთან და თავის კაბინეტში შესულა. ერთი საათის შემდეგ პრინციის კაბინეტში თოფი გავარდა. შეზღონგზე გადაწოლილი მიურატის მკერდიდან სისხლი ჩქეფდა. წერილები კი მაგიდაზე იყო.

მაიამ პირჯვარი გადაიწერა, კრიალოსანი დამარცვლა და ჩუმად ჩაილულლულა:

— ღმერთო, შეუნდე ჩვენს ქალს მისი შეცოდებანი! როგორ შეუმზადებია ქმრის სიკვდილი...

შემდეგ დასაფლავებისა და სალომეს მწუხარების ამბავს მოუყვა გრიშა.

— სალომეს დიდი პატივი სცეს ბატონიშვილებმა დავითმა და კოწიამ. მთელი ტვირთი სამეგრელოს ადათით კაცის დასაფლავებისა, ჩემს ბიძებს დააწვა თავზე. შესანიშნავად და-

იტირეს. სალომე დიდად დავალებულად გრძნობს თავს. სასახელო ბიძებს ეძახის შენს ძმებს. საბრალო სალომეს დიდი საშინელება დაატყდა თავზე, მოულოდნელი მწუხარება, სირცხვილი, ხალხის უმადურობა და გაუთავებელი მითქმა-მოთქმა...

— ხუმრობა საქმეა, შვილო ჩემო! ჯერ მტერი რომ მოგენდოს და თავი შეაფაროს შენს ჭერქვეშ, მას უნდა პატივი დაღათობა, თორემ ახალგაზრდა კაცი, თავის ქვეყანას მოწყვეტილი, სიყვარულით შეუღლებული, მშვიდი, პატიოსანი ქმარი თვითმკვლელობამდე მიიყვანო განათლებულმა ქალმა? ძნელი გადასატანია. მიურატი ჯერ კიდევ ახალგაზრდა იყო. ორმოცდაათი წელი ადამიანის ცხოვრებაში მხოლოდ შემოდგომის დასაწყისია.

* * *

ზამთრის პირი იდგა. ერთფეროვან დღეებს მოწყენილობა შეჰქონდა მარტოდ დარჩენილ მაიას ოთახში. გაზეთებისა და წიგნების კითხვით ერთობოდა.

— გაზეთები ხომ არ მოუტანიათ? — პირველად ამას კითხვად დილით მოახლეს.

გაიგო თუ არა მაიამ გაზეთები ადრე მოეტანათ, ადგა, ისაუზმა, შემდეგ საკარძელში ჩაჯდა და გაზეთებს დაუწყა თვალიერება.

— ეს კიდევ რა უბედურება მომხდარა! — ელდა ეცა მაიას, თითქოს თვალს არ უჯერებსო, უფრო ახლოს მიიტანა გაზეთი თვალებთან.

— რა მომხდარა, ბატონო? — შეეკითხა მოახლე ქალი.

— ნიკო დადიანი გარდაცვლილა.

— ბატონო, ის ფილოსოფოსი ნიკო, თქვენ რომ მასთან ბრძანდებოდით, ბერთემში?

— ის, ის, ჩემო ვერა. ვაი ჩემს დღეს! რაც ჩვენ გვარში კარგი და სასახელოა, მიდის და მიდის. — დამწუხრებული ხმით თქვა მაიამ და ხმამაღლა წაიკითხა სამგლოვიარო განცხადება.

— ნეტავ გიგიშა თუ სახლშია? გადმოვიდეს, კარგი იქნება. ეს ამბავი, ალბათ, ჯერ არ ეცოდინება.

— ახლავე კაცს გავგზავნი, ბატონო, — უთხრა ვერამ და ოთახიდან გავიდა. სულ მალე გიგიშა მაიას ოთახში გაჩნდა.

— საკვირველია, რა უნდოდა ოსეთში, ვერ მომიფიქრებია. თავის ოჯახში ბრძანებულიყო, იქნებ ეს არ მოსვლოდა.

— მოგახსენებენ, იქ კონსტანტინე დადემქელიანის შვილები რომ არიან გადასახლებულნი, იმათ სანახავად წაბრძანებულა. კარგა ხანია, რაც იქ ყოფილა, ბატონო, გამგზავრებული. ამას წინათ გრიშას ვახლდი ბერთემს და იქ გავიგეთ. ალბათ, მოასვენებენ ბატონო!

— რასაკვირველია, თავის სამშობლოში წამოასვენებენ. აბა, იქ ხომ არ დატოვებენ?

„ნეტაე ჩემი ძვირფასი უჩა ჩამოყვებოდეს ნიკოს ნემტის გამომცილებლებს, — გაიფიქრა მაიამ, — მაგრამ ვინ გამოუშვებს ახლა აქეთ უჩას. მეფის კარზე მსახურობს ჩემი ბიჭი, საქმის კაცია, ენაცვალოს დედა. სანამ სწავლობდა, ყოველ ზაფხულს არდადეგებზე ჩემთან ჩამოვიდოდა. მეტად კეთილია. გულით კი ჰგავს უბედურ კონსტანტინეს. საქმით ეტყობა, არ დაემგვანება. არა, უჩასგან სასახელო კაცი დადგება. ეს ნიკომაც მითხრა. არა, ნიკოს ცხედარს უთუოდ ჩამოყვება უჩა. მას საბრალო ნიკო ღვიძლ ბიძასავით უყვარდა“.

მაია გულს იოხებდა, რომ საქმით არ ჰგავდა უჩა კონსტანტინეს, თორემ სინამდვილეში უჩა, ეს ერთადერთი იმედიც მამის კვალი და ასლი იყო. ისიც, როგორც კონსტანტინე, თავის სიამოვნებაზე ფიქრობდა მხოლოდ. დროსტარებაში და ქეიფში ატარებდა დღეებს. ნაკლებად ფიქრობდა დაწინაურებაზე, საქვეყნო საქმეზე. დედას სულ ფულს სთხოვდა. არ ერიდებოდა ხარჯვას, არ წუხდა იმაზე, თუ საიდან უნდა გაეგზავნა დედას მისთვის ამდენი ფული.

უჩასათვის განკუთვნილი მამულის შემოსავალი უჩას მოთხოვნილების მეხუთედსაც არ აუდიოდა. დანარჩენი ფული მაიას უნდა ეშოვა მისთვის. მაია ხშირად სწერდა საყვედურისა და დარიგების წერილებს. ფლანგვით და დროსტარებით ჰეტერობურგის არისტოკრატის ვერ გააკვირვებ. ჯობია საქმით ეცადო თავი მოაწონო ხალხსო. მაგრამ უჩას დედის წერილები მხოლოდ ერთი წუთით დააფიქრებდა. შემდეგ ისევ თავის ცხოვ-

რებას უბრუნდებოდა. სანამ მაქვს, ვიცხოვრებ ჩემს გემოზე, ფიქრობდა იგი, არ მექნება და ანასუნი ჩემს საქმესო.

დედას კი სასიყვარულო, გულთბილ წერილებს უგზავნიდა პასუხად. ამიერიდან შენი რჩევით და მითითებით ვიცხოვრებ. ოღონდ გამიძარტე ხელი, მევალებთან ნუ შემარცხვენ და მერე თუ გთხოვო, თვალებში ჩამაფურთხეო. დაპირება დაპირებად რჩებოდა, მაგრამ დედა თვალებში შესაფურთხებლად მაინც ვერ იმეტებდა ერთადერთ იმედს.

ს ტ უ მ რ ა დ

უნა დადიანი რუსეთის მეფის სასახლის ცხენოსანი ნაწილის ოფიცერი იყო. ხელმწიფის ოჯახში თითქმის შინაურ კაცად ითვლებოდა. მთელი სასახლე აღტაცებაში მოკყავდა მის გარეგნობას, ჩაცმა-დახურვას, სიმარდეს, ენამახვილობას. ბევრ დიდგვაროვან ქალს უძგერდა მისთვის გული.

მაია კმაყოფილი იყო უნას პეტერბურგში ცხოვრებითა და იმ პატივით, რომლითაც უნა ხელმწიფის სასახლეში სარგებლობდა. წერილებსაც იმედიანს ღებულობდა, ხან თვით უნასაგან, ხან მისი ერთგული მხლებლის — პორუფი ფინჩაიასაგან. ასე განვლო თითქმის ერთმა წელმა. უნა ბოლო წლეპში ხშირად ჩამოდის ქუთაისში. მაიამ არ იცოდა მიზეზი, რად შეუყვარდა უნას ამრიგად ქუთაისი. ახლო მეგობრებმა იცოდნენ, რომ უნა ქუთაისში ცნობილი თავადის ერთ ლამაზ ქალზე ჭკუას კარგავდა. ეს ქალი მისი ახლო ნათესავის მეუღლე იყო.

უნას ეს ქალი რომ მოეწონა, მაშინ იგი ჯერ კადეც პაჟთა კორპუსის უკანასკნელ კურსზე იყო. ერთხელ არდადეგებზე დედასთან წამოსულმა ბიძამისს, გრიგოლ დადიანს გამოუარა ქუთაისში და რამდენიმე დღე გაატარა იქ. ახალგაზრდა ვაჟს საუღვაშე ბუსუსით ჰქონდა დაფარული. პაჟის კორპუსის მკაცრი რეჟიმის შემდეგ ჭაბუკი ყველაფერს აღტაცებაში მოკყავდა.

ერთ დღეს გრიგოლთან სადარბაზოდ მოვიდა ალექსანდრე დადემუქელიანი, მაიას ახლო ნათესაეი.

ალექსანდრეს თან ახლდა მეუღლე, — ახალგაზრდა, ლამაზი,

ბაბილინა ერისთავის ქალი, რომელიც ოცდაშვიდი-ოცდარვა წლის იქნებოდა. უჩა მასთან შედარებით ბავშვი იყო, სულ ჩვიდმეტ-თვრამეტი წლისა. ნათესაური იყო დადუშქელიანისა და მისი ცოლის შეხვედრა უჩასთან. მათ უჩა შინ მიიწვიეს, ალტაცებულნი იყვნენ მისი სილამაზით, განათლებით.

საბედისწერო შეიქნა უჩასათვის ეს შეხვედრა. ვინ იცის, რამდენჯერ დასწყევლა შემდეგში უჩამ ის საათი და წუთი, როდესაც პირველად ჩახა ბაბილინა. დავაჟიკაცებამდე თან სდევდა ბაბილინას სიყვარული, გასაქანს არ აძლევდა. ვერც ხელმწიფის სასახლემ, ვერც მაღალმა საზოგადოებამ, ვერც ახალმა გატაცებებმა ვერ დაჰფარა ბაბილინას მომაჯადოებელი სახე უჩას მეხსიერებასა და გულში. სადაც არ უნდა ყოფილიყო, მუდამ თან სდევდა მისი ელვარე თვალები, კილოაზიღული წარბები.

ახალგაზრდა ვაჟი დიდხანს ვერ ბედავდა თავისი გრძნობის გამჟღავნებას. სწორედ ეს გრძნობა არ ასვენებდა უჩას პეტერბურგში, ამ გრძნობას მოჰყავდა ის ხშირად ქუთაისში.

არ დაიძალბა ასეთი ამბავი, მეტადრე პატარა ქალაქში. მალე ბაბილინას თანაგრძნობა შეეყვარებული ვაჟისადმი ყველასათვის შესამჩნევი გახდა.

ეს ამბები მაიას ყურსაც მისწვდა, თუშცა ყველა უმაღლავდა ამას, უფრო მეტად თვით უჩა.

ახალგაზრდა, თაეზიანი, კარგი თვალტანადი, ენატკბილი უჩა ყველას უყვარდა. ის ქველმოქმედი კაცი იყო. ბევრ ღარიბ სტუდენტს აძლევდა ფულად დახმარებას.

უჩა უბრალო ჯარისკაცებსაც ამხანაგურად ექცეოდა, მათთვის მძიმე, მაშინდელი სამსახურის პირობები ბევრჯერ შეუმსუბუქებია, მატერიალური დახმარებაც ხშირად გაუწევია. ყოველივე ამას იკონებდა მაია. მისი ხასიათის თავისებურება ის იყო, რომ გარეშეებთან არასოდეს არ იკადრებდა უჩას ქებას, მხოლოდ უახლოეს ადამიანებთან, განსაკუთრებით გრიგოლთან დაიწყებდა უჩას ღირსება-ნაკლზე ლაპარაკს.

გრიგოლმა, მართალია, აშკარად არ აცნობა რძალს ეს ჭორები, მაგრამ ეჭვი დაეზადა გულში, რომ უჩას ხშირი სტუმრობა ქუთაისში, ალბათ, სულ უმიზნოდ არ ხდებოდა. გრიგოლმა სთხოვა რძალს: შენ ჩემზე უმცროსი და ყოჩაღი ხარ, ჩემს სიკვდილამდე ერთხელ კიდევ მინახულებო.

გრიგოლს რძლის სტუმრობა ეამებოდა, თან საჭიროდ ხედავდა, რომ მაიას 'ზეგავლენა მოეხდინა თავის ვაჟზე, რომელიც კარგ სასიძოდ ითვლებოდა არა მარტო საქართველოში, რუსეთშიც — ხელმწიფის კარზე ჩინებულად მიღებული, უგანათლებულეს თავადად წოდებული.

მაიას უკანასკნელი იმედი ზომ უჩა იყო. უჩას უნდა დაებრუნებინა მაიასათვის მისი ოჯახის დიდება. რას მიაღწია გრიშამ, შეირთო ღარიბი ოჯახის შვილი და მაზრის თავადაზნაურთა წინამძღოლი გასდა. რა ეკითხება მას? თავადაზნაურობამ ერთი გაჭირვებული ბანკი დააარსა. ამ ბანკმა კი მთლად შთანთქა თავადაზნაურთა მამულები, ოჯახები გაანადგურა. მათ ავლადიდებას ვაჭრები და უცხოელი ჩარჩები ისაკუთრებდნენ.

მაიას უჩაზე დამყარებული მთელი იმედები ენგრეოდა, თუ მის ყურამდე მოსული ჭორები გამართლდებოდა. მაზლის დაჯინებითი ღაპატიუებით ეჭვები დაუდასტურდა. მაიამ არ დააყოვნა, ქუთაისს გაეშურა.

მიდიოდა ქუთაისში მაია და ბოღმით საესე გული თან მიჰქონდა.

„როგორ, ჩემი ერთადერთი იმედი, უჩა, ისე გადაგვარდა, დაკარგა ნამუსი, რომ საპატიო ქართველი ოჯახის სახელის გამტეხი შეიქნა? ვაჟს გამიჯნურება მიეტყევა, — ფიქრობდა მაია, — მაგრამ გააჩნია სად და ვასთან. ვაჟკაცი რის ვაჟკაცია, თუ სიყვარულით ისე დაუბნელდება თვალები, რომ თავისიანის პატივმოყვარეობას დაკარგავს, მისებრ ვაჟკაცს პატივს აპყრის, შერცხვენს? მერედა, ვის უპირებს ჩემი შვილი შერცხვენას? ალექსანდრე დადემქელიანს, რომელიც მასზე უკეთესი თუ არა, არც არაფრით ნაკლებია, ვაჟკაცობით, თვალად, სწავლით თუ საქმით. მრავალშვილიანი კაცია. როგორ გაბედა უჩამ, რომ გულში გაივლო მისი ღაპატი?“

მაიას გული დაწყდა. გრიგოლი ჯანგატეხილი დახვდა. ორ წელში თითქოს ოცი წლით მოხსუცებულიყო. დიდხანს ღაპაკიც აღარ შეეძლო.

მაიამ უჩაზე ღაპარაკი არ დაუწყო. უნდოდა ჯერ თვითონ ენახა შვილი. დაკვირვებოდა, სხვებისგან გაეგო მისი ამბავი. შეეჯერებინა გაგონილი და ნახული და ბილოს ეკითხა გრიგო-

ლისათვის რჩევა. მერე მოლაპარაკებოდა ამ საქმეზე უჩას და მიუღო ყველა საჭირო ზომა, რათა შვილი სახიფათო და სამარცხვინო ვზიდან გადაეყვანა.

უჩა ბინით ვრიგოლთან იდგა, მაგრამ იქ იშვიათად ათევედა ღამეს. მისთვის ქუთაისში ყველა წარჩინებული ოჯახის კარი ღია იყო. სასტუმროში საუკეთესო ნომერი ყოველთვის დაბეჭე-ბული ჰქონდა.

ქუთაისელი ქალიშვილები და ქალები ჭკუას კარგავდნენ უჩაზე. დედები და მამები უკეთეს სიძეს ვერ ინატრებდნენ. ამიტომ ქუთაისში არც ერთი ასე თუ ისე შექმნილი და დიდგვაროვანი ოჯახი არ იყო, რომელსაც უჩა არ დაეპატიჟებინოს. უჩასათვის სპეციალურად იმართებოდა ვახშმები და სადილები, სადაც მშობლები თავის ქალიშვილს საგანგებოდ გამოწყობილს გამოიყვანდნენ, რომ მოეწონებინათ სანატრელი სასიძოსათვის.

მაგრამ უჩა ვერავინ ვერ მოხიბლა. მისი გული მარტო ბაბილინა დადემქელიანისათვის სცემდა და ფეთქავდა.

მაიას ჩამოსვლის ღამეს უჩა შინ არ მოსულა. მაიამ თითქოს სხვათა შორის შეიხედა მის საწოლ ოთახში და პირველი, რაც თვალში მოხვდა, ეს დედის სურათი იყო. უჩას დედის სურათი, ღამაზ და ძვირფას ჩარჩოში ჩასმული, საწოლთან ედგა.

ეს სურათი მაიას გადაუღო უჩას ერთ-ერთმა ამხანაგმა, ხიბულაში არდადეგებზე ყოფნის დროს. მაიამ ბევრი იუარა, ბე-ბერი ქალი აბა რა გადასაღებიანო, მაგრამ უჩამ არ დაუ-ჯერა.

თავისი სურათის დანახვამ შვილის საწოლთან მდგარ ტუმ-ბოზე, ასე ძვირფასი ქვებითა და ოქროთი მოვარაყებულ ჩარჩო-ში, დედას გული აუჩუყა. უცებ გადაავიწყდა ის თუ რისთვის იყო ჩამოსული და ახლა თავისი თვალით რომ ენახა ბა-ბილინა დადემქელიანი და უჩა ერთად, შვილს ვერ გაუწყრე-ბოდა.

მთელი ღამე უჩაზე ფიქრში გაატარა მაიამ. „ჩემი უჩა მე ყოველთვის მიგონებდა. არ მომიკლავს გულს, არ მეურჩება, შე-ისმენს, დამიჯერებს, რასაც ვეტყვი. აქ აღარ დავტოვებ. პეტერ-ბურგს გავსტუმრებ დაუყოვნებლივ, თუ მართლა შევატყვი, რომ ბაბილინას ეტრფის“.

მეორე დღეს გვიან დილით გაეგო უჩას დედის ჩამოსვლა და გახარებული შემოიჭრა სახლში. არავის არ დაერიდა, მოეხვია დედას, დაუკოცნა თვალები, ლოყები, ხელები.

— ჩემო საყვარელო დედა, მაპატიე, რომ პირდაპირ შენთან არ ჩამოვედი პეტერბურგიდან. შერცხვენიდა და სასჯელის ღირსი ვარ. აი ჩემი კისერი, შენი ხმლის ქვეშ დამიდვია, — მოფერებით ეუბნებოდა უჩა მამას.

„არა, არა, — გაიფიქრა გახარებულმა მამამ, — ამის თვალეზისა და გულის პატრონს არ შეუძლია ვინმეს ზიანი მოუტანოს, ოჯახი გაულანძლოს. უჩას არ შეუძლია სულმოკლეობა გამოიჩინოს; უღალატოს ახლობელს, მეგობარს, ნათესავს. ალბათ, შურით და ბოროტებით აღვსილმა ადამიანებმა გამოუგონეს ჩემს ბიჭს ის, რასაც სწამებენ. არა, უჩა წმინდა გულისაა, ალალი გულისაა. ჭკვიანია, ასე არ შეცდება“.

— აბა, შემომხედე, დედა, — არ ასვენებდა უჩა მამას, — არა, არ ბერდები, ისევ ისეთი მშვენიერი ხარ, ამაყი, ლამაზი, სიცოცხლითა და სიმბხევით სავსე. ოო, შენი თავი რომ აჩვენა პეტერბურგელ მანდილოსნებს და მამაკაცებს, არ დაიჯერებენ, რომ ეს ქალი ხიბულაში ცხოვრობს, რომ ეს ქალი ევროპაში არ არის აღზრდილი, რომ...

— კარგი ერთი, უჩა, — გააწყვეტინა სიტყვა ბედნიერმა დედამ, — აბა რა პეტერბურგში გამოსაჩენია შენი ხიბულელი ბებერი. შენი ამბავი მომიყევი, შვილო. როგორ ცხოვრობ, რას აკეთებ?

— ემსახურობ, დედა. ემსახურები მეფის კარს, — მიუგო უჩამ და მისი სახე რაღაც სევდამ მოიცვა. — უნდა გამოგიტყდე, დედა, რომ არა ვარ ჩემი სამსახურით კმაყოფილი. ჩვენებურად, მეგრულად რომ ვთქვათ, მეფის მონალე ვარ. მე კი სამხედრო სამსახურზე ვფიქრობდი, შევცდი, დედა. რაიმე ხელობა უნდა მესწავლა. ან ექიმობა ან ინჟინრობა, ვექილობა. მაშინ ნამდვილად გამოვადგებოდი ჩემს სამშობლოს. ნიკო დადიანმა, დედაჩემო, თავისი ტანჯული ხალხისათვის ექიმობით, ქველმოქმედებით, იმდენი გააკეთა, რამდენსაც მე ასე წელი რომ ვიცხოვრო, ვერ გავაკეთებ.

მამა აღტაცებით შეჰყურებდა შვილს და ყურს არ უჯერებ-

და. მაღიმალ გრიგოლს გადახედავდა დედური სიამაყითა და სიხარულით. გრიგოლიც სიყვარულითა და სინანულით შეჰყურებდა უჩას და გულში ფიქრობდა: „ჩვენი ბრალია, უჩა, ჩვენ ვერ გაგიძეხით, ვერ დაგაყენეთ სწორ გზაზე. ახლა კი გვიანაა“.

— აწი მე სხვა ხელობას ველარ შევისწავლი, დედა, — გულსტიკივილით განაგრძობდა უჩა, — ასე ფუქსაეატურად უნდა გავატარო მთელი ჩემი ცხოვრება. უსარგებლოდ ჩემთვის, ჩემიანებისათვის, ჩემი ქვეყნისათვის. აი, ამიტომ ვერ ვუღებ გულს ვერაფერს და დროსტარებაში ვათენებ და ვალამებ. მამას არ ვუწონებდი ასეთ ცხოვრებას და თვითონ ვცხოვრობ ახლა ასე... ვუშვებ ბევრ შეცდომას და მაშინლა მივხვდები ხოლმე ჩემს დანაშაულს, როცა გვიანაა გონს მოგება.

უჩა გაჩუმდა. ერთხანს ყველა დუმდა. უხერხული სიჩუმე ისევე მან დაარღვია.

— აბა რამ მომიყვანა აქ, პირდაპირ პეტერბურგიდან, ისე, რომ შენ არ გამოგიარე, ჩემო საყვარელო დედა?! ჩემმა თავქარიანობამ, ჩემმა... ნუ, ნუ მაპატიებ დედა. ჩემს მეტმა არავინ იცის შენი კეთილი გულის ამბავი. ნუ მაპატიებ, მე მოხმარება მინდა და არა პატიება.

დედის გული მიხვდა, რომ უჩას აწუხებდა იმაზე მეტი, რასაც ლაპარაკობდა, გრძნობდა: იმაზე მეტი უბედურება იყო შვილის თავზე, რაც გრიგოლმა უთხრა და რისთვისაც თვითონაც ყური ჰქონდა მოკრული. იცოდა, უჩა არაფერს არ დაუმალავდა და გადაწყვიტა თვითონ არ შეკითხვოდა არაფერს.

გრიგოლის სალონი

გრიგოლის სახლი ქუთაისის ინტელიგენციის თავშესაყარი იყო. გრიგოლთან კვირაში ერთხელ იკრიბებოდნენ მწერლები, ვეჟილები, ექიმები, მასწავლებლები. ყველა ის, ვინც თავისი ქვეყნის მომავალზე ფიქრობდა, ვისაც თავისი ხალხის ბედი აწუხებდა.

აქ, გრიგოლის მშვენივრად მოწყობილ სასტუმრო ოთახში, მსჯელობდნენ საზოგადო საქმეებზე, ლიტერატურაზე, სოფლის

მეურნეობის განვითარებაზე, სკოლებზე, მედიცინაზე. მაგრამ ყველაზე ხშირად აქ იმართებოდა ლიტერატურული საღამოები. მწერლები კითხულობდნენ თავიანთ ახალ ნაწარმოებებს. იყო მათი გარჩევა, განხილვა.

გრიგოლის სალონში ხშირად ნახავდით აკაკი წერეთელს, კოწია ერისთავს, კირილე ლორთქიფანიძეს, დათა ნიჭარაძეს, იასონ გელოვანს და სიმონ წერეთელს. აქ დროს გასატარებლად კი არ იყრიდნენ თავს, საქვეყნო საქმეებზე მსჯელობდნენ.

მაიას პატივსაცემად მისი ჩამოსვლის შესამე დღეს თავის სალონში მამაკაცებთან ერთად მანდილოსნებიც მოიწვია გრიგოლმა.

თავიდან სტუმრები ორად გაიყვნენ. მამაკაცები გრიგოლის კაბინეტში შეიკრიბნენ, ქალები მაიასთან, სასტუმრო ოთახში.

იმ ხანებში ყველაზე საჭირობოროტო საკითხი ქუთაისში ბანკის არჩევნები იყო და დიდი და პატარა ყველა ამაზე ლაპარაკობდა. არჩევნების გარშემო დიდი ბრძოლა და კინკლაობა იყო გამართული. ამ საღამოსაც გრიგოლთან პირველად არჩევნებზე დაიწყო საუბარი, რომელიც მალე შეუპოვარ კამათად გადაიქცა. მაიას სანახავად მოსული აკაკი კამათში მონაწილეობას არ იღებდა. ის გრიგოლთან იჯდა და პუშკინის ლექსის თარგმანს უკითხავდა. გრიგოლი მშვენივრად ფლობდა ფრანგულს, ის თარგმნიდა ჰიუგოს ლექსებს, დეკამერონს, თარგმნილი ჰქონდა ღონ კიხოტის რამდენიმე თავი. აკაკი იცნობდა მის თარგმანებს, მოსწონდა და დიდ ანგარიშს უწევდა გრიგოლის აზრს. ამიტომ ამ საღამოს დიდად ნასიამოვნები იყო იმით, რომ გრიგოლმა მოუწონა პუშკინის ლექსების თარგმანები.

აკაკის გრიგოლი უყვარდა არა მარტო იმისათვის, რომ ის კარგ მთარგმნელად მიაჩნდა, მოსწონდა მისი ლექსებიც, მისი ადამიანობაც, ხასიათიც. დიდად უფრთხილდებოდა მის ჯანმრთელობას. გრიგოლს სიბერემ ისე მაგრა ჩასჭიდა ხელი, რომ ის ხშირად ავადმყოფობდა, მალე იღლებოდა. სტუმრებთან უნებურად ჩათვლემდა ხოლმე და როცა გამოერკვეოდა, შერცხობოდა.

ახლა აკაკიმ, როგორც კი შეატყო ღრმა სავარძელში მჯდარ

გრიგოლს, რომ ის თავს ძლივს ართმევდა რულს, სტუმრებს ანიშნა მეორე ოთახში გასულიყვნენ. როცა სტუმრები სასტუმროში გაიკრიფნენ, აკაკი ფეხაკრეფით გაჰყვა მათ და კარი მოხურა. გრიგოლს არაფერი გაუგია. მას უკვე ეძინა.

გრიგოლის სასტუმრო ოთახს არასოდეს არ ენახა იმდენი მშვენიერი ქალი, რამდენიც იმ საღამოს. მათ მათას გარშემო თავი მოეყარათ და დიდი პატივით ექცეოდნენ. მათ იჯდა შუაში. დედოფლურად ამაყი და მშვენიერი თავისი თეთრი თმით, ჰაეროვანი თავსაკრავით, რომელიც მოზდენილად ოდნავ ეხებოდა მის ფართო შუბლს და ყველას ხიბლავდა. მის გვერდით ისხდნენ ხანდაზმული დარბაისელი ქალები, ქართული კაბებითა და ჩიხტი-კოპით მორთულები, რომელთა ლეჩაქის სინახე-სინატიფე კიდევ უფრო ალამაზებდა იქაურობას. დანარჩენი ქალები, ახლგაზრდები, ევროპულად ჩაცმულ-დავარცხნილნი, მორიდებით შორიახლოს ისხდნენ და უფროსთა საუბარს ყურს უგდებდნენ. მაგრამ მათი გულისყური უნა დადიანისკენ იყო. ის ერთ ადგილზე ვერ ისვენებდა. იქ იყო ბაბილინა დადეშქელიანი და აბა უჩას რა მოასვენებდა. ის სხვების დასანახავად ხან ერთ, ხან მეორე ახლგაზრდა ქალთან გაჩნდებოდა, ან ფეხის ბალიშზე ჩაიმუხლებდა და რამე სასიამოვნოსა და გასართობს ჩასჩურჩულებდა. ყველგან სიხარული და სიცოცხლე შეჰქონდა; ცდილობდა ბაბილინასადმიც ასევე უღარდელი და ჩვეულებრივი ყოფილიყო, მაგრამ ვერ ახერხებდა. ამ ქალის ახლოს გაკარება მის მხიარულ სახეს სევდის ელფერს ჰფენდა. ყველასთან თამამი და ნებიერი, ბაბილინასთან სითამამეს ჰკარგავდა.

სასტუმრო ოთახში მამაკაცების შემოსვლამ ქალებს სიხარულის ნიავი მოჰბერა. ისინი გამხიარულდნენ, გამოცოცხლდნენ. აკაკი მოწინავე მანდილოსნებს გაერია. ის ყველასთან თამამი და შინაური იყო. მეტადრე ამ საზოგადოებაში, სადაც ყველა ქალი ახლობელი, ან შორეული ნათესავი იყო მისი.

ოთახში მოხუცი მსახური შემოვიდა და ყალბი, პათეტური კილოთი საკმაოდ ხმამაღლა განაცხადა:

- თავადი დავით მიქელაძე მობრძანდა!
- სთხოვეთ! — უპასუხა უჩამ.

ოთახში დინჯად შემოვიდა ახოვანი, შესანიშნავი თვალტა-

ნადი კაცი. უჩა მიეგება. აკაკის ესიამოვნა მისი მოსვლა, გაუ-
ლიმა, იმწუთსვე ახალგაზრდა ქალებს გადახედა, თავისი თვალის
სხივები დააფრქვია მათ და შემოსულს ასე უთხრა:

— სასიამოვნოა შენი მოსვლა, კოლხიდური სილამაზის
ღმერთის თანატოლო, მაგრამ ჩვენს თანამედროვე ახალგაზრდა
ქალებს სიყვარულის სამახსოვრო ჩიხტი-კოპი და ლეჩაქი აღარ
შერჩენიათ. ამ დარბაისელ ბანოვანებს კი, წლოვანებით შენზე
უხუცესთ, ალბათ ისევე კოლხიდულ ღმერთს აგონებს თავიანთი
ჩიხტი-კოპები. — უთხრა აკაკიმ დავითს.

იქ მყოფი ქალები, ვინც აკაკის ნათქვამის აზრს ვერ მიხვდა,
გაკვირვებული უცქეროდნენ. დავით მიქელაძეს მოაგონდა ლე-
გენდა, გაწითლდა, გაიცინა და აკაკის მორიდებულად მიმარ-
თა.

— ბატონო, მე რა იმ ღმერთის შესადარი ვარ. ის ყოველნი-
რად გრძნეული იყო, მე კი ერთი საწყალი კაცი, ვის რას შევ-
კადრებ.

— ბატონო აკაკი, მე რაღაც გამიგონია კოლხეთის ღმერთ-
ზე, მაგრამ კარგად არ მახსოვს, გთხოვთ გვიამბოთ, — სთხოვა
ურამ პოეტს.

— არ შემიძლია, ქალები მომკლავენ.

— არა, ბატონო, თქვენი ჭირიმე, რას პქვია, თქვენს საყვე-
ღურს ვინ გაბედავს, — გაისმა ქალების ხმა.

ახლა მაიაც დაინტერესდა და ახალგაზრდებს სიტყვა შეაწია.

— გთხოვთ, ბატონო აკაკი!

აკაკიმ მაიას ხათრი ვერ გაუტეხა.

— მოგახსენებთ ბატონო, — დავითს გადახედა და გაიცინა, —
ის ლეგენდარული სიყვარულის ღმერთი აქ გამოგეცხადათ
ამაღამ, — თქვა აკაკიმ ახალგაზრდა მანდილოსნების გასაგონად,
და თხრობა დაიწყო:

— ბატონებო, მოგეხსენებათ რომ ძველად ყოველ ხალხს
ჰყავდა თავისი ღმერთი: ომის, ნადირობის, სილამაზის, სიყვა-
რულისა და სხვა. კოლხიდაში იყო თურმე სილამაზის კაც-
ღმერთი, რომელიც შეუბრალებლად ხიბლავდა ქალებს. მთელი
კოლხიდის ქალები მან ერთმანეთს გადაჰკიდა. ეჭვიანობით ა-

თებულმა შეყვარებულმა ქალებმა წაიყვანეს ის უღრან ტყეში და დიდ ხეზე ჯაჭვით მიაბეს. დაბრუნდნენ გახარებულნი, ეჭვისაგან განთავისუფლებული. ვაჟი გულში იცინოდა, მოიცადა, ვიდრე ქალები სახსებით ტყეს მიეფარებოდნენ, შემდეგ ერთი ღონივრად შეიშმუშნა და ის შემოხვეული ჯაჭვი სულ ერთიანად დაწყვიტა. გაწყვეტილი ჯაჭვის რგოლები მიწაზე დაცვიგოდა. შინ მოსული ქალები ვერ ისვენებდნენ. მე ვერ გატყვიფ სიყვარული არ ასვენებდათ თუ ცნობისმოყვარეობა, ამას თქვენ უფრო კარგად მიხვდებით. ისინი ისევე ტყეში გაეშურნენ და ოი, საშინელებაჲ! კაც-ღმერთი იქ აღარ იყო, ხოლო ჯაჭვის რგოლები ხის ძირას ეყარა. გული დაწყდათ, სატრფო დაკარგულად იგულვეს, ჯაჭვის რგოლებით კი თავსაფრები დაიმაგრეს განვლილი ტრფიალების მოსაგონებლად. ეს ჩვეულება მას შემდეგ განმტკიცდა საქართველოში. ჩიხტაში ჩასადები კოპი არის მოგონება დამარცხებული დიდი სიყვარულისა, კდემამოსილების ლერაქით დაფარული.

— საფუქრებელია, რომ სიყვარულის ღმერთი ეჭვიასობას ვერ მოითმენდა, — მოკრძალებულად თქვა ბაბილინამ.

ურამ მას თვალი თვალში გაუყარა.

— მე კი მოგახსენებდით, ბატონებო, — თქვა ტელემაკ გურიელმა, — კოპის ემბლემა იმისი მაჩვენებელი უნდა იყოს, რომ ქართველი ქალის ლერაქის სიწმინდეს ამაგრებს და, თუ გულში უხეირო სიყვარულის ღმერთი თავს გაახსენებს, ამის მოგონებას ქალმა ლერაქი უნდა გადააფაროს, ბატონო ჩემო, რომ ყველაფერი, რაც გულში უდევს, სააშკარაოზე არ ჩანდეს.

ამ ლაპარაკის შემდეგ აკაკიმ გადაინაცვლა ადგილი, ვარინკა წერეთლის გვერდით მოიკალათა და ღიმილით განაცხადა:

— ბატონებო, მე ჩემი პატარა რძალი მიყვარს, როგორც მათესავი და როგორც მაისის ბულბული. თქვენო უგანათლებულესობავ, — მიუბრუნდა ურას, — რატომ არ გააგონებთ ბატონ დედა-თქვენს ჩემი რძლის ჭიკჭიკს?

ვარინკა გაწითლდა.

— რას ბრძანებთ, ბატონო აკაკი. აბა, მე რა ისეთი მომღერალი ვარ, რომ აქ სიმღერა გავბედო?

ვარინკას სიმღერის მოგონებაზე კირილე ლორთქიფანიძემ და იასონ გელოვანმაც აღიმაღლეს ხმები:

— უნდა იმღეროთ, უნდა დაგვატკბოთ!

სანამ ვარინკას სთხოვდნენ ემღერა, უჩამ თავისი ხელით შემოარბენინა გიტარა და ვარინკას კალთაში ჩაუდო.

მაიამ ღიმილით გადახედა ვარინკას და უთხრა:

— იმღერე, ჩემო ტურფა რძალო, მე რამდენი ხანია სიმღერა არ გამიგონია, მოწყურებული ვარ მოვისმინო, განსაკუთრებით კი თქვენი სიმღერა. ბევრი ქება მსმენია თქვენი და თქვენი სიმღერის, დაგვატკბეთ, მე ოდესღაც გატაცებით მიყვარდა სიმღერა.

— სულიკო, სულიკო, — გაისმა ხმები.

ვარინკამ ჯერ გაუბედავად წამოიწყო, ღელავდა ახალგაზრდა ქალი, ამდენ უფროსებსა და საპატიო სტუმრებთან სიმღერა ეხამუშებოდა, მაგრამ მალე თანდათან გათამამდა, მორცხვობისა და უხერხულობის გრძნობას სიმღერის სიყვარული და შესანიშნავი ვოკალური მონაცემები მოერია. ის თავისსავე შექმნილ მელოდიას „სულიკოს“ სავსებით დაუფლებოდა. როდესაც ვარინკამ ბუღბუღის მაგივრად ტიავტიავით დაიკენესა, ოთახი უჩვეულო სიჩუმემ მოიცვა. დაამთავრა ვარინკამ სიმღერა, მაგრამ იქ მყოფთა სუნთქვაც კი არ ისმოდა.

ეს სიჩუმე ისევ უჩამ დაარღვია, რასაც მოჰყვა ტაში. უჩა ვარინკას ხელზე ეამბორა მადლობის ნიშნად. შემდეგ დელასთან მივიდა, მოეხვია და მოახსენა:

— დედა ბატონო, განა ასეთ მელოდიას სადმე სხვაგან გაიგონებ? ამიტომ მიზიდავს სამშობლო, ჩემო დედა, ამიტომ მოგისწრაფვი ხოლმე აქეთ.

— შვილო ჩემო, ჩემი აზრით, სიყვარული იმაში კი არ გამოიხატება, რომ მხოლოდ სტკბებოდე სამშობლოში ყოფნით. სიყვარული ის იქნება, რომ დაიმსახურო, სამშობლო შენი ღვაწლით დატკბეს.

მაიას ქარაგმა აკაკის არ მოეწონა, მიხვდა პოეტი რასაც უსაყვედურებდა მაია შვილს და საუბარი სხვა საგანზე გადაიტანა.

ეს შენიშნა მაიამ, მიხვდა თავის უტაქტობას, ხოლო აკაკის

საქციელმა მოხიბლა დედის გული. მაია მთელი ღამე მალულად ადევნებდა თვალს უჩასა და ბაბილინა დადემშქელიანს და ცხადად ხედავდა, რომ როგორც თოფისწამალი და ცეცხლი ერთად არ შეინახება, ისე ამ ორი ადამიანის ერთად ყოფნა არ შეიძლება.

მაიამ ყოველგვარი ზომები მიიღო, რომ უჩა როგორმე პეტერბურგს გაესტუმრებინა და თავისი მეგობრებისა და ნათესავების დახმარებით კიდევაც მიაღწია ამას.

ორი კვირის შემდეგ უჩა პეტერბურგს გაემგზავრა, მაგრამ გული ქუთაისში დარჩა.

მაია კი ხიბულას დაუბრუნდა.

სიახლის ძალა

თანდათან ირღვეოდა ფეოდალური კარჩაკეტილობა.

გლეხი ხდებოდა ვაჭარი იმდენად, რამდენადაც მას ბატონისაგან დამოუკიდებლად შექმნილი ღირებულება უკვე ბაზარზე გაჰქონდა. ახლად ჩასახულ დაბებსა და ქალაქებში გაჩნდა მოთხოვნილება იმ საქონელზე, რომელსაც მათ გლეხი აწოდებდა სურსათ-სანოვაგეს, ხილს, შეშას, მატყლს, ბამბას, აბრეშუმსა და სხვას სწრაფად ასაღებდა გლეხი ბაზარზე და ღებულობდა ფულს. ეს მცირე ფულადი შემოსავალი, რა თქმა უნდა, ვერ აკმაყოფილებდა მისი ოჯახის მოთხოვნილებებს.

უმიწაწყლო გლეხს თანდათან უჩნდებოდა ქირით სამუშაოზე გასვლის საშუალება. ის სიხარულით ტოვებდა სოფელს, მიმშვილს, სიტიტვლეს და მიიჩქაროდა ქალაქისაკენ. ქალაქებში სწრაფად ვითარდებოდა სამრეწველო საქონლის წარმოება.

თბილისში აშენდა მრავალი ფაბრიკა-ქარხანა. ჭიათურაში მარგანეცის წარმოებამ ფართო ხასიათი მიიღო.

რკინიგზის გაყვანასთან დაკავშირებით გაიხსნა სახელოსნოები, ბათუმში — როტშვილდის და ნობელის ქარხნები. წარმოება მრავალ მუშახელს იზიდავდა. ეს მოვლენა გლეხთა ცხოვრებაში თავისებურ გარდატეხას ახდენდა. ფოთში ნიკო ნიკო-

ლაძე ნავსადგურს აშენებდა. აქ უკვე უცხოეთის მრავალი გემი მოდიოდა საქონლით დატვირთული. გლეხები მუშაობდნენ ნავსადგურის მშენებლობაზე, მტვირთავენად.

გელამ და ლერწამისამ ბევრი გაჭირვება გადაიტანეს. ჯერ იყო და, გადასახლებიდან მოსულ გელას ბიჭი წამოზრდილი რომ დახვდა, მოულოდნელად მოუკვდათ. მწუხარებამ ცოლ-ქმარი წელში გატეხა. მათ პატარა დუტუს სიკვდილი არ აკმარა ბუნებამ, ზედიზედ ეხოცებოდათ პაწიები. ქალს გული წაუხდა. მან იმედი დაკარგა, რომ ის ოდესმე დედა გახდებოდა.

ბოლოს ორმოც წელს მიღწეულ ლერწამისას ვაჟი გაუნდა. მან ამ ვაჟსაც დუტუ დაარქვა, რომ პირველი პირმშოს სახელი ოჯახში არ გაექრო. თვითონაც მოცოცხლდა, ოჯახიც გაზაღისდა.

გელა და ლერწამისა დუტუს სასოებით ზრდიდნენ, წერაკითხვაც დროულად შეასწავლეს.

ოთხმოცდაათიან წლებში საქართველოს სოფლებში აქა-იქ დაწყებითი სკოლები გაჩნდა, მაგრამ მეფის მოხელეები ყოველნაირად უშლიდნენ ხელს ქართული სკოლების გახსნას. მათ უნდოდათ, რომ ხალხს განათლება არ მიეღო, მონურ მდგომარეობაში ჰყოლოდათ უსწავლელი და გაუნათლებელი გლეხობა.

თუ სადმე ხსნიდნენ სკოლას, მეფის მოხელეები ცდილობდნენ, რომ იგი გაეხადათ ქართული ენის აღმოფხვრის საშუალებად. ხალხი ამას დიდ წინააღმდეგობას უწევდა. ზოგი ებრძოდა მეფის მოხელეთა ამ კოლონიზატორულ ხრიკებს, ზოგს კი სულ არ შეჰყავდა სკოლაში შვილი. ბავშვს შინ ასწავლიდა წიგნს.

დუტუმაც დედისაგან შეისწავლა წერა-კითხვა. შინ ისწავლეს წერა-კითხვა დუტუს მეზობელმა ბავშვებმა ლუკა კიტამ და ივა ქარცხიამ. ანბანის ცოდნამ და რამდენიმე წიგნის წაკითხვამ ბავშვებში სწავლის დიდი წყურვილი გააღვიძა, მაგრამ აბა სად უნდა ესწავლათ? მათთვის ყველა გზა დაკეტილი იყო სწავლისათვის.

— რა ვქნათ, დუტუ? — ჰკითხა ერთხელ ივა ქარცხიამ დუტუს, ამხანაგები ერთად რომ შეიკრიბნენ, — სკოლას ჩვენ არა-

ვინ გვაღირსებს, მოდი ზუგდიდში წავიდეთ და რაიმე ხელობა ვისწავლით.

— დუტუს ხელობა რად უნდა, სასახლეში მოსამსახურედ დადგება, — უთხრა ივას ლუკა კიტიამ.

— მოსამსახურედ რად დავდგები, — ეწყინა დუტუს, — უნდა ვისწავლო, თვალს არ მაკლია და ყურს, ჯანს არ ეუჩივი და ნიჭს. თავს მოვიკლავ და უსწავლელი არ დაერჩები.

— სწავლა ჩვენც გვინდა, მაგრამ ვინ მოგვართმევს, — მიუგო ნაღვლიანად ივამ დუტუს და მის აღზნებულ სახეს მოწონებით შეხედა.

— არავინ მოგვართმევს, ზონჩაზე არ დაგვიდებენ, თვითონ უნდა მივადწიოთ ჩვენი სურვილების განხორციელებას, — ჯიუტად თქვა დუტუმ.

ლუკა კიტია და ივა ქარცხია შემოდგომაზე ზუგდიდში წავიდნენ და იქ სხვადასხვა ხელოსანთან მოეწყვენენ შეგირდებად.

დუტუ სოფელში დარჩა იმ მოლოდინით, რომ ამ ზამთარში აქ ემეტადინა, ზოლო შემდეგ ქუთაისში წაიყვანდნენ გამოცდების ჩასაბარებლად. ის გულდაგულ მეცადინეობდა, ხანდახან სკოლის მასწავლებელთანაც დადიოდა, თან მიჰქონდა, ხაჭაპურები, ღოჭით ღვინო. მასწავლებელი თავს არ ზოგავდა; რაც იცოდა იმის გადაცემა არ შურდა დუტუსათვის. უბედურება ის იყო, რომ მასწავლებელს თვითონაც დიდი სწავლა-განათლება არ გააჩნდა.

დუტუს მეორე კლასში უნდა ჩაებარებინა გამოცდები თავისი წლოვანების მიხედვით. ყმაწვილს გამოცდებისათვის მოსამზადებლად კარგი პირობები არ ჰქონდა, მისაღები გამოცდები ქუთაისის კლასიკურ გიმნაზიაში მაინც კარგად ჩააბარა, მაგრამ სასწავლებლის კარები კი მისთვის დაკეტილი აღმოჩნდა.

სკოლაში დიდი კონკურსი იყო. ოთხმოცი ბავშვი აბარებდა მეორე კლასში გამოცდას. აქედან მხოლოდ ოთხი უნდა მიეღოთ. ამ ოთხ ადგილზე ორი დიდი მოხელისა და ორი მდიდარი თავადის შვილები მიიღეს. გაწბილებული და გულგატეხილი დუტუ ხიბულაში დაბრუნდა.

— ნუ დარდობ, შვილო, — უთხრა მას დაყვავებით მაიამ. ეს ქალი თავის შვილებს არ ეუფერებოდა და ღუტუს რომ ასე გულ-თბილად მოექცა, გაუხარდა ბავშვს, მაგრამ მაიას შემდეგმა სიტყვებმა წარბი შეუკრა. — დარჩი ჩემთან სასახლეში, ყოველნაირად შეგიწყობ ხელს, მოგეხმარები, ღედაშენი ჩემი გაზრდილია...

— მე სწავლა მინდა, — ჯიუტად წაილულულა ღუტუმ, — აქ არ გავჩერდები.

— შენი ნებაა, შვილო. რაც შემეძლო, მოგეხმარე. ორი კაცი გაგატანე ქუთაისში. ბევრს ეცადნენ, მაგრამ ვერაფერს გახდნენ.

— სამართალი რომ იყოს ქვეყანაზე, დაუხმარებლადაც უნდა მივედეთ. ყველაზე კარგად ჩავაბარე გამოცდა, მაგრამ, როგორც ჩანს, იქ მთავარია დიდკაცობა და არა ცოდნა.

— მერე შენ გინდა ქვეყანა გაასწორო? — ღიმილი ვერ შეიკავა მაიამ. მიჩერებით უყურებდა ბავშვის ჯიუტ შუბლს.

— მე ვერა, მაგრამ თუ ჩემისთანები ისწავლიან...

— ქვეყნის საქმეს მოაგვარებენ.

— ეს არ ვიცი, ოღონდ ერთი რამ ცხადია, მაშინ სკოლაში ცოდნის მიხედვით იქნება მიღება და არა დიდკაცობით.

— ბიჭო, ასე დალაგებულად უტუ მიქაეა და მართალია თოდუა არ ლაპარაკობდნენ! — გაიოცა მაიამ და იქვე მდგარ გელასა და ლერწამისას შეხედა. — ყოჩაღ, გელა, კარგი ბიჭი გაგიზრდია. ეს რომ თავის ნებაზე მიუშეა, თავადაზნაურებს და გლეხებს ერთნაირად გაკრეჭდა, — ასე კი თქვა მაიამ, მაგრამ გულში უკმაყოფილო იყო ღუტუს საქციელით.

— არა, ბატონო, თავადი და გლეხი ცხვარი კი არ არის, რომ ერთნაირად გაკრიჭოს. ყველას თავისი ადგილი აქვს ამ ცოდვილ მიწაზე, ბატონსაც და გლეხსაც. მთასა და ბარს რა გაასწორებს!

ღუტუმ გაკვირვებით შეხედა მამას, როდის დაიწყო ასეთი ლაპარაკიო. მიხვდა — მამას მაიას წყენინება არ უნდოდა. მაია გულკეთილი იყო, ოღონდ მასთან და მისი წრის ხალხთან გლეხის გატოლებას არავის არ აპატიებდა.

იმ დღის შემდეგ დუტუ სასახლეს არ ეკარებოდა. გვერდით რომ ჩაუვლიდა, უკმაყოფილოდ გადახედავდა მაიას სახლ-კარს. ბავშვი ნალვობდა, გულჩახვეული დადიოდა. არავისთან არ თამაშობდა. მამას ედგა მხარში და წელგაუმართავად მუშაობდა. თუ თავისუფალ დროს იპოვნიდა, წიგნს ჩაუჯდებოდა. ასჯერ ჰქონდა ერთი და იგივე წიგნი წაკითხული, რადგან მეტი წიგნი არ გააჩნდა.

ზაფხულის დამლევს ივა ქარცხია და ლუკა კიტია ჩამოვიდნენ ზუგდიდიდან. მათმა ჩამოსვლამ დუტუ დიდად გაახარა, ხშირად დადიოდა მათთან, ხან ჯარიანობის, ხან ბურთის სათამაშოდ. თოხნაშიც ეხმარებოდნენ ეს ვაჟები ერთმანეთს. საღამობით კი ისხდნენ დუტუს სახლის აივანზე და კითხულობდნენ გაზეთს, რომელიც გიგიშას ოჯახიდან მოჰქონდა დუტუს. ხშირად გიგიშაც შემოდებოდა თავის ძველ მეგობართან — გელასთან. გელას და ლერწამისას ძლიერ უყვარდათ გაზეთი. კითხვით გატაცებულებს, ბევრჯერ დაღამებაც მოუსწრებდათ, მაშინ ლერწამისა ლამპას მოუკიდებდა. ლამპა იმ დროს გლეხების ოჯახში იშვიათი იყო. ჭიშკართან გამვლელი გლეხები შურით გახედავდნენ გელას ოჯახს და ერთმანეთს ეტყობდნენ:

— გააკეთა მაია ბატონიშვილმა ეს ოჯახი, ლერწამისა ულამპოდ ვახშობას არ კადრულობს.

დუტუს და მის ამხანაგებს გელა და ლერწამისა თავს ევლებოდნენ, იქნებ აიყოლიონ დუტუ და წაიყვანონ ზუგდიდში, რომ ხელობა მაინც ისწავლოსო. გელა ბავშვებს უყვებოდა ზღაპრებს, თავისი ქვეყნის ამბებს, ომერ-ფაშასთან ბრძოლის სურათებს ცოცხლად უხატავდა, ჰყვებოდა უტუ მიქაევამ და მართალია თოდუამ როგორ ააჯანყა ხალხი და როგორ იბრძოდნენ უსამართლობის წინააღმდეგ. ამ ომსა და აჯანყებაში თავის წვლილის შესახებ გელა არაფერს ამბობდა. ციმბირში გამოვლილ შავ დღეებს კი ვერ მალავდა. როცა იქაური ყინვებისა და გაჭირვების ამბებს ჰყვებოდა, ბავშვებს ტანში ჟრუანტელი უფლიდათ.

— განა დიდ რამეს ვთხოულობდით? — გაუუქმებინათ ადამიანის საწვალეხელი იარაღები. მოვითხოვდით ჩვენი ქალები ხასებად არ ჰყოლოდათ, არ გაეყვინათ ჩვენი გოგო-ბიჭები თურქეთში და გინდ თვით საქართველოში. ძნელი მოსათმენი იყო,

დედას შვილს მკერდიდან გლეჯდნენ და უყიდიდნენ, ან, პირიქით, შვილებს დაატოლებინებდნენ და დედ-მამას ცხრა მთას იქით გადაკარგავდნენ, პატარებს კი ვიგინდარებს გააზრდევენებდნენ. ვინც ცოცხალი გადარჩებოდა, სხვის თვალში შექყურე იყო, ვინ ლუკმას მიუგდებდა, ვინ თავში უპარტყუნებდა. ათასში ერთს არ შეხვდებოდა ოდნავ შემბრაღე მებატონის ოჯახი. იზრდებოდნენ ასე ძალღურად.

ახალი ამბით დაინტერესებული ბიჭები შეკითხვებით იკლებდნენ გელას. ყველაზე მეტად ლუკა კიტია ეკითხებოდა.

— ბიძა, მე ასეთი ამბებისათვის ეგერ-აგერ მომიკრავს ყური, მაინც ვერ ვერკევი, გლეხები ხომ მეტი იყვნენ, ვიდრე თავდაზნაურები, რატომ ვერ გაიმარჯვეს გლეხებმა?

დუტუ გააკვირვა ამხანაგის გულუბრყვილო შეკითხვამ; ვერ მოითმინა, მამას არ დააცალა პასუხი და ლუკას თვითონ მიუგო:

— ბიჭო, არ იცი, რომ თავადებს რუსთა ხელმწიფე, გუბერნატორები და გენერლები ეხმარებოდნენ!

— ჰო, შვილებო, — განაგრძო გელამ, — ეხმარებოდნენ და როგორ! ხელმწიფეს დიდი ჯარი ჰყავდა, ბევრი იარაღი ჰქონდა, ჩვენ რას გავხდებოდით კაჟის თოფებით და უტუს გაჭვდილი სატყვერებით, ისიც ნახევარს არ გააჩნდა. ფიწლებით, წალღ-ნაჯახით და შინდის კეტებით ვიყავით უმრავლესობა შეიარაღებული.

— თუ გამარჯვების იმედი არა გქონდათ, რატომ აჯანყდით, მამა? — ნაღვლიანად ჰკითხა დუტუმ გელას.

— კაცი იმედით ცხოვრობს, შვილო. ჩვენისთანა გაჭირვებულებს მომავლის იმედი რომ არ ჰქონდეთ, თავს არ იცოცხლებდნენ. გვეგონა, უტუსა და მართალიას ურდუმით მთელ სამთავროს ავიღებდით და კანონ-წესებს ჩვენს ნებაზე შევეცვლიდით. ვინ იფიქრებდა, რომ ბატონების დასაცავად რუსთა ხელმწიფე ჯარს გამოგზავნიდა. მერე ციმბირში რომ გადამასახლეს, იქ გავიგე, თურმე ის წყეული რუსთა ხელმწიფე თავის გლეხებსაც არ ზოგავს თუ მებატონეების წინააღმდეგ ხელს გაანჭრევნ. ეჰ, რამდენი რუსი გლეხი იყო ჩემთან კატორღაში, ჩვენსავით უსამართლოდ დევნილი და აწიოკებული.

— თავის ხალხსაც ასახლებს რუსთა ხელმწიფე თავის მი-

წიდან? — ჰკითხა დაფიქრებულმა და გაკვირვებულმა ლუკა კიტიაძემ.

— ის არავის ინდობს, შვილო, თუ თავის ტახტს დაემუქრავინებ. გლახს კი არა, შვილსაც გაწირავს, — უთხრა გელამ კიტიას და ახლალა შენიშნა, რა ცნობისმოყვარეობით შემოსცქეროდნენ ბავშვები.

— მერე ამდენი ხალხი — ქართველები და რუსები იმ ქოფაკ მეფეს ტახტიდან ვერ გადმოაგდებენ? — ხმა ამოიღო იყა ქარცხიამაც.

— ჰე, შვილო, ხელმწიფის ტახტიდან გადმოგდება მარტო რუს და ქართველ გლახებს უნდათ განა! ციმბირში მარტო რუსი გლახები კი არა, ვინ არ შემხვედრია! — სომეხი, უკრაინელი, ოსი, ლეკი... ყველა ისინი მეფის წინააღმდეგ არიან ამხედრებული, მაგრამ უბედურება იმაშია, რომ ცალ-ცალკე ებრძვიან მეფეს და ადვილად მარცხდებიან. აი, ჩვენ ომერ-ფაშას რაიმე ვებრძოდით, მარტო მეგრელები აბა რას გავაწყობდით ისეთ ძლიერ მტერთან! მაგრამ მხარში ამოგვიდგა გურია, იმერეთი, იქ ყარსში რუსებმა დასცხეს და საერთო ძალით კუდით ქვა ვასროლინეთ ჩვენი ქვეყნის დამპყრობელს. აი ასეთი ერთი პირი რომ ჰქონდეთ ხელმწიფის მოძულე ხალხებს, მაშინ ერთ დღეში დაინგრეოდა მისი ტახტი.

— მერე, არ უნდა შეკრან ერთი პირი? — ისევ ჰკითხა დუტუმ მამას, თითქოს მას მიუძღოდა ბრალი, რომ აქამდე ასე არ იყო.

— შეკრავენ, შვილო, მაგრამ ამას მოთავეები უნდა. ხალხის ერთმანეთთან დაახლოებაა საჭირო. და აი სწორედ ასეთი მოთავე, სადაც კი გაჩნდება, მეფის მოხელეები დაგეშილი ძალებივით მაშინვე აიღებენ სუნს და დაიჭერენ. რამდენი ასეთი მოთავე მინახავს ციმბირში... რამდენის საფლავი გათხრილა იქ! ჰე, ნეტა თქვენ მაინც გაუთხაროთ, ჩემო პატარებო, ხელმწიფეს საფლავი.

— გაუუთხრით, ბიძია, სულ სისხლად ამოვადენტ ხალხის ტანჯვას. მისი საფლავის გვერდით მაიასა და სხვა ჩვენი ამწიოკებელი მებატონეების საფლავებსაც გავთხრით! — თქვა თვალღების ბრიალით ლუკა კიტიაძემ.

— სუ, წიე, არ თქვა მაიაზე მაგი! — გაუწყრა ბიჭს გელა, — მაია სხვა მებატონებთან არ არის მისათვლელი. მას ბევრი სიკეთე გაუკეთებია ჩვენისთანა გაჭირვებულებისათვის.

— მერე ტყუილად გაუკეთა სიკეთე, ბაბა? — ჰკითხა მამას ღუტუმ, — რამდენი აქეთ გაუკეთებია, ასი იმდენი იქით წაუღია. ცხრა პირი ტყავი აუძვრია ჩვენს ზურგზე.

— ვინ გითხრა, შვილო! მაგ რომ მაიამ გაგვიგოს, მერე რა პირით შევხედოთ. მაია მაინც ღვთისსიერი ქალია. ღელაშენი მისი გამოზრდილია.

— მოინალეთ ჰყავდა ღელაჩემი.

— აბა, ქალბატონად ხომ არ ეყოლებოდა, ბიჭო, დადიანის ქალს. — გაიცინა გელამ და შვილის წამონთებულ სახეს სიკვარულით შეხედა. — არა, შვილო, თავადები ახლა ისე ვედარ გვექცევიან, როგორც ძველად. გლეხების აჯანყებას არც აქ ჩაუვლია უქმად და არც რუსეთში. ეს აჯანყება რომ არ ყოფილიყო, ბატონყმობა ახლაც არ იქნებოდა გადავარდნილი. ჩვენ თუ უტუ მიქავა და მართალია თოდუა გვყავდა, რუსებს პუგაჩოვი ჰყავდათ, სხვა ხალხს კიდევ სხვა პუგაჩოვი და მიქავა ეყოლებოდათ. სად ახლანდელი გლეხი და სად ბატონყმობის დროინდელი! მაშინ ბატონს ხეზე რომ ჩამოეკიდევ, სხვისთვის რომ მიეყიდევ, ვისთან უჩივლებდი, ვინ იყო შენი პატრონი! ახლა რუსის სამართალთან უჩივლებ.

— უჩივლებ და მერე რას მიიღებ, ბიძია! — უთხრა გელას ივა ქარცხიამ. — რუსის სამართალი თავადებისა და მემამულეების მხარეზეა, ძალლი ძალლის ტყავს არ დახევს.

— შვილებო, თქვენ რავა ნასწავლი კაცებივით ლაპარაკობთ, ასე დალაგებით ცხონებული უტუ და მართალია არ ქადაგებდნენ, — გაიკვირვა გელამ და ბავშვებს აღტაცებით შეხედა. — თქვენი ხნისა რომ ვიყავი, ორ სიტყვას ვერ გადავაბამდი ერთმანეთს, ბატონის ძვირს როგორ ვიტყვოდი. თქვენ კი ისე დაგიღესიათ ენა, თავადს კი არა, ხელმწიფეს არ ეპუებით. მოერიდეთ, შვილებო, ასეთ ლაპარაკს, თორემ თქვენც ჩემსავით ციმბირს უკან დაგატოვებინებენ! ვაი, ნეტა ახლა მეც თქვენი ხნისა ვიყო, იქნებ მეც მენახა ერთი კარგი ღლე.

— თუ ასე გულხელდაკრეფილი ვიქნებით, ვერც ჩვენ ვნახავთ კარგ ღლეს, — თქვა ღუტუმ.

„რავა მამასავით მოუთმენელია ჩემი ბიჭი“, — გაიფიქრა იქვე შორიასლო მჯდომმა ლერწამისამ. იგი თავიდანვე უსმენდა ქირისა და ბავშვების საუბარს. — ღუტუც მამის გზას ადგია, ენაცვალოს დედა. როგორაა სწავლაზე მოწყურებული. მაგან წიგნი რიგიანად რომ ისწავლოს, ბევრ თავადსა და აზნაურს უკან მოიტოვებს.

— ვინ თქვა, ღუტუ, ხალხი გულხელდაკრეფილი ზისო, — მიუბრუნდა ლუკა კიტიას მეგობარს. — აი ჩვენ ზუგდიდში გაზეთებს ვკითხულობდით. იქ ისეთ ამბებს ამოიკითხავ, რომ არც კი დაიჯერებ.

— ჰო, მეც ყური მოვკარი რალაც-რალაცებს, — კიდევ უფრო წახლისდა გელა. მოხუცის სახე ახალგაზრდული აღვზებით იყო განათებული. — თურმე გლეხი სოფლიდან ქალაქში რომ მიდის და სამუშაოზე ეწყობა ქარხნებში, იმასაც ისე ჩაგრავენ და ცხრაპირ ტყავს აძრობენ ქარხნის მეპატრონეები, როგორც სოფელში მემამულეები. ჰოდა, ქარხანაში მომუშავე გლეხი ან, როგორც ახლა ამბობენ, მუშა და მიწაზე მომუშავე გლეხი ორივე ერთ ცეცხლში იწვის. აწი რომ აჯანყება მოხდებო, ჩვენს გლეხს ქალაქის მუშა წამოეშველებო.

— მაშინ, ვინ იცის, ასე ადვილი არ იქნეს მათი დამარცხება, — იმედინად თქვა ღუტუმ.

— მაშინ კი მართლა გაუთხრიან ხელმწიფეს სამარეს, — დაუმატა ლუკა კიტიამ.

— მოდი, ბაბა, ჩვენ ქალაქში წავალთ, რაიმე ხელობას ვისწავლით, — თქვა უცებ ღუტუმ.

— ჩვენ რომ ზუგდიდში ვსწავლობთ, ის რა ხელობაა! — გულნატკენად წამოიწყო ივამ. — წაღების კერა რისი მაქნისია. მამაჩემი რომ ღორის ტყავის ჩაფულას შეკერავს, იმის შეხედვას არაფერი ჯობია, მე ჭიპზეც რომ გავსკდე, იმაზე უკეთესს მაინც ვერ ვისწავლი. სხვა ხელობა მინდა. აი თურმე ფოთში ვიღაც ნიკოლაძე მოსულა და ზღვას გალავანი უნდა შემოარტყას, რომ გემებს შიგ ქალაქში შეეძლოთ შემოსვლაო. როგორც ამბობენ, იქ აურაცხელი ხელოსნები სჭირდებათ, ხელობასაც იქვე სწავლობენ. მერე როგორ ხელობას, გალავანს ავლებენ უჩა ზღვას*.

* უჩა ზღვა — შავი ზღვა.

— ჩვენ იქ მიგვიღებენ? — დაინტერესდა დუტუ.

აკი ვამბობ, აურაცხელი მუშა სჭირდება-თქო. — უბასუხა ივამ.

— წავიდეთ, დუტუ, — წამოიძახა ლუკამ. — ხომ გაუშეებ, ბიძია გელა, დუტუს?

— კი გავუშვებ, — თქვა ცოტა ხნის დუმილის შემდეგ გელამ, — მაგრამ დუტუს რომ წიგნის სწავლა უნდა?

— წავალ, მამა, რაც უნდა იყოს, მაინც ქალაქია. ხალხი ზღვას გალავანს ავლებს, წიგნზე უფრო საარაკო ამბავი არ არის?

— წადი, შვილო, ოღონდ ის ისწავლე, რაც შენს გულს გაუხარდება და მე რაუა დაგაკაეებ...

ბავშვები ფოთში წასვლის გადაწყვეტილებამ კიდევ უფრო დაამეგობრა ერთმანეთს. ისინი თითქმის მთელი დღე ერთად იყვნენ. კითხულობდნენ რასაც კი იშოვნინდნენ. მათ ხელადა, როგორ სწყუროდათ ბავშვებს სწავლა და თავის წიგნებს არ იშურებდა მათთვის. მან ათხოვა ილია ჭავჭავაძის „გლახის ნაამბობი“, დანიელ ჭონქაძის „სურამის ციხე“. არსენას ლექსი ხომ ზეპირად იცოდნენ. წაკითხულს ერთმანეთს უყვებოდნენ. დავობდნენ, კამათობდნენ, ხშირად საქმე ჩხუბამდე მიდიოდა. ყველაზე მეტად არსენას სახე ხიბლავდათ. მას უტუ მიქაეას ადარებდნენ. ქორთუ უტუს ეძახდნენ. ერთხელ კენჭი ყარეს. დუტუს არსენობა შეხვდა, ივას — კაკობა და ლუკას — ზაქროობა.

მიიწურა გაზაფხული. დადგა მეგობრების ფოთში გამგზავრების დღე. მათამ წინასწარ იცოდა მათი სურვილის ამბავი. სამივესთვის საჩუქარი ჰქონდა გამზადებული, თითო ხელი შარვალ-ხალათი, ერთი ხელი ლოგინი და ცოტაოდენი ფული.

დუტუს, ლუკას და ივას ვაოცებას საზღვარი არ ჰქონდა, როცა გამგზავრების წინადღით ისინი მათამ დაიბარა და საჩუქრები გადასცა. დაარიგა, გზა დაულოცა, წარმატება უსურვა. გიგიშა გააყოლა და ვიღაც გავლენიან კაცთან წერილი გაატანა, რომ ბავშვები სამუშაოზე მოეწყო.

„მართალი იყო მამა, — ფიქრობდა დარცხენით დუტუ, —

მართლა ყველა თავადი და ბატონი ერთნაირი რაგვაა, სად ჯოლო-რია დგებია და სად მაიას მამა — გიორგი დადია. გიორგის მზეს დღესაც ფიცულობს ხალხი, ისეთი ღვთისნიერი კაცი ყოფილა. ტყუილა ვემღუროდი მაიას, დედა არ უზამს შეილს, რაც იმან ჩვენ ახლა გაგვიკეთა“.

ფოთში მაშინ დიდი ამბები ხდებოდა. ამიერკავკასიის რკინიგზის კვანძი იქ მთავრდებოდა, ხოლო რუსეთისა და საზღვარგარეთული გემები ზედიზედ აწყდებოდნენ ფოთის ნავსადგურს, რადგან საქართველოს ბუნებრივ სიმდიდრეთა გატანა მათთვის მოსაგები საქმე იყო. სანამ ნავსადგური ღია იყო, გემებს ნაპირთან მიდგომა უძნელდებოდათ. საქართველოს თავკაცების ცდით, განსაკუთრებით კი მოწინავე ქართველის — ნიკო ნიკოლაძის შრომითა და ღვაწლით დიდი მუშაობა გაჩაღდა ფოთის სანაპიროზე, რომ ქალაქს ხელოვნური ნავსადგური ჰქონოდა. ნავსადგურის მშენებლობამ მრავალი მუშახელი მოითხოვა.

ფოთი მუშებით აივსო. ხალხით სავსე ქალაქი დღითი დღე იზრდებოდა. გაიხსნა მაღაზიები, ღუქნები, სასადილოები. დასავლეთ საქართველოს სხვა ქალაქებთან შედარებით, ყველაზე მეტად ფოთში იდგამდა ფეხს კაპიტალიზმი მისი დადებითი და უარყოფითი მხარეებით.

მეგობრები ძლიერ განაცვიფრა ფოთმა და შავმა ზღვამ. ან როგორც ისინი უწოდებდნენ, უჩა ზღვამ. გიგიშას მიტანილმა წერილმა გაჭრა. იმ გავლენიანმა კაცმა დუტუ, ლუკა და ივა ნავსადგურის მშენებლობაზე მოაწყო. ისინი ერთ ცნობილ ქვისმთლელს დაუყენა შეგირდებათ. ბიჭებს ბინაც მიუჩინეს და გასამრჯელოც დაუნიშნეს. მათ სიხარულს საზღვარი არა ჰქონდა. მათი ოსტატი, ესტატე ნაჭყებია მწიგნობარი და საკმაოდ გონებაგახსნილი კაცი აღმოჩნდა. იგი წარმოშობით აზნაური იყო სოფელ ზეთიდან. უსაქმო აზნაურებს არ ჰგავდა. დიდი შრომისმოყვარე და თავისი საქმის შესანიშნავი მცოდნე იყო. ქვას აცოცხლებს და სულდგმულის სახეს აძლევსო, ამბობდნენ ესტატეზე. ხურობებში, კალატოზებში, უბრალო მუშეებსა და გლეხებში პატივისცემას იმსახურებდა. იგი დიდსა და პატარას უყვარდა მშენებლობაზე.

ჩვენი სამი მეგობარი ისე მიიღო, როგორც შვილები. როცა

გაიგო, რომ ისინი წიგნის მოყვარულები იყვნენ, თვითონ და-
უწყო მათ წიგნებისა და გაზეთების კითხვა; აცნობდა ქალაქს,
აჰყავდა უცხოეთის ხომალდებზე. რუსულაც კი ასწავლი-
და.

მეგობრებს სოფელთან შედარებით ოდნავ გაუუმჯობესდათ
პირობები. მუშაობდნენ გულმოდგინედ, სწრაფად ითვისებდნენ
რასაც ოსტატი ასწავლიდა და კარგ ნიჭსაც იჩენდნენ. თავისუ-
ფალ დროს წიგნებს კითხულობდნენ, ხან ესტატე უყვებოდა სა-
ინტერესო ამბებს. ბიჭების ყველაზე საყვარელი გასართობი
უცხოეთის ხომალდების დათვალიერება და მეზღვაურების ნახ-
ვა იყო. აკვირებდათ მეზღვაურთა ჩაცმულობა, საქციელი. ხე-
დავდნენ როგორ სასტიკად ექცეოდნენ მათ ხომალდის პატრო-
ნები, მაგრამ ისინი მაინც მხიარულობდნენ, ცხვირჩამოშებულს
ვერ ნახავდი ვერც ერთ მათგანს. შაკანინების ნახვამ ხომ
მთლად განაცვიფრა სოფლელი ბიჭუნები, განსაკუთრებით დე-
ტუ. მას ზღაპრებში კი გაეგონა შაკანინების არსებობა, მაკ-
რამ ის ხომ ზღაპარში იყო და ახლა, ცხადად რომ ხედავდა, არ
სჯეროდა.

გადიოდა წლები... დეტუ, ლუკა და ივა მოწიფული ვაჟაკე-
ბი გახდნენ. ნაესადგურის მშენებლობა დასასრულს უახლოე-
დებოდა. მათ ერთ დროს რომ აოცებდათ გაგონილი ამბავი — შაკ
ზღვას გალაგანს ავლებენო და ხომალდები ქალაქში უნდა შე-
მოიყვანონო, ახლა თვითონ იყვნენ ამ გალაგანის მშენებლები და
ამით ამაყობდნენ. ისინი უკვე ხელოსნები იყვნენ, თვითონ ჰყავ-
დათ შეგირდები. ხანდახან იმდენ ფულს შოულობდნენ, რომ
მშობლებსაც უგზავნიდნენ. წელიწადში ორჯერ ჩააკითხავდნენ
კიდევ და საჩუქრებიც ჩაჰქონდათ.

საჩუქრები მიჰქონდათ მაიასთვისაც. ჩავიდოდნენ თუ არა
შინ, იმ დღესვე მივიდოდნენ სასახლეში და მაიას ინახულებდ-
ნენ. მის ამავს არ იეიწყებდნენ. მაია რომ არა, ჩვენ დღეს არც
ეს ხელობა გვეცოდინებოდა და არც ამდენი გვექნებოდა ნანახი
და გაგონილი, იტყოდნენ ხოლმე.

დეტუ თანდათან მშვენდებოდა. ტანად ასხლეტილი და მოქ-
ნილი, მხარბეჭვანიერი, წელში წვრილი, იგი ქალიშვილებს
თვალს სტაცებდა, გულს უტყვევებდა. სოფელში მისი ჩამოსე-

ლა ელვასავით მოედებოდა კარიდან კარს და გოგოებს მოსვენება ეკარგებოდათ, ძილი უტყდებოდათ.

მაიამ იფიქრა, ეს ბიჭი ქალაქში ვინმე ურიგო ქალს არ გადაეყაროს, მოდი, ცოლს შევერთავო. ერთხელ დუტუს ჩამოსვლის მეორე დღეს გელა და ლერწამისა დაიბარა.

— ქალი უნდა შერთოთ დუტუს, — უთხრა მშობლებს, — თქვენ მოხუცდით, ცალი ფეხი სამარეში გიდგათ, პატრონი და ჭირისუფალი გჭირდებათ. ხომ ხედავთ, რამდენ ქალს უჭირავეს დუტუსზე თვალი. რას უყურებთ, დაწერეთ ჯვარი.

გელას და ლერწამისას მოეწონათ მაიას რჩევა, დალოცეს, მადლობა გადაუხადეს და გახარებულები დაბრუნდნენ შინ. იმ წამსვე დუტუს გაუზიარეს მაიას ნათქვამი.

დუტუს, თითქოს ამას უცდიდაო, თვალწინ დაუდგა ერთი სიყრმის მეგობარი ქალიშვილი. ეს იყო თავისი მეზობლის ბეგლარ კვარაცხელიას ქალიშვილი ირინა. იგი დუტუსზე ხუთი წლით უმცროსი იყო. დუტუს ის ჯერ კიდევ ცამეტი წლისა ჩაუვარდა გულში და რაც დრო გადიოდა, უფრო და უფრო ეკიდებოდა სიყვარულის აღი.

დუტუმ ის ღამე მოუსვენრად გაათენა. მეორე დღეს სახლიდან იმ განზრახვით გავიდა, რომ საღამე შეხვედროდა ირინას, მაგრამ ვერც იმ დღეს და ვერც მეორე დღეს ვერსად შეასწრო თვალი. გადაწყვიტა, მოვიმიზეზებ რაიმე საქმეს და შინ მივალო.

დუტუმ ირინას ეზოს უკნიდან შემოუარა, იმ ოლაგეზე გადახტა, რომელზეც ბავშვობისას არა ერთხელ გადამხტარა. რამდენჯერ დაწევია ირინას ამ ოლაგეზე, სწვდენია თმაში ან კაბის კალთაში და დაუჭერია. ოლაგე ვიწრო და მაღალი იყო, თან ურდული ჰქონდა ზედ გადებული, რომ თხები არ გადამხტარიყვნენ ეზოში. დუტუ ერთს რომ ისკუპებდა ხოლმე, შველივით გადაახტებოდა კაცის სიმაღლეზე გადებულ ურდულზე. ახლა კი ირინასთან გულაჩქროლებით მიმავალმა, ურდულს კი არა, ოლაგეს ძლივს გადააბიჯა, და იქვე შედგა ფერწასული.

ხელმარჯვნივ, ბოსტანში, ირინას მოკრა თვალი. ირინას მოკლე კაბა ეცვა, ხორბლისფერდაკრული მაღალი წვივები და

გრძელი, სავსე მკლავები მზეში უბრწყინავდა, კვალში ჩამუხ-
ლული ხახვს მარგლავდა.

ერთხანს სუნთქვაშეკრული უყურებდა ღუტუ. ქალიშვილს
დაფიქრებული, ოცნებით გაღიმებული სახე ჰქონდა. „რაზე
ფიქრობს ნეტა!“ — გაიფიქრა ღუტუმ და ინატრა, მისი ფიქრის
და ოცნების საგანი თვითონ ყოფილიყო.

— ირინა! — დაუძახა უცებ ჩუმი ხმით, თითქოს პაემანზე
დათქმულ ადგილას შეხვედროდნენ ერთმანეთს.

— ღუტუ, შენ აქ საიდან! — გაიოცა ირინამ, — სიზმარში ვი-
ყავი თითქოს, როგორ ამეცხადე?!

— ვის ხედავდი სიზმარში, ირინა? — ჰკითხა ღუტუმ და კი-
ნალამ გადახტა ღობეზე, მაგრამ დროზე შეიკავა თავი.

ქალმა თავი დახარა. ღუტუ მიხვდა რას ნიშნავდა ეს და მას
ახლა წკნელის ღობე კი არა, ქვეითკირის ორსაყენიანი გალავა-
ნი ვერ შეაკავებდა. ვერ გაიგო როგორ გადაეგლო ღობეს, მხო-
ლოდ მაშინ გამოერკვა, როცა ქალის წინ აღმოჩნდა და მისმა
თვალებმა თრთოლვითა და შიშით სახეში შეანათა.

ასე იდგნენ ერთხანს პირისპირ. ესმოდათ ერთმანეთის გუ-
ლის ცემა, მათ შორის ახლა ყოველგვარი სიტყვა უადგილო
იყო. მერე ქალი წინ წავიდა, ვაჟი უკან გაჰყვა. ქალი ფეხშიშ-
ველი იყო, მოკლე კაბაში იგი, ახლაც იმ ცამეტი წლის გოგოდ
ეჩვენებოდა ღუტუს. მაგრამ ამ ცამეტი წლის გოგოს ისეთი
აშოლტილი ტანი ჰქონდა, ისეთი მომრგვალებული მხრები და
მოქნილი წელი, რომლის მსგავსი მას არაფერი ენახა.

თხილნარში რომ შევიდნენ, ირინა მობრუნდა. აქ მან უფ-
რო თამამად შეხედა ვაჟს და გაუღიმა. ღუტუს მოეჩვენა, რომ
ირინამ არა მარტო გაუღიმა, ხელებიც გაუწოდა, ამიტომ თვი-
თონაც მკლავი გაშალა, მოეხვია და გულზე მიიკრა...

შემოდგომის ჭირნახულის დაბინაების შემდეგ, როდესაც
ქვევრებში მაჭარი დულდა, მოხუცმა გელამ და ლერწამისამ
ვაჟს ქორწილი გადაუხადეს. ყველას ერთგული გიგიმა მხურ-
ვალე მონაწილეობას იღებდა ქორწილში.

რამდენიმე თვის შემდეგ ღუტუმ ისევ ფოთში დააპირა წასვ-
ლა. დედ-მამა ახალშერთული ცოლის დატოვებას არ უწონებდ-
ნენ შვილს. ღუტუსაც ეძნელებოდა ცოლის მიტოვება, მაგრამ

ფოთში ლუკა და ივა ელოდნენ, მეგობრებს ვერ უღალატებდა.

ფოთში ჩასულმა პორტში დაიწყო მუშაობა. ერთხელ დუტუსთან ერთად მომუშავე ამხანაგებმა ლაპარაკი ბათუმზე ჩამოაგდეს. დუტუ მათ საუბარს გულმოდგინედ უსმენდა.

— დიდი ამბები ხდება თურმე ბათუმში, ბიჭებო! იქ წასვლის სურვილი არ მასვენებს. — თქვა ერთმა ახალგაზრდა მტვირთავმა.

— კაცმა რომ თქვას, მარგალიტები არც იქ ყრია, მაგრამ ამდენი ქარხნები რომ გაიხსნა, ბევრი მუშა დაგროვილა, ცხოვრება უფრო საინტერესო გამხდარა, — უპასუხა მას ხანში შესულმა მუშამ.

დასვენების დრო იყო, მოსაუბრეთ მუშები კიდეც შემოემართათ, ყველა თავის აზრს გამოთქვამდა.

— მუშის ცხოვრება საინტერესო მაშინ იქნება, როდესაც მას ადამიანად მიიჩნევენ. გაზეთებში წერდნენ: ბაქოს რკინიგზის კვანძი ბათუმს შეუერთდაო. კარგია, რა თქმა უნდა, მგზავრობა უფრო ადვილი გახდა, ჭრაქში ჩასასხამი ნავთი მაინც გაჩნდება, მაგრამ ეს რას შევლის ჩვენს გაჭირვებას? — თქვა ლუკამ.

— აბა შენ რა გეგონა? — უპასუხა დაცინვით პირველმა მტვირთავმა. მატარებელი გვიშველიდა თუ ბათუმში გახსნილი მანთაშევისა და როტშილდის ქარხნები? გაზეთში წერენ: ბათუმში ათი ათასი მუშა მუშაობს, გაკვეთდითო, ხოლო იმაზე არავინ წერს თუ როგორ ცხოვრობენ მუშები.

— როგორ ცხოვრობენ და ისე, როგორც ნობელს და მანთაშევს მოუხდებათ, ნახევრად მშიერი. ფულზე დანატრებულ გლეხებს მუქთად ქირაობენ, მუშების გაკეთებული საქმით თვითონ მდიდრდებიან. — ჩაერია ლაპარაკში ივა ქარცხია.

— ეპ, გლეხის და მუშის ბედი ასეთი ყოფილა. ჩვენ უნდა ვიმუშაოთ, ძაღლურად ვიცხოვროთ, ხოლო მემამულეები და ქარხნების მებატრონეები უნდა გამდიდრდნენ, ფუფუნებაში ნებივრობდნენ. — არა ცხრებოდა პირველი მტვირთავი.

დუტუ ჯგერენაია ყოველივე ამას ყურს უგდებდა, აკვირვებდა ამდენი ამბები ლუკამ და ივამ საიდან იცინაო. ნუთუ ამდენი

რამ შეიცვალა ჩემს აქ არყოფნაში, რომ ბიჭები ასე გამოცდილი მუშებივით ლაპარაკობენო. თვითონ საუბარში მონაწილეობა არ მიუღია, რადგან გრძნობდა, გარკვეული აზრი არ ჰქონდა იმაზე, თუ როგორ შეიძლებოდა გლეხებსა და მუშებს თავიანთი ცხოვრება გაეუმჯობესებინათ. ჩუმად იჯდა, გულში კი გადაწყვიტა ბათუმში წასულიყო: ერთ-ერთ ქარხანაში მეც მიმიღებენ, თუ იქ ათი ათასი კაცი მუშაობს, სამუშაოს მეც ვიშოვნო, ახალ ხალხს გავიცნობ, ახალ ცხოვრებას გავეცნობი. უფრო განვეითარდებიო.

ბათუმში წასვლას აპირებდნენ ესტატე ნაჭყებია, ივა ქარცხია და ლუკა კიტიაც. ისინი ფოთში ახლა მტვირთავებად მუშაობდნენ. ქვის ოსტატებს მტვირთაობა არ აკმაყოფილებდათ. ბათუმში ახალი ქარხნები, ფაბრიკები და სახლები შენდებოდა. იქ ადვილად იშოვნდნენ თავიანთი ხელობის შესაფერად გილს:

დუტუმ მოუწონა თავის ოსტატს და ამხანაგებს განზრახვა. ერთ მშვენიერ დღეს ჩასხდნენ გემში და ბათუმისკენ გაემგზავრნენ.

ბათუმში მათი ჩასვლა იმ დროს დაემთხვა, როდესაც პოლიციამ პირველი სოციალ-დემოკრატიული წრის წევრები დააპატიმრა. ამ პატარა წრეს რუსი სოციალ-დემოკრატები ხელმძღვანელობდნენ. თბილისის კომიტეტმა 1902 წელს ერთი თავისი აქტიური წევრთაგანი იქ მიაგვლინა არალეგალური სოციალ-დემოკრატიული ორგანიზაციის ჩამოსაყალიბებლად.

ესტატე, დუტუ, ლუკა და ივა მანთაშევის ქარხანაში მოეწყვნენ. ესტატეს აქ რამდენიმე ნაცნობი მუშა აღმოაჩნდა. ისინი ესტატეს გამოზრდილები იყვნენ და მისი მოსვლა ძალიან გაუხარდათ. ასევე ესიამოვნათ ოსტატის ახალი შეგირდების გაცნობაც. მალე დაიახლოვეს ისინი, დაჰყავდათ შინ. ამ მუშებში იყვნენ წერა-კითხვის მცოდნენი, წიგნის მოყვარულნი, რევოლუციურად განწყობილნი. სულ მალე დუტუ მათ დაუახლოვდა.

დუტუ ხშირად ჩადიოდა სოფელში. ვერ ისვენებდა უცოლოდ. ენანებოდა ახალგაზრდა ქალის მიტოვება თვეობით, იცოდა როგორც თვითონ განიცდიდა მარტოობას, ისევე წუხდა და

დარდობდა ირინაც მასზე. ირინას ბიჭი შეეძინა. ბავშვს სახელად კაკო დაარქვეს. სამ თვეში ერთხელ მაინც ჩააკითხავდა ხოლმე დედა-შვილს დუტუ.

მისი ჩამოსვლა სოფლის ახალგაზრდობისათვის ნამდვილი დღესასწაული იყო. ბევრი ახალი და საინტერესო ამბები ჩამოპქონდა ქალაქიდან დუტუს. არა მარტო ახალგაზრდები, ხშირად მოხუცები, თვით მაიაც დიდის ამბით ელოდა დუტუს ჩამოსვლას. ისიც გატაცებით ისმენდა დუტუს ნაამბობს მუშათა გაფიცვებზე ბათუმსა და თბილისში.

თბილისის საორთქლმავლო დეპოსა და რკინიგზის სახელოსნოს მუშებმა სოციალ-დემოკრატიული ორგანიზაციის ხელმძღვანელობით დიდი გაფიცვა მოაწყვეს 1901 წელს. ამ სამაისო დემონსტრაციის შემდეგ ბათუმის მოწინავე მუშებმა, მათ შორის დუტუ ჯგერენაიამ, გარკვევით იცოდნენ, რომ მისი მომწყობი და ხელმძღვანელი სოსო ჯულაშვილი იყო.

1902 წლის პირველ მაისს დუტუ ჯგერენაია უკვე თვითონ დებულობდა მონაწილეობას ბათუმის დემონსტრაციაში, რომლის ხელმძღვანელი და ორგანიზატორი თბილისის კომიტეტის მიერ გამოგზავნილი ახალგაზრდა სოსო იყო.

— მამა, — უყვებოდა დუტუ გელას, — იმაზე მშენიერს ვერაფერს ნახავდი, წითელი დროშა რომ ავაფრიალეთ, რევოლუციური სიმღერები დავჭექეთ, თან მოთხოვნილება წამოვაყენეთ: თუ ამ პირობებს არ შეგვისრულებთ, მუშაობას შევწყვეტთ, და, მართლაც, დემონსტრაციიდან ყველანი ჩვენ ჩვენს სახლებში წავედით. ქარხნის პატრონი და მისი დამქაშები კი დატრიალდნენ, ერქარებოდათ მუშების ქარხანაში დაბრუნება. ქარხნის დახურვა მათთვის დალუპავა, ყოველდღე ასიათასობით ზარალი მოუვათ.

— ხომ შეეძლოთ თქვენს მაგიერ სხვა მუშები ეშოვათ? — ჰკითხა გელამ.

— არ შეეძლოთ, რადგან გაფიცული მუშების მაგივრობას ვერავინ გაბედავს.

— კარგად გქონიათ, შვილო, საქმე. ვენაცვალე იმ ახალგაზრდას, ვინც მაგ საქმეს ხელმძღვანელობდა. მაშ გაიმარჯვეთ ხომ?

გელას უხაროდა მუშების გამარჯვება, თან გული წყდებოდა, რომ ორმოცდაოთხი წლის წინათ გლეხთა აჯანყება ასე უნაყოფოდ დამთავრდა.

— შვილო დუტუ, ცეცხლი არ მომიკიდო, მამაშენივით შენც არ დაგიჭირონ! — ეუბნებოდა შემინებული ლერწამისა დუტუს.

დუტუ ამშვიდებდა დედას. ეუბნებოდა: მალე დადგება ისეთი დრო, რომ გლეხისა და მუშის ცხოვრება ადამიანის ცხოვრებას დაემსგავსებაო.

— ღმერთმა ქნას, შვილო, — ეუბნებოდა გახარებული ლერწამისა შვილს, — შე ვერ მოვესწრები მაგ დღეს, მაგრამ შენ და შენმა ცოლ-შვილმა მაინც გაიხარეთ.

ლერწამისა ამ ბოლო წლებში ხშირად ავადმყოფობდა. გრძნობდა, რომ დიდი ხნის სიცოცხლე აღარ ეწერა და დუტუს ყოველი ჩამოსვლა, მისი აქ გატარებული ყოველი დღე დიდი ბედნიერება იყო მისთვის. ამ ბედნიერებასაც მათა უნახვერებდა. სამი-ოთხი დღით ჩამოსულ დუტუს მათა დაიბარებდა ხოლმე და მთელი დღე არ გამოუშვებდა. ის დაწვრილებით ისმენდა დუტუსაგან მუშათა და გლეხთა მოძრაობის საინტერესო ამბებს.

ოთხმოცდაათიან წლებში გამოვიდა გაზეთი „კვალი“, რომელიც საქართველოს იმდროინდელ გაზეთებს შორის ყველაზე მოწინავე იყო. „კვალი“ გამოხატავდა სოციალ-დემოკრატიულ იდეებს. ამ გაზეთს მესამე დასელების გაზეთს უწოდებდნენ, ვინაიდან საქართველოში ახალგამოჩენილ სოციალ-დემოკრატიულ პარტიასაც მესამე დასელები ერქვა. ასეთი სახელწოდება მიიღო მან იმიტომ, რომ მეცხრამეტე საუკუნის მეორე ნახევარში საქართველოში რამდენიმე მიმართულების პარტია (დასი) წარმოიშვა. პირველ დასად თერგდალეულებს თვლიდნენ. მეორე დასად — ფედერალისტებს, ხოლო მესამე დასად — სოციალ-დემოკრატებს.

გაზეთი „კვალის“ შინაარსი ძლიერ მდიდარი იყო. აქ იბეჭდებოდა გაზეთ „ისკრიდან“ გადმობეჭდილი წერილები. „ისკრა“ იყო „კვალის“ გეზის მიმცემი. „ისკრას“ სათავეში ედგა ლენინი და პლეხანოვი. ეს გაზეთი ჟენევაში გამოდიოდა, რადგან

თვით პლენაროვსა და ლენინს რუსეთში არათუ გაზეთის გამოცემა, ცხოვრების ნებაც არ ჰქონდათ.

ათას ცხრაასიან წლებში გაზეთ „ისკრის“ რედაქციაში ორ დიდ მოაზროვნე თეორეტიკოსს — პლენაროვსა და ლენინს შორის თავი იჩინა უთანხმოებამ. ორივე ხელმძღვანელს თავისი მომხრეები გაუჩნდათ რედაქციაში. უთანხმოება შეეხებოდა როგორც მეცნიერულ-იდეურ პრინციპებს, ასევე პარტიის ორგანიზაციის ჩამოყალიბებას და მრავალ პრაქტიკულ საკითხს.

განხეთქილების შემდეგ ლენინის ხელმძღვანელობით ჟენევაში გამოვიდა ახალი გაზეთი, რომელსაც „ნოვია ისკრა“ ერქვა.

ეს გაზეთი არალეგალურად ვრცელდებოდა მთელ რუსეთსა და საქართველოში. მას მოწინავე მუშებში, მოსწავლე ახალგაზრდობასა და სოციალ-დემოკრატიის მომხრეთა შორის რევოლუციური შეგზება შეჰქონდა.

ასეთი მუშაობის შედეგად საქართველოში მრავალი პროკლამაცია და ბროშურა იბეჭდებოდა და არალეგალურად ვრცელდებოდა.

მაია დიდი ინტერესით აღევნებდა თვალყურს მოვლენათა განვითარებას, მაგრამ ყველაფერში ვერ ერკვეოდა. ძლიერ აინტერესებდა ის აღამიანები, რომლებიც მუშათა და გლეხთა საქმისათვის თავს წირავდნენ. ის კი არ იცოდა, რომ რევოლუციონერები მისი კლასის, მისი საზოგადოების წინააღმდეგ იბრძოდნენ.

ერთხელ დუტუსთან ხანგრძლივი საუბრის შემდეგ მაია დიდხანს იჯდა აივანზე ფიქრებში წასული. სასახლეში ყველას ეძინა. შორიდან სიმღერა მოისმოდა. მღეროდნენ ახალგაზრდები. მთვარიანი ღამე იყო, სივრცე — წმინდა და ნათელი. მაიას უყვარდა ასეთი ღამეები. ისინი ყოველთვის რაღაც სევდიან ფიქრებს ჰგვრიდნენ.

სიმღერა თანდათან ახლოვდებოდა, მაიამ ყური მიუგდო.

ჩქიმი ჯიმა სესია,
მუთ ითვინე თესია,

შხვაშო ხაჩქუ, შხვაშო ბარგუ,
შხვას ეურღვა ღერცია,
ირო ჭვიტე კილეგანცუ
სქანი მაღაზაში რჭეღცია.*

მაია ნელა ჩავიდა აივნის უკანა კიბიდან და ეს სიმღერა უფრო მკაფიოდ გაიგონა. შერცხვა საკუთარი სინდისისა.

„მართალი არიან, სხვისთვის თესენ, სხვისთვის მარგლავენ, ჭირნახულიც სხვას მიაქვს... როდემდე იქნება ასე? — ჩაფიქრდა მოხუცი ქალი, — ერთ დღეს რომ გლეხებმა ჩვენთვის თესვა და თოხნა მიატოვეთ, მაშინ? — დაეკითხა თავის თავს და შეერთა. — რითი იცხოვრებენ ის და მისი შვილები? — ფიქრი განაგრძო: ახალგაზრდებს აშრომებენ, ამსახურებენ. ჩემებრ მოხუცებს კი, ალბათ, რამეს მიუჩენენ. ღვთის გაჩენილს ღმერთი არ გაწირავს“, — უპასუხა თავის ფიქრებს. სულით არ დაეცა ასეთი საშიშროების წინაშე, ცოტა ხანს უსმინა მომღერალთ და შემდეგ აივნისკენ წამოვიდა.

„ბევრი რამე ვნახე, ნეტავ ამასაც მოვესწრებოდე თუ რას იზამს ხალხის ძალა? აქვს კი ძალა ხალხს? როდის გამოიყენებს? — მაია თავისი წლოვანების გამოანგარიშებას შეუდგა: — ოთხმოცდასამი წლისა ვარ, ეს არც ისე დიდი წლოვანებაა! საინტერესო კია, რით დამთავრდება ქვეყნის ბედ-იღბალი, თუ ოდნავ მაინც სამართლიანია ის მიზანი, რისთვისაც მრავალი წლის მანძილზე ადამიანთა სისხლი იღვრება, ხალხმა უნდა გაიმარჯვოს“...

* * *

ათას ცხრაას სამი წლის მიწურულში და ათას ცხრაას ოთხი წლის პირველ ნახევარში მთელ რუსეთსა და საქართველოში რევოლუციური მოძრაობა ფართოვდებოდა. ხალხი აზვირთდა. გაბედულად და შეგნებულად გამოვიდა. გლეხები თავიანთ ნებაზე ამუშავებდნენ თავადების მიწებს, გადასახადებს აღარ იხ-

* „ჩემო ძმავ სესია, როგორ ითმენ ამასო, სხვისთვის თესაე. სხვისთვის მარგლაე, სხვას უთოხნი ყანასო, ცარიელი სასიმიწე როდის უნდა გაავსო!“

დიდნენ. ყოველ მაზრაში ჩამოყალიბდა ერთნაირი წესწყობი-
ლება. ბოქაულისა და მამასახლისის მაგივრად გაჩნდნენ ასის-
თავეები და ათისთავეები. პოლიციას არავინ არაფერს ეკითხე-
ბოდა. ვინც ერთობის გარეშე დარჩენას ფიქრობდა, ბოიკოტს
უცხადებდნენ. ხალხმა შექმნა თავისი რევოლუციური მთავრო-
ბა, რომელიც მხოლოდ სოციალ-დემოკრატიულ მუშათა პარ-
ტიას ემორჩილებოდა. სოფლებში იმართებოდა კრებები, სადაც
ასისთავეებს ირჩევდნენ. აქ წყდებოდა სხვა საჭირობოროტო სა-
კითხებიც.

ჟანდარმერია და პოლიცია პირიდან ცოფს ყრიდა. ხელავედა,
რომ თვალსა და ხელს შუა უფლებას კარგავდა. ისინი ჯამუ-
შობდნენ, ხელს უშლიდნენ ერთობის საქმეებს. მათ დასაშინებ-
ლად და მოქმედების საწინააღმდეგოდ გაჩნდნენ ტერორისტე-
ბი, რომელნიც პოლიციელებსა და ჯამუშებს დევნიდნენ, უკი-
დურეს შემთხვევაში კი თავიდან იშორებდნენ.

მთელი დასავლეთ საქართველო ქუთაისში არსებულ იმე-
რეთ-სამეგრელოს სოციალ-დემოკრატიული პარტიის კომი-
ტეტს ემორჩილებოდა. პარტიის ფრაქციებად გაყოფის შემდეგ
იმერეთ-სამეგრელოს კომიტეტის წევრთა შორისაც ორი ფრაქ-
ცია ჩამოყალიბდა: ბოლშევიკების და მენშევიკების.

დუტუ ჯგერენაია თავდადებულად მუშაობდა ბოლშევიკურ
ორგანიზაციაში. ის უკვე იმერეთ-სამეგრელოს ბოლშევიკური
ფრაქციის კომიტეტის წევრი იყო. მას, როგორც ნდობით აღ-
ჭურვილ კაცს, ხშირად უხდებოდა სიარული ბათუმში, ქუთაის-
ში, ფოთში, უფრო ხშირად ზუგდიდში.

დუტუ, გარდა იმისა, რომ მიტინგებზე გამოდიოდა ხიბულა-
კირცხისა და ნარაზენის ასისთავეებთან, წრეში პროპაგანდას
ეწეოდა, ამარაგებდა მათ არალეგალური ლიტერატურით და იმა-
ვე დროს ხალხის შეიარაღებას სათავეში ედგა. თავისი სოფლის
რაზმელებს მეთაურობდა. ამ რაზმში ირიცხებოდა ივა ქარცხია,
ლუკა კიტია კი ასისთავი იყო.

ივა ქარცხია და ლუკა კიტია აქ ბათუმის კომიტეტმა გა-
მოგზავნა სამუშაოდ. ესტატე ნაჭყეების ისინი ისევ თავის მას-
წავლებელს ეძახდნენ, მაგრამ არა როგორც ხელოსანს, არამედ
როგორც გამოცდილ რევოლუციონერს და ხალხისათვის თავ-

დადებულ მებრძოლს. ესტატე ზუგდიდში მუშაობდა და იქიდან ხელმძღვანელობდა თავის მოწაფეებს.

მაიას შვილებზე დარდი მოსვენებას არ აძლევდა. არეული დრო იყო. ამბოხებები, გაფიცვები, ტერორი... მისი უჩა და გრიშა ოფიცრები იყვნენ. ახლა მუშებისა და გლეხების წინააღმდეგ ნიკოლოზ მეფე პოლიციისა და ჟანდარმერიის გარდა ჯარსაც იყენებდა და მაია სულ იმის წუხილში იყო, რომ მისი შვილები არ აეძულებინათ ხალხის წინააღმდეგ საბრძოლველად.

საბრალლო დედას სულ გზისკენ ეჭირა თვალი. სოფელში თუ ვინმე ჩამოვიდოდა, უმაღლვე თავისთან დაიბარებდა, იქნებ ჩემი ბიჭების ამბავი იცისო. მაგრამ გადიოდნენ თვეები, ქვეყნის მდგომარეობა სულ უფრო და უფრო დაძაბული ხდებოდა, შვილების ამბავს კი ვერ გებულობდა. ამ შიშმა და მწუხარებამ მაიას თავისი დალი დაანწია, იგი ისე დაუძლურდა, აივნინდან ვეღარ ჩამოდიოდა. აივანი კი მარსათვის მთელი ქვეყანა იყო.

ერთხელ მაია ჩვეულებისამებრ აივანზე იჯდა. უცებ, სად იყო, სად არა, გრიშას ბოხი ხმა შემოესმა. გრიშას გოგომა მიგებებოდა გზაზე და სახლისაკენ მოჰყავდა.

— დედა ბატონი როგორაა, გიგიშა? — ეკითხებოდა გრიშა თანამომძმეს.

— დედა შემოგვევლოს, შვილო, შენ, — გული აუჩუყდა მაიას შვილის ხმის გაგონებაზე. წამოდგა, ჯოხს დაეყრდნო და კარებთან მიეგება.

— შვილო, როგორ გამახარე... მადლობა ღმერთს, კა კად ყოფილხარ, მე კი შიშით აღარა ვარ. რა არ ვიფიქრე... — მაია უცებ გაჩუმდა. მას არასოდეს არ უყვარდა შიშის გამხელა, შვილებთან და ქმართანაც კი მუდამ თავშეკავებული იყო. ახლა ეუცნაურა, რომ ასე გახსნა თავისი გული. „ტუდის ნიშანია, სიკვდილი ხომ არ მომიახლოვდაო“ — გაიფიქრა.

გრიშაც გააკვირვა დედის ასეთმა გულახდილობამ. ასე თბილად, ასე ტკბილად არასოდეს არ შეხვედრია მას დედა.

— რა გაქვს, დედა ბატონო, საშიში? მე ვინ რას მერჩის. ხალხი მეფეს ებრძვის...

— შენ ხომ მეფის ოფიცერი ხარ, გითა? — უთხრა მაიამ და თავის გვერდით მოისვა შვილი.

— მეფის კი არა, ჩვენი ქვეყნის ჯარისკაცი ვარ, დედა.

— არა, შვილო, მაგას ვინ დაგიჯერებს, სანამ ეს „პაგონები“ გაკერია მხარზე. თავის ქვეყნის ჯარისკაცები ისინი არიან, ვინც ხალხის საქმისათვის იბრძვიან. აი ჩვენი დუტუ ჯგერენაია, ლუკა კიტიია, ივა ქარცხია. და იცი კიდეე ვინ, შვილო? მუშნი დადიანი და გვანჯი ჩიქოვანი. იარალი აუღიათ და ბოლშევიკების რაზმებში ჩაწერილან.

— რას ამბობ, დედა ბატონო! — გაიოცა გრიშამ, — მუშნი დადიანი და გვანჯი ჩიქოვანი ბოლშევიკების, წითლების რაზმში არა, მე მაგისთანა ჯარისკაცი ვერ გავხდები სწორედ, წითლებში ვერ ჩავეწერები.

— იმ წითლებს, შვილო, ერთი ღვთისნიერი კაცი მეთაურობს...

მაიამ ვერ გაიხსენა იმ კაცის გვარი, გიგიშას მიუბრუნდა: — რა გვარიაო, გიგიშა, როგორ თქვა დუტუმ?

— ლენინი, ქალბატონო.

— ჰო, ლენინი, შენ არ გაგიგონია ეს გვარი, გითა?

— როგორ არა, დედა ბატონო. მე კი არა, მთელმა ქვეყანამ იცის მისი გვარი ახლა.

— მერე, არ ჯობია ლენინი იმ შენს ქარაფშუტა ნიკოია ხელმწიფეს?

— მუშებისა და გლეხებისათვის კი ჯობია, დედა, მაგრამ ხალხი მარტო მუშები და გლეხები ხომ არ არის.

— აბა, ვინაა, შვილო, ხალხი? მე და შენ ვართ? ერთი მუჭა თავადაზნაურობა და მემამულეებია ხალხი?

— შენ მთლად წითლებივით ლაპარაკობ, დედაჩემო, — გაიღიმა გრიშამ და შეეცადა ლაპარაკის საგანი შეეცვალა, მაგრამ მაიამ არ დაანება, — მაინც როგორაა ქვეყნის საქმე გითა?

— მეფის ნაცვლად გრაფი ვორონცოვ-დაშკოვი დანიშნეს, დედა, ჯარების სარდლად, — გენერალი მალამა დაგვიყენეს.

— მერე რა შეიცვლება ამით? — ჰკითხა მაიამ შვილს. — ერ-

თი გენერლის მაგივრად მეორე დანიშნეს. დუტუ ამბობდა, ის შენი გენერალი დიდი მოძულეაო ქართველებისა,

— მართალი უთქვამს დუტუს, — დაუდასტურა გრიშამ, — მაგრამ ეს მითხარი, დედა ბატონო, საიდან იცის ამდენი ამბები გელა ჯგერენაიას შვილმა ან როდის გახდა ის შენი მეგობარი.

— დუტუმ რომ იცის, იმდენი დააკლდა, შვილო, შენს მტერს, — მიუგო მაიამ შვილს. — იმ ჯგერენაიამ იმდენი იცის, რომ ბევრ თავმომწონე ოფიცერს და თავადს შეეხარბება... პო, მაღამა ამბობს თურმე, ქართველებს რევოლუცია იმიტომ სჭირდებათ, რომ შოვინისტები არიანო.

— მართალია უთქვამს დუტუს, — დაუდასტურა გრიშამ დედას, — ჭირივით სძულს თურმე ქართველები, სისხლით ჩაეაქრობ მათ შოვინიზმსო.

— ისემც ადგომია გვერდი მას, — გულმოსულად თქვა მაიამ და სახე გაუფიქრდა. — როგორც დუტუმ ამიხსნა, შოვინიზმი სხვა ერის სიძულვილია, სხვა ხალხების დევნა და ჩაგვრა. ესაა, გითა, შოვინიზმი, ხომ?

— პო, დედა, ესაა...

— პოდა, ენით ხეზე უნდა ჩამოკიდო ის მაღამაა თუ ვინცხა რეგენია. როდის იყო, რომ ქართველ კაცს სხვა ერი სძულდა, სხვა ერს ჩაგრადა? თბილისში თურმე მეჩეთი, სინაგოგა და ეკლესია ერთმანეთის გვერდით დგას. აზატ-ხანს სომხებისათვის კინაღამ არ შეაკლა თავი ერეკლე მეფემ. ქართველებმა არ გადაარჩინეს სომხეთი სპარსელების აოხრებისაგან? რა ერის ხალხი არ ცხოვრობს ჩვენს ქვეყანაში, შვილო, თათარი გინდა, თურქი გინდა, სომეხი გინდა, ბერძენი, პოლონელი, გერმანელი. ჩვენ რომ ისინი გვძულდეს, აქ გაჩერდებოდნენ? ვერ კითხავთ იმ მაღამას, ვინ მეთაურობს რევოლუციონერ ქართველებსო? იქნებ ლენინიც შოვინისტად მონათლოს იმ ვაჟბატონმა.

— დედა, რაღა შენ და რაღა ბოლშევიკი.

— შვილო, რასაც დუტუ ამბობს, თუ ის არის ბოლშევიკი, მაშინ მაგ საქმე დასაწუნი არ არის. მაღამას არ ეხატება იგი გულზე, მაგრამ ხალხი დიდიან პატარიანად გაჰყვება ბოლშევიკებს.

დედის ლაპარაკი გრიშას არ მოსწონდა, დაღლილობა მოიმიხეზა და თავის ოთახში შევიდა ხელ-პირის დასაბანად, ტანსაცმლის გამოსაცვლელად. სანამ სუფრას გაშლიდნენ, მაია ოთახში არ შესულა. გიგიშასთან ერთად იჯდა აივანზე.

— არ მოეწონა ჩემს გითას ჩემი ლაპარაკი, — დაარღვია დუმილი ცოტა ხნის შემდეგ მაიამ და გიგიშას შეხედა, — რაღაც დაშინებული ჩანს ჩემი შვილი, გიგიშა.

— აბა, რა იქნება, მაია ბატონო, კაცი მეფის სამსახურშია, ცოლ-შვილის პატრონია. ოფიცრობა რომ დაკარგოს, რითი არჩინოს ოჯახი. რა მამული და ქონება აქვს ისეთი, რომ იმან შეინახოს.

— ბოლშევიკების ოფიცრად არ გამოდგება ვითომ ჩემი შვილი? — ჰკითხა მაიამ გამოცვლილი ხმით გიგიშას.

— არ გამოდგება და არც თვითონ ინებებს, — უთხრა გიგიშამ. — არც ენდობიან ისინი მეფის ოფიცრებს.

— რა მოელის აბა ჩემს შვილებს, გიგიშა? — შიშით იკითხა მაიამ, — თუ ნიკოლოზ ხელმწიფე ჩამოაგდეს ტახტიდან, ხელმწიფეს და მის ამაღლას ცოცხალს არ გაუშვებენ. მომიკლავენ ჩემს უჩას ვითომ?

— უჩა ისეთი უჭკუო არ არის, უკანასკნელ დრომდე იქ გაჩერდეს, მეფესთან. როგორც კი შეატყობს, რომ მეფის საქმე შავადაა, დაკრავს ფეხს და თავის ქვეყანაში წამოვა.

მაიას არ ამშვიდებდა გიგიშას სიტყვები. საგონებელში ჩავარდა. გიგიშას უთხრა სადღილი დააჩქარებინეო, რომ სუფრაზე კვლავ გაეგრძელებინა შვილთან საუბარი.

სადღილი აივანზე გააწყვეს. გრიშა მადიანად შეექცეოდა ბაჟას, საწებელში ჩაწყობილ ვარიას და დედის კითხვებზე დინჯად უპასუხებდა. ღვინოს მოზრდილი სასმისით სვამდა და გიგიშასაც ისეთივე სასმისით ასმევდა. გიგიშამ იცოდა გრიშას ხასიათი, უარს ვერ ეუბნებოდა.

— მაშ ალიხანოვის დამსჯელი რაზმი უკვე წვავს გურიის სოფლებს, — მკაცრი და გაბოროტებული ხმით იკითხა მაიამ, — ადამიანის ფერი არ ედო. არ ჭამდა, არც სვამდა, სფინქსივით უძრავად იჯდა. — და ქართველი ხალხი გულდამშვიდებული შეკ-

ყურებს, როგორ ანადგურებენ მის სახლ-კარს. სოფლები ურჯულო ომერ-ფაშას არ გადაუწვავს და ალიხანოს აწვევინებენ.

— ბევრი იღონა, დედა ბატონო, თბილისის მოწინავე საზოგადოებამ, რანაირად არ სთხოვეს გენერალ მალამას, რომ შეეჩერებინა ალიხანოვის რაზმი, მაგრამ იმ არამზადამ აინუნში არ ჩააგდო ქართველ მოღვაწეთა თხოვნა.

— ყირიმ-გირეიმ რა ქნა, რისთვის გაგზავნეს ის კაცი გურიასში?

— უნდა გამოერკვია, თუ რა უნდოდათ გურულებს.

— მერე.

— ამ „გამორკვევამ“ კიდევ უფრო მეტი უბედურება მოუტანა ხალხს. აჯანყებულები ისე გათამამებულან, სადაც კი მივიდოდა ყირიმ-გირეი, ყველგან დემონსტრაციები იმართებოდა თურმე. ორატორები გაბედული სიტყვით გამოდიოდნენ. მოთხოვნილებები წარუდგენიათ მთავრობის წევრისათვის, ისიც პირდებოდა საქმეების დაუსჯელად მოგვარებას.

— მერე რამ შეუშალათ ხელი, რისთვის შეიყვანეს დამსჯელი ჯარი? — იკითხა გიგიშამ.

— სანამ ყირიმ-გირეი დადიოდა და დემონსტრაციებს ესწრებოდა, ალიხანოს არ ეძინა, ის მეფისნაცვალს არწმუნებდა: ყირიმ-გირეის მოღვაწეობა აღრმავებს რევოლუციას მარტო გურიასში კი არა, მთელ დასავლეთ საქართველოშიო. ალიხანოს პეტროგრადისთვის მიუმართავს ასეთივე მოხსენებით, რის შედეგად ყირიმ-გირეი უკანვე გამოითხოვეს, ალიხანოს კი გზა გაუხსნეს გურიის დასარბევად. მოსალოდნელია ჩვენც გურიას ბედი გვეწვიოს...

— დაგვიფაროს ღმერთმა, შეილო... — თქვა ჩავარდნილი ხმით მაიამ და წამოდგა. თავის სამინებელ ოთახში ჩაიკეტა. გრიშას დედა კარგა ხანს გაღიმებული არ უნახავს ამ საუბრის შემდეგ.

გლახთა აჯანყება სამეგრელოს ოედო. განსაკუთრებით ზუგდიდის მაზრას. დუტუ ჯგერენაია, ლუკა კიტია და ივა ქარცხაია ესტატიე ნაჭყებიას მეთაურობით ხან ერთ სოფელში გაიერდებოდნენ, ხან მეორეში. ხალხს მოუწოდებდნენ იარაღით ხელში დახვედროდნენ გენერალ ალიხანოს.

დუტუსა და მისი მეგობრების ყოველ ნაბიჯი იცოდა მაიამ. მათი ამბავი სიტყვასიტყვით მიჰქონდა მასთან გიგიშას.

— შენ, გიგიშა, და საერთოდ ყველანი, ხალხს რითაც შეგიძლიათ დაეხმარეთ. მე არც მენდობიან და ან რას დავეხმარები, ფეხზე ძლივს ვდგავარ. არც მინდა ვინმეს ვაფიქრებინო, შეეშინდა და გვეფერებაო, — ეუბნებოდა მაია გიგიშას.

მართლაც მალე დასჭირდა ხალხს მაიას სასახლე. დუტუს ხშირად ჩუმად მოჰყავდა ზუგდიდიდან ჩამოსული ამხანაგები ღამის გასათევად ხან იქ, ხან გიგიშასთან.

ახლა მაია ისეთი ინტერესით აღარ კითხულობდა აღმოსავლეთ საქართველოსა და იმერეთ-გურიის ამბებს, რადგან ახალი ამბებით ზუგდიდის მაზრა აივსო. დაიწყო შეტაკება ხალხსა და პოლიციას შორის.

მაზრის უფროსი კელამოვი ხალხს თვალთ არ დაენახებოდა. ერთ დილას მაიამ, რომელიც ჯერ არ ამდგარიყო, შეამჩნია, რომ მისი ოთახის გვერდით, მოახლე ქალის, ვერას ოთახში, რაღაც უჩვეულო მოძრაობა იყო. არაფერი თქვა მაშინ, მხოლოდ ჩაის რომ სვამდა, ვერას შეეკითხა:

— რა ამბავია სოფელში?

ვერა შეკრთა, მაგრამ მაინც დინჯად უპასუხა:

— ამბობენ, პოლიციას და წითელ რაზმელებს შეტაკება მოსვლიათო.

— ერთი გიგიშას დამიძახე, ვინმე გაგზავნე, ან შენ თვითონ გადადი.

— კი, ბატონო, მე თვითონ გადავირბენ ერთ წუთში.

ვერას გაუხარდა, რომ ეხოს გადაღმა გადასვლის შემთხვევა მიეცა. მალე დაბრუნდა, თან გიგიშა მოიყვანა.

— კარგად გაძგვებიან, გიგიშა, ვინ დაუჭერიათ, რატომ მომხდარა შეტაკება პოლიციასა და ხალხს შორის. — შეაგება კითხვა მაიამ კარში შემოსულ გიგიშას.

— კელამოვს დაუჭერია, ბატონო, რამდენიმე კაცი, ერთობის ერთგულები, ასისტავები, ათისტავები და მიჰყავდა თურმე ზუგდიდში. გზაზე დახვედრიათ წითელრაზმელები დაჭერილების გათავისუფლების მიზნით. კელამოვის „სტრაჟნიკებს“ აუტე-

ხიათ სროლა, მოკლულები ორივე მხარეს არიანო, ამბობენ.

— ტყვეები ვერ გაუთავისუფლებიათ?

— წარმოდგინეთ, ბატონო, გაუთავისუფლებიათ ყველა!

— ეს დუტუს მოწყობილი იქნება, — თქვა მაიამ.

— აბა, სხვა ვინ გაბედავდა თავიდან ფეხამდე შეიარაღებულ „სტრაჟნიკებთან“ შებრძოლებას! — უთხრა მაიას გიგიშამ.

— მამამისის გელას ასლი და კვალთა ის ბიჭი, — თქვა მაიამ და გაიღიმა, — მეშინია თავი არ წააგოს, ნამეტანი თავზე ხელაღებულა.

მაიას სამზარეულო, მარანი და სასიმიინდე ყოველთვის საიმედო თავშესაფარი იყო დევნილთათვის. ახლა რაც რევოლუციური მოძრაობა გაძლიერდა მაიას ახლობელ სოფლებში, მის სასახლეს ერთობის ხალხი ზედმეტი პატივით ექცეოდა. მაიას ხალხის რისხვა არ შეხებია, მისი სახლიდან მოსამსახურეები არ წაუყვანიათ, არც ბოიკოტი გამოუცხადებიათ მისთვის.

მაიამ ახლა ისიც კი იცოდა, რომ რევოლუციის მიზანი მართო ნიკოლოზის ჩამოგდება არ იყო. გლეხს მიწა უნდოდა და ყველაზე მეტი მიწები სწორედ მაიას ჰქონდა იმ კუთხეში. მან ვერაფერს წყვეტდა. ეს საკითხი ძალაუნებურად გაქარავდა გულში.

— დუტუ სიმართლის მთქმელი კაცია, მეტყვის ყველაფერს. მგონია, ხალხისათვის ცუდი არაფერი გამოიკეთებია არც მე და არც ჩემს შვილებს. რა ექნათ, რომ მთავრის შთამომავალი ვართ. ამისათვის ხომ არ დაგვსჯიან და დაგვამშვენენ?

მაიამ მშვენიერად იცოდა, თუ რა ხდებოდა სასახლეში, მაგრამ თითქოს არაფერი არ იცისო, ისე ეჭირა თავი. არაფერს კითხულობდა.

— ხედავთ, თქვენი ჭირიმე? რაც მუხრან-ბატონებმა, დადიანებმა, დადეშქელიანებმა და გურიელებმა ვერ გაბედეს, ახლა გვასალიები, ქარცხიები, ბუკიები, კიტხიები ბედავენ, რუსთა ხელმწიფეს ებრძვიან და ტახტიდან ჩამოგდებას უპირებენ, — ამბობდა მაია კმაყოფილებით.

როდესაც გლეხები ასეთ აზრებს მოისმენდნენ, გულში იცინოდნენ და გაკვირვებული ერთმანეთს გადახედავდნენ. შემდეგ

ერთმანეთს სიცილით გაუზიარებდნენ ბატონის „გასოციალისტებას“.

ასეთმა შეხედულებებმა და ხალხთან კარგმა განწყობილებამ 1905 წელს მათ სხვა მემამულეთა ბედს ააცდინა. ამ წლებშიც არ შეცვლილა მათას ოჯახის ჩვეულებები და წესრიგი, მხოლოდ მამულების შემოსავალმა საგრძნობლად იკლო: დალის მოტანას ყველა გაურბოდა. ეს არ მოსწონდა მათას, მაგრამ თავის უკმაყოფილებას არ ამჟღავნებდა.

გრიშა ხშირად ჩადიოდა დედის სანახავად, ხომ არაფერი უჭირსო.

— არავინ არ მაწუხებს, შვილო, ვის რას ვერჩი ერთი მოხუცი ქალი? მე იმედი მაქვს, რომ ჩემი სოფელი შიმშილით არ მომკლავს, როგორც ღმერთსა და ხალხს სურს, ისე წავა ჩემი საქმე.

— ხალხის საქმე არ წავა კარგად, არა, — ეუბნებოდა გიგისას მათა. — არ გახსოვს უტუ მიქაევას და მართალია თოდუას რამდენი ჯარი ჰყავდათ, მერე რა გამოვიდა. ახლაც იგივე არ მოუვიდეთ მემამბოხეებს, ხალხს არა აქვს ერთი პირი, თორემ ხალხის ძალას ვინ მოერეოდა! რუსეთი დიდია, რა შეკრავს ამდენი ხალხის პირს. ერთობა რომ დამარცხდეს, ბევრი დედის გული ატირდება, გიგისა. დიდი მსხვერპლი მოჰყვება ამ დამარცხებას. დაიჭერენ ამბოხებულებს და ყველას გააციმბირებენ.

— ძალიან არეულია ქვეყანა, მათა ბატონო. გრიშა კიდევ ქუთაისში გაუწვევიათ, გუბერნატორს დაუბარებია მარშლები და თავკაცები. ამბობენ: გუბერნატორი კარგი ადამიანიაო, გვარი დამავიწყდა... — გიგისა ჩაფიქრდა, — დიახ, სტაროსელსკი უნდა იყოს... — დიახ, დიახ, ძალიან ეხმარება თურმე ხალხს ბატონო ჩემო, მაგრამ ნამესტნიკი მეტისმეტად მკაცრი კაცია. თვითონ სტაროსელსკის ეშინია მისი, მეფის ღალატი არ დამწამოსო. იმისათვის მოუწვევია თავადაზნაურობა სათათბიროდ, რომ როგორმე მშვიდობიანი გზით დააწყნაროს ქვეყანა, ხალხს იარაღი დააყრევინოს.

— კარგ გუნებაზე დამდგარა გუბერნატორი. ხალხმა თუ იარაღი დაყარა, ეს რაღა ბრძოლა იქნება? ეს ხომ დამარცხებას ნიშნავს? — გაიკვირვა მათამ.

— სწორედ ამიტომ არ ყრის ხალხი იარაღს. ჩვენები ჰეტერ-ბურგს, რუსეთს ელოდებიან: სანამ იქ იბრძვიან, ჩვენც ვიბრძობით; რასაც რევოლუციის დიდი ხელმძღვანელები შემოგვითვლიან, ჩვენც ისე ვიმოქმედებთ.

— ეს ძალიან კარგი უქნიათ, ჩემო გიგიშა, რუს რევოლუციონერებთან ერთად რომ იბრძვიან. რუსეთი დიდია და ძლიერი. იქ ხომ მთელი რუსეთის რევოლუციის ხელმძღვანელი ლენინია.

— შენი ჭირი შემეყაროს, ბატონო, ყველაფერი რომ იცი, — უთხრა მაიას გიგიშამ...

დუტუ ჯგერენაიას ოჯახი მუდამ საუსე იყო ქალაქიდან ჩამოსული ამხანაგებით. ბევრი მათგანი დუტუს ნაცნობ-მეგობარი იყო. ზოგი ბათუმიდან იყო, ზოგი — ფოთიდან.

დუტუ იმერეთ-სამეგრელოს კომიტეტის წევრი გახდა და ისიც „უმრავლესობის“ ფრაქციისა. გელა შვილის საქმით და მოქმედებით გახარებული იყო. გელა უკვე ისე მოხუცდა, რომ უჯოხოდ ვერ დადიოდა. ახლა მხოლოდ ის შეეძლო, რომ აღტაცებით ესმინა შვილის მიერ მოტანილი ამბები და ჩამოსული ამხანაგების საუბარი. ახალგაზრდებს ეტყოდა:

— სწორედ არ მინდა სიკვდილი ერთობის დამყარებამდე, ერთი ჩემი თვალთ ვნახო როგორ დაეწყება გლეხკაცის ცხოვრება.

— მოესწრები, ბიძია, მოესწრები! — ამხნევებდნენ ერთობის ხელმძღვანელები გელას.

ასეთ დროს გელას თვლებში იმედისა და სიხარულის ნაპერწკლები გაიფლავებდა ხოლმე.

სოფლებში ხალხი ხშირად იკრიბებოდა, ქალაქიდან ჩამოსულ ამხანაგებს ხვდებოდნენ შეკრებილნი, რათა კარვად გაეგოთ, რა მდგომარეობა იყო ქალაქებში, რა საშუალება და შესაძლებლობა, რომ მომავალი ბრძოლები თვითმპყრობელობასთან ხალხის გამარჯვებით დამთავრებულყო.

მეფის მთავრობა სასტიკად დევნიდა ერთობის ხალხს.

ჟანდარმერია და პოლიცია ფეხზე იდგა, მაგრამ ვერას გახდნენ. როგორც ქალაქში, ისე სოფლებში გაძლიერებულად ვი-

თარღებოდა და ფართოვდებოდა რევოლუციური მოძრაობა.

მთელს იმპერიაში მასების ამოძრავებით შეშინებულმა მეფემ ნიკოლოზ მეორემ, 17 ოქტომბერს გამოსცა მანიფესტი, რომელიც მინისტრთა საბჭოს ახალდანიშნული თავმჯდომარის გრაფ ვიტტეს მიერ იყო შემუშავებული და რომლითაც მეფე პირდებოდა ხალხს სიტყვის, ბეჭდვის და კრებების თავისუფლებას, საარჩევნო უფლებების გაფართოებას.

მთელი ძალაუფლება რევოლუციური ორგანიზაციების ხელში გადავიდა. ქალაქებსა და სოფლებში იმართებოდა მიტინგები. ხალხის თავისუფლებას წითელი რაზმი იცავდა.

ზუგდიდის მაზრაში მრავლად მოიპოვებოდნენ წასწავლი ვაჟები. ზოგ მათგანს ქუთაისის გიმნაზია და რეალური სასწავლებელი დაემთავრებინა, ზოგს ფოთის, ზოგს სულ დაეტოვებინა სწავლა და ხალხში გასულიყო, ერთობას მსხვერპლად ეწირებოდნენ.

ცხრაას ხუთში სასწავლებლები თითქმის არ მუშაობდნენ. მოსწავლეთა დემონსტრაციების შემდეგ ახალგაზრდებმა თავიანთ კუთხეებს მიაშურეს, რევოლუციურ მოძრაობაში მხურვალე მონაწილეობას იღებდნენ; გამოდიოდნენ მიტინგებზე, ხელმძღვანელობდნენ ბოლიტწირებს, ამზადებდნენ პროპაგანდისტებს, ქმნიდნენ ბარტიის გათვითცნობიერებულ წევრთა კადრებს.

რ მ ა ძ ც ი ა

1905 წლის მიწურულში სამეგრელოში თანდათან იზრდებოდა შეიარაღებული რაზმების რიცხვი. ხალხი შეეჩვია იმ აზრს, რომ ერთობა უკვე მტკიცედ დამყარდა, რომ ხალხის მიერ არჩეული მთავრობის დამხობა ნიკოლოზ მეორეს აღარ შეეძლო. საქართველოს ყოველ კუთხეში იცოდნენ ქუთაისში გამართული ბარიკადების ამბები. ქვეყანა იმედით იყო სავსე. მანიფესტის შემდეგ მოძრაობა ფართოდ მოედო მთელ საქართველოს და მის განაპირა კუთხეებს, გურიას, სვანეთს, აფხაზეთს.

ყველგან მოძრაობას სათავეში ედგა სოციალ-დემოკრატიული მუშათა პარტია.

სამაზრო-საგუბერნიო ხელისუფლებამ ხალხში ნდობა დაკარგა. თემები ერთიმეორისაგან დამოუკიდებლად მუშაობდნენ, ხოლო სოციალ-დემოკრატები იმერეთ-სამეგრელოს კომიტეტის განკარგულებას ექვემდებარებოდნენ.

დუტუ ჯგერენაია არ ერიდებოდა არც ბოქაულს, არც ჩაფრებს. მის სახლში აშკარად იკრიბებოდნენ რაზმელები, აქ იყო იარაღის საწყობი, მაგრამ როცა მისმა მოქმედებამ ყოველგვარ საზღვარს გადააჭარბა, ბოქაულსაც აევსო მოთმინების ფილა. ურიადნიკი იხმო და დუტუს საქმის გამოძიებას შეუდგა.

— ღმერთმა ნუ იცის, ბატონო, დუტუს თავი. მოგეხსენებათ ის ოჯახი თავიდანვე მოწამლული იყო, იმ მოხუც გელას რომ უყურებთ ნაკატორღალია. კაკო დუტუს შვილია. ტყუილად კი არა ჰქვია კაკო, ნამდვილი ყაჩაღია. ერთ სიტყვას ვერ ათქმევინებ, ვერაფერს მისგან ვერ გაიგებ, — მოახსენა ურიადნიკმა.

— თქვენც მიხვალთ, დაჯდებით დუტუსას, გაძლებით, დათვრებით და ისე წამობრძანდებით იქიდან, რომ ვერაფერს ვერ გებულობთ, თუ რას აკეთებს ეს კაცი. — შეუწყრა ბოქაული.

— ბატონო, თქვენც ხშირად ბრძანებულხართ და იცით, სტუმრის როგორი მიღება იცის დუტუმ; პურ-მარილის კაცია, ზრდილობიანი და კეთილი. თქვენგან ბრძანება არ გეკონია გავეჩხრიკა, კედელზე კი ერთი სანადირო თოფი უკიდია. ჩიხსახალუხსაც არ იცვამს და ხანჯალს არ ატარებს.

— გარუსებულაია შერყენებული, მიტომაც მისდევს რუსეთის რევოლუციას. გაჩხრეკას რა აზრი აქვს, იქნებ საწყობი მაია ბატონიშვილის სახლში აქვს: ეჭვს არავინ აიღებსო. ის გიგიშა წმინდა სულის კაცი არ უნდა იყოს. მაიას სასახლეს გიგიშა, პლატონი და ონისიძე ქარცხია ისე უტრიალებენ, როგორც უნდათ. უჩა რომ იყოს აქ, ვერ გაბედავდნენ ხელმწიფის წინააღმდეგ ამდენ ტლიკინს, — ამოხვეწით თქვა ბოქაულმა.

— ესეც მართალია. მაიას ვაჟები სასახლეში არ არიან, შე-

იძლება იქ ჰქონდეს სოფელს იარაღი, — დაუმოწმა ურიადნიკმა.

— არ ვიცი, რა ვენა. მათა ბატონიშვილის სასლის გაჩხრეკა ყოვლად შეუძლებელია. გავლენიანია, გადაგვემტერება, იქით გრიშას და უჩას მომამღურებენ. იყოს ჯერ, ღუტუს დროც მოვა, თქვენ მაინც ყურადღებით იყავით! სირცხვილია, თქვენი ცხვირის წინ ამდენი ამბავი ხდება, — მკაცრად თქვა ბოქაულმა.

— ბატონო, ზევიდან თუ არ გვექნება ბრძანება, ჩვენით სროლას ხომ არ დავუწყებთ შეგროვილ ხალხს? ჯობს გატეხილად ვთქვათ: ღამის კრებების დროს ძალიან საშიშია მისვლა. მოგროვილ ხალხს ირგვლივ შეიარაღებული რაზმელების ჯაჭვი აქვს შემორტყმული, მიუახლოვდები თუ არა, რამდენიმე თოფის ლულა ამოგიღებს ნიშანში. კარგი, ვთქვათ, მოკალი ერთი, შემდეგ იქიდან გამოსვლა არ გინდა?

— გარშემო რომ შევესიოთ? — არ ცხრებოდა ბოქაული.

— რამდენი კაცი, ბატონო?

— სამ-სამი, ოთხ-ოთხი!

— ხობში სულ ოცდახუთი „სტრაჟნიკი“ ვართ. რამდენ სოფელს ეყოფა ეს ძალა, როდესაც ხობის საპრისტაოში ათი სოფელი მაინც იქნება, თუ მეტი არა! — უკვე აღელვებულად უპასუხა ურიადნიკმა, რომელმაც ვეღარ აიტანა ბოქაულის ბაქიობა. — დამერწმუნეთ, ყოველ სოფელში, ღამღამობით კრებები და მიტინგებია.

— რას ყბედობ, ბიჭო! აბა, გაუმარჯვიათ მაგ ღაწირაკებს და ჩამოუგდიათ ნიკოლოზი! შენ ურიადნიკი ხარ, ასე შეშინებული არ უნდა ლაპარაკობდე. „სტრაჟნიკებში“ მაინც არ გამოთქვა ასეთი აზრები და შენი სიმხდალე არ აჩვენო მათ.

ურიადნიკი ადგა, ყველაფერს შევასრულებო, უთხრა ბოქაულს, გულში კი გაიფიქრა:

„თითქოს თვითონ დიდი ვაჟკაცი მყავდეს, ერთი რაზმელი რომ შემოეფეთოს, შიშით ცხენიდან ჩამოვარდება დალოცვილი, ვის აქვს თავი განწირული, ზღვა ხალხს შეაკვდეს?“

ერთ დღეს გრიშა მოულოდნელად ესტუმრა მათს, მხოლოდ

ორი მხლებელი მოჰყვა. აღელვებული და დაღლილი იყო. პირდაპირ დედის ოთახში შევიდა. ჩვეულებრივ მოკრძალებას ვერ იჩინდა, ეტყობოდა ძლიერ აღელვებული იყო.

— ცუდი რამე ხომ არ შეგემთხვა, შეილო ჩემო? — ჰკითხა მაიამ.

— არაფერი, ბატონო, ქვეყანა არეულია, მე რა მამყოფებს კარგ გუნებაზე?

— ქვეყანამ ასე იცის. ხან დაეწყობა, ხან აირევა. პირადად ხომ არაფერი გიჭირს, ექსორიაქმნილი ხომ არ ხარ? (სიტყვა „ბოიკოტი“ მაიას არ უყვარდა).

— არა, ბატონო, პირიქით, მთელი სოფელი კარგად მეპყრობა, მხოლოდ პატარა უსიამოვნება შემემთხვა: ერთ ღამეს ბოქაული მესტუმრა „სტრაჟნიკებით“. ეს გაეგო ერთობის ხალხს, ჩემს მეზობლებს: ნორაკიძეებს, ფულარიებს, გვასალიებს, დამესხნენ ოჯახში, ბოქაულსა და მის „სტრაჟნიკებს“ იარაღი აყარეს. რა მექნა, წინააღმდეგობა რომ გამეწია, სროლა ატყდებოდა, ბავშვები შიშით გადამერეოდა. მეც ჩემი ხელით აყვარე ყველას იარაღი და ჩავაბარე. წასვლისას მოიბოდიშეს. ოთახში რომ შემოვბრუნდი, დედა ბატონო, სიცილი ვერ შევიკავე, ისეთი სანახავი იყო ჩვენი ბოქაული. გათენებისას წავიდნენ ხობში ასე დამშვენებული.

— კიდევ კარგი, რომ მშვიდობიანად გათავებულა ეს საქმე. შენ ეს მითხარი, ქუთაისში რას ამბობენ, რისთვის დავიპარეს, რა დაადგინეთ?

— ჩვენ ვინ რას გვეკითხება? გვიბრძანეს არ ავყვეთ ხალხის ფეხის ხმას, ვებრძოლოთ ერთობას, მიეცეთ მთავრობას ერთობაში შემჩნეული პირები.

— ეს როგორ, ვერ გავიგე. ერთობის ხალხი და მათი წინამძღოლები სად არიან, რას აპირებენ, ყრიან იარაღს?

— დედა, იარაღი სად ჰქონდათ და რა უნდა დაყარონ? რევოლუცია რუსეთში დამარცხდა და საქართველოში რაღა იქნება. ახლა ბრძანებაა, ყველგან გენერალ-გუბერნატორები დაინაშნოს და მოეწყოს სამხედრო სასამართლოები. სტაროსელსკიც გადააყენეს. მის მაგივრად გენერალი ანდრონიკაშვილი დანიშნეს. იგი ძალიან სუსტი გამოდგა. ამიტომ ფაქტიურად გუბერნიის მართვა-გამგეობა ხელთ იგდო ალიხანოვ-ავარსკიმ.

— გამოდის, რომ ჩვენ არაფერი ვყოფილვართ, თუ ჩვენი ხალხის შვილებს ვერ დავიფარავთ და ვერ დავეხმარებით. შენ მარშალი ხარ, უნდა ითავო, თავზე იღო მათი გამოქომაგება. უნა ვიხმოთ, მივწეროთ. ჩვენ გაუღელტა არ დაგვკლებია თათრისაგან და გვეყოფა.

— დედა ბატონო, მე მერიდება მოგახსენო, ჩვენზე ისედაც ცუდი აზრის არიან გუბერნატორი და მაზრის უფროსები. პირადად შენზე მელაპარაკებოდნენ ქუთაისში: დიდად პატივს ვცემთ მის ღირსებებს, წლოვანებას, მაგრამ თუ ასე გაგრძელდა, ვეღარ მოვითმენთო. ნამდვილად ვიცი, რომ მფარველობს ერთობის ხალხსო, მისი სასახლის კარი მუდამ ღიაა მეფისა და კანონის მოღალატეებისათვისო. მე პირდაპირ მითხრეს, კი არ მითხრეს, მიბრძანეს, გამოვასწორო ეს მდგომარეობა, თორემ შენც პასუხს მოგთხოვენ და ჩვენც, შენს შვილებს.

— ჩემს ადგილზე შენ და უჩას რატომ მოგთხოვენ პასუხს,— თქვა ცივად მაიამ, — შენ შენი ოჯახი გაქვს, უნა ხელმწიფის კარს ემსახურება. მე არავისი სამეურვეო არ ვარ და არც არავის ვთხოვ მფარველობას. ჯერ კიდევ შემწვევს ძალა ჩემს თავს ვეპატრონო. ვისაც ჩემი მოქმედება არ მოსწონს, აქ მობრძანდეს, პასუხს მე გავცემ.

— შენ ალბათ იმის იმედი გაქვს, რომ ანგარიშს გაგიწევენ, მაგრამ დამერწმუნე, გიგიშას და სხვა მსახურებს ყველას დააპატიმრებენ, გაგვლანძლავენ. რატომ ინებებ ასეთ სათაკილო საქმეში მონაწილეობას?

მაიამ წარბები შეკრა, შვილს მრისხანედ გადახედა, ოთახში სიარული დაიწყო, ახლა ისე ღელავდა, რომ კრიალოსანიც ვერ მოიშველია და ხელებს უმიზნოდ ასავსავებდა.

— აბა ის აჯობებს, ხალხმა აქედან განმდევნოს, გადამწვას, ოჯახი გამინადგუროს? მე მირჩევნია შემაწუხონ, ვიდრე მოყვასს, ბედით დაჩაგრულს არ მივხედო. თქვენ ტყუილა გისწავლიათ, ისიც არ იცით, ადამიანს რისი უფლება აქვს და რისი არაა. — განმგმირავი თვალებით ჩახედა შვილს თვალებში, — „რომ ბედში მყოფი შენს ძმად მიგაჩნდეს...“ თქვენ კი ყოველთვის ბედში მყოფთ ეგებით ფეხქვეშ, ბედით დაჩაგრულთ კიდევ უფრო ჩაგრავეთ, ლევანის მოღამისა ხართ, ვერ შეითვისებთ

ადამიანურ აზრებს. აგერ სალომე ეეროპაში აღიზარდა, თითქმის ნახევარი ცხოვრება იქ გაატარა, ისიც ვერ შეითვისა, რომ დამორჩილებულთან ბრძოლა არ უნდა იკადროს. რას ჰგავს სალომეს საქციელი! სოფელი ააწიოკებინა მთავრობას. ამას არ სჯობდა ხალხის ცხოვრება ოდნავ ხეირიანად მაინც მოეწყო? სხვისი შრომა მხოლოდ თავისი გამდიდრებისთვის და თავის მოსაწონებლად უნდა. გეუბნები, ბევრჯერ ნათქვამს, არაფერი კარგი და სამართლიანი საქმე არ სჩვევია მთავართა შტოს. სულ ტყუილია, დაიმსხვრა ჩემი იმედები!

— დედა, ჩვენ ქვეყანას ვერ დავაწყობთ, თორემ ვის არ უნდა ცვლილება მოხდეს სახელმწიფოში, და, კერძოდ, საქართველოში, მაგრამ ჩვენ ამას არავინ გვეკითხება. კიდევ გთხოვ, საეჭვო პირებისგან ოჯახი გაწმინდო. თუ ვისმეს დახმარება დასჭირდა, მე დავეხმარები. გიგიშას დღესვე წავიყვან, ჩემთან ვიყოლიებ და შენც დაწყნარდები, ყველაზე უფრო ეჭვის თვალით მას უყურებენ, თითქოს ეგ გყავდა მიჩენილი ერთობის ხალხის მომვლელად.

— გიგიშა სადაც გინდა იქ წაიყვანე, ხოლო ძალიან გთხოვ ჩემს ოჯახურ საქმეებში ნუ ერევი. მე ჯერ კიდევ მაქვს გონება, ისიც კარგად ვიცი, რა ერთგულებითაც ზრუნავს ჩემზე ყველა. შენ რა დამითმე, რომ მე ყველაფერი დავთმო?! გინდა გული გამიხეთქო, მალე მოვკვდე, რომ მერე...

გრიშამ დედას სიტყვა არ დაამთავრებინა, იფეთქა:

— რაა?! რა თქვი, დედა?! რა იკადრე ან მე რა მაკადრე? დღეის იქით ჩვენი დედაშვილობა არაფრად ვარგა, ის არც ოდესმე ყოფილა შენთვის სასიამოვნო. ამიერიდან არ გეჩვენები, შორიდან გემსახურები, რითაც შემძლია.

— არავისი სამსახური არ მინდა! შენ შენს ცოლ-შვილს ემსახურე. ათ სულს რომ გააჩენ, უნდა გესმოდეს, რომ მათ მოვლა და პატრონობა უნდა, უსწავლელი არ დაგირჩენ. სწავლა შენთვის არ ინდომე და ალბათ შვილებსაც ისე მოექცევი, არავითარი შრომით არ შეაწუხებ.

გრიშა მიხვდა, რომ დედა მისადმი მთელი გულისტკივილის გამჟღავნებას ახლა აპირებდა, აღარ დაუცადა, მხოლოდ საყვედურით ესროლა:

— თუ ასე გებტალეხით მე და ჩემი შვილები, ერთისთვის მაინც მოგეკიდა ხელი და გაგეზარდა. ჩემთვის ვერაფერს შეე-
ლევ, თორემ თავზე ხელალებულებისთვის რომ დაგჭირდეს, სა-
სახლესაც გაყიდი — თქვა გრიშამ და დედას არ გამოეთხოვა,
ისე წავიდა.

შვილის დაუმშვიდობებლად წასვლამ კიდევ უფრო გააბრაზა
მაია.

„არ გაპატიებ ამ საქციელს, გითა, — ამბობდა გულში მაია, —
შენ ყოველთვის ურჩი იყავი, ახლაც მეურჩები, მაგრამ დამა-
ცადე. მთლად ამოგირეცხავ გულიდან ცოლიან-შვილია-
ნად“.

ასე მწარედ კი გაიფიქრა მაიამ, მაგრამ სადღაც გულის სი-
ღრმეში სიბრალულმა გაჰკრა, შემდეგ იკითხა, — „გითა წავიდა
თუ არაო“.

— კი, ბატონო, — უპასუხა ვერამ. — გიგიშაც თან გაიყოლა.

— ყველა მატყუებს. ვითომ ჩემს ამბავს გუბერნატორები და
მაზრის უფროსები კითხულობდნენ. ჩემს ვაჟს უნდა სიცოცხ-
ლეშივე ჩამომართვას ყოველგვარი უფლება, არა, ბატონო! სა-
ნამ სული მიდგას, ოჯახიც ჩემს ნებაზე უნდა იყოს და ქონებაც.
ვისაც მინდა, იმას მოვახმარ. გლეხებს დაუურიგებ, გაჭირვე-
ბულს მივეხმარები. ქეიფში და დროს ტარებაში არავის გა-
ვაფლანგვინებ ხალხის ნაშრომს. ამაზე ნუ დამემდურებიან
ნურც გუბერნატორი და ნურც ჩემი შვილები.

ვერას უნდოდა დაეწყნარებინა მაია და უთხრა:

— ბატონიშვილი შენზე ზრუნავს, შენ არაფერი აგიტეხონ.

ამ საუბრის შემდეგ გრიშა მაიას მართლაც არ გაჰკარებია,
დედას შორიდან ადევნებდა თვალყურს, რომ მოხუცს რამე სა-
წყენი არ შეხვედროდა.

მაიას საწყენი არაფერი შეხვედრია, მაგრამ საზრუნავი და
ყურადსაღები თანდათან ემატებოდა: მაზრაში რევოლუციური
მოძრაობა ძლიერდებოდა, მთავრობის პოლიტიკა სულ უფრო
მკაცრი ხდებოდა. ზუგდიდის მაზრის უფროსმა კელამოვმა, რო-
მელიც განთქმული იყო თავისი სიმკაცრითა და შავრაზმული
სულისკვეთებით, ყაზახებით აავსო სოფლები: აბასთუმანი, კა-
ხათი, ჭაქვინჯი, მუხური. გლეხები ხედავდნენ, რომ ზოგიერ-

თი თავადი და აზნაური პოლიციის დამქაში გახდა. ისინი კლუბებს აბეზღებდნენ, აჭერინებდნენ, რის გამო წოდებათა შორის პოლიტიკური ბრძოლის გარდა, შინაური მტრობა და კინკლაობა ჩამოვარდა.

ასეთ დაძაბულ ვითარებაში ზუგდილში ჩამოვიდა ახალი გუბერნატორი თავადი ჯამბაკურ ორბელიანი, რომელიც ხალხს თითქოს კარგად ექცეოდა, მაიამ დიდად გაიხარა ამ ამბით: რაც არ უნდა იყოს, ქართველი კაცია, შეაჩერებს მტრობასა და ქიშპობას ძმათა შორისო.

მაგრამ მაია მალე დარწმუნდა, რომ ვერც ორბელიანმა მოაგვარა საქმე რიგიანად. ხალხის შევიწროება გრძელდებოდა. საზოგადოების ნაძირალები ყოველნაირად ცდილობდნენ ერთობის დამარცხებას, სულ სხვა სულისკვეთება დამყარდა სოციალ-დემოკრატიული პარტიის ბოლშევიკურ ფრაქციაში. რეაქციის შემოტევის დროს ბოლშევიკები კიდეც მეტ მუშაობას ეწეოდნენ მოწინავე გლეხთა შორის, რათა ხალხი სულით არ დაცემულიყო, რევოლუციურ მოძრაობაზე გული არ გატეხოდა, არ გაჰყოლოდა იმ პარტიებს, რომელთაც რევოლუცია საბოლოოდ დასამარებული ეგონათ. ამ დროს კიდე უფრო მეტ ყურადღებას აქცევდნენ პოლიტიკურ წრეებს, რომლებშიც მოწინავე გლეხები იყვნენ გაერთიანებული. წრის წევრებს უხსნიდნენ, აწავლიდნენ, რაში მდგომარეობდა პარტიათა შორის უთანხმოება და ვის უნდა გაჰყოლოდა გლეხოზა.

* * *

გიგიშა დიდი ხანი არ დარჩენილა გრიშასთან. დედს არაფერი გაუჭირდესო, უთხრა გრიშამ და ზუგდილში დაბრუნების მესამე დღეს ხიბულაში გამოისტუმრა.

— ახლა გვანჯ ჩიქოვანს და მუშნი დადიანს მიშა დადიანიც მიკედლებია და ისიც მხურვალე მონაწილეობას იღებს თურმე ერთობის მოძრაობაში, — უთხრა გიგიშამ მაიას, როცა გრიშას ოჯახის ამბების მოყოლა მოათავა.

— ტყუილად კი არ არის ჩემი საყვარელი ძმისწული მუშნი. იმას რომ კარგი სწავლა-განათლება ჰქონდეს, საქვეყნო კაცი

იქნებოდა, — თქვა ღიმილით მაიამ, — მიშა დადიანს მუშნი ჩა-
ითრევედა ერთობის საქმეში...

— სწორედ ასე ამბობენ, — დაუდასტურა გიგიშამ, — მიშა კი არა, ბევრი სხვა თავადი და აზნაური აუყოლებია. ლეო შენგელაია* ვნახე, ბატონო, ზუგდიდში, თბილისიდან ახალი ჩამოსული იყო. აი სწორედ ლაპარაკი იმას სცოდნია და განათლებაც იმას ჰქონია. წიგნებსაც წერს თურმე. მუშნი და გვანჯისთვის უთქვამს: თქვენ თუ არ ამოუდექით მხარში გლეხობას, მარტო თავის მოვლა გაუჭირდებათო. რევოლუციას ნასწავლი აღამიანები უნდაო. თავისი ერის და თავისი ხალხისათვის თავდადებული. ყველა იმას უსმენდა, ყველა იმას შესციცინებდა თვალეში.

— ქუთაისში ლეო შენგელაიაზე ბევრი ქება გამიგონია, — შეაწყვეტინა მაიამ გიგიშას. — ჯერ სულ ახალგაზრდაა თურმე. ამბობენ კალამი უჭრისო. ღმერთმა უმრავლოს ჩვენს ქვეყანას მაგისტანა სასახელო შვილები.

— გვერდიდან არ იშორებდა მუშნის...

— ეს მითხარ, გიგიშა, სალომეს რა უნდა მუშნისაგან, რატომ გადაჰკიდებია ეს ქალი ჩემს ძმისწულს? — ჰკითხა მაიამ და წარბი შეიკრა. მისმა სახემ მრისხანე გამომეტყველება მიიღო. მას არ უყვარდა პრინცესა და არც მისი ხსენება, მაგრამ იძულებული იყო მასზე ჩამოეგლო ლაპარაკი.

— გადაჰკიდებია რაფერ მერე... უარესი მტერი ღმერთმა დაგიფაროს, — უთხრა გიგიშამ ქალბატონს. — რომ შეუტყვია, თქვენი ძმისწული ერთობას მიემხრო, დაუბარებია თავისთან და შავი ღლე დაუყენებია.

— მაგას ვინ კითხავს, ვის მიემხრობა ჩემი მუშნი, — უფრო შეიკრა წარბი მაიამ. — თავს გასულხარ, სალომე ბატონო! — თქვა მუქარით, — მერე, მერე?

— მერე, შენ ხარ ჩემი ბატონი, — განაგრძო გიგიშამ. — რჯულისა და გვარის მოღალატე ხარო. თავს გვჭრი დადიანებს. უნიფხო ყაზახებს ამოუდექი მხარში და ჩვენს წინააღმდეგ მოუძღვები, რომ მოგვსპონ, მიწასთან გაგვასწორონო. ეს ყაზახები,

* ლეო შენგელაია — მწერალი ლეო ქიაჩელი.

სანამ ჭირდები, მანამ გეფერებიან, თორემ მერე შენც მიგაყო-
ლებენ მეფის მოხელეებსო...

— ვითომ ასე იქნება, გიგიშა? — შეფიქრიანდა მათა, — დუტუ
და ლუკა კიტია ან ივა ქარცხია ჩემზე აღმართავს იარაღს? ეს
როგორ დავიჯერო.

— ძნელი დასაჯერებელი კია, მაგრამ, — ერთხანს გაჩუმდა
გიგიშა და მერე განაგრძო: — იმ ლეო შენგელაიამ თქვა ამას
წინათ მიტინგზე: თუ რევოლუციას დასჭირდა, ჩვენ არავის არ
დავინდობთ, თუნდაც ჩვენი ღვიძლი ნათესავიც რომ იყო-
სო.

— რევოლუციას უდანაშაულო სისხლი რატომ დასჭირდება
ვითომ. არა, გიგიშა, გლახმა იცის ამავის დაფასება. დუტუ, თუ
არ უღალატეს, ისე არც მუშნის წინააღმდეგ აღმართავს ხმაღს
და არც სალომესი. დაეტიოს ის ქალბატონი თავის ტყავში. ნუ
ერევა ქვეყნის საქმეში.

— არ ერევა, ბატონო, ხედავს ერთობის გამარჯვება არას
მოუტანს და რა დასევამს გულხელდაკრეფილს. მუშნის რომ
უარი უთქვამს მისი წინადადებისათვის — თავი დაენებებინა მე-
ფის წინააღმდეგ ბრძოლაზე, დაქადნებია: მე სალომე არ ვიქნე-
ბი თუ შენ ციმბირი არ გაჩვენო. ხომ გახსოვს რა ვუქენი გე-
გელიებსო, შენ უარესს გიზამო. მეორე დღეს ამდგარა და ქუ-
თაისში წასულა გუბერნატორთან.

— მაგას კი ვერ დავიჯერებ, რომ სალომემ ასე გაიმეტოს
მუშნი, — თქვა მათამ.

— რავა ვერ დავიჯერებ, ბატონო! — გაიკვირვა გიგიშამ. —
ჩვენ არც ის გვეჯეროდა, რომ გეგელიებს იმას უზამდა...

— რა უქნა გეგელიებს, კი არ მახსოვს კარგად? — ჰკითხა
მათამ.

— როგორ არ გახსოვს, მათა ბატონო, — უთხრა გიგიშამ
მათას, — სულ ოცდახუთი წლის ამბავია და რამ დაგავიწყა. სა-
ლომეს მოურავამ ესტატე დარასელიამ, ქალბატონის დაუკითხა-
ვად ოცდახუთი კომლი ჭოჭუები გადაასახლა თავიანთი მიწი-
დან, რომ იქ ოჯალეში გაეშენებინა. ფარნა გეგელიამ რომ ეს
გაიგო, ახტა და დახტა. ხომ გახსოვთ რა კაცი იყო. უსამართლო-
ბას არავის აპატიებდა, შვილსაც კი. აზნაურიშვილი იყო, მაგ-

რამ გლესხ უფრო ესარჩლებოდა, ვინემ თავისიანს. ჰოდა, მიუვარდა პრინცესას, ერთი ამბავი დააწია, თუ უკან არ დავიბრუნებია ოცდახუთივე კომლი, მეფესთან ფეხით რომ მომიწიოს წასვლამ, არ დავიზარებო. გადაემტერა ამაზე სალომე, ჭირივით შეიჯავრა. ამ ამბის წინ კიდევე, როცა აშილ მიურატმა თავი მოიკლა და ვილაცამ საფრანგეთში წერილი გაგზავნა, რომელშიც სალომეს ამბავი იყო მხილებული და საფრანგეთის გაზეთებში ერთი ამბავი ატეხილა, იმ წერილის გაგზავნას სალომე ხომ ფარნა გეგელიას აბრალებდა.

— მახსოვს, მახსოვს, როგორ არ მახსოვს, მაშინ სალომემ არა მარტო აშილ მიურატს მოჭრა თავი, მთელი სამეგრელო შეგვარცხვინა.

— დიახ, ჩემო ბატონო, და იმ ძველ შურს ახალიც რომ მიემატა, ეს ველარ მოითმინა პრინცესამ, ფარნას პირდაპირ ვერაფერი გაუბედა, მაგრამ ფარნა გეგელია და მისი მეზობლები კალანდიები ერთმანეთს გადაჰკიდა და აი როგორ: გეგელიების ახლოს იყო რამდენიმე ქცევა მიწა, კალანდიების მიწა კი გეგელიების მიწას ესაზღვრებოდა. მათ ეს მიწები გაცვალეს. შემოდგომაზე, როდესაც სიმინდის მოტეხის დრო მოვიდა, სალომეს მოურავმა კალანდიები დაიბარა:

— თქვე უბედურებო, ასე როგორ გაგასულელეს გეგელიებმა. გლახა მიწა კარგში გაგიცვალეს, მათი ყანა თქვენს ყანას სჯობს. თუ გინდათ ყოველთვის თქვენი დამხმარე ვიყო, მიდით, გეგელიას ყანა მოტეხეთ, სიმინდი სახლში წაიღეთ, — უთხრა მოურავმა.

— არ ღირს, ბატონო, გეგელიები კარგი ხალხია, არც ჩვენი ყანაა ისეთი ცუდი, რომ ამისათვის აყალმაყალი ავტეხოთ, — უპასუხეს კალანდიებმა. არ მისცა საშველი მოურავმა. მეორე დღით, გეგელიებმა დაინახეს კალანდიები, რომ მათ ყანას ტეხდნენ. ფარნა გაემართა მათკენ. რას შვრებით, კაცო? ეს რა საქციელია, როგორ გეკადრებათ, — მიმართა ფარნამ. კალანდიებს ჯოხები ჰქონიათ მომაგრებული, დაესივნენ ფარნას, დაუწყეს ცემა. ფარნამ შესაშინებლად რევოლვერი დასცალა, ვილაცას ტყვია ფეხში მოხვდა. კალანდიებმა კი ფარნას თავი გაუტეხეს. ეს ამბავი ფარნას ძმას გაეგო და გამოქცეულა ძმის და-

სახმარებლად. დაერია კალანდიებს ჯოხით, ერთი მათგანი ხელში შემოაკვდა. ფარნა და მისი ძმა სამუდამოდ ციმბირში გადაასახლეს, იქ რევოლუციონერებს გაეცნო თურმე ფარნა, მათთან ერთად მუშაობდა. მალე ციმბირიდან შევბულებით ჩამოვიდა აქ, თავისი და თავისი ძმის საქმე დაარღვია, მალე გათავისუფლდნენ და თავიანთ ოჯახებს დაუბრუნდნენ. ფარნა რომ მოხერხებული კაცი არ ყოფილიყო, ხომ დაიღუპებოდა ციმბირში. აი, ასეთია ჩვენი პრინციპა, მათა ბატონო. მე ძალიან მუშინია არაფერი აუტეხოს მუშნის. დღეს თუ ხვალ ის სისხლისმსმელი ალიხანოვი თავისი რაზმით სამეგრელოში შემოვა და სალომე მას პურმარილით შეხედება უთუოდ. რასაც უნდა იმას გააკეთებინებს.

— ფიქრი ნუ გაქვს, ჩემო გიგიშა. სანამ სული მიდგას, მუშნის, მიშა დადიანს, გვანჯ ჩიქოვანს და მათი საქმის კაცებს არაფერს გავუჭირვებ. მთელ ჩემს ქონებას შევწირავ, თუ მათ დასჭირდათ...

* * *

სოფლის სკოლა მალლობზე იდგა. ის იყო დუტუმ სკოლას ჩაუარა და გაიფიქრა, ჩემი კაკო ახლა გაკვეთილზეაო, რომ კაკო და მისი ამხანაგი, ქერივი მაიკო ქუთელიას ვაჟი შოთა შემოხვდა.

— სად მიხვალთ, კაკო? — ჰკითხა დუტუმ შვილს, — ასე ადრე გაგიტავდათ გაკვეთილი?

— არა, მასწავლებელმა გაგვათავისუფლა, — მიუგო კაკოს მაგივრად შოთამ დუტუმს. — წუხელ ძროხა დაგვეკარგა. მთელ დამე ვეძებდით, ამ დილითაც შემოვიარეთ ეს არემარე მე და დედამ და ვერ ვნახეთ. მგელი დაგლეჯდაო, ვიფიქრეთ, მაგრამ ახლა კაკომ მითხრა, დილით რომ თხები გადავდენე, თქვენი ძროხა ჩვენი ეზოს უკან ტყეში ვნახე დაბმულიო.

— კი, მამა, ჩემი თვალით ვნახე. შოთას ძროხა იყო ნამდვილად.

— ვინ დამალავდა იქი — გაიკვირვა დუტუმ. დაფიქრდა და მერე ბავშვებს უთხრა: — თქვენ სკოლაში დაბრუნდით. ძროხის ამბავს ნურავის ეტყვი. ამაღამ მე თვითონ მოვიყვან, შოთა, ძროხას. — დაამშვიდა ბავშვი.

კაკომ და შოთამ გაკვირვებით გადახედეს ერთმანეთს, მაგრამ დუტუს არაფერი უპასუხეს, შებრუნდნენ და სკოლისაკენ გასწიეს.

სოფელში ყველამ იცოდა, რომ მაიკოს ძროხა დაკარგოდა. წერილი შვილები ჰყავდა სარჩენი. სოფელმა რომ მაიკოს ძროხის დაკარგვის ამბავი გაიგო, ყველა შეწუხდა. რაღა ობოლსა და ღატაკს მოპარესო, იმ წყეულებმა, — წუხდა ქალი და კაცი, მებობლები კი მაიკოს გულს უკეთებდნენ — თავს ნუ იღლი, ამალამ ვინმეს ძროხას ჩაყვება ოჯახში, დილით აქ მოგიყვანენო. ერთობის შემდეგ ქურდობა მოსპობილათ. ახლა ვინ აღმოჩნდება ისეთი ურჯულო, რომ შენისთანა გაჭირვებულს ერთადერთი მარჩენალი ძროხა მოგპაროსო.

დუტუ კი შელამებისთანავე ტყის ბილიკს დაადგა, თან კაკო წაიყვანა, რომ ადგილი ეჩვენებინა, სადაც ქერივის ძროხა იყო დაბმული.

შემდეგ ვაჟი შინ გაუშვა, თვითონ შტაბში მივიდა, ორი შეიარაღებული რაზმელი თან წაიყვანა და იმ ადგილთან შორი-ახლო ჩასაფრდნენ. შუალამე გადასული იქნებოდა, რომ ტყეში ხმადაბალი ლაპარაკი მოისმა. ვილაცამ ჭრაქიც აანთო, უცნობები ახლოვდებოდნენ. დუტუმ იცნო ერთი მათგანი, მაგრამ თვალს არ დაუჯერა, გარკვეულად გაიგონა მათი ლაპარაკი:

— როგორც ჩანს, ჩემო ბერუ, ძროხას სოფლიდან ვერ გავიყვანთ, ყველგან ჩვენი რაზმელები დგანან, თორემ გაკვეთდებოდით, ძალიან მსუქანია ეს ოხერი და ზუგდიდში კარგ ფასში გაიყიდებოდა.

— როგორ, ხორცად არ წაიდება თუ? თავ-ფეხი და ტყავი აქვე დავმარხოთ, მერე მე მოუვული მაგათ, შენ სულ არ შეგაწუხებ, ბესა!

დუტუს თავში აუვარდა სისხლი. იცნო, რომ ეს ბესარიონ მხეიძე იყო, მისი ერთ-ერთი საიმედო რაზმელი. ბერუ კი ცნობილი იყო ცხენის ქურდობით, ერთობის შემდეგ ბოიკოტგამოცხადებული.

— ბიჭო, არ გაუწყრეთ ღმერთი და მართლა არ დაკლან ძროხა! — მიუბრუნდა დუტუ რაზმელებს და მოულოდნელად მიიჭრა

ქურდებთან იმ დროს, როდესაც ბერუმ მეშის ქარქაშიდან ალესილი დიდი დანა ამოიღო.

— არ დაიძრეთ, თორემ გაგათავუთ! — შესძახა მან მხეიძეს და გულზე რევოლვერი მიაბჯინა. ორივე რაზმელი ბერუს წინ გაჩნდა.

— არამზადავ, აღარ ტოვებ ძველ ხელობას? — შეანჯღრია ერთმა მათგანმა ბერუ.

— ღმერთი, ხატი, მე მაგ საქმე მიტოვებული მაქვს, მაგრამ საშველი არ მომცა ბესამ: დაკვლასა და გატყვევაში მომეხმარეო.

— ბესა, შე უსინდისო, რატომ შემარცხვინე კაცი, ერთ ძროხაში როგორ გაცვალე პატიოსანი სიტყვა და ვაუკაცობა? ამას ჰქვია ერთობის სამსახური? — მიუბრუნდა ღუტუ ბესას.

— დამანებე თავი, გაწიე იქით რევოლვერი, შე ლაწირაკო, შენი ერთობაც და შენი... — და გაცოფებულმა მხეიძემ ღუტუს უდიერი სიტყვით შეაგინა, თან იარაღის წართმევა მოუნდომა. რევოლვერი გავარდა, გულგამირული მხეიძე მოცელილივით დაეცა. ამ არეულობაში ჭრაქი ჩაქრა. ბერუმ სიბნელით ისარგებლა და ძუნძულით თავის სახლისკენ მოკურცხლა. სროლის ხმაზე რაზმელები შტაბიდან გამოცვივდნენ, ალელეებული ღუტუ შტაბისკენ წავიდა, გზაზე შეხვედრილ რაზმელებს ყველაფერი უამბო და არეული ნაბიჯით გზა განაგრძო.

უკვე აშკარა ხდებოდა, რომ ერთობა მარცხდებოდა. ღუტუს გადაწყვეტილი ჰქონდა, რაკი ამას საქმის ვითარება მოითხოვდა, ყველაზე გვიან დაეყარა იარაღი. „მაგარ ბიჭებს“, როგორც თვითონ ეძახდა, გოშუას, ქუთელიას და დგებუაძეს არ იშორებდა.

გუდუ გოშუა, აექსენტი ქუთელია და ჯოდორია დგებუაძის შვილიშვილი, ნესტორ დგებუაძე როგორც კი დარწმუნდნენ, რევოლუცია მარცხდება, თვითმპყრობელობას მიემხრნენ ჩუმად. მაზრის უფროსის კელამოვის მარჯვენა ხელი გახდნენ. ღუტუ მათ ენდობოდა, განუყრელად მათთან დადიოდა და დამალვასაც მათთან ერთად აპირებდა. ის ვერ შორდებოდა თავის კუთხეს, ზირიქით, ერთობის საქმეში მონაწილეებს თვით უფრთხილდებოდა, აქეთ-იქით დასამალავად აგზავნიდა საიმედო პირების

ოჯახებში. არ იცოდა, რომ პოლიციის მეშვეობით გახრწნა თვით მის რაზმში იყო დაწყებული.

დუტუს ბევრჯერ უთხრა მამამ, ნესტორ დგებუაძეს ნუ ენდობი, პაპამისის ჯავრი შენზე არ იყაროსო. მაგრამ ბუნებით გულკეთილმა დუტუმ გულში არ გაივლო მამის შიში. დუტუ ძმასავით ენდობოდა ნესტორს.

კელამოვი ყოველ ღონეს ხმარობდა, რომ აღიხანოვ-ავარსკისათვის თავი დიდ მოღვაწედ ეჩვენებინა და მის შემოსვლამდე ისეთი რამ გაეკეთებინა, ავტორიტეტს აიმაღლებდა და მთავრობისადმი ერთგულებას დაამტკიცებდა.

ნარაზენის მალლობი, სადაც ასწლოვანი რცხილების დიდ შტოები გადაშლილა, ერთობის დროს კიდევ უფრო მიმზიდველი გახდა. აქ ეწყობოდა ღამლამობით კრებები და გაისმოდა სიტყვები, რომლებიც ხალხს გულზე მალამოდ ეფინებოდა. ჩამოივლიდნენ სოფელში ათისთავეები და ხმამაღლა დაიძახებდნენ:

— ამხანაგებო, ამაღამ ნარაზენში ძალიან კარგ პროპაგანდისტს ველით, ყველა უნდა შევიკრიბოთო.

მართლაც, სოფელი აფუსფუსდებოდა. ყოველი ოჯახი სახელდახელოდ ივახშმებდა. მარტოხელა ქალები ბავშვებიანად მიდიოდნენ ერთობის კრებაზე. ნარაზენი სოფლის საყვარელ ადგილად გადაიქცა.

ბოიკოტგამოცხადებული თავადაზნაურები და ბობოლა გლეხები დაცინვით უყურებდნენ კრებაზე მიმავალთ და გული მტრული გრძნობით ევსებოდათ. ახლა ყველაზე დაღვრემილად ეს ნარაზენის მალლობი გამოიყურებოდა. რცხილები მწვანე ფოთლებიდან გაძარცულიყო, ობლად ქანაობდნენ მისი ტოტები. მხართემოზე წამოწოლილი დუტუ სივრცეს გასცქეროდა. რაზე არ ფიქრობდა იმ წუთში იგი, მაგრამ რევოლუციის დამარცხებას ვერასგზით ვერ ურიგდებოდა. წითელი რაზმის ხელმძღვანელს არავითარ შემთხვევაში არ უნდოდა რაზმის დაშლა, ბრძოლის მიტოვება. ჯერ კიდევ რამდენიმე დღის წინ მოვიდა სამაზრო კომიტეტის განკარგულება, რომ რაზმები დაეშალათ და რაზმის წევრების გადარჩენაზე ებრუნათ. დუტუ ფიქრებიდან მხოლოდ მაშინ გამოერკვა, როცა სამი შეიარაღებული კაცი რცხილებს მოუახლოვდა. ესენი დუტუს „მაგარი ბიჭები“ იყ-

ნენ. მათ ცხენის ქურდი ბერუ ახლდათ. ისინი დიდი ხანია ეძებდნენ ხელსაყრელ დროს დუტუს მოსაკლავად და აი ახლა მოულოდნელად წაადგნენ თავზე მარტოლმარტოს.

დუტუ ამხანაგების ნახვამ ძლიერ გაასარა, მაგრამ ბერუ რომ მათთან დაინახა, არ მოეწონა. არც მისალმებია მას.

— თქვენც ვერ ტოვებთ ამ ადგილს, ბიჭებო? უთხრა მან მოსულებს. — არა მჯერა, რომ დაიღუპა ის იმედები, რომლებსაც ჩვენ ამ ცაცხვების ქვეშ გამოეთქვამდით. ნუთუ ტყუილად ჩაიარა ამდენმა შრომამ და ჯაფამ. ნუთუ დავმარცხდით. დავაშინა ალიხანოვის რაზმმა და სოროებში უნდა შევეძვრეთ... გუშინ ზუგდიდში ვიყავი. ლეო შენგელაიამ და ესტატე ნაჭყებიათ დამიბარეს. იცით რა მითხრეს: იარაღს კი არა ვყრიო, იატაკქვეშ ბრძოლაზე გადავდივართ. არ იფიქროთ ბრძოლა წაგებულია, გული არ გაიტეხოთ.

— მერე შენს სახლს რომ იატაკი არა აქვს, დუტუ ბატონო! — უთხრა დაცინვით ნესტორ დგებუაძემ.

დუტუს არ მოეწონა მისი კილო. შეხედა და დაინახა, რომ მარჯვენა ხელი წინ, ქამარში გარჭობილი რევოლვერის ვადაზე ედო.

— ჩემს სახლს თუ არა აქვს, შენს სახლს ხომ აქვს ნესტორ!

— ბაბუაშენის ჯარგვლის ცეცხლს რომ არ დაეწვა ჩემი სასახლე, მაია დადიანსა და პრინცესასაც კი არ ექნებოდა ახლა ისეთი სასახლე, — მუქარის კილოთი მიუგო ნესტორმა.

— რაში დაგჭირდა ჯოლორიას სასახლის გახსენება, ნესტორ? — თვალეში შეხედა დუტუმ, მერე გულუ გომუას და აქესენტის ქუთელიას გადახედა.

იმათაც რევოლვერის ვადაზე ედოთ ხელი. დუტუმ იგრძნო, რომ „მაგარი ბიჭები“ სასიკეთოდ არ იყვნენ მოსული.

— იმისათვის დამჭირდა ამის გახსენება, რომ კელამოვმა შემოგიტოვალა, მე კარგად ვიცი რისთვის დაგიბარა ლეო შენგელაიამ და ესტატე ნაჭყებიათ, ის ვაჟბატონები უკვე გაბაწრული მყავს ციხეშიო.

— რავა, ლევეუშკა და ესტატე დაიჭირეს? — წამოიძახა უცებ დუტუმ.

— სარუქრად უნდა მიართვას ალიხანოვს, — უპასუხა ნესტორმა. — შენ კი რახან ხის იატაკიანი სახლი არა გაქვს, ამიტომ მიწის იატაკის ქვეშ უნდა ჩაბრძანდეთ.

— რას ჩერჩეტობ, ბიჭო! — შეუბღვირა უცებ დუტუმ და ცაცხვზე მიყუდებულ თოფისკენ გადახტა, მაგრამ გავარდა ნესტორის რევოლვერი.

დუტუმ მოასწრო, ცაცხვს ამოეფარა, ტყვია აიციდინა, თოფს ხელი წამოავლო და პირდაპირ შუბლში ესროლა ნესტორს.

— მომკლა ურჯულომ! — ამის წამოძახებულა შესძლო ნესტორმა. მისმა ამხანაგებმა კი გონს მოსვლა ვერ მოასწრეს, რომ მათ ზურგში ცივი ლულის შეხება იგრძნეს და ხელები ასწიეს.

გალიმებული და გახარებული დუტუ საფარიდან გამოვიდა. „მაგარი ბიჭების“ უკან გვანჯი ჩიქოვანი, მუშნი დადიანი და მიშა დადიანი იდგნენ.

— კარგ დროს მოვესწართ, — უთხრა მუშნიმ დუტუს. — ამ ვირთხებს ზუგდიდიდან გამოვყევით. გავიგეთ რა დავალებით მოვიდნენ შენთან.

— ღმერთი მოწმეა, არ მინდოდა ამ ოხრის მოკვლა, — სინანულით თქვა დუტუმ და ნესტორის უსულო სხეულს დააცქერდა. — ძაღლის მოდგმაა და ძაღლურად შემომაკლა თავი.

— ამათ რაღა ვუყოთ? — იკითხა მიშამ.

— ოღონდ სიცოცხლე გვარუქეთ და სამუდამოდ თქვენი მონები ვიქნებით, — მუხლებზე დაეცნენ „მაგარი ბიჭები“, ფეხებქვეშ ჩაუვარდნენ დუტუს.

— რაღად ღირს თქვენი სიცოცხლე, თქვე ღორის შვილებო! — უთხრა მათ გვანჯი ჩიქოვანმა. — თქვენი ხელით უნდა მოიკლათ თავი.

— მაგდენი ვაჟკაცობა მაგათ ვინ მისცა, — გაიცინა მიშა დადიანმა და ბერუს დააცქერდა. დიდუ, ეს ბერუია ცხენის ქურდი არ არის? რა დიდებული კომპანია შეყრილა. ვინ შეუკედლებიათ ამ ოხრებს. ხომ გახსოვს, დუტუ, რომ გეუბნებოდი, ესენი სანდო კაცები არ არიან-მეთქი, არ მიჯერებდი.

— შევცდი, ბატონო მიშა.

— ბატონო კი არა, ამხანაგო-თქო, შე კაცო!

— კარგი კაცი ამხანაგიც არის და ბატონიც, — გაულიმა დუტუმ, — რა ვუყოთ ახლა ამ ოხრებს.

— რა ვუყოთ და გავუხვრიტოთ ეგ უტვინო თავები, რაეარც ნესტორს გაუხვრიტე შენ.

— არა, ნუ ვიზამთ მაგას, — იუარა დუტუმ, — ამის ცოდვა რომ დავიდე, ის მაწუხებს და ესენიც რაეა დავხოცოთ.

— მოლალატეს სხვა სასჯელი არა აქვს, ბიჭო, — უთხრა დუტუს მუშნიმ. — გაიხსენე რისთვის მოკლა მამამშენმა ჯოლო-რია.

— მახსოვს, მაგრამ მან ომში, ბრძოლაში უღალატა სამშობ-ლოს.

— ამათ, რაეა, ქეიფის დროს გიღალატეს თუ? — გაიცინა გვანჯიმ.

— არა, მაგრამ კაცის მოკვლა მაინც ცოდვაა. — ყოყმანობდა დუტუ.

— მე გეტყვით რა ვქნათ, — სახე გაუბრწყინდა მუშნის. — ამ ქურდმა, — ფეხი წაკრა ბერუს, — ისეთი დაღის დასმა იცის, ისე გადააკეთებს მოპარულ ცხენის თეძოზე დაღს, რომ ეშმაკი ვერ იცნობს.

— მერე, დაღი რა შუაშია აქ?! — გაიკვირვა გვანჯიმ.

— შუბლზე დააწეროს ამ ყურუმსაღებს, რომ მოლალატე-ტეები არიან.

— დააწერ, წიე? — ჰკითხა გვანჯიმ ბერუს.

— ოღონდ არ მომკლათ და ყელს გამოვჭრი ორივეს.

— მაგას კი იზამ, შე ავაზაკო, აბა სიკეთე შენგან ვის გაუ-გია, — შეუბღვირა მიშამ. — მაშ, შეუდექი შენს საქმეს, იცოდე, ისე დააწერე, რომ ადვილი წასაკითხი იყოს. წერა ხომ იცი?

— რაეა არ ვიცი, — დაიღრიჯა ბერუ, — მითხარით რა დაეა-წერო და ისე დავხატავ, რომ ბავშვმაც კი წაიკითხოს.

— დააწერე შუბლზე — „მოლალატე“.

— უი, ზედგამოჭრილი მათი სახელებია, — წათამაჰდა ბერუ.

— ამ ვირთხას უყურეთ, რაეა გამოცოცხლდა, — შუბლი შე-იკრა მუშნიმ. — შენ რაღა გიყოთ? ამას არ იკითხავ?

— მე ქურდობის მეტი ჩემს სიცოცხლეში სხვა სიგლაზე არაფერი ჩამიდენია. ამათ შემაცდინეს. მარტო ის ვუთხარი, თუ სად იყო ახლა დუტუ. მის მოკვლას ისე არ ვიფიქრებდი, რავარც ჩემი შვილის მოკვლას არ ვიფიქრებ.

— კარგი, კარგი მორჩი მალე შენს საქმეს! — წამოაგლო ზეზე გვანჯიმ ბერუ.

რამდენიმე წუთში დადაღული „მაგარი ბიჭები“ ბერუმ წინ წაუყენა დუტუს და მის მეგობრებს.

— კარგად გიმუშავნია, ყოჩაღ! — შეუქო მუშნიმ ხელობა. — ახლა ხელი რომ არ მოიკიდონ და შენი ოსტატობა არ გააფუჭონ, ზვანჯრები დაატყერი და წინ გაირეკე.

— კი ბატონო. კიდევ რას მიბრძანებ.

— მეტს არაფერს. თავისუფალი ხარ. თქვენ კი, — მიუბრუნდა გუდუ გოშუას და აქვსენტი ქუთელიას. — თუ ერთ კვირაში ლეო შენგელაია და ესტატე ნაჭყებია ციხიდან არ გაგაპარებიან, თქვენს სახლ-კარს ცეცხლს მივცემთ, ცოლ-შვილს კი ამოგიწყვეტთ. აბა, ისე მოკურცხლეთ ახლა, რომ უკან არ მოიხედოთ.

სოფელმა იმ დღესვე გაიგო „მაგარი ბიჭების“ ღალატის ამბავი. ხალხის აღშფოთებას საზღვარი არ ჰქონდა. დიდი და პატარა დუტუს მარჯვენას ლოცავდა. ქებითა და აღტაცებით იხსენიებდნენ გვანჯი ჩიქოვანს, მუშნი და მიშა დადიანებს. მათ მაიამ სამეგრელოს სამი მუშკეტერი უწოდა.

მესამე დღეს ლეო შენგელაია და ესტატე ნაჭყებია ციხიდან გააპარეს. მაზრის უფროსი კელამოვი ცოფს ყრიდა. რა საჩუქარი მქონდა ალიხანოვისთვის და ახლა ხელცარიელი უნდა დაეხვდყო. არ აკვირებდა დუტუ ჯგერენაია და მისი საქმე, მაგრამ არაფრით არ უნდოდა დაეჯერებინა, რომ მთავრის გვარის შთამომავალნი დადიანები და ისეთი დიდგვაროვანი თავადი, როგორიც იყო გვანჯი ჩიქოვანი, სოციალისტებს იყვნენ აყოლილები. ნუთუ ისეთი ბეცები არიან ეს მუშკეტერები, — ამბობდა იგი დაცინვით, — რომ ვერა ხელავენ თავიანთი ხელით სამარეს ითხრიან.

მაიას ყურამდე მიადწია კელამოვის გაკვირვებამ. ეამა მოხუსს, რომ ასე ფიქრობდა მეფის მოხელე, თან გული ეტკინა, —

რატომ მისი შვილები არ ჰგავდნენ მუშნისა და მიშა და-
დიანს.

„ჩემი ბრალია, ვერ გავზარდე ისინი, — ადანაშაულებდა
მაია თავის თავს, — ძიძებს მივეცი გასაზრდელად... ვითომ მე
რა ქვეყნის საქმეებს განვაგებდი, რომ შვილების მოვლის დრო
არა მქონოდა. ვინ ეშმაკმა მოიგონა შვილის გაძიძავება მოიწყ-
ვეტ ბუბუდან ბავშვს და სხვის ანაბარა მიატოვებ რამდენივე
წლით... არ დაემსგავსნენ ჩემი უჩა და გრიშა მამაჩემს...“

მაია ფიქრიდან ონისიმე ქვარცხიამ გამოიყვანა. ის მაიას
ჰყავდა დაბარებული. ონისიმე ივას ამბის გასაგებად იყო წასუ-
ლი ზუგდიდში და ამ დღილი დაბრუნებულიყო იქიდან. მაიას
ისე ესწრაფებოდა ივას ამბის გაგება, რომ შეიტყო თუ არა ონი-
სიმე ჩამოვიდაო, მაშინვე ბიჭა აფრინა მასთან.

ივა ქვარცხია და ლუკა კიტია ზუგდიდის ციხეში ისხდნენ.
კვლამოვი მათ გასამართლებას დღიდან დღეზე სდებდა, რომ
ალიხანოვს მოესწრო და სამხედრო ტრიბუნალს გაესამართლე-
ბინა.

ამოვიდა თუ არა ონისიმე აივანსე, მაიამ პირველად შვილის
ამბავი ჰკითხა.

— რა ქენი, ონისიმე?

— რას ვიზამდი, ქალბატონო, — მიუგო ნაღვლიანად მოხუც-
მა. იგი შვილის ამბავს ისე გაეტეხა, რომ ათი წელი ხანი მო-
მატებოდა. — ალიხანოვს ახალ სენაკში უკვე მოუთავებია თავი-
სი საქმე. ხობისკენ წამოსულა თურმე, მაგრამ ის ღვთისნიერი
ხობის ბოქაული, სამსონ ჩიქოვანი შეგებებია ქვალონში და ისე
გაუცილებია ხობიდან, ერთი თოფი არ გავარდნილა, ერთი სახ-
ლი არ დაუწვავთ. დღეს ალიხანოვის რაზმი ცაიშში დათარე-
შობს ალბათ.

— მერე, მერე, რა ეშველება ივასა და ლუკას? — შეიცხადა
მაიამ. — დაჯექი, ადამიანის ფერი არ გადევს. — სკამი და-
უდგა.

ონისიმემ გაკვირვებით შეხედა. მაიამ დაუდგა სკამი!.. გული
აუჩუყდა მოხუცს, თვალებზე ცრემლი მოადგა. ერთხანს ორივე
ჩუმად იჯდა. მერე მაიამ დაარღვია მყუდროება.

— გაგიშას უთხარი ეტლი მომიშალოს. სულიც რომ არ მიმ-

ყვეს ზუგდიდამდე, მაინც წავალ, ვნახავ ალიხანოვს. ადამიანის შვილია, ქაჯი ხომ არ არის. ვთხოვ სიცოცხლე მაინც შეუნარჩუნოს ივას და ლუკას.

ონისიმე ყურსა და თვალს არ უჯერებდა. მაია, ეს თითქმის ას წელს მიღწეული ქალი, საკუთარი შვილისთვისაც რომ არ დაიმცირებდა თავს სხვასთან, ზუგდიდში მიდის იმ ბიჭების გამოსახსნელად, რომლებიც თავადებსა და მემამულეებს უპირებენ მოსპობას.

— შენ რომ ჩემი ბიჭის დასახსნელად ზუგდიდში წასვლა მოინდომე, ამით ისეთი პატივი დამდე, თითქოს უკვე შინ მოგეყვანოს ივა, — უთხრა ათრთოლებული ხმით ონისიმემ მაიას, — მაგრამ ტყუილად წაბრძანდები, მაია ბატონო. ის წყეული გენერალი, ღმერთი რომ ჩამოვიდეს ციდან, იმის თხოვნასაც არ შეიწყნარებს თურმე.

— მაშ, რა გვეშველება, ონისიმე? ასე გულხელდაკრეფილი ხომ არ უნდა ვუყუროთ ამ ამბავს.

— დუტუ ზუგდიდშია. ამ საღამოს კელამოვი და მისი „სტრაჟნიკები“ ჭითა წყართან შეეგებებიან ალიხანოვს. ამ დროს დუტუ, მუშნი, მიშა და გვანჯი ციხეს დაეცემიან. თუ ბედი მაქვს, დაიხსნიან ჩემს ბიჭს, თუ არადა, თავი რაღად მინდა მერე ცოცხალი.

— ეს კარგად მოუფიქრებიათ, — შუბლი გაიხსნა მაიამ. — ნუ გეშინია, ონისიმე, დუტუს და მუშნის რაზმი ზუგდიდის ციხეს რავა ვერ გატეხენ. მაგრამ ერთი ეს მითხარი, შენ რამ წამოგიყვანა ამ დროს ზუგდიდიდან? — ჰკითხა გაკვირვებულმა მაიამ.

— არ გამაჩერა მუშნიმ. წადი შინ, აქ მაინც არაფერში გამოგვადგები, ოჯახი გახიზნე, სახლს დაგიწვავენ, შენც დაიშალე, თორემ მოგკლავენო.

— ნუ გეშინია, ონისიმე, შენ სახლ-კარს არ დავაწვევინებ. არც ისე დაცემულა მაია დადიხე, რომ თავისი სოფელი ვერ იპატიოს. ოჯახი კი გახიზნე და შენც თავს უშველე. ქარიშხალი გაივლის. ცხოვრება თავის კალაპოტში ჩადგება. ჩვენ ვერ მოვესწრებით, თორემ ასე კი არ იქნება ყოველთვის, გლეხობა გამარჯვებს, მოიკრებს ღონეს და ისევ გაილაშქრებს მეფის წი-

ნაადმდეგ. გლახს შემდეგში მეტი გამოცდილება ექნება ამ საქმეში. შეადარე აბა ახლანდელი ამბავი, ჩვენი გლახობის ცოდნა და გამჭვრიახობა უტუ მიქავას აჯანყებას. გლახთა აჯანყება მაშინ უფრო ძლიერი იყო თუ ახლა?

— რა შედარებაა, ბატონო, ალბათ, თუ თვითონ პარტიებმა არ შეუშალეს ხელი ერთმანეთს; თურმე ერთი პარტია ამბობს: რევოლუცია არ არის საჭირო, საკმარისია მეფემ ცვლილებები მოახდინოს და მეფე დავტოვოთ, მეორე კი ამბობს: იარაღით ვიბრძოლოთ, მეფის მთავრობა დავამხოთ, ჩვენ მიერ არჩეულ მთავრობას დავავალოთ ქვეყნის საქმე ისე მოაწყოს, რომ მოისპოს შთანასწორობა, ჩაგვრა და ყველას კარგი ცხოვრება ექნესო.

— ამათ კარგად უთქვამთ, — მოეწონა მაიას, — ყველამ უნდა იცხოვროს კარგად, რატომ უნდა იტანჯოს ერთმა და იფარფაშოს მეორემ... ჰო, წადი, ონისიმე, ნუ აგვიანებ... მოდი აქ, გააკოცებ, მშვიდობის გზას გისურვებ. ოჩხომურს შეაფარე თავი. ივასი ნუ გეშინია. მუშნი და ღუტუ ცხრა კლიტიდან გამოიყვანენ...

* * *

როცა მაზრის უფროსი კელამოვი გენერალ ალიხანოვ-ავარსკის ზუგდიდიდან ექვსი კილომეტრის მოშორებით მდინარე ჭითა წყართან პატაკს აძლევდა, ამ დროს ღუტუ და მუშნი დადიანი ორი მხრიდან დაეცნენ თავიანთი მცირე რაზმით ზუგდიდის ციხეს. გაათავისუფლეს ყველა პოლიტიკური პატიმარი და ისე გავიდნენ ზუგდიდიდან, არც თვითონ მოუკლავთ ვინმე, არც მათი რაზმის წევრი დაჭრილა.

ასეთი წარმატება მუშნი დადიანის მოხერხებულობის და ვაჟკაცობის შედეგი იყო. ალიხანოვის დამსჯელი ექსპედიციის ოფიცრის ფორმაში გამოწყობილმა, შავი ულაცო მიაგლო ციხის ჭიშკართან. გუშაგმა დაინახა თუ არა „ოფიცერი“, გამოიჭიმა და სამხედრო სალაში მისცა. გააღე ჭიშკარი, უბრძანა სუფთა რუსულით მუშნიმ. გუშაგმა არ დააყოვნა, ფართოდ გაუღო ჭიშკარი ულაცს, რომელსაც ძლივს აკავებდა „ოფიცერი“ და

თვითონ განზე გადგა, რომ არ გაეტანა გადარეულ პირუტყვს.

— ვაშა-ა! — დასჭექა მუშნიმ და ვერ მოასწრო ულაყის ადგილიდან მოწყვეტა, რომ ოცი ცხენოსანი, თითქოს მიწიდან ამოძვრნენო, ლანქერივით მოაწყდა ციხის ალაყაფის კარს.

— ვაშა-ა! — გამოეხმაურნენ პატიმრები, რომლებიც ამ დროს ეზოში სასეირნოდ იყვნენ გამოყვანილი. მათ წინასწარ იცოდნენ მუშნის გეგმა და მზად იყვნენ. იცოდნენ, შემოიჭრებოდნენ თუ არა მუშნის კაცები ციხის ეზოში, მაშინვე უკან უნდა შემოსხდომოდნენ ცხენზე რაზმელებს, ვინც ვისთან მოხვდებოდა.

— აქეთ, ივა! — დაუძახა ღუტუმ ივას, რომელიც პირველი მიეგება მოსულებს, ხელი შეაშველა ივას და უკან მოიგდო.

გუშაგებმა და ციხის უფროსმა გონს მოსვლა ვერ მოასწრეს, რომ რაზმელები ისეთივე თავბრუდამხვევი სისწრაფით გაიჭრნენ ციხის ეზოდან თავისი ნადავლით, როგორითაც შემოიჭრნენ ხუთი წუთის წინ.

მ ო თ ა რ ე შ ე ნ ი

ციხიდან პატიმრების გატაცებით გაბოროტებული ალიხანოვ-ავარსკი ყველაზე სასტიკად მოექცა ზუგდიდის მაზრას. სოფლებში გმინვა და კვნესა ისმოდა. ცეცხლი და კვამლი სახლიდან სახლზე გადადიოდა. ისმოდა ქალების კივილი, ბავშვების ტირილი, მოხუცთა მოთქმა და გოდება.

პლასტუნები აუპატიურებდნენ ქალებს, ძარცვავდნენ ოჯახებს, აპატიმრებდნენ გლეხებს მიზეზით თუ უმიზეზოდ. ხიბულაში მაიას შიშით არ შემოსულან ალიხანოვის პლასტუნები, მაგრამ კელამოვმა ღამით ჩუმად შემოგზავნა რამდენიმე პლასტუნი და ცეცხლი წაუკიდა ღუტუსა და ონისიმეს სახლ-კარს. ისე გადაწვეს მათი სახლები, ბოსლები, სასიმიანდეები და საქათმეებიც კი, რომ პირტიტვლად მოწმინდეს იქაურობა.

მაია მაშინვე მიხვდა, რომ ეს კელამოვის გაკეთებული იყო, მაგრამ აბა ვისთან უჩივლებდა.

ალიხანოვმა ხიბულას გვერდი აუარა და პირდაპირ ჭაქვინ-ჯისაკენ წავიდა. ხალხს მაიას სასახლეში დამალვის და ხიბულაში თავის შეფარების იმედი მიეცა.

დამარცხების შემდეგ დარბეული ახალგაზრდობა ტყეს შეეხიზნა. მათ, ვინც მტკიცე რწმენისა და შეგნების იყვნენ, არ შეუბღალავთ ერთობის სახელი. ზოგი კი ასცდა გზას, ისარგებლეს შერჩენილი თოფ-იარაღით, გადავარდნენ და, ხალხის სახელით სამოღვაწეოდ გამოსულებმა, ხალხის ძარცვა დაიწყეს.

ყოფილი რაზმელების უმრავლესობა იმედიანად შეჰყურებდა მომავალს, ერთგულად განაგრძობდა თავისი იღვის ხალხში განმტკიცებას, რომ ხალხს გული არ გატეხოდა, მისი რწმენა არ შერყეულიყო. ბევრი მათგანი დააპატიმრეს, ზოგი უთანასწორო ბრძოლაში მამაცურად იღუპებოდა.

დუტუსა და მუშნის რაზმმა სოფელ ხორშს შეაფარა თავი. ტყეში იმალებოდნენ. ასე გაატარეს მთელი შემოდგომა. ზამთარში, როცა ალიხანოვ-აეარსკი სამეგრელოდან გავიდა, რაზმელები თავიანთ სახლ-კარს დაუბრუნდნენ.

მაიას დახმარებით და მისი ყველაზე დიდი ამაგიით, სოფელმა გელა ჯგერენაიას და ონისიმე ქარცხიას ფული შეუგროვა და სამ თვეში ახალი სახლი დაუდგეს.

ამ დროს დუტუ და მისი მეგობრები ქუთაისში იყვნენ წასული პარტიის გაწვევით და იქ მუშაობდნენ.

მაია სულ მარტო დარჩა. ერთადერთი საზრუნავი, რომელსაც გულს აყოლებდა, ეს გელასა და ონისიმეს სახლების მშენებლობა იყო. აი დადგეს სახლები, ჩასახლდნენ შიგ მოხუცები და მაიას აღარაფერი დარჩა საზრუნავი. ერთობის საქმე დამარცხებულად მიაჩნდა. მუშნის, დუტუს, მიშასა და სხვების ქუთაისში გადასახლება იმას მიაწერა, რომ აქ არაფერი ჰქონდათ გასაკეთებელი და იქ თავიანთი ცხოვრების მოსაწყობად წავიდნენ.

მაიას ცხოვრება კი ისევ ერთფეროვანი რჩებოდა, ხალხისაგან მიტოვებული და მივიწყებული. აღარავის ჩამოსვლას აღარ ელოდა. გრიშა ნაწყენი იყო, რადგან მაია აშკარად ეხმარებოდა

და მხარს უჭერდა ერთობის ხალხს და არ მოდიოდა დედის სა-
ნახავად. უნა კი წერილებსაც არ იწერებოდა.

„აბუნად მივდებენ შვილები. გრიშა მამულების გამოყოფას
მოითხოვს, უნა უთავბოლო ხარჯებსა და ვალებშია გადავარდ-
ნილი. მამულების შემოსავალი მას უნდება, ცოლის შერთვაზე,
წესიერ ოჯახის შექმნაზე არ ფიქრობს, მე რომ ხელმწიფის სა-
სახლეში მგონია, ის ქუთაისში დანავარდობს, ფუქსავატ ცხოვ-
რებას დაწაფებული, მაგრამ, ღმერთო, რაც მჭირს, იმის უარე-
სისაგან დამიფარე, — ამბობდა მათ, მთრთოლარე ხელით პირ-
ჯვარს იწერდა.

ერთხელ ასეთი ფიქრებით მოცული მათა თავის ოთახში
იჯდა, როცა მას მოახსენეს, უნას ამაღლის უფროსი პროფი ფიჩ-
ხაია გეახლათ ქუთაისიდან, თქვენი ნახვის ნებას თხოულობსო.
პროფის უნას წერილი ჩამოეტანა. წერილი ალერსითა და სიყ-
ვარულით იყო სავსე, ბოლოს მაინც ფულის თხოვნით თავდე-
ბოდა.

მათა აღელდა.

— უნას ხარჯებს, ჩემო შვილო, — უთხრა მათამ ფიჩხაიას, —
სამიურატო მამულების შემოსავალიც არ ეყოფა, ჩემმა საცო-
დავმა ხიბულამ აბა რა შემოსავალი უნდა მომცეს ისეთი, რომ
უნას ხარჯებს ეყოს. ხალხი დღედაღამე წელზე ფეხს იდგამს,
რომ თავი შეინახოს და შიმშილით არ დაწყდეს, აბა მე რა უნ-
და მოვთხოვო გაჭირვებულებს.

შემდეგ წყნარად უნას ამბების გამოკითხვა დაუწყო. ჯერ
პეტერბურგის შესახებ ეკითხებოდა, შემდეგ ხელმწიფის სასახ-
ლისა და უნას სამსახურზე, როგორ არის მიღებული ჩემი ვაჟი
სასახლეში, როგორი მოწონებული და პატივცემულიაო.

ფიჩხაიაც უპასუხებდა, რაც შეეძლო გადაჭარბებულად, რა-
თა მისი დედ-მამის გაზრდილი საფიცარი უნა ძლიერ კარგად
მოეჩვენებინა მათასათვის, გული მოეღბო მისთვის, იქნებ ბევ-
რი ფული გაემეტებინა, ამით უნა გაეხარებინა.

— ბატონო, უნა, მისი ჭირიძე, ყველას უყვარს სასახლეში,
ერთხელ მწყალობელო ბატონო, ხელმწიფის სასახლეში
სუფრა იყო გაშლილი, სუფრა სავსე იყო ბოთლებით, მაღალი
საყვავილეებით, მაგიდის ირგვლივ მაღალზურგიანი სკამები იყო

ჩამწკრივებული, ხელმწიფემ უნას მიმართა: ვაჟკაცი მაშინ გერქმევა, თუ ამ სუფრას ისე გადაახტები, რომ არაფერს არ წააქცევო.

— თუ ნებას მომცემთ, ვცდიო, — უპასუხა უნამ.

მოტრიალდა, დედოფალს ნება სთხოვა, ხელზე ეამბორა, სრულიად მოულოდნელად ისკუპა და გადაახტა ისე მსუბუქად, რომ ყველანი განცვიფრებაში მოიყვანა. ხელმწიფის შვილები გარს ეხვეოდნენ და ეფერებოდნენ, თან ეკითხებოდნენ, ხომ არაფერი გეტკინათა ბიძიო, ძალიან უყვართ სასახლეში, ბატონო, — დაამთავრა ფიჩხაიამ.

— ჯამბაზობა დაუწყია ჩემს შვილს, — გაშრა ამ ამბის გაგონებაზე მაია, — როგორ იკადრა, როგორ დაეცა ასე ჩემი უჩა? მთელი ქვეყანა მეფეს ებრძვის, ჩემი შვილი კი ყარაზე დგება მის წინ, რომ მას და მის ცოლ-შვილს აამოს.

— რას იზამ, ბატონო, მეფე მაინც მეფეა.

— სახელითაა მეფე, თორემ საქმით ხალხის ჯალათია. თუმცა, დავანებოთ ამას თავი. მეყოფა ეს ამბავი სირცხვილად.

მაია ერთხანს დაფიქრებული იჯდა. დანა პირს არ უხსნიდა. მერე როდის-როდის ძლივს ამოიღო ხმა.

— იქნებ ცოლის შერთვამ დაადინჯოს, — თქვა ისე, თითქო თავის თავს ელაპარაკებო. — კაცი რომ ოჯახს მოეკიდება, სხვა ჭკუაზე დადგება. წესიერ და ზრდილ ქალს დიდი გავლენის მოხდენა შეუძლია ქმარზე.

— მართალი ბრძანდებით, ქალბატონო. ქალს რომ შეუძლია, იმდენს ხშირად ათი ვაჟკაცი ვერ იზამს, — დაუმოწმა ფიჩხაიამ და მის ხმას რაღაც შეკრთობა დაეტყო, სახეზე შეიკვალა სტუმარი და მაიას თვალი მოარიდა.

მაია პირდაპირ თვალეში შეჰყურებდა და უმაღ მიხვდა, რომ ფიჩხაია რაღაცას უმაღავდა.

— მეეჭვება, რომ უნამ ცოლი შეერთოს, ვერ გაუსხლტება ხელიდან იმ ქმრისა და ოჯახის შემარცხვენელ ერისთავის ქალს.

გაკვირვებული ფიჩხაია დუმდა.

„ჩიტი მოუტანს ამ დალოცვილს ამბავს, თუ საიდან იცის

ყველაფერი? იქნებ ისიც იცის, გუშინ დილას რომ უჩამ დიდი წერილი გადასცა ბაბილინას და პასუხიც გამოართვა? — გაიფიქრა მოსულმა.

უნა ერთგულ მხლებელს არაფერს უმაღავდა. ფიჩხაიამ ისიც იცოდა, რომ უზომოდ შეყვარებული უჩა დადემქელიანის ცოლის გატაცებას აპირებდა საზღვარგარეთ. ამისათვის საჭირო იყო უჩას სამსახურიდან გათავისუფლება, საზღვარგარეთული პასპორტების შოვნა. ყველაფერი ეს კი დიდ საიდუმლოდ უნდა გაკეთებულიყო, საქმეს დიდი თანხები სჭირდებოდა. არც ისე ადვილი იყო უჩასთანა კაცისათვის საპატიო კაცის მოტაცებული ცოლით საზღვარგარეთ წასვლა, გაპარვაც ეთაკილებოდა, არც კანონი იქნებოდა ამის მომხრე.

ყველაფრის მოგვარებას ფული უნდოდა, დიდძალი ფული. სწორედ ამ ფულს თხოვდა დედას უჩა ფიჩხაიას პირით, რა თქმა უნდა, სიმართლეს უმაღავდა, ფულის საჭიროებას სხვა მიზეზით ასაბუთებდა.

ფიჩხაიამ ისიც იცოდა, თუ რარიგად უჭირდა ბაბილინას ექვსი შვილის მიტოვება, მათთან საუკუნოდ კავშირის გაწყვეტა, არც ალექსანდრეს შიში ასვენებდათ შეყვარებულთ. ვერც გრძნობას ერეოდნენ, ვერც დაბრკოლებანი გადაეღახათ.

— იცის თუ არა ჩემმა უბედურმა ბიძაშვილმა, ალექსანდრემ, რომ მისი უღირსი მამიდაშვილი ცოლის წართმევას უპირებს? — ჰკითხა მოულოდნელად მამამ ფიჩხაიას.

— საიდან ეცოდინება, ბატონო, ღმერთმა დაგვიფაროს! ეს რომ მან ნამდვილად იცოდეს, ან მოკლავს უჩას ან შეაკვდება. — ფიჩხაია უცებ გაჩუმდა, მიხვდა, რომ ზედმეტი წამოსცდა.

მამამ საწადელს მიაღწია, კამოტეხა გამოუცდელი ფიჩხაია.

„ნუთუ უჩას მართლა გადაწყვეტილი აქვს ბაბილინას შერთვა?“ — გაიფიქრა ძრწოლვითა და ზიზღით მამამ. — ფიჩხაიას კი ცივად შეხვდა და ასე უთხრა — ვისესხებ ფულს და გავუზავნი, რამდენსაც შევძლებ.

ფიჩხაიამ მღაბლად დაუკრა თავი და ოთახიდან გავიდა.

მაია ისევ თავის ფიქრებს დაუბრუნდა:

„ნუთუ ცოდვილი ქალი ვარ, ეგებ უჩა მომიკლან! ჩემი ურჩი შვილის გრიშას ბედიც სანატრელი შემექნა უჩასთვის! უმწიკვლო და სათნო მაინც არის ჩემი რბალი ციცუ, ერთგული მეუღლე და თავდადებული დედა. მოსწრებული შვილები ეყოლება მალე გრიშას. ბაბილინა ორმოც წელიწადს გადაცილებული ქალია, არც შვილი, არც ძირი ჩემს უჩას. მგონი, მართლა მომერია წლოვანება, საღად ვეღარ ვაზროვნებ, შვილსა და ფუძეზე ვფიქრობ, როდესაც კარზე მომდგარი სიკვდილი თვითონ უჩას წართმევას მიპირებს“.

წარუხროცილი ლაქა

დეკემბერი დადგა.

ქუთაისში ზამთარიც ისეთივე მომხიბვლელი იცის, როგორც გაზაფხული. ბალის ასწლოვანი ხეები ახლა თეთრად იყო დაბურული. ქუთაისისათვის ჩვეულ მყუდროებას ქუჩებში მოსიარულე მარხილების ეჭვნების უღარუნი არღვევდა.

ვაჟთა გიმნაზიის მახლობლად ზედიზედ სროლის ხმა გაისმა. წუთიც და ქალაქი საზარელმა ამბავმა მოიცვა.

„ალექსანდრე დადემქელიანი მოუკლავთ“, — იძახდა ხალხი და ყველა იმ ადგილისაკენ გარბოდა, სადაც ეს ბუმბერაზი ვაჟკაცი გაშოტილიყო თოვლზე, მკერდიდან სისხლი მიიქეფდა, არწივისებური სახე თანდათან უფითრდებოდა. სიკვდილი დასადგურებელიყო მის გოლიათურ სხეულში. გული ჯერ კიდევ სვანური შეუდრეკლობით ებრძოდა სიკვდილს. ხელებს ასავსავებდა, იარაღს ეძებდა. ხანჯალთან მიტანილი ხელი უღონოდ ეცემოდა თოვლზე. სინათლედაკარგული თვალებით ვიღაცას ეძებდა, შურისძიებას ლამობდა...

რამდენჯერმე დაეშვა მიზანმიუწვდომელი ხელი, წამოდგომა სცადა, ვერ შეძლო. დიდხანს არ გაგრძელებულა სიკვ-

დღლისწინა ვაბრძოლება. ექიმისა და პოლიციის წარმომადგენელთა მოსვლასას ის გარდაცვლილი იყო.

ალექსანდრე ჯერ თავის სახლში არ გადაესვენებინათ, რომ საღხში უკვე ხმა დაირხა: უჩა დადიანმა მოაკვლევინა დადეშქელიანი, რადგან ცოცხალს ცოლის წართმევა ვერ გაუბედაო. სულ სხვადასხვაგვარად წარმოადგენდნენ უჩასა და ბაბილინას რომანს, მკვლელობის მოწყობაში — უჩას და მის ერთგულთა მონაწილეობას.

ერთნი ამბობდნენ: უჩას და ბაბილინას ერთმანეთი გაგიუბებით უყვარდათ, უკვე ათ წელზე მეტია მათ ხელს უშლიდათ ალექსანდრე, რომლის თავმოყვარეობა ვერ მოითმენდა ასეთ შეურაცხყოფას. ის ცოლსაც მოკლავდა და უჩასაცო. დადიანი დაარწმუნეს, ალექსანდრეს ყურამდე მიაღწია შენი და ბაბილინას მიჯნურობის ამბავმა. ის არ გაპატიებს ოჯახის სახელის შელახვას, აუცილებლად მოგკლავს, თავს გაუფრთხილდით.

იმასაც ამბობდნენ, დადიანი შეშინდა, მკვლელები შეუჩინა დადეშქელიანს, ორი საქმე ერთად გაიკეთა: სიკვდილის საშიშროებაც მოიშორა და ბაბილინაც დაისაკუთრაო.

ზოგი იმასაც ამბობდა, რომ, თითქოს ალექსანდრეს დიდი შეტაკება მოუვიდა ცოლთან უჩას გამო, ცოლს უდიერადაც მოექცა, თან დაექადნა: რაკი შენ ჩემს სახელს ჩირქი მოცხე, ტყუილია თუ მართალია ეს ჭორები, ჩემთვის სულ ერთია, სასტიკად დაგსჯი. ამ ზამთარშივე წაგიყვან სვანეთში, თხილამურებით გატარებ სადადეშქელიანო ციხემდე, იქ ჩაგკეტავ, ქუთაისს არასოდეს არ გაჩვენებ. არათუ უჩა და მისი მხლებლები, მთელი მისი წინაპარი რომ მკვდრეთით აღდგეს, შენს თავს იქიდან ვერ დაიხსნის, შეილებს მე თვითონ ვასწავლი, პანსიონებში მივაბარებ, შენგან რა სიკეთეს ისწავლიანო.

ბაბილინა კი ცხარე ცრემლებით ეფიცებოდა ქმარს თავის სიმართლეს, ყველაფერს მტრებსა და ბოროტ ენებს აბრალებდა. მაშინ მართალი და კეთილი გულის ალექსანდრე მოლბებოდა, ცოლს უფრო ნდობით უცქერდა. მაგრამ მაინც გადაწყვეტილი ჰქონდა დადიანის თავიდან მოშორებაო.

ზოგნი იმასაც წუხდნენ, თუ რატომ შეუშალეს ხელი ამას წინათ ალექსანდრეს დუელს, იქნებ მაშინ უფრო უმსსვერადლოდ და ლამაზად გათავებულყო ეს საქმეო.

ალექსანდრეს სიკვდილის დღეს უჩა ქუთაისში იყო. ის როგორც ამ ოჯახის ნათესავი და მეგობარი, დიდ მწუხარებასა და თანაგრძნობას ამჟღავნებდა, ქუთაისის საზოგადოება კი გულცივად ხვდებოდა უჩას ნათესაურ გრძნობებს. ეიმც უჩას ვერ ელეოდა ასეთი ბოროტმოქმედებისათვის, ბრალს მარტო ბაბილინას დებდა ქმრის სიკვდილში.

უჩამ მხოლოდ ახლა იგრძნო თავს დატყევილი უბედურება და თვითონ მოინდომა გაეგო სინამდვილე, ვასი თაოსნობით მოკლეს ალექსანდრე. მას არაეისთვის დაუვალებია ეს ბოროტი საქმე. ის ფიქრობდა: ნუთუ სიყვარულით დაბრმავებულმა ბაბილინამ ჩემდა დაუკითხავად მოახდინა ეს საშინელებაო. ვერც უჩა იმეტებდა ბაბილინას ასეთი ბოროტებისათვის. ის დაკვირვებით შეუდგა მკვლელობის საქმის გამორკვევას. გაიგო: ალექსანდრეს მისი მოკვლა გადაეწყვიტა, ეროხელ თითქოს დაქირავებული მკვლელი ქუთაისიდან ტყიბულში გაჰყოლოდა უჩას. რაკი უჩა არასოდეს მარტო არ დადიოდა და თვითონაც ხელსწრაფი და იშვიათი მსროლელი იყო, ვერ მიეხერხებინა მისი მოკვლა.

ეს უჩას ერთგულმა მსახურებმა გაიგეს, გამოძებნეს მიხერხებული დრო, ალექსანდრეს დაასწრეს ბოროტების ჩადენა და მოკლეს.

უჩა დიდად დააღონა ამ ამბავმა. ეს რა დათვური საქმასური გაუწყვიტათ ჩემთვისო, — ეუბნებოდა ფინსიას. მე მოგეკალით და ეს არ ჩაგედინათ. ან ვინ დაიჯერებს, რომ ეს თქვენ ჩემი დავალებით არ გააკეთეთ. ქალის სიყვარულისათვის ძმას არ მოვკლავდი, ისიც მიპარვით, თავი მომჭერით, საბრალმდებლო სკამზე დამსვით, შემარცხვინეთო.

უჩა ოთახიდან იშვიათად გამოდიოდა, ქალაქიდან წასვლა ვერ გადაეწყვიტა, რადგან მეტი საბაბი მიეცემოდა ხალხს ჭორებისათვის. მისი გული ვერ უძლებდა დედის მოგონებას და მასზე ფიქრს, მორიდება და სიბრალული დედისადმი მეტად აწუხებდა, რომ გაეცა მკვლელები — ეს არ იქნებოდა ერთგუ-

ლების სამაგიერო. ეს სხვისი კალთის ქვეშ თავის ამოფარება და ლაჩრობა იქნებოდა.

დაჯავრიანებული დახვდა უჩა თავის უფროს ძმას, გრიშას, რომელსაც ნათესავის სიკვდილი შემთხვევით გაეგო სენაკში და მაშინვე ქუთაისს წამოსულიყო.

გრიშას ვერ გაუბედეს სენაკში ეთქვათ უჩაზე გავრცელებული ხსენები. ქუთაისში გაიგო, თუ რა სამარცხვინო საქმე დატეხიდა თავზე მათ ოჯახს.

სირცხვილით წელმოტეხილი გრიშა მხოლოდ ერთხელ მივიდა ალექსანდრეს სატირლად, ისიც ღამით; დაიტირა და წამოვიდა, დაკრძალვას არც დაესწრო. არც ბაბილინა მოიკითხა.

ბაბილინა ქმრის სიკვდილის დღესვე ლოგინად ჩაეარდა, ხალხში არ გამოდიოდა.

ხალხი კადევ იმ აზრისა იყო: ბაბილინას სინდისის ქენჯნა არ აძლევს ნებას ქმრის ცხედარი დაიტიროსო.

უჩამ იცოდა, თუ როგორ აძაგებდნენ ბაბილინას. წერილებს სწერდა, რომლებშიც არწმუნებდა: ჩვენს დიად სიყვარულს ვერაფერი ვერ შეებლავს, რადგან თვითონ დარწმუნებული ვართ, რომ ბოროტება ჩვენ არ ჩაგვიდენია. ვისაც რა უნდა, ისა თქვას, სიმართლე გაიმარჯვებს, მე კი მუდამ შენს ერთგულად მიგულებო. ეს წერილები ამხნევებდა სულით დაცემულ ქალს.

ყველაფერი, რაც ქუთაისში ხდებოდა, მაიას ყურამდეც აღწევდა. რამდენიმე დღეს უმაღავდნენ, შემდეგ ეჭვად უთხრეს დადემქელიანის სიკვდილი.

ქუთაისიდან დაბრუნებულმა გრიშამ დაწერილებით უამბო მაიას ალექსანდრეს სიკვდილისა და უჩას გალანძღვის ამბავი.

მაიას კინაღამ გონება დაეკარგა. დიდხანს იჯდა ჩუმად, თავი მძიმედ დაეხარა, თითქოს თეალის გახელისა და ქვეყნის შეხედვისა რცხენია, რომ ასეთი უღირსი შვილის დედა გამხდარაო.

გრიშას მათ შორის ჩამოვარდნილი უსიამოვნების შემდეგ დედა არ ენახა. ძლიერ მოტეხილად მოეჩვენა ახლა, შეებრა-ლა გულწრფელად. სანამ გრიშა დედას სიბრალულით საესე

თვალთ უცქერდა, მაია ღუმდა. მისი მღელვარება-ღუმდილი ყველას გადაედო. გრიშა სულ უფრო და უფრო იმსჭვალებოდა დედისადმი თანაგრძნობით. იცოდა, რა მწარეა შვილის სიყვარული და უფრო მწარე — შვილის მიერ სამარცხვინო საქმის ჩადენა. არც თვითონ ემაღლიერებოდა ძმას, რომ ასეთ უხერხულ მღგომარეობაში ჩაიყენა თავი.

„ახლა ეს კიდევ რა დაგვატყდა თავზე, კაცის მკვლელის სახელი დაგვედო. უჩას გამო მთელი ოჯახი ჩირქმოდნებულა. რამდენ ხანსაც არ უნდა იცოცხლოს, სამარცხვინო ღაქა აძევეს უჩას. რად გვჭირდებოდა ჩვენ ეს საშინელი ამბები: კაცის კვლა, დევნილთა მფარველობა. პატიოსნების მეტი სავა არაფერი სიმდიდრე გამაჩნდა. ჩემს შვილებს ოჯახიშვილობას მაინც დაუტოვებდი მეგონა, ესეც შეილახა და გამიცრუვდა. მე დედისაგან დაჩაგრული კაცი ვარ, ყოველგვარ გაჭირვებას ვიტანდი, ოღონდაც წმინდა სახელი შემბრუნებოდა“.

ამ წუთში, როდესაც სასოწარკვეთილ დედას უცქერდა, გრიშა გულისწყრომით ფიქრობდა დედასა და ძმაზე. შემდეგ მის გულს თანდათან დედის სიბრაღული დაეუფლა და სეული მოხვია.

— რა დაგემართა, დედა, დამშვიდდი. უჩა რომ ამის ჩადენი არ არის, ყველანი დარწმუნებული ვართ. უბრალო ჭორებია. დამიჯერე, დედა, უჩას არაფერი არ შეესება ამ საქმით, — ეუბნებოდა და თან ხელებს უკოცნიდა.

მაიამ თავი აიღო, გრიშას თავი ხელებში მოიმწყვდია და თვალებში ჩახედა. დედის თვალები ახლა სრულებით არ პტაჟდა იმ რისხვის გამომხატველ თვალებს, რომლითაც რამდენიმე წლის წინათ ვაჟი გააცილა. უმწეო, უსიცოცხლო ელფერი გადაჰკეროდა მის სახეს, უღონოდ უყურებდა შვილს თვალებში და ღუმდა, თითქოს ენა ჩაუვარდაო.

— მე, გარდა იმისა, რომ საყვარელი ადამიანები შემომეცალნენ, ორი საყვარელი შვილიც დაკარგე, — ამოიღო ბოლოს ხმა მაიამ. — ბევრი ტანჯვა და ბედის დაცინვა გადამიტანია, მაგრამ ასეთ საშინელებას არ მოველოდი. დიდ არს, უფალო, სახელი შენი, მომეც ძალა გავუძლო ცდუნებას, არ

ვგმო გარენა ჩემი მოგიტევოს, უნა, უფალმა ჩემი მოსუცებუ-
ლობის გამწარება, — თქვა და თვალებში ცრემლი აუციაგ-
და, — მარტო დამტოვე, შვილო!

— არა, დედა, შენთან მინდა ვიყო.

— რისი გეშინია? მე სიკვდილს სრულებით არ ვაპირებ.
ბოლომდე უნდა შეეცვა ცხოვრების შხამი. მე დარწმუნებული
ვარ, უჩასაც დაიჭერენ, იმ შერვენებულ ქალსაც პასუხს მო-
იხოვენ. თუ ჩემი შვილი ოდესმე ციხიდან გამოვიდა, იმ ქალს
შეირთავს. ამიერიდან ჩემთვის აღარაფერს მნიშვნელობა აღა-
რა აქვს. ყველაზე უფრო საშინელი და თავისმომჭრელი უკვე
მოხდა; ჩემს საამაყო შვილს, უჩას, კაცის მკვლელობას აბრა-
ლებენ, უღირსი ქალისათვის? მე თქვენ გეტყვით, სამშობლოს
დაცვისათვის მოკლა კაცი, ან მოლაღატე და ფლიდი ვინმე
გამოასალმა წუთისოფელს. ალექსანდრე, პატიოსნებითა და
ვაჟკაცობით ცნობილი, დედამისის სისხლი და ხორცი. ვაი,
ვაი, თუნდაც ათასჯერ გამართლდე, უჩა, ჩემს გულში დამნა-
შავე და მკვდარი ხარი შენ მოკალი თუ სხვამ, სულ ერთია,
ხომ ითქვა... როცა შენი ღვიძლი დედა ასე ფიქრობს შენზე,
სხვები სულ არ დაგზოგავენ. ხმა ღვთისა და ხმა ერისა საუ-
კეთესო მსაჯულია შენი, შე უბედური დედის შვილო, აქაც
მიმტყუნა ბედმა.

მაიას ცუდი ამბები მოსდიოდა: უჩა და ბაბილინა დააპა-
ტიმრეს, აგრეთვე მხლებლებიც — ძმები ფიჩხაიები. უჩა, რო-
გორც უგანათლებულესი თავადი და იმავე დროს სამხედრო
პირი, პაუპტვახტში იჯდა, სრული თავისუფლებით სარგებ-
ლობდა, ხოლო ბაბილინას და უჩას მხლებლები ციხეში ისხდ-
ნენ.

უჩა პატიმრობაშიც დიდკაცურ ცხოვრებას განაგრძობდა.
მამულების ვეპილი აფაქიძე ხშირად ჩადიოდა მასთან, ჩაპ-
ქონდა ფული მამულიდან შემოსული თანხებიდან.

მაია სრულიად გულგრილი გახდა შემოსავალ-გასავლისა
და მამულების მიმართ.

— როგორც გინდათ, ისე ხარჯეთ, ნურაფერს მეკითხე-
ბით! — ეტყოდა ის გიგიშას. გულს კიდევ იმას აყოლებდა თუ
ვინმე მთავრობის მიერ ღვენილს ხელს შეუწყობდა. რამდენი-
მე კაცი კიდევ შერჩა ამ სასახლეს საზრუნავად.

გრიშას კვლავ აგულისებდა დედის ეს საქციელი. დედა-შვილს შორის მუდამ უსიტყვო ბრძოლა აყო გამართული.

მაია ცხოვრებაზე მთლად გულგატეხილი დარჩა, როდესაც გაიგო, რომ უჩას ოცი წლის პატიმრობა მიუსაჯეს, დირსება ახადეს, ციხეში ჩასვეს. დანარჩენ ბრალდებულებს, როგორც უჩას ხელში იარაღად გამოყენებულთ, ნაკლები ჰქონდათ მისჯილი.

„ნეტა დუტუ გამეზარდა უჩას მაგივრად, — ფიქრობდა მაია, — გლეხის შვილია დუტუ, მაგრამ რომელ თავადის შვილს ჩამოუვარდება. ქვეყნის საქმეს აკეთებს. ხალხს უცვარს, ხალხის შვილია. უჩა... უჩას კი ზიზღით იხსენებს ხალხი...“

უჩამ საქმე სენატში გადაიტანა, მას გამოჩენილი ვეჭილი მყავდა დამცველად, რომელიც უჩას გავლენას ხელმწიფის სასახლის კარზე და უჩას დიდკაცობას მოხერხებულად იყენებდა, რათა გაემართლებინა ბრალდებულები.

არც ალექსანდრეს ძმა ოთარ დადემქელიანი ზოგავდა თავის გავლენას პეტერბურგის მაღალ წრეებში, რომ უჩა გაეშავებინა, ალექსანდრეს მკვლელობა პირადად მისთვის დაემტკიცებინა, დამსახურებულად და სასტიკად დაესაჯა ის.

ოთარი ცდილობდა რძალი ბრალდებიდან გაეთავისუფლებინა, ძმის ოჯახის შებღალული სახელი აღედგინა. დადემქელიანის მოწმეები იმასაც კი ამტკიცებდნენ: უჩამ ბაბილინასთან ინტიმური კავშირის დამყარება ვერ შეძლო და სიყვარულით გახელებულმა ქმარი მოუკლა, უმწეო ქალი გააუბედურა, სამარცხვინო საქმეში გახვიაო.

ამ მხრივ ოთარის ცდა გაბათილდა, როდესაც სასჯელისგან გათავისუფლებული უჩა და ბაბილინა შეუღლდნენ.

საქმე მაინც დიდხანს გაჭიანურდა.

უჩამ სრული თავისუფლება და ყველა თავის საზოგადოებრივ უფლებებში აღდგენა მაშინ მიიღო, როდესაც მსოფლიო ომი დაიწყო.

შვილის პატიმრობის დროს მაიას ბევრი სხვა უბედურებაც დაატყდა თავს: ერთ დღეს ხორშიდან ქვეითად მოსული, სახედაკაწრული ქალები — გრიშას ძიძიშვილები წივილ-კივი-

ლით უემოცვიდნენ მაიას ეზოში და უკითხავად მის ოთახში შეუარდნენ, გრიშას სიკვდილს გაჰკიოდნენ, თან ყველაფერს ატყვრევდნენ, ლეწავდნენ, მაიასაც უყვიროდნენ: სირცხვილი შენი, შენ მოკალი გრიშა, შენ ცოცხალი ხარ, გრიშა აღარა გვყავს, უნა ციხეში გიღებთა, შენც მოკვდი ახლავყო.

მწუხარებას გონება დაეკარგა მათთვის, უდიერად ექცეოდნენ მუდამ მორიდებასა და პატივისცემას მიჩვეულ ქალს. ერთი რომ გაათავებდა წყევლა-კრულვას, მეორე დაიწყებდა:

— შენი მოძულეებული შეილი გრიშა ხუთ წუთში მოკვდა, გული გაუსკდა უბედურს, შენ და შენმა არჩეულმა შეილმა უნამ გაუხეთქეთ გული. ვაი, ჩვენი ცოდვა, ვაი ჩვენი ცოდვააა! — მოთქვამდნენ ქალები, თან იწყებდნენ, მაიას სასლის გადაწვით იმუქრებოდნენ.

მაიას მსახურებმა ძლიერძლივობით დაამაგრეს ეს ქალები და ოთახიდან გაიყვანეს.

ახლა ეზოში კიოდნენ. მთელი სიფელი წივილ-კივილით გააქრუს, მერე წყევლა-კრულვით ეზოდან გავიდნენ და ხორში დაბრუნდნენ.

მთელი ხიბულა უკან დაედევნა ამ ქალებს. ყველას მწუხარებას გვრიდა გრიშას უეცარი და უდროო სიკვდილი, ეჩქარებოდათ თავისი თვალთ ენახათ მიცვალებული.

ხიბულაში გრიშა ძლიერ უყვარდათ, მისი შეილები იქაურებს ჰყავდათ გაზრდილი, მრავალი ძიძა-მორღუ, ნათლული, ნათლიდედ-ნათლიმამა ფეხშიშველი გარბოდა ხორშისკენ. გულგამგმირავად კიოდნენ და მოთქვამდნენ.

მაია გაქვავებულივით იდგა თავის ოთახში. გარინდული უცრემლოდ და უძიზნოდ იტქირებოდა აქეთ-იქით. უსაშინლესი მწუხარებით გარემოცული ქალი წასაქცევად ქანაობდა, რომ მოახლემ სავარძელი დაუდგა და ის უგონოდ ჩაეშვა შიგ. აკანკალებული თავი რომ დაემაგრებინა, ხელებზე დაეყრდნო. აზრს თავი ვერ მოუყარა მაინც, არ იცოდა, რა ჭირდა, თითქოს ახლა გამოერკვაო, მოახლეს ჰკითხა:

— გრიშა მართლა მოკვდა თუ იმ უმსგავსო ქალებმა მომატყუეს? იქნება გული შეუწუხდა და ცოცხალი იყოს ჩემი

მზესავით შვილი? — თქვა და წამოდგა, მოახლეს ჩააკივლა: მართალი მითხარიო.

— მოკვდა, ბატონო!

მაია ისევ სავარძელში დაეცა, ერთი საცოდავად დაიკვნესა და თვალებიდან ცრემლები ნაკადულივით წამოუვიდა.

მოახლე დატრიალდა, ოთახიდან სამზარეულოში გაიჭრა: იქნებ ვინმე ჩამოვიდა ხორშიდანო. სახელები გასძახა ბიჭებს, მაგრამ ოჯახში არაფერს დარჩენილიყო.

ყველაზე ადრე ონისიმე ქარცხია მოვიდა, ისიც დაკაწრული სახით, ლაპარაკის ღონე აღარ ჰქონდა, ბუხართან მიეგდო, სლუკუნებდა, გულზე ხელს ირტყამდა, ჟღალ წვერ-ულვაშს იგლეჯდა. მალე გელა ჯგერენაია და გიგიშაც მოვიდნენ. მათ ეს ამბავი სადღაც გზაზე გაეგოთ და ხორშში წასულიყვნენ. ახლა ნამტირალევი, ძლიერ შეწუხებული მოვიდნენ მაიასთან.

პირის სოკვით და ვაი-ვაის ძახილით შევიდნენ მაიასთან, რომ ბატონი მოენახულებიანთ და ისევ ხორშში გაბრუნებულიყვნენ. დაწვრილებით უამბეს მაიას გრიშას მიუღლოდნელი სიკვდილის ამბავი.

მაიას ტანჯვა იმდენად ძლიერი იყო, რომ გიგიშა და გელა თვალს ვერ უსწორებდნენ. ამ მოხუც ქალს მთელი დღე არაფერი არ უჭამია, არც არაფერს კითხულობდა, თუ როდის კრძალავდნენ, რას აპირებდნენ.

— შენი აზრი გვიბრძანე, ბატონო! — უთხრა გიგიშამ.

— არ შემიძლია, მე მკედარი გრიშა ვნახო. მე ნურაფერს მკითხავთ. ორი წელია, რაც ერთმანეთს ვემდურით, ვითომ ახლაც დამდურებული ვართ. ჩემი ფართო მხარბეჭიანი, ჩემი ლამაზი გითა მემდურის, მეც ვემდური. ამიტომაც ვერ ვნახავ, ასე უნდა მოვკვდე.

კვლავ ცრემლები წასკდა თვალებიდან. გელა და გიგიშა გულხელდაკრეფილი იდგნენ, კედელზე აკრული ზღუქუნებდნენ, ცრემლად იღვრებოდნენ.

ნაშუალამევი იქნებოდა, მაიამ რომ ყველანი დაითხოვა.

სურათებიან მაგიდას მიუახლოვდა. ღვთისმშობლისა და

წმინდა წინოს ხატი მიცვალებულთა სურათებს დაჰყურებდა ზევიდან. ვერცხლის შანღლებში სანთელი ჩადო, სურათებს გადახედა, უჩას მეტი ახლა ცოცხალი აღარავინ დარჩენილი-ყო ამ დიდი საგვარეულოდან. მაიას არც უჩა მაინდა ცოცხლად, მაინც მისი სურათი თავის პატარა მაგიდაზე დასდო, სასთუმალთან რომ ედგა; მაგიდის თეჯირი აიღო, იქვე კედელს მიაყუდა და ცოცხალი ადამიანივით გაუმართა საუბარი.

— ახლა აღარ ხარ საჭირო. ხომ ხედავ, ყველა წავიდა, შენ კი უცვლელი დარჩი... მთელი ღამე იჯდა, იცრემლებოდა და მხურვალედ ლოცულობდა.

მოწამილული ფუტკარი

ერთმა წელმა განვლო გრიშას სიკვდილის შემდეგ. სოფელს შემოდგომა კარს მოდგომოდა, ბუხარს ცეცხლი მონატრებოდა.

დაღვრემილი მაია გიზგიზა ბუხართან მოშორებით იჯდა, უცქერდა ნაპერწკლებს, რომელთა შუქი და ციმციმი სასიამოდ იჭრებოდა მის დაღლილსა და მწუხარე გულში. ცეცხლის ტკაცუნი კიდევ უფრო აშფოთებდა მაიას, გარდასულ დროს მოაგონებდა.

მისი ფიქრები შორიდან იწყებოდა, ფიქრთა რვეულს ის ალექსის სიკვდილის დროიდან ხსნიდა, შემდეგ თანდათან ფურცლავდა ამ რვეულს, კრიალოსანთან ერთად მარცვლავდა მოგონებებს.

შემოდგომის გრძელი სადამო წარსულის ტკბილ-მწარე მოგონებებში დაიღია... მაიამ ოთახში მიმოიხედა, თავისი უფერული ცხოვრება ზედმეტად მიიჩნია, მაგრამ იმ წუთსვე მოაგონდა უჩა, რომლის თუნდაც ერთი შეხედვა უზომოდ ენატრებოდა და რომლის ნახვის იმედიც კვლავ გაუჩნდა.

ყოველდღე ელოდა შვილს. გამართლებულმა და განთავისუფლებულმა უჩამ ორი თვის წინათ მას სურათი გამოუგზავნა. ამ სურათს მაია ჩუმად, რომ არავის შეეხედა, გულში ჩა-

იკრავდა, წარწერას ხშირად წაიკითხავდა და თვალები სისხრულით გაუბრწყინდებოდა.

მაიამ იცოდა, რომ უნა ომში უნდა წასულიყო. მას ისიც მოახსენეს მორიდებულად: უნა დიდი ყურადღებით ექცევა ბაბილინას, პატრონობას უწევს უმწეოდ დარჩენილ ქვრივ-ონლებსო.

მაიას ფიქრები ცხენის ფეხის ხმამ დაარღვია. მოხუცი ქალი ფანჯარასთან მივიდა. რამდენიმე ცხენოსანი შემოდიოდა ეზოში.

მიუხედავად შემოდგომის საღამოს ბინდისა, ერთ-ერთ ცხენოსანში უნა შეიცნო, გული სიხარულით აუტოკდა, მავრამ მხოლოდ წუთით.

— გვერდით არ მოგყვება შენი უბედური გითა, კენტად ხარ დარჩენილი ამ ქვეყანაზე! — თქვა და გამობრუნდა, სელის საეარძელში უღონოდ ჩაეშვა.

ბევრი ცრემლი ღვარა უნამ დედის მკერდზე: ჩემი ძვირფასი გრიშა რად არ დამხვდაო, მთელი ღამე უძილოდ გაათენა.

დილით ხორშში წავიდა ძმის საფლავზე საცირლად, რძლისა და ძმისწულების სანახავად.

ხორშიდან დაბრუნებული უნა არც დედასთან დარჩენილა დიდხანს, იმ კვირასვე ომში წავიდა.

დედა-შვილს ერთი სიტყვა არ უთქვამთ არც დადუშქელიანის სიკვდილზე, არც უნას სამარცხვინო ბრალდებაზე, არც ბაბილინა უკითხავს მაიას. მათი საუბარი მხოლოდ გრიშას სიკვდილსა და მამულების საკითხებს ეხებოდა.

უნა ველურ დივიზიაში გაამწესეს. ეს დივიზია ფრიად სახელგანთქმული იყო იმ დროს. მეტწილად შედგებოდა მთიელთა ჯარისკაცებისა და ოფიცრებისაგან, რომელნიც თებერვლის რევოლუციას მხარში ამოუდგნენ. უნამ გრიშას დავაჯიკებული ვაჟებიც თან წაიყვანა. ის ერთ-ერთი ნაწილის უფროსად იქნა დანიშნული.

— სიკვდილს ნუ მოვესწრები მისას და სხვა ყველაფერი უმნიშვნელოა ჩემთვის. რაში მეჭირვება, როგორ უყურებს მას რუსთა ხელმწიფე ან ჯარის სარდალი?

მაიამ ისიც კი გაიგო, რომ ბაბილინა მოწყალეების დათ მუშაობს ჯარშიო.

— ძლიერ მოწყალე გულის არის, ალბათ, ერისთავის ქალი — დაცინვით თქვა და ხელი ჩაიქნია მაიამ, ლაპარაკიც არ სურდა ამ ქალზე.

მაიას ხანდახან შეილიშვილების ცოლები მოაკითხავდნენ. პირველად უმცროს რძალს ხუთი ცხენოსანი მოჰყვა, შემდეგ ორი, შემდეგ — ერთი, ბოლოს ქვეითი ბიჭი მოჰყვებოდა.

მაიას ეს შეუმჩნეველი არ დარჩა. რძალი მოუყვა: ეს ბიჭი ძლივს ვიშოვე, კინაღამ მარტო წამოვედი. კაცები ყველა ომშია, დედა მონასტერში გახლავთ, უფროსი რძალი ოჯახში დარჩა, ხოლო მე ამბად მომიტანეს თქვენი შეუძლოდ ყოფნა და გეახელითო.

ხიბულაში პატარძლის ყოფნის დროს ჯარიდან შეებულებაში წამოსული მისი მეუღლე ჩამოვიდა და ბებიას უჩას წერილი მოუტანა. წერილი საესე იყო სიყვარულის გრძნობით, მალე ნახვის ნატვრით.

უნა დაღლილობას უჩიოდა. დედას სწერდა: როგორც კი ომი გათავდება, ჩამოვალ, სოფლის მეურნეობას მოვკიდებ ხელს, არასოდეს არ მოგშორდები, თუ ვინმე მოხუცი რძალი ჩამოგიყვანო, ისიც ჩემსავით მიიღე და შეიყვარეო.

არ ეამა მაიას სიტყვა „მოხუცი რძალი“. შეილიშვილს თვალში გაუყარა თავისი გამჭრიახი თვალი და ჰკითხა:

— გადაწყვიტა ბიძაშენმა ბაბილინას შერთვა ხომ? რას მიმაღავთ? მამაშენი მოკვდა და ის გადავიტანე, შავიც არ ჩამიცვამს. საზოგადოდ შავის ჩაცმა სისულელეა, მეტ ჭუჭყს იჭერს, პატრონი ვერ ამჩნევს, იშვიათად რომ რეცხავს, თავს იმით ინუგეშებს. — თქვა და თეთრი ბაიკის კაბა ტანზე გაისწორა. — მომერია მოხუცებულობა, შავებზე ლაპარაკს შევრჩი, მთავარი სათქმელი დამავიწყდა. დიახ, იმას ვამბობდი, უჩა რომ ბაბილინას შეირთავდა, იმ წუთიდან ვიცოდი, რა წუთსაც ალექსანდრეს სიკვდილი მითხრეს.

— კი ბატონო, — უპასუხა შეილიშვილმა, — უჩა ბიძია და ბაბილინა ჯვარდაწერილი ცოლ-ქმარი არიან, თითქმის ორი წელია.

მაიამ იქვე მდგომ პატარძალს უკმაყოფილოდ შეხედა:

— შესც შიღალატე? ამას არ მოველოდი, რატომ არ მითხარი?

— ყველას მოგვერიდა, ბატონო, თქვენი შეწუხება, დანამდევილებით არ ვიცოდით.

— გაიგეთ, შვილებო, მე არაფერი მაკვირვებს და მაწუხებს. გაკვირვებას, მწუხარებას თავისი დრო ჰქონია. გული გადაიღალა. ალბათ, იქამდე მივიდა ჩემი მწუხარება, რომ სეტის შეგრძნობა აღარ შემიძლია. ვაი, დაღუპულო იმედებო! ვაი, უჭკუოდ დაკარგულო შვილო! მთლიანად გრძნობა იყავი, ახლა ეს რა გიქნია? თუ ამდენ ხანს საეჭვო იყო შენგან ძმის მოკვლა, ახლა შენმა საქციელმა ზომ ყველაფერი დააღასტურა. რამ მოგწამლა, ჩემო კეთილო და უჭკუო შვილო? — თქვა და თვალწინ შვილის სახე წარმოუდგა. ისე ძლიერ ვნატრებოდა მისი ნახვა, რომ ადგა, სურათს დახედა, გულში ჩაკერა მოინდომა, მაგრამ არ უნდოდა გულის სისუსტე სხეებთან გამოეჩინა და სურათი ისევ მაგიდაზე დადო. სურათზე დახედვამ დააიმედა, გული მოუღბო და ისევ იქ მყოფ მიმართა:

— ჩემო ბატონებო, ჩემ შვილს ისე მოუვიდა, როგორც ფუტკარს მოსდის ხოლმე: არის ერთი ყვავილოვანი ხე, რომელსაც აზაღია ეწოდება. ჩრდილოვანი და მამზიდველია იგი. მისი ყვავილები სურნელოვანი, ნათელი ფერისაა. როგორც კი ფუტკარი ამ მომხიბლველ ხეს დაინახავს, მისკენ გაეშურება, ხარბად წუწნის ყვავილების ტკბილ ნექტარს, გახარებული თავის ბანაკისკენ მიფრინავს, რომ თაფლი თაფლს მიუმატოს. ის სკამდე ვერ აღწევს, ნექტარით მოწამლული გზაშივე კვდება. ასე დაემართა უჩასაც, მოიხიბლა ერისთავის ქალის გარეგნობით, მისი ცეცხლოვანი თვალებით, გედის ყელით დაიპყრო ის ჯადოქალმა. ჩემი ფიქრით, ახლა უჩა მოწამლული ფუტკარივითაა, რომელმაც აზაღია იგემა. უჩაც ვედარ დაუბრუნდება თავის ოჯახს, თავის სამშობლოს. ის თავისი ქვეყნისათვის მკვდარია. მარტო ხორციელი სიცოცხლე როდია საკმარისი ადამიანისათვის, მთავარია სულის სისპეტაკე, ვაჟკაცობა, რაინდობა. უჩა ყველას თვალში ძმის მკვლეელია.

— დიდება ბატონო, — უთხრა მორიდებით რძალმა, — ხომ იცით, ნერვიულობა გავნებთ, დამშვიდდით. რაც მოხდა, გვესმის, მძიმეა თქვენთვის, მაგრამ თქვენი ძლიერი ხასიათით უნდა მოერიდოთ წყენას.

— ეჰ, ჩემო შვილო, წლებმა, განვლილმა მრავალმა უბედურებამ ხასიათიც შემიცვალეს და ჯანმრთელობაც. სიცოცხლის გმობა მაინც არ მიყვარს, არც სიკვდილს ვესწრაფვი. ვნახავ კიდევ, რამდენ უბედურებას გადავიტან, რა მოელის ქვეყანას.

— ქვეყანას, ბატონო ჩემო, როგორც მოგეხსენებათ, დიდი ამბები მოელის, დიდი ცვლილებებია მოსალოდნელი, — მოახსენა ჯარიდან ჩამოსულმა შვილიშვილმა.

— რას ელიან ვითომ, რუსთა ხელმწიფის ტახტს შეარყევენ თუ მეფეს სულ ჩამოაბრძანებენ?

— რას ბრძანებთ, ბატონო! ასეთი სიტყვისა და აზრისათვის ხალხს ხერტენ, ძალიან საშიშია ამაზე მსჯელობა, ფრთხილად ვიყოთ, — უთხრა შვილიშვილმა.

— თქვენ იყავით ფრთხილად, მე ვინ დამიჭერს, ვის სჭირდება ჩემი აზრი? მე საიქიოდან ვლაპარაკობ, სააქაო რაღა მაქვს!

— იქნებ ჩვენც არ გვიყვარდეს, ბატონო დიდება, ნიკოლოზ მეფე, მაგრამ ძალა აღმართსა ხნავსო. მით უფრო ჩვენ, ახალგაზრდებსა და სამხედროებს, მაგრად გვეკიდებენ ხელს. ჩვენც მივეჩვიეთ სიფრთხილეს.

არ მოეწონა მაიას ეს სიფრთხილე, აღარ გააგრძელა ლაპარაკი, აღარაფერი უპასუხა, სავარძელში ღრმად ჩაჯდა და კრიალოსნის მარცვლა დაიწყო, ფიქრებს მიეცა, შვილიშვილს აკვირდებოდა, მის მსჯელობას, მის მიხრა-მოხრას.

„აი, როგორი ვაჟკაცები გამოუზარდა ჩვენს ოჯახს რუსთა ხელმწიფემ: დამფრთხალი, შეშინებული, რომელთაც არც თავისუფალი აზროვნება შეუძლიათ, არც თავის დაცვა. ესენი ასე ბრმა იარაღად დარჩებიან ხელმწიფის ხელში მთელი თავისი სიცოცხლის მანძილზე. ამათ ახლა ყოველი კიტია და ჯგერენაია ჯობია, რომელიც ხელმწიფესთან ბრძოლას გაბედავს და თავისი რწმენისათვის, თუ საჭირო იქნა, თავსაც და-

დებს. გადაგვარდა, ბატონო, ჩვენი ჯიში. განა უჩაც ასეთი არ არის? ჩემი უბედური გრიშაც ასეთი არ იყო? ისიც ისე არ ჩამოშორდა საზოგადოებრივ ცხოვრებას?!“ — ფიქრობდა მათა და მისი სახე სასოწარკვეთილებას ამჟღავნებდა.

უმცროსებმა საჭიროდ დაინახეს მარტო დაეტოვებინათ ფიქრებში წასული მათა. შვილიშვილმა და მისმა მეუღლემ ღამე ნებისა უსურვეს მოხუცს და ოთახიდან გავიდნენ.

მათამ დილით კვლავ გააგრძელა რძალთან და შვილიშვილთან დაწყებული საუბარი.

— შვილო ჩემო, ძველ დროში ომი უფრო წესიერად წარმოებდა, ძველ ომებში მეღავენდებოდა ახალგაზრდობის ვაჟკაცობა და გულადობა.

— რატომ, ბატონო, ხელჩართული ომი ახლაც ხშირია, რუსის ჯარი სწორედ ცნობილია ხელჩართული ბრძოლით.

— არა, ხელჩართული ბრძოლაც სხვანაირია ახლა. წინათ ფარი ეკიდა მებრძოლს, მტრის მოქნეულ ხმალს იმით იგერიებდა, ამიტომაც ამბობდა ხალხი: დროზე ნახმარი ფარიო, იგივე ხმალი არიო. ძველ ომებში მებრძოლი აღტაცებული იყო იმით, რომ იცოდა მოპირდაპირე გმირებისა და მებრძოლების ვაჟკაცობა. მათთან ბრძოლა თავმოყვარეობას აღვიძებდა, ბრძოლის ჟინს მატებდა. განსვენებული ჩემი ძმის დავითის წიგნი „რუხის ბრძოლა“ უნდა წაგიკითხო, იქ ნახავ შესანიშნავ სურათს, თუ როგორ იბრძოდა მამაჩემი გიორგი დავიანი, უტუ მიქავა, გელა ჯგერენაია და სხვა გმირები სამშობლოს დასაცავად.

— წაკითხული მაქვს, ბატონო დიდება, დავითის წიგნი. ქართველი ახლაც გმირულად დაიცავს თავის სამშობლოს. უჩას ვაჟკაცობის და გმირობის ამბავი მთელმა რუსის ჯარმა იცის.

— მისი სამარცხვინო ამბავი კი მთელმა საქართველომ, — ნაღელიანად ჩამოართვა სიტყვა შვილიშვილს მათამ და განაგრძო: — არა, როგორ წახდა უჩა ისე, რომ იმ ქალზე ჯვარი დაიწერა? საქართველოში აპირებს ჩამოსვლას, ალბათ, აქ მომიყვანს „სასახელო“ რძალს: დამიჯაბნა. რა ძნელი ყოფილა სიბერე, რა გამიბედა უჩამ?!“

— მართალია, ბატონო, ცუდი საქმეა, ხალხი გაკიცხავეს, მაგრამ თქვენ ხომ სიყვარულის ძალა წარმოდგენილი გაქვთ. უნდა მიუტევოთ. თუ ადამიანმა თავი ისე გასწირა, რომ სულ ერთი გახდა, მასზე ვინ რას იტყოდა, როგორც ჩანს, მისთვის ყველაზე ძვირფასი ყოფილა ის, ვისთვისაც ეს გააკეთა. ის ყოფილა მისი ბედნიერება. ყველაფერს უნდა შევეურიგდეთ. ბიძია უჩას ბედნიერება თქვენთვის სასიხარულო უნდა იყოს... თქვენ ხომ მისი სიცოცხლით ცოცხლობთ ახლა. — მორიდებით უთხრა რძალმა.

— შენ, ჩემო რძალო, ახალი რომანების ენით მსჯელობ, მე ბევრჯერ და გულახდილად მითქვამს შენთვის მთელი ჩემი ცხოვრების თავგადასავალი. სიყვარულს დიდ პატივს ვცემ, მაგრამ მე ყველაფერს იმას ვაფასებ, რაც ადამიანის ღირსებას არ დაამცირებს და არ შებღალავს. ხომ იცი, როგორი თავდავიწყებით მიყვარს უჩა, როდესაც ის ვილაც დიდმა თავადმა დუელში გამოიწვია, მგონი თბილისში, კარგად არ მახსოვს, მე წასვლით არ წავსულვარ, მაგრამ ჩემი რძლის ძმა გავვზავნე და თან მივწერე, რომ არ შერცხვენილიყო, უკან არ დაეხია, იქ ვაჟკაცური სიკვდილი მერჩია, ასეთი სირცხვილით მისი ცხოვრების დამოავრებას.

— ბატონო ღიღედა, ბიძიას რომ ის ქალი არ შეერთო, ვინ დარჩებოდა დამცირებული?

— ისევ ჩემი შვილი, — თქვა მაიამ ჩაფიქრების შემდეგ. — ქალს რომ სახელს უტეხ, ოჯახს უნგრევ, პატრონს უკლავ, ვალდებული უნდა იყო, უპატრონო მერე.

— ხომ, ბატონო? აბა მეტი რა დააშავა უჩა ბიძიამ! მან ადამიანური მოვალეობა მოიხადა.

— ბიძაშენმა ის დააშავა, რომ თავიდანვე უსინდისოდ მოიქცა, ძმას უღალატა. მერე ის დააშავა, რომ მისი მიზეზით მშვენიერი ვაჟკაცი უდროოდ გამოესალმა წუთისოფელს, მესამე ის, რომ მან ფეხი დააბიჯა საზოგადოების აზრს. უნდა იცოდე, შვილო ჩემო, სანამ საზოგადოებაში ურევიხარ, საზოგადოების აზრს პატივს უნდა სცემდე. საერთოდ რაღა ადამიანია ის, ვინც გრძნობას ვერ მოერევა?

— ჩემი ფიქრით, ქალი თვითონ არ უნდა გაჰყოლოდა უჩა

ბიძიას ამდენი უბედურების შემდეგ. თუ იდეალურად უყვარდა მას ბიძია, უნდა შეეწირა საკუთარი ბედნიერება, გაეხსნა გზა მისთვის ახალი ცხოვრებისაკენ, ჩამოშორებოდა თვითონ. ბიძია შემდეგ, ალბათ, ცოლს შეირთავდა.

— რა ბავშვი და გამოუცდელი ხარ! შენ წაკითხული რომანები გგონია ცხოვრება! ასეთი ქალები განა სპეტაკ გრძნობებზე ფიქრობენ? ისინი თავიანთი პირადი ბედნიერების გარდა ვერაფერს ხედავენ.

— ბატონო, დიდება, თქვენ, ალბათ, ღირსეული დედამთილი იქნებით, როგორც ყველა განვლილ უსიამოვნებას, ამასაც სულგრძელად გადაიტანთ.

— არც ღირსეული ვიქნები, არც არაფერი. ამ ოთახიდან კი, ვიცი, სიკვდილამდე არავინ გამაგდებს, ჩემი გიგიშა არ მომშორდება, ეს ჩემი გაზრდილი და დანასახლები გლეხებიც მომხედავენ, აწი სიკვდილიც მოახლოებულია, — თქვა და ჩაფიქრდა. კრიალოსანზე რაღაც დათვალა, შემდეგ ხმამაღლა თქვა: — თებერვალში ოთხმოცდათვრამეტი შემისრულდება. — წამოდგა, ღინჯად გაიარ-გამოიარა.

რძალი გაკვირვებული უყურებდა, თან ფიქრობდა: „ნუთუ ბებიას ხნის რომ გავხდე, სამოცდაოთხმეტი წელი კიდევ უნდა ვიცოცხლო“. ძალიან დიდად მოეჩვენა ეს დრო, ბებიას დაემშვიდობა და თავის ოთახში გავიდა.

საერთო და პირადი

დუტუ ჯგერენაია იშვიათად ჩამოდიოდა ქუთაისიდან. იგი ხან თბილისში იყო პარტიის დავალებით, ხან ბაქოში, ბათუმში, ჩრდილოეთ კავკასიაში და იქიდან სერგეი კიროვის და სერგო ორჯონიკიძის დავალებით ბრუნდებოდა. ძლიერ აწუხებდა ღრმად მოხუცებულ დედ-მამის უპატრონოდ მიტოვება, მაგრამ რა ექნა, თავის მოსაფხანადაც არ ეცალა და როგორ მიეხედა მშობლებისათვის. თავის შვილს, უკვე თვრამეტ წელს მიღწეულ კაკოს აგზავნიდა შინ და თუ რამეს იშოვნინდა, მშობლებთან და ცოლთან ატანდა. კაკო ქუთაისის გიმნაზიაში

სწავლობდა და მამას პარტიული დავალებების შესრულებაშიც ეხმარებოდა.

მაია ხშირად იხსენებდა დუტუს. იცოდა მისი ამბები. როცა კაკო ჩამოვიდოდა, დაწერილებით გამოკითხავდა მამის შესახებ თუ რამე იცოდა. კაკოს უსათუოდ რაიმეთი დაასაჩუქრებდა და ისე გაისტუმრებდა ხოლმე ქუთაისში.

სამი წელიწადი გრძელდებოდა ომი. მილიონობით ადამიანი ეცემოდა ბრძოლის ველზე. ადამიანთა სიცოცხლე მიჰქონდა არა მარტო ტყვიასა და ხმალს, შიმშილს, ეპიდემიას. მოიშალა მეურნეობა; მუშახელი ქალაქიდან და სოფლიდან ჯარში იყო გაწვეული. ომს კი ბოლო არ უჩანდა. მეფის არმია მარცხს მარცხზე განიცდიდა. გერმანელთა არტილერია, შეიარაღებული უკანასკნელი ტექნიკის ქვემეხებით, ყუმბარებს სეტყვასავით აყრიდა მეფის ჯარს, რომელსაც არ ყოფნიდა არც ქვემეხები, არც ყუმბარები და შაშხანებიც კი.

გერმანელთა წარმატებას ხელს უწყობდა მეფის სამხედრო მინისტრის სუბომინოვის ღალატი. ეს სამშობლოს გამცემი „რაინდი“ გერმანელთა დაზვერვის აგენტი იყო და სხვა მინისტრებთან, თვით დედოფალთან ერთად, ყოველნაირად ცდილობდა რუსეთის ფრონტის იარაღით და სურსათით მომარაგების ჩაშლას.

გერმანელებმა დაიპყრეს პოლონეთი, ბალტიისპირეთის ნაწილი და ჯიქურ მოიწვედნენ წინ. ეს საშინელ აღშფოთებას იწვევდა როგორც რუს ხალხში, ისე კავკასიის ხალხებშიც. აძლიერებდა და აღრმავებდა მუშათა და გლეხთა რევოლუციური მოძრაობას ომისა და ცარიზმის წინააღმდეგ. რევოლუციური მოძრაობა ერთნაირი სიძლიერით ვითარდებოდა როგორც ფრონტებზე, ისე ქალაქად და სოფლად.

ნიკოლოზ მეორის ჯარების მარცხი არა მარტო ხალხს აღაშფოთებდა, იგი დიდ უკმაყოფილებას იწვევდა რუსეთის ბურჟუაზიაშიც. ყველა ხედავდა, რომ კატასტროფის გზაზე დამდგარი მეფე, დღეს თუ ხვალ სეპარატულ ზავს შეკრავდა გერმანელებთან, რათა ამით თავისი ტახტი დამხობისაგან გადაერჩინა. ამიტომ რუსეთის ბურჟუაზიამ გადაწყვიტა მეფის სასახლეში გადატრიალება მოეწყობა, ჩამოეგდოთ ტახტიდან

ნიკოლოზ მეორე და მის ადგილზე ბურჟუაზიის მოკავშირე მიხეილ რომანოვი დაესვათ: ბურჟუაზიას სურდა იმპერიის კრიზისი სასახლეში გადატრიალებით გადაეწყვიტა, მაგრამ ხალხმა იგი თავისებურად გადაწყვიტა.

სურსათის, ნედლეულისა და სათბობის ნაკლებობამ იქამდე მიადწია, რომ რუსეთის ქალაქებში ერთიმეორის მიყოლებით ზედიზედ იხურებოდა ფაბრიკები და ქარხნები. ეს იწვევდა უმუშევრობას. ხალხი თანდათან დარწმუნდა, რომ ამ კატასტროფული მდგომარეობიდან გამოსვლა მხოლოდ მეფის ტახტიდან ჩამოგდებით შეიძლებოდა.

დაიწყო გაფიცვები. საყოველთაო გაფიცვების იდეა დღითიდღე სულ ახალ და ახალ მომხრეებს პოულობდა და ისეთივე პოპულარული ხდებოდა, როგორც 1905 წელს იყო. გაფიცვა და დემონსტრაცია გადაიზარდა აჯანყებაში. დაიწყო აჯანყებულ მუშათა და ჯარისკაცთა შეტაკება, მაგრამ 27 თებერვალს ჯარისკაცებმა იარაღი თავის ოფიცრებს შეუბრუნეს. აჯანყდნენ ჯარისკაცებიც. მუშათა კლასის მხარეზე ჯარის გადასვლამ უცებ გადაწყვიტა მეფის თვითმპყრობელობის ბედი.

თებერვლის ბურჟუაზიულ-დემოკრატიულმა რევოლუციამ გაიმარჯვა.

ეს ამბავი უცებ მოედო მთელს იმპერიას.

ერთხელ კაკო ქუთაისიდან ჩამოვიდა და შინმიუსვლელად პირდაპირ მაიასთან მივიდა. ამ დროს მაია წინა ოთახის ღია ფანჯარასთან იჯდა და ეზოს გადაჰყურებდა. კაკო რომ დაინახა, ჩემოდნით ხელში, აჩქარებული ნაბიჯით მომავალი, მიხვდა, ბიჭი რაღაც ამბით იყო აღელვებული. წამოდგა მაია და აივანზე გამოვიდა. დაინახა თუ არა მაია, კაკოს სახეზე დიმილი მოეფინა.

— ბიჭოლა მაია, — დაუმახა ეზოდან, — რუსეთში რევოლუცია მოხდა, მეფე ტახტიდან ჩამოაგდეს. — ამოირბინა კიბე, შემოვიდა აივანზე, ჩემოდანი დადგა და მაიასკენ გაემართა. ისინი ისე შეხვდნენ ერთმანეთს როგორც დიდი ხნის უნახავი დედა და შვილი.

მაიამ კაკოს შუბლზე აკოცა.

— გმადლობთ, ჩემო შვილო, კარგი მასარობელი ხარ, — უიხრა და დაჯდა. — ველარ გადაწვავენ აწი გენერლები ჩვენს სოფლებს, ველარ გააციმბირებენ ჩვენს შვილებს, — თქვა ბედნიერი ადამიანის ხმით. კაკო გვერდზე მოისვა. — მერე, ვინ დაუსვამთ ახლა მეფის ადგილზე?

— დროებითი მთავრობა.

* * *

რუსეთში დროებითი მთავრობა და საქართველოში მენშევიკური მთავრობა რომ ჩაუდგა სათავეში სახელმწიფო მართვა-გამგეობას, მაიას ეგონა, აწი მაინც დაწყნარდება ქვეყანა და ველირსები უჩას ნახვასო, მაგრამ იმედები გაუცრუვდა. ოქტომბრის რევოლუციამ მაია ისევ საგონებელში ჩააგდო. რა საჭირო იყო მეორე რევოლუცია? დუტუ ისევ ქუთაისში იყო. ვისთვის ეკითხა რაში იყო საქმე? „არაფერი მესმის რა ზდება ქვეყანაზე, — ფიქრობდა მაია. — ჯერ მეფეს ებრძოდნენ ერთად მენშევიკები, ბოლშევიკები, ესერები, კადეტები; მეფე რომ დაამარცხეს, ახლა ერთმანეთს ებრძვიან ისინი ვინც ერთი, საერთო საქმისათვის იბრძოდნენს.. არა, მე უჩას ნახვა არ მელირსება, ნეტა ის მაინც ვიცოდე, რომელ პარტიაშია ჩემი შვილი, ვის ებრძვის?“

მაია ამ ფიქრში რომ იყო, უჩა თავისი ცოლითა და გერებით სამშობლოსკენ მოიჩქაროდა, რადგან იცოდა, საქართველოს მთავრობა უფრო ტკბილად შეივრდომებდა. უჩა მოხერხებული კაცი იყო. თუ სალაპარაკოდ ვინმეს ჩაიგდებდა ზელში, თუნდ მოსისხლე მტერიც ყოფილიყო, ენამჭვერობით და გარეგნობით უცებ მოინადირებდა მის გულს. თბილისში ჩამოსვლისთანავე მთავრობასთან გამოცხადდა, ზოგთან დავიწყებული მეგობრობა აღადგინა, ზოგი მთავრობის კაცი ნათესავიც აღმოჩნდა, ზოგი მოყვარე. სამ დღეში თავის სოფელში ცხოვრების ნება აიღო.

— შედით ჩემს მდგომარეობაში. ასი წლის დედა უპატრონოდ მიკვდება, არა ჰყავს მოსამსახურე, არც მომვლელი. მიინდა ჩემს ხელში დლიოს სული, — არწმუნებდა ყველას უჩა.

თხოვნა შეუსრულეს, ბოდშიც კი უთხრეს, რომ მარტო თვრამეტ დესეტიანა მიწას უტოვებდნენ.

— ნუ წუხართ, ნეტავ მაგის დამუშავებას შევძლებდეთ, მე ხომ მარტო უნდა დავამუშავო ყველაფერი.

მაიას სიხარულს საზღვარი არ ჰქონდა, როცა უჩა ჩამოვიდა მასთან. ეზოს მოადგა ორი ეტლი და ორი ურემი, ადამიანებით, ბარგით, ყუთებითა და სურსათ-სანოვაგით დატვირთული.

მაია ცივად შეხვდა ბაბილიანს. შვილის სიყვარულით მაინც ზრდილობიანად მიიღო. როცა გადახედა მამით ობლებს, გული შეეკუმშა. თვალწინ ალექსანდრე დადემქელიანის ვაჟ-კაცურმა სახემ გაუქროლა, თვალები დაენამა და თავის ოთახში შებრუნდა.

— სიხარულმა ააღელვა, ნურავის შეუშვებ მასთან, — უთხრა მოახლე ქალს ვერას უჩამ და ძალაგამოღებული დედა ოთახში შეიყვანა.

* * *

ცხოვრებისაგან დაღლილ უჩას რუსეთში მაინც აღარ ეღგომებოდა. ენერგიულად შეუდგა სოფელში მეურნეობის მოწყობას.

თვრამეტი დესეტიანა მიწის შემოსავალი მრავალრიცხოვანი ოჯახის მოთხოვნილებას ვერ დააკმაყოფილებდა, თუ არ გააუმჯობესებდა მიწის მეურნეობას. უნდა შეემცირებინა მოსამსახურეთა და მოახლეთა რიცხვი. ასეც მოიქცა, მაგრამ მათთან შეგობრული კავშირი არ გაუწყვეტია არც მას და არც დედამისს, მეტადრე გიგიშასთან, რომელიც სულ ახლო კლასნლა და ამ ოჯახის ხშირი სტუმარი აყო.

მაია ხშირად უჩიოდა სიღარიბეს შვილთან და ყველა თავისიანთან. უჩას ჩამოსვლის შემდეგ შვილიშვილები და მათი ცოლები ახლა მხოლოდ სტუმრად თუ მოვიდოდნენ რანდენიმე დღით. ეს მაიას არ მოსწონდა. სულ არ მინდა ჩემი უმანკო რძლების მაგივრად ბაბილიანს ვუცქიროო, — იტყოდა. არ უყვარდა რძალი, არც გულს გადაუხსნიდა არასოდეს.

ოჯახის წევრებმა იცოდნენ, რომ მაიას ბევრი ძვირფასი ნივთი, თვალმარგალიტი ჰქონდა შენახული პატარა ოთახში, რომლის კედელი ძალიან საიმედოდ იყო გაკეთებული. ოთახი აივნის მხრიდან რკინის სალტეებით იყო შემოჭვდილი, ხოლო შესავალი კარი ერთი ჰქონდა, ისიც მაიას საწოლი ოთახიდან. ძიძის სიკვდილის შემდეგ იქ ფეხი არავის შეუდგამს ვერას მეტს. მაია თვითონაც არ შედიოდა, დახუთულ ჰაერს ერიდებოდა, ყოველ გაზაფხულსა და შემოდგომაზე ყველაფერს გამოამზეურებდა ვერას დახმარებით, თავის ოთახში გააშლევინებდა ატლასითა და ხავერდგამოკრულ ყუთებს, ძვირფას ნივთებს ტყვეობიდან გაათავისუფლებდა. ოქროს, ვერცხლს, ალმასს, ლალს, ბრილიანტს, მარგალიტებს, — ყველაფერს თავისი ხელით თეთრი ტილოთი გაწმენდა, ისევ ჩაკეტავდა და შეანახვინებდა.

ნოხები, ფარდაგები, დიბა-ფარჩები, სპარსული და თათრული ქსოვილები, ზოგი თხელი და ჭრელი, ზოგიც დიდი მოცულობის ხალიჩები იმავე საკუჭნაოში მალლა გაბმულ ბაწრებზე ეკიდა. ამათ უფრო ხშირად ამზეურებდნენ. არც დამალვა ხერხდებოდა მათი, ხოლო ძალიან დიდი ნოხები, რომლებიც ოთახების იატაკებს ფარავდნენ, ყველასათვის თვალსაჩინო იყო.

მაიას თავისი სიმდიდრე და ნივთები მოსვენებას არ ამლევდა მენშევიკების ხელისუფლების დროს. მთავრობას არ ჰქონდა საკმაო ავტორიტეტი. სიფლებში მრავლად იყო შეიარაღებული ახალგაზრდა, რომლებიც აჯანყების სამზადისში იყვნენ. ხშირად ამათი სახელით ისეთებიც შეიარაღდებოდნენ, რომლებიც ხალხის პარცვა-გლეჯას არ ერიდებოდნენ. მაიას სასახლეშიც ეშინოდათ ასეთი პირების.

უნა ბოლშევიკებს გაურბოდა, უგანათლებულესი თავადი, პოლკოვნიკის ჩინით, დამფრთხალი იყო რუსეთში ნახული სამოქალაქო ომით. ცდილობდა უსიამოვნებისათვის თავი აერიდებინა. სოფელს არც იმდურებდა, არც უახლოვდებოდა. მაია დიდი პატივისცემით ეკიდებოდა იმათ, ვის გამოც გრიშასთან უსიამოვნება მოუვიდა.

დუტუ და მისი ამხანაგები ახლა ზუგდიდის მაზრაში მოქმედებდნენ. ისინი საქართველოს ბოლშევიკებთან ერთად მენ-

შევიკების ხელისუფლების დასამხობად ემზადებოდნენ. ურამ იცოდა რას მოასწავებდა მისთვის მენშევიკების დაბარცხება და ამიტომ ყოველნაირად ცდილობდა დაერწმუნებინა დედა, ჩამოშორებოდა დუტუს და მის ამხანაგებს.

— დედა, მათ ხალხისათვის უბედურება მოაქვთ. მათ მხოლოდ ძარცვა და ნგრევა შეუძლიათ, — ეუბნებოდა უჩა მაიას. — მალე აღგვიან მაგ ავაზაკებს მიწის პირიდან. დაწყნარდება ქვეყანა.

— არა, თუ ასე გაგრძელდა, ქვეყანა არ დაწყნარდება. მე ვერ მოვესწრები ქვეყნის დაწყნარებას. შენი მეშინია, შვილო. შენ არაფერი აგიტეხონ მაგ ბოლშევიკებმა, თორემ მე ჩემს თავს არ ვუფრთხილდები, ისე კი მგონია, რომ დუტუ ჯგერენაია მძარცველების და მნგრეველების პარტიაში არ შევიდოდა. ან ლენინი უხელმძღვანელებდა ასეთ პარტიას?

— შენ საიდან იცი, დედა, ლენინი? — გაოცდა უჩა.

— შენს მტერს დააკლდა, შვილო, იმდენი, რამდენიც შე ვიცი... მაგრამ აწი ჩემი ცოდნა ვის რაში სჭირდება.

ახალგაზრდები

გრიშას სიკედილისა და უჩას ცოლშვილიანად სოფელში ჩამოსვლის შემდეგ გრიშას ცოლ-შვილისკენ უფრო უწევდა გული მაიას. უყვარდა რძლები. გრიშას სამი უფროსი ქალიშვილი გათხოვილი იყო, ისინი და მათი შვილები ქვეყანას ერივნან. შვილიშვილები ზაფხულობით თავისთან ჰყავდა. ყველაზე უმცროსი გოგონა — ქეთინო მესამე კლასში იყო ქუთაისის წმინდა ნინოს სასწავლებელში. როდესაც მაიამ ის ზაფხულის არდადეგებზე ხიბულაში მოაყვანინა, მაშინ კაკო ქუთაისის გიმნაზიაში სწავლობდა. მაიას თხოვნით კაკო ხშირად ამეცადინებდა ქეთინოს.

გოგონას სიხარულს საზღვარი არ ჰქონდა, როცა კაკო სამეცადინოდ მოვიდოდა. ის ასჯერ უკეთ ითვისებდა კაკოს მიერ ახსნილ საგანს, ვიდრე მასწავლებლისას. ხიბულაში ჩამოსვლა ქეთინოსათვის დღესასწაული იყო, რადგან იქ ნახავდა კაკოს, იმეცადინებდა მასთან.

მაგრამ აი კაკომ გიმნაზია დაამთავრა. თბილისის უნივერსიტეტში შევიდა და უკვე სტუდენტი იყო. ამავე დროს კომკავშირის ორგანიზაციის აქტიური წევრი. ერთხელ ის კომკავშირის ორგანიზაციის დავალებით ქუთაისში ჩავიდა და სადგურიდან პირდაპირ წმინდა ნინოს სასწავლებლის პანსიონისკენ გაეშურა. იქ ქეთინო ეგულეობდა, მისკენ მიისწრაფოდა.

ქეთინო უკვე თექვსმეტი წლის ქალიშვილი იყო. არც ისე ლამაზი, მაგრამ ისეთი ეშხიანი, სიცოცხლითა და ენერგიით სავსე, რომ მარტო მისი სიცილი და საუბარი მოხიბლავდა მამაკაცს.

პანსიონის ქალიშვილებს კაკო ნანახი ჰყავდათ და ახლა სტუდენტის ფორმაში რომ დაინახეს, თვალები გაუფართოვდათ. ისინი უივილ-ხივილით გაიქცნენ ქეთინოს დასაძახებლად.

— ქეთინო, ქეთინო, შენი ლამაზი ნათესავი მოვიდა!

მგონი ზოგნი განგებ ხმამაღლა იძახდნენ, კაკოს რომ გაეგონა. გახარებული ქეთინო ბავშვივით მორბოდა, მაგრამ მიუახლოვდა თუ არა კაკოს, ფეხი აერია, თითქოს დამუნჯდა. შედგა კაკოს წინ გულამომჯდარი და გაფითრებული.

— გამარჯობა, ქეთინო, — პირველმა კაკომ დაარღვია უხერხული ღუმელი.

— კაკო, არ გელოდი...

— გეწყინა ჩემი მოსვლა?

— არა, რას ამბობ... ისე გამიხარდა... დიდი ხნით ჩამოდი?

ისინი გრძნობდნენ, რომ ქალიშვილები რომლებიც აქეთიქით მიიმალნენ ხის ქვეშ, დერეფნებში, კიბესთან, შორიდან თვალს აღევნებდნენ მათ და ბალის კუთხისკენ წავიდნენ.

— რა საქმეზე ჩამოდი, კაკო? — ჰკითხა ქეთინომ. ვერ ფარავდა სიხარულს. ლოყა ეწვოდა.

— შენს წასაყვანად.

— სად?!

— ჩემთან.

— შენთან?! — ვერ გაიგო რას ეუბნებოდა ვაჟი.

— ჰო, ჩემთან.

— რატომ?!

— იმიტომ, რომ ჩემად მეგულები.

ისევ სიჩუმე ჩამოვარდა. იდგნენ თავდახრილები და ვერც ერთი ვერ ბედავდა შეეხედა თვალებში. ქეთინო ვერ ბედავდა, რადგან მიხვდა რას ეუბნებოდა ვაჟი და სიხარულისაგან სული შეუგუბდა. ვაჟს კი ეშინოდა უარი არ ეთქვა ქალს და გული გაუჩერდა პასუხის მოლოდინში, ბოლოს ისევ კაკომ აიღო თავი.

— არ წამომყეები, ქეთინო?

— მე ხომ ვსწავლობ...

— სწავლას რომ დაამთავრებ?

— მაშინ კი... მაგრამ ბიძია უჩამ ნება რომ არ მომცეს... იმას ხომ მამაშენი არ უყვარს, ბოლშევიკიაო.

— იქნებ არც შენ გიყვარს ბოლშევიკები?

— მე... მე არ ვიცი. მე შენ მიყვარხარ და სხვა არაფერი მინდა.

— მეც რომ გავხდე ბოლშევიკი?

— თუ ეს კარგია, მე მხოლოდ გამიხარდება.

ცეცხლის ალი

მენშევიკების მთავრობამ კარგად იცოდა, რომ ზუგდიდში, ისე როგორც საქართველოს სხვა კუთხეებში, არალეგალური ბოლშევიკური სამაზრო კომიტეტი არსებობდა და ეს კომიტეტი ხელმძღვანელობდა მაზრის გლეხთა მოძრაობას, მიმართულს არსებული წესწყობილების წინააღმდეგ. მთავრობას ჯერ მათი კვალისთვის ვერ მიეგნო.

კომიტეტის თავმჯდომარე დუტუ ჯგერენაია, პროპაგანდისტ-ორგანიზატორები: ლუკა კიტია და ივა ქარცხია ზუგდიდის მაზრის გლეხობაში დიდი პოპულარობითა და ნდობით სარგებლობდნენ.

მთავრობის წარმომადგენლები ყოველ ღონეს ხმარობდნენ, რომ გლეხთა მოძრაობა ჩაეხშოთ, ამ მიზნით თვით. ზუგდიდის შეიარაღებული ძალები ხშირად დადიოდნენ სოფლებში, მაგრამ რაკი რწმუნდებოდნენ ხალხი მასობრივად ამხედრებუ-

ლია მთავრობის წინააღმდეგ, იძულებული გახდნენ თბილისის-სათვის მიეცათ ცნობა.

საქართველოს ყოველ კუთხეში ასეთივე მდგომარეობა იყო, როგორც ზუგდიდის მაზრაში, მთავრობა ვერ აუდიოდა ხალხის დაწყნარებას, მისი ერთადერთი დასაყრდენი მენშევიკური გვარდია იყო.

სიბუღაში ჩამოვიდა გვარდიის ერთი ნაწილი, რომელიც ერობის შენობაში დაბინავდა და ხალხის შეკრებაც აქ მოითხოვა. მთელი დღის ნაშრომი მოსახლეობა ჩაუცმელ-დაუხურავი, სიღარიბით წელმოწყვეტილი, საცოდავ შთაბეჭდილებას ახდენდა. მაგრამ გვარდიელებს და მათ ხელმძღვანელებს გაძვალტყავებული გლეხობის ჯავრი არა ჰქონდათ. ისინი სოფლად ბოლშევიკებს ეძებდნენ, მკაცრად მოითხოვდნენ ხალხისაგან მოეძებნათ და მოეყვანათ ბოლშევიკები კრებაზე, ეჩვენებინათ სად ჰქონდათ იარაღი და ვინ აერცელებდა ბოლშევიკების პროკლამაციებს. წინააღმდეგ შემთხვევაში გადაწყითა და დაპატიმრებით იმუქრებოდნენ. გვარდიის ოფიცერი, რომელიც ჩამოსულებს ხელმძღვანელობდა, მრისხანედ გამოიყურებოდა. ხელში ქალაღის ნაგლეჯი ეჭირა, რამდენიმე გვარი ამოიკითხა, ზოგი მათგანი აქვე იყო, ზოგი კი არ ჩანდა.

— აქ ხომ არ არის დუტუ ჯგერენაია, ავაზაკ კაკო ჯგერენაიას მამა?

— არ გახლავთ, ბატონო, — უპასუხა სასოფლო ერობის განყოფილების თავმჯდომარემ.

— სად არის?

— ეშმაკმა იცის იმისი თავი და ფეხი, — განგებ ძაგებით უპასუხა ოფიცერს გლეხმა, — ის ყოველთვის შფოთისა და ამბოხების ამტეხი იყო, მეფის დროსაც, ჩვენი მთავრობის დროსაც და ასე იქნება სიკვდილამდე.

— ნუ გეშინიათ, მალე ჩავაძაღლებთ, — დაამშვიდა გლეხი გულუბრყვილო ოფიცერმა და მერე ჰკითხა, — შორს ცხოვრობს აქედან ის ავაზაკი ჯგერენაია?

— არც ისე ახლოს.

— ეინა ჰყავს ოჯახში?

— ხანში შესული ცოლი, რომელსაც პარტიების არაფერი გაეგება.

— ჩვენ გავაგებინებთ, ამ წუთში აქ მომგვარეთ! — ყვიროდა ოფიცერი.

ამრიგად, მთელი ღამე, განუჩევლად წლოვანებისა, მოყვადათ სოფლები გვარდიელების დროებით შტაბში. როგორც მათ თვითონ უწოდეს ერობის შენობას, აწარმოებდნენ მკაცრ დაკითხვას, ოდნავ საეჭვო პირებს კი მეორე ოთახში ამწყვდევდნენ და გვარდიელებს აყენებდნენ დარაჯად.

ხალხი, რომელიც თვით შენობაში ვეღარ ეტეოდა, გარეშად იდგა სიცივით გათოშილი. არავინ იცოდა, ვის რა ბედი მიელოდა. გვარდიელების მრისხანება ყოველგვარ ადამიანურ საქციელს მოკლებულიყო. გინება, ცემა, ადამიანის დამცირება უკვე სისტემად იყო გადაქცეული მათ ხელში. გათენებისას, როდესაც ხალხის დაპატიმრებით გული იჯერეს, გვარდიელების ნაწილი წინასწარ მითითებულ ოჯახებში გაიბნა დასასვენებლად და ვახშმის მისართმევად, ხოლო ნაწილი თავისი უფროსით იმავე შენობაში დარჩა. გიზგიზა ბუხართან სოფლის მიერ მოტანილი ვახშმის ჭამას შეუდგნენ, კარგად შეზარხოშდნენ ღვინითა და არყით. შემდეგ თავიანთ ბუშლატებზე გაგორდნენ და ხერინვა ამოუშვეს.

ღილით გვიან გაღვიძებულ გვარდიელებს სოფელში გაბნეული ამხანაგები საძებარი გაუხდათ. ღვინით გამობრუხულ გვარდიის ოფიცერს ყველაზე გვიან გაეღვიძა. შენიშვნები და უხეში საყვედურები მიაყარა თავის ხელქვეითებსა და თვით ერობის განყოფილების თავმჯდომარეს. შემდეგ მკაცრად ჰკითხა:

— წაუკიდეთ თუ არა ცეცხლი შენიშნულთა სახლებს?

— თქვენს ბრძანებას ველოდით, ბატონო!

— პირველ რიგში ღუტუ ჯგერენაიას სახლი გადაწვით!

ერობის განყოფილების ერთ-ერთი ახალგაზრდა მუსაკი ოფიცერს გაბედულად შეესიტყვა:

— ჩვენ რომ ახლა ღუტუს სახლი დავწვათ, მთელი მაზრა ფეხზე დადგება.

— გინდ ფეხზე დადგეს, გინდ თავდაყირა. უნდა დაიწვას მისი სახლ-კარი, — მკვახედ მიუგო ოფიცერმა. — არა მარტო მისი, ყველა ბოლშევიკის სახლ-კარი ცეცხლში უნდა გავხვიოთ, ახლავე შეასრულეთ ბრძანება!

ამ ამბის შემდეგ ერთი საათი არ იქნებოდა გასული, რომ ოფიცერთან გიგიშა მივიდა და მოახსენა:

— დიდი ქალბატონი, მაია დადიანი გთხოვთ ეახლოთ შინ.

— რომელია ეს დიდი ქალბატონი დადიანი? — იკითხა ოფიცერმა. — უჩა დადიანის დედა ხომ არაა?

— დიახ, უჩა დადიანის დედაა.

ოფიცერი მაშინვე გამოცხადდა მაიასთან. მაიამ იგი პატივისცემით მიიღო, ხილით და ოჯალეშით გაუმასპინძლა.

— ჩემო შვილო, — დაუწყო მაიამ ფარული მღელვარებით, ოფიცერმა რომ რამდენიმე ჭიქა დალია. — როცა ამ თხუთმეტი წლის წინათ მეფის გენერალი ცეცხლითა და მახვილით შემოვიდა გურიასა და საქართველოში, ჩვენ ოსმალთა შემოსევა გაგვახსენდა და აღშფოთებით ვწყევლიდით მეფის ხელისუფლებას და თვით იმ ჯალათ ალიხანოვ-ავარსკის. რა უნდა ვთქვათ ახლა, როცა სოციალისტური მთავრობის ზარბაზნები უშენენ სოფლებს და ცეცხლს უკიდებნ ჩვენს სახლებს.

ოფიცერი ისე განაბული უსმენდა მაიას და თან ისე მორჩილი, რომ გეგონებოდათ მას დედოფალი ესაუბრებოდა და არა ას წელიწადს მიღწეული უმწეო დედაბერი.

— მაშინ ალიხანოვმა დაწვა დუტუ ჯგერენაიას სახლი. ახლა შენ უპირებ გადაბუგვას შენი მიწის, შენი სისხლ-ხორცის, შენი ერის შეილის სახლ-კარს.

— მე ბოლშევიკების სახლს ვწვავ, ქალბატონო.

— იმ ოჯახში ახლა მოხუცი ქალის მეტი არავინაა, შეილო, ნუ ჩავარდებით იმის ცოდვაში... ასი წლის ქალი გავხდი და თხოვნით არასოდეს მიმიმართავს არავისათვის. მე მხოლოდ ვბრძანებდი და მოვითხოვდი აქამდე. ახლა შენ პირველი კაცი ხარ, რომელსაც გთხოვ, ეცი პატივი ჩემს ჭაღარას. ნუ დაწვავ დუტუ ჯგერენაიას ოჯახს.

— ბატონო ჩემო, — წამოდგა აღელვებული ოფიცერი. — სიცოცხლის ფასადაც რომ დამიჯდეს, მე თქვენს თხოვნას

უარს ვერ ვეტყვი. გარდა ამისა, ბატონი უჩას პატივისცემით...
კიდევ რას მიბრძანებთ, ქალბატონო?

— მეტს არაფერს, შვილო...

ოფიცერი წავიდა, კმაყოფილი და გახარებული მაია მთელი
დღე კარგ ხასიათზე იყო. წარამარა უჩას კითხულობდა. სასლ-
ში ყველა გააფრთხილა, რომ უჩასთვის არ ეთქვათ თუ ოფი-
ცერი იყო მასთან.

უჩა გრიშას ოჯახში იყო წასული, ხორშში, თავისი ცოდ-
შვილით და დღეს უნდა დაბრუნებულიყო. იგი საღამოს დაბ-
რუნდა. დაღლილობა მოიმიზეზა, უვაზმზოდ დაწვა.

მაიას ძილი არ ეკარებოდა, მისი საწოლი ოთახის ფანჯა-
რა მთელ სოფელს გასცქეროდა. ძილი რომ გაუწყდა, ღვიძინ-
ში წამოჯდა, ბალიში ასწია, ზურგით მიეჯდნო და ასე სა-
თობით გასცქეროდა ფანჯრიდან სოფელს. კრიალოზანს მარტუ-
ლავედა ფიქრებში წასული, რომ უცებ ცეცხლის აღი აფრია-
და სოფელში.

— დუტუს სახლი იწვის! — მაშინვე მიაკივლა მაიამ. — ვე-
რა, ვერა! — დაუძასა მოახლე ქალს.

გულგახეთქილი შემოვიარდა მოახლე ქალი.

— რა ამბავია, ქალბატონო?

— ვერა, ხედავ, როგორ გამაბრიყვა იმ უსინჯისო ოფი-
ცერმა!

— უიმე, უიმე, ეს რა საცოდაობაა! — შემოიკრა ლოყანე
ხელი ვერამ. — ქრისტიანი იყო, თუ ურჯულო ის ოფიცერი.
რავა გპირდებოდა: სიცოცხლის ფასად რომ დამიჯდესო... სი-
ცოცხლე გაუმწარდეს, ღმერთმა შინ ცოცხალი ნუ მიიყვანოს!..

სოფლიდან წივილ-კივილი და შეძახილი ისმოდა. ეტყო-
ბოდა ცეცხლს აქრობდნენ, მაგრამ იგი თანდათან ძლიერდებ-
ოდა. მერე ერთბაშად მოწყდა ალს წელი. სახურავი ჩაიქცა
აღბათ.

მაია ქანდაკებასავით უძრავად იჯდა.

„ოფიცერმა გატეხა სიტყვა, — ფიქრობდა ის და არ სჯე-
როდა, — შევარცხვინე მე ასეთი ოფიცერი. მოდი, ვეტყვი უჩას
და დუელში გამოვაწვევინებ... მაგრამ, როგორ იკადრებს ჩემი
შვილი მაგისთანა ძაღლისთვის ხელის გასვრას...“

არ იცოდა მაიამ, რომ სწორედ უნამ დააწვევინა იმ ოფიცერს დუტუს სახლი. მაიას სახლიდან დაბრუნებულ ოფიცერს გზაში ხორშიდან მომავალი უჩა შემოხვდა. ოფიცერმა უთხრა, რომ მაიასთან იყო, რომ მაიამ თხოვა, არ დაეწვა ჯგერენაიას სახლი, რომ მან ეს თხოვნა მიიღო, როგორც ბრძანება და უარი თქვა სახლის დაწვაზე.

— რა ნება გაქვთ უარი თქვით, — წარბი შეიკრა უჩამ და უბრად შეხედა ოფიცერს. — ნუ დაგავიწყდებათ ჯარისკაცი სართ და ნაბრძანები გაქვთ გადაწვით ბოლშევიკების სახლები, თქვენ კი იჩინოთ სულგრძელობას, მოხუცი ქალის კაპრიზს აყოლილი, უარს ამბობთ თქვენი მოვალეობის შესრულებაზე. ამას არ გაპატიებენ. პირველი მე არ გაპატიებთ.

გაოცებული უსმენდა ოფიცერი.

— ჰო, მაგრამ, ის ბოლშევიკი თქვენ გენათესავებათ თურმე.

— ჩვენ გვენათესავება დუტუ ჯგერენაია, როგორც ადამიანი, მე არ ვცნობ ნათესავად დუტუ ჯგერენაია-ბოლშევიკს.

— გასაგებია...

— დედაჩემს თქვენთვის არაფერი უთხოვია.

— გასაგებია.

— მე თქვენ არ შემხვედრიხართ.

— გასაგებია.

— გისურვებთ წარმატებას.

— გმადლობთ.

მაიამ რომ მიაკივლა, უჩას გაეღვიძა. ცეცხლის დანახვაზე ერთი წამით ეტკინა გული, მაგრამ უმაღლე გადაუარა. „დუტუ და მისი შვილი თავისი საქმით ახლა მოყვარე კი არა, მტერია ჩემი და ჩემი ოჯახის. მტერი არ უნდა შეგებრალოს“. გაიფიქრა, მეორე გვერდზე გადაბრუნდა და მალე ჩაეძინა.

დუტუ ჯგერენაიას ოჯახზე უჩა სხვა მხრივაც იყო გაბოროტებული. ხორშიში გრიშას მეუღლემ ცუდი ამბავი დაახვედრა. კაკო ჯგერენაიას ქეთინო გაუტაცნია თბილისშიო. ქეთინოს დედა ციცუ ლოყებდაკაწრული დახვდა უჩას და მის

კოლს. ეს რას მოვესწარი, გლახუჭას შეილმა ქალიშვილი მომტაცა. სანამდი დავეციო, ჭირიან გლახებზე თს. ეღებრიან ჩვენი შეილებიო.

მეორე დღეს უჩამ ეს ამბავი დედას უთხრა, მაიას ძაღლიან ეწყინა, ამ ამბავმა დუტუს სახლი და ის ოფიცერი უცუპ დაა-ვიწყა.

— დააფარე ახლა ხელი ჯგერენაიებს, — უთხრა მორიგე-ბით, მაგრამ მაინც საყვედურით უჩამ მაიას, — სომ ხედავ, რო-გორ დაგიფასეს შენი ღვაწლი და კეთილი გული. თავი მოგუ-ჭრეს. ხვალ კიდევ უარესს უნდა ველოდოთ მაგათგან. ტილს რომ ფეხზე დაისვამ, თავზე აგილოდდება.

მაია და უჩამ ამ ლაპარაკში რომ იყენენ, ეზოში რამდენიღე თმაგაწეწილი ქალი და მოხუცი გლეხი შემოვიდა. ისინი აჩ-ქარებით წამოვიდნენ სახლისკენ. მაიამ და უჩამ ისინი ფანჯ-რიდან დაინახეს და აივანზე გამოვიდნენ.

უჩამ და მაია მაშინვე მიხვდნენ, რისთვის მოდიოდნენ ისინი. უჩამ წარბი შეიკრა.

— არაფერა არ უთხრა, უჩამ, — სთხოვა დედამ, — დაეხმარე, რითაც შეგიძლია.

მოსულებს წინ დუტუს მეუღლე — ირინე მოუძლოდა.

— დაგწვეს, ბატონო, აგვაწიოკეს. — უთხრა ირინემ, სახე დაკაწრული ჰქონდა, თვალები ნამტირალევი.

— ჯერ თურქი გეწვავდა, მერე გენერლის პლასტუნები, ახლა ჩვენები გეწვავენ და გვაწიოკებენ, — ჩამოართვა სიტყვა ირინეს ღუკა კიტიას ბაბუამ, ღრმად მოხუცმა გლეხმა, — გვიშ-ველე, უჩამ ბატონო, რამე. — შესთხოვა უჩამს, — გადაგვარჩინე, შეილო, მიწასთან გასწორებას, გვიხსენი, დაგვიფარე.

— ყოველგვარ ღონეს ვიხმარ... ვეცდები, ბაბუა პავლე. — ეუბნებოდა ამ სიტყვებს და სინდისი ქეჯნიდა.

— შენ თუ მოინდომე, შეილო, ყველაფერს შეძლებ. რა გუ-ლი გითმენს, შორიდან რომ უყურებ ჩვენს საცოდაობას. ხუთი სახლი დაწვეს წუხელ, დღეს რა მოგველის, აღარ ვი-ციო!

— ნამეტანს შეეხიან, ბაბუა პავლე, — დაიწყო უკმაყოფილო ხმით უჩამ, — ჯერ მეფე არ უნდოდათ და იმას ებრძოდნენ

თქვენი შვილები. ახლა მენშევიკები არ გვინდაო. რას ვერნით? ხომ ხედავთ, მენშევიკებმა თავადები და გლეხები ერთ რიგზე დაგვაყენა, გაგვათანასწორა. რაღა უნდა ამაზე მეტი ამ ბოლშევიკებს? კარგით, წავალ, ვთხოვ, აკმარონ, რაც სასჯელი მიაყენეს სოფელს. ვთხოვ დღესვე დატოვონ სოფელი.

უჩამ იცოდა, რომ ამ საღამოს გვარდიელები სოფლიდან გასვლას აპირებდნენ. მას უხაროდა, რომ თავისი პირობით ორ კურდღელს იჭერდა. ცალკერძო დედას გაახარებდა, რომ დაეხმარა სოფელს, გამოადგა ხალხს მისი შვილი, ცალკერძო ხალხის და ბოლშევიკების სიყვარულს მოიპოვებდა.

— უთხარი ეტლი მომიშადონ, ვერა! — მიმართა იქვე აივანზე მაიას უკან მდგარ მოახლეს.

მაია გაბრწყინებული სახით გადასცქეროდა თავის მეზობლებს.

— ნუ გეშინიათ, ღმერთი მოწყალეა, — ეუბნებოდა იგი მათ და ცრემლს ძლივს იკავებდა. — შენ, ირინა, ჩემთან გადმოდი, არ იღარდო, კაკო დიდი კაცი გახდაო, ჩამოვა და თბილისში წაგიყვანს. ყველას დაგეხმარებათ, ყველას ეშველება...

მაიას სიხარულს საზღვარი არ ჰქონდა, ერთხელ მაინც გამოადგა ჩემი შვილი თავის კუთხესო, ფიქრობდა და ის კი არ იცოდა, რა ხმა დადიოდა სოფელში უჩაზე.

ზუგდიდის მაზრაში გვარდიელთა დამსჯელი ექსპედიციის შემოსვლას უჩა დადიანს აბრალებდნენ, მან გამოითხოვა თბილისიდან გვარდია, ახლა კი სოფელს თავს ისე აჩვენებს, თითქოს დიდი გულშემატკივარია ხალხისო.

გლეხობა ეჭვის თვალით უყურებდა უჩას, მაგრამ არც უჩა გრძნობდა თავს კარგად. თანდათან რწმუნდებოდა თავის კლასის უზადრუკობასა და დაქვეითებაში. უჩა ჯერ კიდევ რუსეთში ყოფნისას დარწმუნდა, რომ ძველმა, დრომოჭმულმა კლასმა ადგილი უნდა დაუთმოს ახალ, მზარდ, მოწინავე იდეებით შეიარაღებულ, ხალხის ინტერესების დამცველ კლასს, მაგრამ თავის კლასობრივ ინსტინქტს ვერ დალატობდა, სადღაც გულის სიღრმეში იმედი უღვივოდა: შეიძლება ბოლშევიკები დამარცხდნენო.

მაიას ახლა იშვიათად თუ მიაკითხავდა ვინმე. არავის ეცა-

ლა მისთვის, მხოლოდ გივიშა და მისი ცოლი არ ივიწყებდნენ. მოსამსახურენიც ცოტადა დარჩა, აღარც მიძიშვილების შვილები, აღარც ნათლულები არ ნახულაობდნენ.

შ ი ნ ა ლ ი თ

რევოლუციური კომიტეტები, ანუ, როგორც შემოკლებით ამბობდნენ, „რევკომები“, სამეგრელოს თითქმის ყველა სოფელში იყო ჩამოყალიბებული. აჯანყებულ გლეხებს უშუალოდ რევკომები ხელმძღვანელობდნენ. ბოლშევიკები განსაკუთრებულ სიფრთხილეს იჩენდნენ, სიფხიზლითა და პასუხისმგებლობით ეკიდებოდნენ პარტიაში უცხო, არასაიმედო ელემენტების შემოპარვას.

ხალხი საჭიროებდა და მოითხოვდა იარაღს, რომელიც ხშირ შემთხვევაში არასაიმედო ადამიანებს უვარდებოდა ხელში. ეს ხალხი იარაღს პირადი სარგებლობისათვის იყენებდა. თავის თავს კი ბოლშევიკებს უწოდებდა. ამის გამო რევკომის კრებებზე დიდი შეხლა-შემოხლა ხდებოდა.

— ვინ მისცა, ამხანაგებო, იარაღი ელეფთერ ქარცხიას? — იკითხა ერთ-ერთ კრებაზე რევკომის თავმჯდომარემ დუტუ ჯგერენაიამ.

ყველანი დუმდნენ.

— თქვით! შეცდომას გამოსწორება უნდა! — ხმას აუწია დუტუმ.

— მე მივეცი. — წამოიძახა მიშა დადიანმა უკანა რიგიდან. — მჯერა, რომ ის ამ იარაღს სასარგებლო საქმეს მოახმარს.

— პირადად მე, — დაიწყო კვლავ დუტუმ, — ელეფთერის საწინააღმდეგო არაფერი მაქვს, მაგრამ ასეა ეს თუ ისე, სახელგატეხილი კაცია და გაგეგონებათ ალბათ: სახელის გატეხას თავის გატეხა ჯობიაო. ელეფთერი ჩვენ არ გვიღალატებს, ვთქვათ, მაგრამ ხალხი როგორ შეაფასებს ჩვენს რიგებში ასეთი კაცის ყოფნას, რომელსაც ბევრი გაუძარცვავს, ბევრი მოუკლავს პირადი ანგარიშებისათვის. ჩვენი პარტია უნდა იყოს წყაროსავით სუფთა, ანკარა საჭიროა იარაღი ჩამოერთვას

ყველას, ვისაც წარსულში რაიმე ჩირქი სცხებია. ამავე დროს უნდა ვეცადოთ ისინი ჩვენი გავლენის ქვეშ ვიყოლიოთ.

— მე თქვენ გარწმუნებთ, იარაღის დატრიალების დროს ელეფთერი ბარე ორს აჯობებს, — ჩაურთო სიტყვა ერთმა ძველმა პარტიზანმა.

— არ გედავები, ამხანაგო, ელეფთერს მეც ვენდობი, მაგრამ როგორც გითხარით, აქ მთავარია ჩვენს პარტიას ჩირქი არ მოვცხოთ. ჩვენ ისედაც დაძაბული მდგომარეობა გვაქვს. მენშევიკების მთავრობამ მობილიზაცია გამოაცხადა. ვისთან აპირებს ბრძოლას მთავრობა? თითქოს მას მტერი ესხმოდეს თავს. აჯანყებულ ხალხთან მთავრობის ჯარებით ბრძოლა ხომ ნამდვილი სამოქალაქო ომი იქნება. მენშევიკებს სურთ აქაც ისე გაუსწორდნენ მუშებსა და გლეხებს, როგორც რუსეთში თეთრგვარდიელები უსწორდებოდნენ მათ. მაგრამ არ ვიცი, რა ძალით, ვისი იმედით ბედავენ მობილიზაციის გამოცხადებას. განა ჯარში ხალხის შვილები არ არიან, არ იციან რა დღე აღვია ხალხს უთავო მთავრობისაგან?

— რაც მეტს გაიწვევენ, ისა ჯობია. ხალხი შეიარაღდება, მთავრობა თავისივე მოცემული იარაღით დამარცხდება. მაშინ უფრო გაბედულად და ფართოდ გაუღებენ მამისონისა და დარიალის კარს ჩვენს რუს ძმებს, — ამბობდა ერთი ბოლშევიკთაანი.

ახალგაზრდა ვაჟი, რომელსაც თოფი მხარზე ეკიდა, წამოდგა და კრებას ასე განუცხადა:

— ამხანაგებო, დღეს ჩამოვედი თბილისიდან, ამ დღეებში ჩამოვა აქ კაკო ჯგერენაია. მისი ხელმძღვანელობით იმუშავეს ზუგდიდის რაიონი. ცხადია, მთავრობის ჯარი გაიხრწნა. ისინი ახლა ბატინკებისა და ბუშლატების ქურდობის მეტს არაფერს აკეთებენ. მთავრობის იმედს მხოლოდ გვარდია შეადგენს. მერე რას გაუძლებს გვარდია აზღვავებულ ხალხს? ჩვენი საქმე უკვე მოგებულია.

მენშევიკების მთავრობის მომხრენი კი მრავალ ჭორს ავრცელებდნენ ბოლშევიკებზე. ცდილობდნენ ხალხის დაფრთხობას მათი სიმკაცრით. თვით ერობის თავმჯდომარეებიც არ იყვნენ იმედიან განწყობილებაზე. ყოველ ქალაქში, ყოველ და-

ბაში, მთავრობის წარმომადგენელთა ბინებში შეკრული ნო-
ხები და სავსე ყუთები ელაგა. რა წუთშიც ბრძანებას მიიღებდ-
ნენ თბილისიდან, იმ წუთსავე ბათუმისკენ უნდა გამგზავრე-
ბულიყვნენ.

უჩა ხიბულაში აღარ ცხოვრობდა. ხან თბილისში იყო, ხან
ქუთაისში, სენაკში, ზუგდიდში, სად არ ნახავდა მას კაცი იმ
ხანებში. ცოლი და გერები ხიბულაში ჰყავდა, თვითონ ერი-
დებოდა იქ ჩასვლა.

მაია უგუნებოდ იყო შეილის სიშორით, არასასიამოვნო
რძლისა და მისი შვილების სიახლოვით.

რღვევის დასასრული

მაიამ 102 წლამდე მიაღწია, მეხსიერება ისევ საღი ჰქონდა.

რეაქციის მწვავე სუსხი და ალიზანოვ-ავარსკის მიერ
ხალხის აწიოკება მთელი თავისი გრძნობებით განიცადა.

უჩას დაჭერამ, მისმა პასუხისგებაში მიცემამ, გრიშას
სიკვდილმა — ყველაფერმა ამან ქარბუქივით გადაიარა მის თავ-
ზე. გრიშას სიკვდილით გაცეცხლებულმა მოხუცმა მაგიდაზე
დადგმული თეჯირი, რომელიც მიცვალებულთა და ცოცხალ-
თა მიჯნად მიაჩნდა, კედელს მიანარცხა და გაუწყრა:

— გეყოფა, ამდენი კაცი მოიღიე, შენ კი ისევ ისე გამოი-
ყურები, როგორც ამ ნახევარი საუკუნის წინათ, როცა პირვე-
ლად დაგდგი ამ მაგიდაზე, — თქვა და თავის ნათესავთა სურა-
თებს გადახედა.

— ყველანი წასულან და მე ასე მარტო დავრჩენილვარ ამ-
ქვეყნად. მხოლოდ უჩა დამრჩენია ცოცხალი! — დასძინა ნაღვ-
ლიანად და უჩას სურათი ჰაწია მაგიდაზე დადგა, სადაც მხო-
ლოდ ვერცხლის ზარი ედგა.

— უჩა, უჩა, საყვარელო, ვერც შენ გაამართლე ჩემი იმე-
დები. სად მყავხარ? როგორ აგერია ცხოვრების გზა-კვა-
ლი?

ამ მწარე ფიქრებით ათენებდა და აღამებდა მაია.

თებერელის სუსხიანი ღამე იყო. სწორედ ასეთ ღამეზე იტყვიან: კაცი თვალში თითს ვერ მიიტანდაო.

მაიას სასახლეს ქარი აწყდებოდა, ვეებერთელა სახურავს გადაგდებას უპირებდა. ლაწანი გაჰქონდა სახურავიდან ავარდნილ ყავარს. ბარაქიანად, წყვილ ფანტელებად ცვიოდა თოვლი. ტყიდან ისმოდა ტურების კივილი, რომელსაც ქარის უსიამო სისინი ერთვოდა.

მაია ძველებურ ბუხარს მიჯდომოდა და კაუჭა ჯოხით ნაკვერცხლებს ადგილს უნაცვლებდა, ხანდახან იქვე მჯდარ ვერას გამოეხმაურებოდა:

— ერისთავის ქალი დაწვა, ვერა?

— კი ბატონო, ორი დღეა, რაც თქვენი რძალი უგუნებოდ ბრძანდება. ძალიან ცუდი ამბები მოდისო, ბატონო! მენშევიკების მთავრობა მალე თბილისს დატოვებსო, ბოლშევიკები იმარჯვებენ თურმე. თქვენს რძალს ეშინია, რომ ბატონ უჩას რაიმე ხიფათი არ დაატყდეს.

— შენ ეს მითხარი, ხალხი მოელის თუ არა ბოლშევიკების გამარჯვებას?

— ბატონო, სოფელში მოხუცებისა და ბავშვების მეტი არავენ არის. ისინიც ასე ამბობენ: აუცილებლად ბოლშევიკები გაიმარჯვებენო. თქვენს რძალს იმის შიშიც კი აქვს: შეიძლება უჩა გაწვეულიც კია მენშევიკების ჯარშიო.

— ვაი ჩემს დღეს! ვერ მოისვენა ჩემმა უჩამ მაგის ხელში. ეს ქალი და მისი უთაებლო შვილები რომ არ ბორკავდეს, უჩა თავს უშველიდა ამხანაგებთან ერთად. რაკი ისე გაუწყრა ღმერთი მამარჩემის შთამომავალს, რომ ნიკოლოზ მეფის მხლებელი გახდა, ბარემ სხვებთან ერთად მასაც შეეფარებინა სადმე თავი.

— აღარც იმათ ადგიათ კარგი დღე, ბატონო, ხელმწიფე მთელი ამალით დახვრეტილია თურმე.

მოხუც ქალს არ იამა მოახლის მიერ ამის თქმა. მას ერჩია უჩას ყოველგვარი უბედურება რძლისთვის დაებრალეხინა. მაია ადგა და ლოგინისკენ წავიდა. ვიდრე ვერა ლოგინს გაასწორებდა და მოხუცს ტანისამოსის გახდაში მოეხმარებოდა,

ძლიერმა ელვამ გაანათა იქაურობა. მას ისეთი ჭკეპა-ქუხილი მოჰყვა, რომ სახლი შეინძრა.

. — სადღაც ახლოს დაეცა მეხი. — თქვა დიდი ხნის სიჩუმის შემდეგ ვერამ.

— ვაი მისი ცოდვა, ვინც ახლა გარეთაა, — ჩაილაპარაკა მაიამ და პირჯვარი გადაიწერა.

ათ წუთსაც არ გაუვლია, რომ ყურშიამ გამეტებით შეუტია ვიდაცას, რომელიც ძაღლს მოეფერა და მერე სახელიც დაუძახა.

მაიამ უჩნას ხმა შეიცნო.

— ვერა, მგონია უჩა მოვიდა! — მოხუცის გული ისეთმა სიხარულმა მოიცვა, ისეთი ბედნიერება იგრძნო, თითქოს მის გულს არასოდეს დარდი არ გაჰკარებოდა.

დადუმებული სასახლე სულ რამდენიმე წუთში ანმაურდა. უჩნას ცოლი და შვილებიც წამოდგნენ. ყველა ბარგის ჩალაგებას შეუდგა. თავს უყრიდნენ ყველაფერს, რაც კი გააჩნდათ. ბაბილინასაც ეტყობოდა აღელვება, თუმცა არაფერს ამბობდა. საერთოდ სიტყვაძვირი ქალი იყო. ახლაც გაჩუმებული ალაგებდა ყუთებში ნივთებს, ქსოვილებს და თან ფიქრობდა: „არ ყოფილა ჩემი საშველი, არ გათავდა ჩემი ტანჯვა. სრული თერთმეტი წელიწადია, რაც ასე გზააბნეული დავეხეტებით მე და უჩა ერთი ადგილიდან მეორეზე...“

ვინ იცის, იქნებ სინანულის გრძნობასაც დაეჩრდილა ახლა ის აკრძალული სიყვარული, ოცი წლის წინათ რომ თავდავიწყებით განიცადა. ახლა განვლილ წლებსა და საკუთარ ხანდაზმულობას გაენელებინა სიყვარულის ცეცხლი ამ ლამაზი ქალის გულში. მას ამ თოვლქარიან ღამეს სახლიდან გასვლა და ისევ უგზო-უკვლოდ ხეტიალის მოლოდინი აწუხებდა, გულს შიში უკსებდა, განვლილ საშინელებას ავიწყებდა.

უჩა დედის წინ იჯდა, უხსნიდა: მენშევიკურმა მთავრობამ თბილისი დატოვა და ბათუმში გადავიდა იმ ვარაუდით, რომ ვინძლო ბოლშევიკებთან ბრძოლაში დამარცხდა, საზღვარგარეთ წავიდეს.

— მეც იძულებული ვარ, ცოლ-შვილით ბათუმში წავიდეთ. თუ გაჭირდა, საზღვარგარეთ გავეყვებით საქართველოს მთავ-

რობას. გრიშას შეილებაც მიმყავს. შენც აუცილებლად უნდა წამოხვიადე ჩვენთან ერთად. აქ ვისი ი^იედით უნდა დაგტოვო, დედა.

— მეც უნდა წამოვიდე? რამ გაფიქრებინა ეს, უჩა? მე, ასი წლის ქალი ტვირთად აგეკიდოთ, რატომ და რისთვის? ჩემი ხიბულა მივატოვო, სადღაც ჩაკვდე, სხვის მიწას მივებარო. არა, შენი ჭირიმე, გითქვამს და მეტი არ გაიმეოროს მე ისიც მიკვირს, რომ შენი ძმისწულები მიგყავს.

— დედა, არ შეიძლება მათი დატოვება. სამეგრელოს მთავრის შვილიშვილები არიან. ბოლშევიკებს არ უყვართ მთავრების მოდგმა. მე რუსეთში ძლივს დავიხსენი თავი მაგათი ხელიდან, ახლა არ შემიძლია აქ არათუ ადამიანის დატოვება, ერთი მანეთის საღირალიც არ მინდა დავტოვო სახლში. ყველაფერს წაიღებენ, გაგძარცვავენ. შენ თვითონ გაწამებენ, დედა არ იცი, რა შეუბრალებელი არიან. ისინი. დიღით ხობში უნდა ვიქნეთ, რომ საღამოს ბათუმში მიმავალ მატარებელს სენაკში მივეუსწროთ.

— რას იზამ, თუ ასეა, უნდა წახვიდე. ვაი ჩემს დღეს, არ მეღირსა შენის ხელით თვალების დახუჭვა!.. არაფერია, შენ იყავი კარგად.

— ახლა, დედა ბატონო, უბრძანეთ: თუ სადმე რამე ნივთებია, თავი მოვეყაროთ, თოვლ-წვიმაც გადაიღო, ნაქირავები ცხენები მიგვეყავს ბარგის წასაღებად.

გამოიტანეს საგვარეულო განძეულობით სავსე ყუთები, აგა-ბურჯინები, სპარსული ნოხ-ხალიჩები...

ურამ და ვერამ გახსნეს დიდი ყუთები. იქიდან პატარა კოლოფები ამოიღეს თვალ-მარგალიტით, ოქროთი და ლალით სავსე, დიდი ყუთებიდან კი — ყელმადალი ვერცხლის სურები, თასები ოქროთი მოსევადებული, დანა-ჩანგალი, ჭინჭილები და მრავალი პატარა ძვირფასი ნივთი: საყურეები, ბეჭდები, საათები, სამაჯურები, ძეწკვები და ვინ მოთვლის რამდენი რა...

ახლა თეთრეულის სკივრები გახსნეს. რაც უხმარი ტილო, ბატისტი, დიბა-ფარჩა და აბრეშუმში იყო, ამოიღეს. წასაღებ ნივთებს შეუერთეს.

მაია თვალს ადევნებდა, როგორ გადიოდა მის ოჯახიდან

სიმდიდრე, რომელიც მას შეუძენია თავისი განვლილი ოთხ-
მოცი წლის ცხოვრების გზაზე. პატივმოყვარე მაიას ბევრჯერ
უსიამოვნებაც მოსვლია ქმართან, რომ მამა-პაპათა განძეული
პატივით შეენახათ და შეენარჩუნებინათ.

თვალწინ წარმოუდგა ბრილიანტის გულქანდა, ბაჯალლო
ოქროს გრძელჯაჭვიანი საათი რომ ჩამოჰკიდა სამეგრელოს
მთავარმა დაეთმა მოღერებულ ყელზე. საათს ეკიდა შესანიშ-
ნავი ნახელავი ოქროს გული, რომელშიც კონსტანტინეს სუ-
რათი ჩაესვა მის უფროს ძმას. მოაგონდა დავითისავე ნაჩუ-
ქარი ბეჭედი, ქმარზე გულმოსულობისას სხვა ნივთებში რომ
გაურია. და ეს ყველაფერი ახლა უჩას უცხოეთში მიჰქონდა,
ვინ იცის, რომელ გადამთიელს ჩაეყარდებოდა ხელში...

მაიას გულში ბოღმა ტრიალებდა.

— ვერ გავატან! — გადაწყვიტა, შემდეგ წარბებშეკრული
მიუბრუნდა უჩას:

— სად წაიღებ ამ ნივთებს, უჩა?

— ჯერ ბათუმში, თუ ბოლშევიკები ამ დროებით ვერ და-
ვამარცხებთ, მეც საზღვარგარეთ წავალ, ნივთებსაც დროებით
იქ წავიღებ.

— საზღვარგარეთ ვერ გაგატან, შვილო! იქ რა უნდა ჩვენს
საგვარეულო ქონებას. შეაჩერე, ვერა, ძვირფასეულთა ყუ-
თების გახსნა, გახსენით მხოლოდ ის ყუთები, სადაც ქსოვი-
ლებია, ზოგიერთი ნოხიც გააყოლეთ, ხოლო ძვირფას ნივთებს
ხელი არ ახლოთ!

გაკვირვებული უჩა მაიასკენ მიბრუნდა, გააოცა დედის თვა-
ლების ძალამ, სახის გამომეტყველებამ და ისევე ალერსით მო-
ინდომა დედის დაყოლება, მის ლოგინს მიუახლოვდა და მორ-
ჩილად დადგა.

— მომიტყევე, დედა, რა გეწყინა, რატომ შეიცვალე გადა-
წყვეტილება? აკი ნება მომეცი განძეულობა წამელო?

— სად მიგაქვს? — კიდევე შეეკითხა შვილს.

— ჯერ ბათუმში, თუ უცხოეთში წასვლა მომიხდა, თან წა-
ვიღებ, მალე დავბრუნდები, ყველაფერს უკლებლივ ჩამოგი-
ტან. ბოლშევიკები, მერწმუნე, ბევრი-ბევრი, ორი-სამი თვე
თუ დარჩნენ საქართველოში და რუსეთშიც.

— ჰმ, — ამოიხვნეშა მაიამ, — შენ, შვილო, მე მანუგეშებ, თუ მართლა ასე ფიქრობ? მე შენ გარწმუნებ, ესენი არასოდეს არსად არ წავლენ, გესურს თუ არა, ეს ასე იქნება, განმტკიცდებიან. რუსეთი დიდია და ძლიერი. მოიგონე, რა უყვეს ნაპოლეონს. შენ ნასწავლი კაცი ხარ და მე გასწავლო? ჩემი უკანასკნელი სურვილი მაინც ამისრულე: წაიღე მხოლოდ ის, რაც გაჭირვების დროს გასაყიდად გამოგადგება.

— თუ ჩემს გაჭირვებას მოელი და მასზე ზრუნავ, ოქრო და ვერცხლი უფრო არ გამომადგება, თვალ-მარგალიტი უფრო არ გაიყიდება? — შეკითხა უჩა.

— შენ ნუ დაგავიწყდება, უჩა, — მკაცრად უთხრა მაიამ შვილს, — ნივთები და განძეულობა საგვარეულო ქონებაა, ის უცხოეთში არ უნდა წავიდეს, საქართველოშივე უნდა დარჩეს! მომიტანე ვერა, ჩემი რძლის — ეკატერინე დედოფლის მონალოცი ნივთები!

ვერამ ხავერდგადაკრული ძვირფასი ყუთი გახსნა.

მაიამ შვილს ბრილიანტის გულქანდა აჩვენა.

— უჩა, შეხედე! ეს გარსევან ჭავჭავაძის დიდი ოჯახიდან მომივიდა.

ურამ შეხედა გულქანდას. „მართლა დიდ ფასად გაიყიდებაო“, — გაიფიქრა და დედას კი ასე უთხრა:

— თქვენი ნებაა, ბატონო! თუ გენანებათ, არც იმას წავიღებ, რასაც მთავაზობთ, მაგრამ გახსოვდეთ: ყველაფერს ბოლშევიკები წაიღებენ.

— სად წაიღებენ, შვილო, ბოლშევიკები? ისინი ხომ არ მიდიან უცხოეთში? ისინი ხომ აქ რჩებიან, ნივთებიც აქ დარჩება საქართველოში.

— კარგი, დედა, როგორც გინდა. დარჩეს ბოლშევიკებს დადიანების განძეულობა. შენ ფიქრობ შენს ხალხს შეუნახავენ ამ ნივთებს? ღმერთმა ქნას... ისევ გიმეორებ ჩემს თხოვნას: — თუ ჩემი ძვირფასი დედა ხარ, წამომყევი ბათუმში. ამაღამ არ შეგაწუხებ, ხვალ ეტლს გამოგიგზავნი, გიგიშა ისე მოაწყობს წამოსვლას, რომ სრულებით არ დაიღლები.

— ხომ გითხარი, მაგ საგანზე არც ერთი სიტყვა-მეთქი. მე არსად არ წავალ!

— აბა ჩემი თხოვნა ეს იქნება: არაფერზე იჯავრო, მეც მალე დაგიბრუნდები. რაც მიბოძე, უკლებლივ ჩამოგიტან. ეს სულ მალე იქნება, დედა, როგორც კი ბოლშევიკები წავლენ.

— ბოლშევიკები არ წავლენ, შვილო, და ველარც შენ გნახავ, — ამოიკენესა დედამ. მას დაღლილობითა და ღელვით ხმა უსუსტდებოდა, ცუდი ფერი ედებოდა.

ურამ დრო იშოვა, ვერას გადაუჩურჩულა:

— დედის სიტყვებს შენ ყურს ნუ უგდებ. ის აღელვებულია. შენ სწორედ ის ძვირფასი ნივთები ამოიღე დიდი ყუთიდან, ზეწარში გახვიე და მეშის აბაში ჩამიდევი.

ვერა შეეყოყმანდა.

— არ გებრალეები, ბატონიშვილო? რა პირით შევხედო მერე ქალბატონს?! ცოდვა არა ვარ?

— ნურაფრის გეშინია, მე ნივთებს არ დავკარგავ, სულ მოკლე ხანში უკან ჩამოვიტან. დედას სულ ნუ გააგებინებ, რომ ძვირფასი ნივთები მიმაქვს. სანამ ის შეიტყობს, მეც აქ ვიქნები და ნივთებიც.

დიდი ყოყმანის შემდეგ ვერამ უჩას სურვილი შეასრულა: მაიას ძვირფასი ნივთებით აბგის ორივე პირი გაავსეს.

ურა ხშირად მიდიოდა დედის ლოგინთან, ტკბილად ერურჩულებოდა, ხან მკერდზე კოცნიდა, ხან ხელზე, მაიაც ალერსით უპასუხებდა.

ურას და მის მხლებლებს ერქარებოდათ წასვლა. ვველაფერი მოგვარებული იყო წასასვლელად. უჩას მხოლოდ დედის მოშორება, მასთან გამომშვიდობება ეძნელებოდა, გამოთხოვებას აგვიანებდა.

მაია უჩას ცოლ-შვილს უგულოდ გამოეთხოვა, ხოლო უჩა დიდხანს ჰყავდა გულში ჩაკრული.

— მალე გნახავ, დედა, გენაცვალე, ჩემო ძვირფასო, საყვარელო! — ისევ ჩაეხვია შვილი დედას.

მაიას დაუძლურებულმა გულმა საოცარი სიბრალული იგრძნო დასაკარგავად გამზადებული შვილისადმი და იფი რომ გაემხნეებინა, ძალა მოიკრიბა:

— გამაგრდი და ივარგე. მე არა მიჭირს რა, ბევრი კარგი და ბევრი ცუდიც გადამხდენია თავს. ბევრი ამალლება და დამცირება გამომივლია. იგივე დაგემართა შენ, და ყოველ არსებას ბუნებისას შეხედება ეს. ხომ დაკვირვებული ხარ, როგორ ცვივა ხეს ფოთოლი შემოდგომაზე? გაზაფხულზე კი კვლავ შეიმოსება ქვეყანა. ახლა თებერვალია, გაზაფხულის წინამორბედი. მიყვარს თებერვალი, რადგან ის ზამთრისა და გაზაფხულის ბრძოლაა. მე თებერვალში ვარ დაბადებული, შენ თებერვალში გშორდები ალბათ, თებერვალში მოვკვდები. ასეც მოხდეს, ნეტავ! — თქვა და უკვე ხმამ უღალატა.

— დედა, გენაცვალე, დაწყნარდი!

— ჰო, რა მინდოდა მეთქვა და სხვაზე გადავედი. არაფერმა არ გაგაკვირვოს, არც სიხარულმა, არც მწუხარებამ...

— კარგი, დედა, დამშვიდდი, გზა დამილოცე.

მაიამ პირჯვარი გადასწერა. მისი ოდესღაც ლამაზი, ახლა კი სიბერით გამომშრალი თვალები ცრემლით აევსო, წალმე შემოტრიალდა შვილი. მერე გამგმირავი თვალებით მიაჩერდა.

— გრიშას შვილები და მათი ცოლ-შვილი არ წაიყვანო უცხო ქვეყანაში, დაიბნევიან, ვერ შეეგუებიან იქაურ ცხოვრებას. ახალგაზრდები არიან, საკუთარ მიწას მოგლეჯილი ვერსად მოიღგამენ ფეხს! საკუთარ ნიადაგს მოშორებული მცენარეც ვერ ხარობს. თხოვე მათ ჩემს მაგივრად, ხშირად მინახულონ, თუ წავიდნენ, ისინიც შენებრ დამილოცნია!..

როდესაც უჩა და მისი ცოლ-შვილი დატვირთული ცხენებით ეზოდან გადიოდნენ, მაია ბურანში იყო, თითქოს არ ესმოდა ეზოში ატეხილი ხმაური, ხალხის ლაპარაკი, ცხენების თქარუნი. გიგიშა და ვერა მთელი ღამე თავს დასტრიალებდნენ ძილგატეხილ და მშფოთვარე მოხუცს... გათენებისას ჩაეძინა მხოლოდ მაიას.

ღილის ათი საათი იქნებოდა, როცა მაიამ თავისებური ომახიანი ხმით დაუძახა ვერას, თან ვერცხლის ზარი ააწყვარუნა.

— გეგონა წუხელის მოვკვდებოდი, მაგრამ, ხომ ხედავ,

გაღვიძება მოგასწარი. ადგომა და ჩაცმა მინდა, ლოგინი მე-
ჯავრება.

მაიამ ჩაიცვა, ისაუზმა, შემდეგ გიგიშა მოიკითხა, სად
არისო.

— გიგიშა, ბატონო, ოჯახის თადარიგს შეუდგა. ამ წუთში
წისქვილში წავიდა. მალე გეახლებათ.

— კარგი, კარგი, წადი, ისაუზმე. მე კარგად ვარ, მაია ბა-
ტონიშვილს სიკვდილი არ უწერია.

მარტო დარჩენილი მაია ჯერ უჩას სურათს დაწვდა,
ეაღერსა, შემდეგ ოთახში გაიარ-გამოიარა, კუთხეში უწყეს-
რიგოდ დაყრილი ხავერდგადაკრული ყუთები შენიშნა, ჩანდა,
ვერას მათი გატანა ვერ მოესწრო.

— ეს კიდეც რა ამბავია? — გაიფიქრა მაიამ და ხმაღაღდა
დაუძახა ვერას.

ვერა იმ წუთში შემოვარდა და დამნაშავესავით დადგა კე-
დელთან.

— ვერა, სად არის ჩემი განძეული! სად არის ოქროს ზე-
დაპირიანი ძვირფასი ყუთები. — ჰკითხა და თვითონ დაიხარა,
რამდენიმე ცარიელი ყუთი აიღო. ამ ყუთებში ძვირფასი სამ-
კაულები ეწყო. — ნუთუ არაფერი არ ეყო ჩემს უბედურ შვილს?
ვერა, არ მეტყვი, მართლა წაიღო უჩამ ის განძეული თუ სად-
მე შეინახე?

— წაიღო, ბატონო! პატიოსანი სიტყვა მოგცათ უკანვე და-
ვაბრუნებო.

ამის გაგონებაზე მაიას მიცვალებულის ფერი დაედო, სა-
ვარძლისკენ ძლივს მობრუნდა, ვერამ მხარი შეაშველა.

— დამეყრდენით, ბატონო! — უთხრა და სავარძელთან მი-
იყვანა. მაია ისე უღონოდ დაეშვა, რომ ვერას შეეშინდა, ხელ-
ში არ შემომაკვდესო.

— რამ შეგაშინა? მოგკვდები გგონია? არ მოსულა ჯერ უა-
მი ჩემი სიკვდილისა, თორემ ამ დილით არ უნდა გამღვიძე-
ბოდა. უჩა საუკუნოდ მომშორდა. ვერასოდეს ვეღარ ვიხილავ,
წავიდა, ოჯახიც გაძარცვა, ვაი სირცხვილო, ვაი გაცრუებუ-
ლო იმედებო! — წამოიძახა ხმის კანკალით და ადგომა მოინ-
დომა, მაგრამ ვერ შეძლო, ჩაიკეცა და მიწისფერი დაედო.

დიდი ხნის ღუმილის შემდეგ უჩას სურათი აიღო ხელში. ვერას უკვე ვერ ამჩნევდა. დიდი ხანი უცქირა შვილის სახეს.

— სირცხვილეული მიდიხარ, შვილო, სამშობლოდან გაქცევა არ ეკადრებოდა მამაჩემის შვილიშვილს. ვაი ჩემს სიცოცხლეს, რომ ვეღარ გნახავ. — მამ გულში ჩაიკრა სურათი. — სიცოცხლის უკანასკნელი წუთებიც მომიწამლა შენმა საქციელმა, ჩემო თავქარიანო შვილო! — თქვა და სურათი თავის ადგილას დადო, ოთახში მიმოიხედა, მის თვალს ისევ ცარიელი ყუთები მოხვდა.

— კიდევ არ მომაშორე, ვერა, ეს ცარიელი ყუთები. სად წასულა, დალოცვილის შვილი! ალბათ, ყუთებსაც წაიღებდნენ, რომ სიმძიმეს არ მორიდებოდნენ. ცარიელი იზადება ადაშიანი და ცარიელი კედება. მიწა ვარ, მიწად ვიქცევი, განვიძარცვე ახალგაზრდობიდან, პატივისაგან, სიყვარულის, სიხარულისა და სიმდიდრისაგან. რალა ღამრჩა მე ამქვეყნად, ამოუბა ამოუბასა ზედა. უფალო, მომიტევე შეცოდებანი ჩემი! — თქვა და მარჯვენა ხელი რომ აიღო პირჯვარის გადასაწერად, ჩამომხმარ არათითზე ძეწკვით მიმაგრებული ოქროს ბეჭედი შეიგრძნო.

მაიამ წაიძრო ბეჭედი. თითქოს პირველად შეამჩნია, რომ ბეჭედი ესოდენ დალეულიყო, გათხელებული ოქრო აკვირვებდა. უყურებდა ბეჭედს, ხან ისევ ცარიელ ყუთებს გადახედავდა. ერთ წუთს თავში გაუელევა მოგონებამ... დამშვიდებულ მდგომარეობაში ის ამ მოგონებებს გაურბოდა, ახლა კი სიამოვნებით ჩაიძირა წარსულში... სიამოვნებით აღიღვინა მეხსიერებაში ის ღრო, ის განცდები.

— ალბათ, გარდასულ დღეთა მოგონება, თუნდაც არცთუ ისე ბედნიერი. ყოფილიყო, მაინც ეამება კაცს, თორემ რა ღროს ამოვარდა ეს ფიქრი: როდესაც არ ვიცი, რა მოელის ქვეყანას, რა მოელის ჩემს უჩას, ჩემს გრიშას შვილებს! ჩემი პირადული რამდენი ხანია გათაედა, ო, რამდენი ხანია?.. ჩემი ნამდვილი სიმდიდრე მაინც შენ ყოფილხარ. — ადამიანივით გამოელაპარაკა ბეჭედს. — თანამგზავრად მხოლოდ შენ შემრჩი, სხვა ყველა და ყველაფერი წავიდა, დაიკარგა, მხოლოდ შენ

და შენი უტეხი. გულიდა შემრჩა, ერთნაირად ვიღვეით და ვპატარავდებით მე და შენ. ორივე გაჩანაგებული ვართ, არ ვუღალატებთ ერთმანეთს. ეჰ, ეჰ, ადამიანს მხოლოდ სპეტაკი გრძნობა რჩება გულში იმედად. შენ, ჩემო ძვირფასო, სპეტაკ გრძნობათა მოგონება ხარ! — თქვა და ბეჭედი ისევ თითზე წამოიგო და დაამაგრა. გაელიმა, მაგრამ მის ღიმილში რაოდენი სევდა-ვარამი გამოკრთოდა. ისევ უჩას სურათი აიღო, გულში ჩაიკრა, დიდხანს დაყურებდა, შემდეგ თავი ძალდა ასწია. თვალელებში უიმედობა კრთოდა. საოცარ სიმარტოვეს გრძნობდა, გული ცარიელი ეგულებოდა ისე, როგორც კუთხეში მიყრილი ყუთები, მზის სხივებით განათებული ოთახი კი — ჩაბნელებულად და უკაცურად.

„რა მოგველის ნეტავ?“ — ამის გაფიქრება მოასწრო, რომ კარები გაიღო.

კარის ზღურბლზე ძალადი და ლამაზი ვაჟკაცი იდგა. მისი სახის ყოველი ნაკეთი ძალასა და მხნეობას გამოხატავდა. მისი თვალები მზის სხივებივით ელვარებდნენ. მაიას ჯერ გაუკვირდა, რომ მის ოთახში დაუკითხავად უცხო კაცი შემოვიდა, კარგად დაკვირვების შემდეგ იცნო.

— კაკო, შენა ხარ? რა ამბავი მოგვიტანე, შვილო?

— კარგი ამბავი, დედა ბატონო! საქართველოში საბჭოთა ხელისუფლება დამყარდა. ბოლშევიკებმა გავიმარჯვეთ. საქართველო თავისუფალია.

— გამარჯვება ნუ მოუშალოს, შვილო, ღმერთმა ჩვენს ქვეყანას, — უთხრა კაკოს და გაულიმა. დიდხანს უყურებდა დაფიქრებული. მერე ფანჯრისკენ გაიხედა. ბუნება თოვლისგან თავისუფლდებოდა. მზე ბრწყინავდა ხის დაბერილ კვირტებზე. იღვიძებდა ყოველი სულდგმული.

თოვლზე მზის სხივების ბრჭყვიალმა დაუძლურებული თვალები აუჭრელა. მიწაზე გართხმული მზის სხივები მას ოქროს ბეჭდებად მოეჩვენა. ეს მოჩვენებითი ბეჭდები, ხან გუნდ-გუნ-

დად ცვიოდა, ხან ქრებოდა. ერთ წუთს თავისი ბეჭედიც მათ შორის გაერია. შეკრთა, უსახელო თითს ხელი შეაელო; დარწმუნდა, რომ მიღებული ოქროს ბეჭედი ისევ თითზე იყო ძეწკვით მიმაგრებული. თვალეში ხელი ამოისვა, კაკოსკენ შემობრუნდა.

„ასეთ მძიმე წუთებში, როდესაც ჩემს უჩას საუკუნოდ განეშორდი, როდესაც ჩემთვის ერთადერთი იმედიც გააქრა, მე მსხვერპლად მომიტანია ჩემი უკანასკნელი იმედი, ჩემი უკანასკნელი გრძნობები, შვილო ჩემო.. მაგრამ სადღა მყავს შვილი, სად ხარ ყოველთვის გზააბნეულო, შვილო უჩა!..“ — ამოიკვნესა, თვალებიდან ცრემლი მოწყდა, დამჭკნარ ლოყებზე ჩამოუცურდა და ზედ შეაცივდა.

მხატვარი სპ. ცინცაძე
მხატვრული რედაქტორი მ. ღედანაშვილი
ტექნიკური რედაქტორი ო. კაპანაძე
კორექტორები: ნ. ბურჯანაძე, მ. მგალობლიშვილი
გამომშვები ნ. ხავთასი

ს. ბ. 4337

ჩაბარდა წარმოებას 17.11.88 წ. ხელმოწერილია დასაბეჭდად 18.04.89 წ.
ფორმატი 84×108¹/₃₂. ქალაქი საბეჭდი № 2. გარნიტურა ლიტერატურ-
რული. ბეჭდვა მაღალი. პირობითი ნაბეჭდი ფურცელი 22,68. სააღრიცხვო-
საგამომცემლო ფურცელი 20,46. პირობითი საღებავგატარება 22,68.
ტირაჟი 80.000. შეკვეთა № 2438.

ფასი 5 მან.

გამომცემლობა „მერანი“, რუსთაველის პრ. 42, თბილისი 1989.

საქართველოს სსრ გამომცემლობათა, პოლიგრაფიისა და წიგნით ეჭრობის
საქმეთა სახელმწიფო კომიტეტის, თბილისის ო. ჭავჭავაძის სახელობის
წიგნის ფაბრიკა, მეგობრობის გამზირ № 7.

Тбилисская книжная фабрика им. И. Чавчавадзе Государственного
комитета Грузинской ССР по делам издательств, полиграфии и
книжной торговли, пр. Дружбы № 7